

近代中國史料叢刊第十五輯  
沈雲龍主編

合肥李勤恪公（瀚章）政書

李經畬等編

文海出版社印行

合肥李勤恪公政書卷首目錄

楚湘  
湖廣

男經畚經江澧編輯

濤滇  
淮

飾終諭旨

御祭碑文

予諡碑文

國史館傳

墓誌碑文



飾終諭旨

光緒二十五年九月初五日內閣奉

上諭前任兩廣總督李瀚章老成練達辦事勤能由拔  
貢知縣隨同曾國藩軍營綜理糧餉營務卓著勤勞  
洊擢監司旋膺疆寄歷任湖廣漕運兩廣總督於地  
方事宜盡心籌辦克稱厥職前因患病准其開缺回  
籍調理茲聞溘逝軫惜殊深李瀚章著加恩予諡照  
總督例賜卹任內一切處分悉予開復應得卹典該  
衙門查例具奏伊子翰林院編修李經畬著俟服闋  
後以應升之缺開列在前江蘇候補道李經楚著俟

服闋到省後以道員遇缺即補用示篤念蓋臣至意  
欽此

御祭碑文

朕惟巖疆作鎮資謀畫於老成俎豆酬庸備哀榮之  
典禮遙頒鳳綵式啟雕筵爾前兩廣總督李瀚章勤  
慎持躬恪恭盡職制科拔萃飭吏治於長沙壯歲從  
戎佐奇功於元老遂煥翠翎之彩待分黃綬之符洎  
乎察吏贛南提刑嶺表藩條嗣晉星朗薇垣疆寄頻  
膺風行荆楚屬瘡痍之滿目吳越需才荷飢渴之仔  
肩撫綏樹績逮建旄而展覲和鈴趨紫禁之聲旋乘  
傳以入滇專閩受錦城之任既頭銜之寵錫克壯鴻  
猷迺腹地之量移俾伸烏養載逢闕服督挽運於千

艘復領兼圻總師干於百粵回憶宮階晉秩曾膺懋  
賞之榮既而章疏陳情許遂養疴之願茲聞溘逝悼  
惜殊深疊沛恩施優加奠醊於戲湘江粵嶠眷言節  
鉞之成勞醴酒元羹用示朝廷之嘉薦爾靈不昧尚

克欽承

予謚碑文

朕惟俎豆升香用報蓋臣之駿烈旂常樹績莫垂後  
禩之鴻名特錫絲綸俾鐫琬玉爾前兩廣總督李瀚  
章老成練達辦事勤能拔萃英年三湘聽鼓贊襄營  
務五夜持籌遂疊奏夫膚功雀羽煥彩仍深資乎臂  
助豸繡叨榮江左分巡始著廉能之望嶺南陳臬幾  
臻平理之休既綰藩條疊膺疆寄撫吳撫越蘇兵燹  
之餘生督漢督湘擁旌旄而坐鎮迨至趨朝述職禁  
城叨緩轡之恩旋因按事入滇川省總師干之任頻  
邀心簡聿晉頭銜返旆南邦蘭芷發重來之秀推恩



賢母蓼莪增錫類之仁洎服闋之經年授運漕之要  
職屬以海氛不靜移節鉞於邊陲加之林賞同膺荷  
升銜於宮保乃抱微疴之染屢陳回籍之情方期調  
理就痊長承恩眷何意遺章遽上痛失賢良綜厥生  
平謚為勤恪於戲塙文五色彰兩湖兩粵之嘉猷麟  
閣千年表羣策羣力之偉畧欽茲異命峙爾豐碑

李勤恪公列傳

提調官惲毓嘉纂輯

纂修官劉啟端覆輯

國史館總裁王文韶

那桐

副總裁瞿鴻禨

榮慶

於光緒三十二年春季進

呈奉

欠定

--	--	--	--	--	--	--	--	--	--

李瀚章列傳

李瀚章安徽合肥人父文安刑部郎中自有傳  
瀚章道光二十九年拔貢

朝考一等以知縣籤分湖南咸豐元年署永定縣  
知縣二年署益陽縣知縣未行粵逆犯長沙巡  
撫駱秉章屬守南門天心閣地道再裂瀚章率  
兵力禦城得完圍解始赴任獎六品銜三年調  
署善化縣知縣時侍郎曾國藩在籍練湘軍檄  
瀚章總理糧臺四年湘軍克湖北崇陽籌進兵

戶部計戶口之斤維，斤維，良也。也朝又分支

綿亘千里其間如蔡店繫馬口侏儒山各地逆壘林立瀚章率水師駐新灘口扼其衝使賊不敢自內河駛小舟以襲我後敘功奉

旨免補本班以直隸州知州留湖南補用五年四月湘軍轉戰江皖瀚章移駐江西省城總理後路糧臺五月丁父憂曾國藩奏請仍留辦糧臺十一月克義甯州保知府並

賞戴花翎六年曾國藩以禮去官湘軍糧臺歸併江西省局瀚章亦回籍終制安徽巡撫福濟奏留辦理團防捐務七年服闋八年曾國藩檄調瀚章

回江綜覈糧臺報銷九年克景德鎮及浮梁縣  
城奉

旨免補本班以道員仍留湖南儘先補用湘軍入江以  
後兵數日增餉需尤迫江西入款錢漕之外惟  
釐稅曾國藩商之巡撫毓科仿湖南章程設局  
經收專充湘軍之餉十年五月奏以瀚章廉正  
樸誠吏事精覈會辦江西釐稅事並改歸江西  
以道員遇缺請

簡

從之七月授江西吉南贛甯道旋

命襄辦江西團練同治元年五月曾國藩派充襄辦廣東釐務十二月調補廣東督糧道二年擢廣東按察使三年擢布政使四年二月擢湖南巡撫是時粵逆餘黨聚福建之漳州逆首李世賢汪海洋分股由上杭圖犯贛南窺伺兩湖貴州教苗各匪陰結粵逆侵軼楚界而震軍奏調赴川道出鄂省降卒潰叛亦竄及湖湘於是湖南之與他省接壤者所在告警瀚章急飭前江蘇按察使陳士杰營郴州防閩賊在籍雲南按察使趙煥聯營岳州防叛卒閩賊聞引去叛卒上犯

江西不得逞折入湖南攸縣竄陷安仁興甯副將張義貴擊走之陳士杰等率軍會勦疊戰於小良田百丈嶺斬獲無算先是瀚章飭總兵周洪印勦辦苗教各匪敗之晃州沅州九月賊圍貴州銅仁及所屬涼傘雪洞周洪印越境追勦解其圍五年正月奏言黔省下游羣盜如毛苗教各匪時伺楚邊已嚴飭周洪印選取寨頭苗巢為節節進搆之計第懸軍深入非得黔省知兵大員駐紮會辦難以成功請飭新任貴州布政使兆琛暫緩赴任專辦貴東軍務與楚軍共



圖進取

許之二月寨頭苗匪敗竦而銅仁教匪由黃瓜巖出擾  
謀踞壩開溪瀚章檄周洪印督隊截擊已革按  
察使李元度繼之四月師進銅仁教匪大股竄  
沙壩場別賊謀由松桃伺隙入楚周洪印先於  
亢金盤陀寺設伏以待賊偵知不敢前未幾清  
江臺拱苗匪又相繼蠢動瀚章以苗教兩匪恒  
互為犄角以牽制官軍使不能兼顧乃飭李元  
度由銅仁勦思南石阡教匪兆琛周洪印由思  
州天柱勦清江臺拱苗匪復增募水陸新勇設



劉維楨唐仁廉赴濟甯助勦七月擒匪張總愚  
盤旋渭北蓄意東趨荆紫關為河南腹地門戶  
豫軍力單

命鄂省籌兵代守瀚章即日令提督姜玉順往賊遂改  
道他竄十二月調浙江巡撫

賞頭品頂戴七年籌議浙省新漕海運擬定規則十四  
條奏請施行江蘇諸府半食浙鹽兵後商販凋  
敝無本包運權由官銷八年瀚章議復其舊招  
徠引商先試銷六萬六千引並暫免州縣督銷  
考成十二月調署湖廣總督九年偕長江水師

提督黃翼升覆奏整頓長江水師汰老弱勤操  
巡以肅軍律會天津民教滋事法挾兵力為要  
索計勢張甚

詔嚴江海之防瀚章檄調水陸各軍分布要隘日夜為  
備八月授湖廣總督湖北宣恩之哥弟會楊竹  
客為亂延及湖南湘潭各糾悍黨揭竿鳳凰山  
十年四月遂陷益陽龍陽瀚章亟令所部四出  
收捕獲為首者置之法隨嚴檄各縣舉行保甲  
亂始定十一年五月楚軍平定苗疆以瀚章和  
衷共濟克竟全功

予優敘十二年奏免湖北行銷川鹽之陸課及湖南澧州行銷川鹽之鄰稅商民便之八月湖南臨湘巨匪傅春琳叛嘯聚數千八所經村邑恣行暴害瀚章飭提督劉維楨平之十三年五月復勦平鄖西會匪九月兼署湖北巡撫十一月

詔江西湖北湖南自明年始悉運本色漕糧瀚章滙陳湖北漕糧驟難改徵本色擬就漕折撥款購米三萬石由輪運津並請開辦海運時總理衙門會籌海防六策

命各督撫詳議切實辦法瀚章迺參酌原議切實敷陳

一練兵二簡器三造船四籌餉五用人六持久  
奏入

命會議施行先是英國繙譯馬加里由緬甸歸雲南中  
途被戕案久懸光緒元年五月

命瀚章往按旋調四川總督二年三月偕前侍郎薛  
煥臚呈全案請

旨飭下總理衙門會同刑部擬定罪名然後退與英  
使互相妥議則不惟英使少一藉口之端即總  
理衙門亦多一轉身之地

上如所請命總理衙門議奏九月調湖廣總督川淮

鹽引歷年分銷楚鄂兩江總督沈葆楨欲全數  
規復准引瀚章謂沈葆楨所奏包認餉銀章程  
因運商病場商誤國計戾民生未臻妥善必欲  
規復全引亦應俟數年後量度事勢再行籌辦  
三年九月疏上

允之四年侍郎袁保恆又請加川鹽釐稅抵還豫賑  
借款瀚章以川稅甲於他引若更非分抑勒既  
病商亦病民况以豫省借款取償川鄂亦非情  
理之平至湘省加征尤多窒礙不可行

上命均無庸議鄂濱大江與湘豫陝皖相毘連會匪

出沒其間時或為患故始肆亂於湖北之天門  
繼又勾結刀痞周火星滋擾於河南鄧州漸章  
遣將協勦皆定之御史李廷簫疏言近來各省  
州縣往往誅求百姓不遂所欲輒誣指為抗拒  
率請派營彈壓以致民怨日甚一日匪徒裹脅  
亦日甚一日請飭各大吏嚴行申禁十月瀚章  
因奏言法貴求於無弊而患當慮其未然倘各  
省懍遵

嚴諭稍有誤會轉致因噎廢食互相諱匿事發而州  
縣不敢請兵稟到而督撫不敢派隊徘徊觀望



貽惠養癰徒隳將士之心而長奸徒之志從前  
粵逆之亂即因初起時辦理因循馴至不可收  
拾足為殷鑒可否責成各督撫查照原奏嚴申  
誥誡然遇土匪竊發地方官仍當星速稟報督  
撫亦立即調營往勦不得稍涉拘泥庶保良善  
藉杜亂萌

上躉之武昌縣屬之樊口外江內湖延袤八百餘里  
同治中紳民有建築插壩之請前任督撫暨瀚  
章先後查勘以不合地利節次斥駁嗣御史李  
廷簫奏樊口堤插壩係農田民命

特命尚書彭玉麟履視亦以建築為然乃

命瀚章速籌修築瀚章奏查樊口地界數千年來從  
無議建插壩之事蓋設堤防禦祇有順水直堤  
不聞阻水橫壩通籌全局其害實大是以歷任  
督撫嚴禁於先臣復力持於後茲蒙

諭旨飭臣速辦已轉飭司道秉公妥議嚴立規條重  
懲需索至黃柏山堤向係民捐民辦自當飭令  
興修

詔如議行厥後黃柏大堤於五年八月工竣自樊口  
至黃柏山長約四十五里基址堅厚盛漲時距

堤頂尚一丈餘利賴至今六年俄人窺琿春湖南提督鮑超及提督劉維楨統軍北上以衛

畿輔瀚章為籌糧餉軍械事定霆軍裁撤十三營還至鄂瀚章善遣之無一譁者八年丁母憂十年服闋十四年五月入

覲

賜西苑乘船九月授漕運總督十一月

賞加兵部尚書銜十五年七月調兩廣總督粵故患盜南海番禺順德尤大肆剽掠往往白日公行瀚章知水師提督方耀夙有幹濟才委以三路

緝捕事宜甫視事即誅破姦猾殄其支黨未及  
數月盜風大戢粵東各局多冗濫瀚章悉心釐  
定僅留海防善後十一局餘皆裁革歲節糜費  
以數萬計四月兼署廣東巡撫二十年正月

慈禧端佑康頤昭豫莊誠壽恭欽獻崇熙皇太后六旬  
萬壽

賞加太子少保銜八月日本謀預朝鮮亂事邊釁猝開  
諭令密備海防瀚章因巡閱各礮臺整飭營伍以固  
省會旋緝獲私與敵通代為招兵之奸匪悉論  
如律九月議息借商款助餉瀚章以借款之舉

所取信於民者惟在隸還有準收放無弊二端  
廣東將來還款以海關洋稅為首稅務司經紀  
洋稅又多識畧商民素所推重若令始終其事  
籤字蓋印則出入一手尤易取信而吏胥弊竇  
公式繁文皆可刪除奏入

命派員與粵海關稅務司商定章程訂立合同票式  
咨由總理衙門轉遵二十一年三月因病奏懇  
開缺回籍調理

允之二十五年卒安徽巡撫鄧華熙以

聞

諭曰前任兩廣總督李瀚章老成練達辦事勤能由拔貢知縣隨同曾國藩軍營綜理糧餉營務卓著勤勞洵擢監司旋膺疆寄歷任湖廣漕運兩廣總督於地方事宜悉心籌辦克稱厥職前因患病准其開缺回籍調理茲聞溘逝軫惜殊深李瀚章著加恩予諡照總督例賜卹任內一切處分悉予開復應得卹典該衙門察例具奏伊子翰林院編修李經畬著俟服闋後以應升之缺開列在前江蘇候補道李經楚著俟服闋到省以道員遇缺即補用示篤念蓋臣至意尋

賜祭葬

予謚勤恪

誥授光祿大夫太子少保兩廣總督李勤恪公墓志

弟鴻章撰 男經畬書

公合肥李氏諱瀚章字筱荃曾祖贈光祿大夫諱椿祖  
贈光祿大夫諱殿華父贈光祿大夫刑部郎中諱文安  
刑部府君有子六人公為其長以選拔貢生為知縣湖  
南至武昌見總督宮傅裕泰公奇之曰他日繼吾位業  
必李令也歷署永定益陽未至益陽以洪秀全圍長沙  
守南門天心閣有功圍解之任次年改署善化曾文正  
公出治軍檄公主饗餼在軍積歲遂自江西吉南贛甯  
道調廣東督糧道就遷廣東按察使布政使是後為巡



撫者三湖南江蘇浙江而江蘇不至為總督者四湖廣  
四川漕運兩廣而四川漕運至皆數月輒別徙前後督  
湖廣最久再署任再實任丁太夫人憂去官家居六年  
再起督漕遂督粵凡為楚督十有三年粵督七年告歸  
又五年薨於里第享年七十有九 上聞震悼予謚勤  
恪子十一人經畬翰林院編修經楚江蘇補用道經滇  
浙江即 知縣經湘邑庠生經沅候選郎中經澧候選  
員外郎經江候選知縣經湖經肥經廣經淦女九人孫  
六人國成試用道國式試用知府國武國熾國威國晟  
孫女五人曾孫三人往年鴻章視師中原拜楚督之

命以公往署兵事平鴻章歸鎮受代公始撫浙居二年  
鴻章被命征黔征陝公又來署楚督逮鴻章量移直  
隸遂以楚督授公兄弟更代累年太夫人不移武昌官  
所蓋聖朝之優寵臣家至矣時人便謂朝廷緣鴻  
章薄立功伐賚及元兄此過論也始鴻章與公皆師事  
曾文正而公從文正軍獨久文正數稱公能嘗疏上公  
績狀而胡文忠薦公之疏亦至文宗以胡所請特優  
手詔批答曾疏謂已可胡奏文忠欲得公自助文正惜  
不予江西牙釐廣東榷餉皆軍中重任文正一倚辦公  
當是時朝廷求人輒視文正所左右公以此平進開

府其後膺疆寄久習知民情偽事可否利病所至斂抑  
才智投合經法無近功顯名而士夫虛憍浮囂之習盡  
屏不用顧公一出以和不甚為時怨妬其亦往往見詆  
者則由鴻章非才而久負重有以牽累而中傷之也在  
楚督時忌者尋端齟齬會以憂去猶窮竟黨與卒不得  
公絲髮咎戾乃止及在粵遇日本構釁傾資以濟海防  
和議成國論大譁公亦乞骸骨歸矣方事之未定公貽  
書誠鴻章約事已共告歸鴻章自念柄用久當與國  
休戚不敢歸難後人故公歸徜徉山水數年而鴻章獨  
留不去今公已殂謝鴻章亦頽老適來粵繼公後循覽

前政輒用慨然諸子將以四月壬申朔葬公於合肥東  
鄉大劉村以夫人王氏祔弟鴻章謹掇公官位治行志  
事本末勒石墓道用告後千百載來者光緒二十六年  
二月

--	--	--	--	--	--	--	--	--	--

合肥李勤恪公政書卷一目錄

楚湘湖廣

男經畬經江澧編輯

吳淮濤滄

叩謝

天恩摺

同治四年三月初一日

通籌防勦大概情形摺 四年四月十六日

霆營降眾復叛劫掠咸甯片

堵勦霆營叛卒並西路軍情摺 四年四月二十六日

霆營叛卒竄至攸縣現飭分勦摺 四年五月十四日

截勦叛卒陣斬首逆楚疆肅清摺 四年五月二十六日

覆陳東路軍情緊急驟難圖黔摺 四年閏五月初十日

黔匪竄逼晃沅即經官軍擊退摺 四年八月十四日

粵逆竄動現籌楚邊防勦情形摺 四年九月十一日

西路雪洞涼傘危急片

西路防勦並涼雪解圍情形摺 四年十月初十日

東路籌防情形片

東西兩路軍情片 四年十一月十六日

叩謝

天恩摺

同治四年三月初一日

奏為叩謝

天恩仰祈

聖鑒事竊臣於本年二月二十八日在廣東藩司任  
內准兵部火票遞到同治四年二月初十日內

閣奉

上諭李瀚章著補授湖南巡撫欽此又承准議政王  
軍機大臣字寄同治四年二月十二日奉

上諭欲平滇逆必須先平黔匪李瀚章已簡授湖南  
巡撫著即馳赴新任督飭援黔之周洪印等軍迅



速進兵夾擊等因欽此當即恭設香案望

闕叩頭謝

恩伏念臣籍隸皖江世守耕讀臣父已故刑部郎中  
記名御史李文安由科第起家臣弟江蘇巡撫  
世襲一等伯李鴻章以編修從戎晉陟封圻  
賞延於世與臣弟甘肅甘涼道李鶴章先後屢膺  
異數臣由拔貢知縣洊領藩條旬宣東粵

恩榮稠疊萃於一門常懷盛滿之虞未有涓埃之報

茲臣復蒙

特簡

命撫楚南

殊恩重逮於臣家拊衷彌深乎震悚查湘省北控重  
湖南連兩粵東毘江右西界蜀黔是曰奧區形  
勢綦要臣曾任該省知縣民風土俗粗識端倪  
今昔情形或有同異巡撫有綏輯全省軍民之  
責職守匪輕際籌畫京外糧餉之時仔肩增重  
且值滇疆未靖防範諸務孔殷臣自揣軀庸深  
懼弗克勝任亟應趨詣

闕廷叩聆

聖訓庶幾得所遵循又因會勦逆氛奉

諭迅速赴任未遂就瞻之願彌殷依戀之私臣即日  
交卸藩篆遵

旨馳抵湘州謹當殫矢血誠於地方軍務一切事宜  
實心經理以冀仰副

高厚鴻慈於萬一所有微臣感激下忱謹繕摺具

奏叩謝

天恩伏乞

皇太后

皇上聖鑒謹

奏

通籌防勦大概情形摺 四年四月十六日

奏為欽奉

諭旨謹將通籌防勦大概情形恭摺先行覆

奏仰祈

聖鑒事竊臣由粵來湘途次欽奉同治四年二月二

十二日

寄諭福建龍巖州城克復後餘賊入漳南陽汪逆竄  
上杭所屬之白沙地方該匪圖襲贛南窺伺兩楚  
湖南與江西交界地方防務亦關緊要李瀚章著  
即趕緊赴湘整頓防兵認真辦理未到任以前石

贊清妥籌防勦等因欽此又奉二月二十六日

寄諭清江台拱苗匪復出巢竄陷天柱縣城以兩股  
撲楚邊以兩股竄黎平古州髮逆又逸入永從著  
李瀚章石贊清抽撥勁旅前赴天柱一帶協力會  
攻等因欽此又奉三月十九日

寄諭苗匪號匪紛擾會同銅仁江口等境沅晃靖三  
屬戒嚴著該撫飭令周洪印等暫緩赴黔迅速扼  
要駐紮妥籌勦辦其黎平髮逆即飭戈鑑會同地  
方文武及粵省官軍勦辦東路防堵事宜並飭趙  
煥聯等酌量添募勇丁嚴防閩省髮逆毋任竄越

等因欽此仰見

宸謨廣運

指示周詳跪誦之餘莫銘欽服臣遵

旨邁行赴任自入楚界沿途接見官紳詢訪防務抵

省與護撫臣石贊清暨各司道面晤知黔邊苗

教各逆前經諸將領於二月杪及三月上旬擊

退石贊清已於三月二十六馳奏在案伏查湘

省軍務東路毘連江西廣東均慮閩匪竄越沿

邊設戍之外似宜於郴州扼紮重兵西路緊接

貴州髮匪苗匪教匪勾結蔓延黔疆已尅完土

時慮侵軼楚界以致靖會沅晃一帶防不勝防就西南大局而論將欲大舉圖黔則湘中本屬進兵之路即專為本省籌計亦必黔靖而後湘安審度戎機防不如勦顧勦必先籌兵籌兵必須選將現在帶兵各員分位大率等夷宜得謀勇兼備者予以統領之任庶事權歸一威令易行臣履任方新於諸將中孰勝一路孰可偏裨未能驟悉至將兵而又善將將更非可旦夕以求且越境深入分道並進兵勇既須加增餉需尤應預計現水陸兵勇統計三萬餘人月餉十

四五萬積欠已數十萬軍興十餘年來本省防  
勦之需外省協濟之款以及援應鄰封供給東  
征不下三千餘萬正賦既有定額捐輸不止再  
三釐金雖屬鉅款而以所入權所出短絀甚鉅  
籌餉既無把握則增兵遠勦一時勢有未能又  
況閩賊未平亦不能撤東路之兵併力以圖黔  
事臣惟有隨時審度如果事勢稍順裕餉有方  
再當籌策機宜奏請

訓示茲與石贊清等商酌就現有兵力東路調劉德  
謙一軍駐紮郴州餘仍其舊西路飭令周洪印



彭炳武于高勝等節節前進規取天柱其黎平  
髮逆卽飭戈鑑等會商粵軍設法迅圖勦辦以  
固疆圉而遏鄰氛所有臣到任後通籌防勦大  
概情形謹繕摺由驛馳

奏伏乞

皇太后

皇上聖鑒訓示謹

奏

霆營降眾復叛劫掠咸甯片

再正在繕摺間接據臨湘縣稟報探得霆字營前收之降眾復叛在湖北咸甯縣地方劫掠勢甚猖獗驛路梗阻等情並據岳州府營具稟前來當以事出倉卒究竟若何肆擾情形飭令再行確探稟報查岳州緊接鄂界水陸交衝乃南北之咽喉湘中之門戶形勢至關緊要且慮土匪乘機煽動亟宜先事預防該郡本有副將劉國斌所部水師戰船分哨巡護平江團勇亦素稱得力臣即經分劄飛飭加意防範一面檄令

雲南按察使趙煥聯抽撥和字營勇一千餘名  
馳赴岳州鳳凰山先行駐紮以資控扼仍察看  
緩急隨時酌量辦理謹會同大學士一等伯湖  
廣總督臣官文附片奏

聞伏乞

聖鑒謹

奏

堵勦寔營叛卒並西路軍情摺

四年四月二十六日

奏為派軍堵勦寔營叛卒並西路各軍越境收復天柱縣城現飭扼要駐紮情形恭摺馳

奏仰祈

聖鑒事竊臣到任後通籌防勦事宜業將大概情形於四月十六日具摺馳陳並將探聞寔營降眾在湖北潰叛即派水陸勇練分投扼堵緣由附片奏

聞在案嗣接各路稟報叛卒竄入咸甯踞城肆掠臣料該逆甫經謀變眾心未定鄂省重兵勦辦不

至久踞咸甯而岳州水陸向有戒備當為賊所  
習聞或不敢由蒲圻大路直趨岳境惟自崇陽  
通城以達平江係屬僻逕最為可慮當經飛函  
籍隸該邑之已革浙江臬司李元度囑其速集  
舊部嚴防要隘乃李元度未接臣函之先經平  
江縣令歐陽烈邀令入城商計業已集團募勇  
得勇三千七百餘人分防平通交界各隘迨該  
逆由崇陽竄至通城偵知平江設備後有鄂省  
追兵乃向南樓嶺竄入江西義甯州境由查津  
而至銅鼓營平江北路之防稍鬆而東界小坳

漿市龍門及南界山棗嶺各處在在喫緊臣已  
飛札李元度歐陽烈會商派隊堵截諒可無虞  
岳屬無事皆李元度集勇敏速布置周備之力  
也查銅鼓營為江西義甯新昌湖南平江瀏陽  
交界之區平江雖可固守而瀏陽又瀕於危臣  
先經飭據雲南臬司趙煥聯派和字老中老左  
二營星馳該邑駐防續又添派左前左左二營  
並因逆勢南趨復將前派赴岳之副中副左中  
右三營調令折赴瀏陽共計勇四千餘人以副  
將張義貴統之佐以本地練勇分扼上洪上莊

古港虎坳各隘由瀏陽而南則為醴攸茶陵臣  
已飭趙煥聯先調和字中左營由茶陵就近移  
紮醴陵與瀏陽各軍聲勢聯絡知府劉德謙所  
部威信軍二千二百人本由永州調赴郴州茲  
幸閩賊未遽竄動應先其所急改赴茶陵以保  
長沙東南要地另飭前江蘇臬司陳士杰從桂  
陽州移營郴州固守南界目前邊防孔亟應以  
守禦為先聞鄂省官軍已有數營進次南樓嶺  
又准護江西撫臣孫長紱咨已調臬司席寶田  
率隊西馳迎擊一俟行抵吉安則下游有兵堵

截楚師出境合勦可杜敗賊紛竄臣現已分飭  
在防諸將領探明江鄂各軍進次紮營一定即  
分隊疾馳以收夾擊之效而免旁突之虞此東  
北一路派軍堵勦之情形也臣欽奉三月二十

七日

寄諭楊廷桂一軍進勦貴州黎平髮逆暫駐永從專  
待楚黔兩省之兵會合進攻著嚴飭派出各軍迅  
速前進等因欽此又奉三月二十九日

寄諭湖南東路防堵未可稍形鬆勁著飭趙煥聯等  
軍扼要駐守實力嚴防黔省天柱縣城復失竄擾



靖會邊境荆竹園號匪勾結鎮遠苗匪亦有蠢動之信著即飭周洪印等軍先勦天柱之匪力顧靖會腹地並令彭炳武等軍嚴扼沅晃等處以固邊圉等因欽此茲查東南一路幸無甚警而閩賊未平防務未可稍弛近因叛卒披猖不得已將趙煥聯所部抽調大半飭赴瀏陽與茶陵劉德謙一軍及郴州陳士杰桂陽縣周興隆各隊聲息互通緩急可以相顧西路沅晃靖會貼近黔邊時慮苗教等匪侵軼自天柱復陷逆勢益張三月上旬經各軍擊敗後總兵周洪印彭炳武副

將于高勝饒元馨彭芝亮與知府戈鑑知縣黃元齡等又復連旬奮勦或分道進取或約期會師初破賊於空處繼破賊於新舟地旺渡馬渡慕均平毀壘壘追奔逐北斃匪共以千計而什會石梧岑修容寨王家寨等處逆巢亦經先後進兵縱火斬殺無算其遠口山蠻蝦蟆塘邦洞賴洞之匪均已聞風竄逸楚界肅清四月初八日各軍齊抵渡慕整隊進規天柱賊已宵遁遂於初九日收復縣城署貴州清江協副將吳勝金部勇同時齊到直隸州知州楊昌江率勇於

初十日繼至扼駐邦洞與各將領會商善後一切事宜臣接據稟報即飭周洪印等酌撥五六千人分紮長吉瓦寨油洞各要隘以固楚圍而鎮黔邊至黎平一路准廣西撫臣張凱嵩緘告逆首陳輝良等被勦窮蹙詣副將楊廷桂軍營投誠已據情緘商勞崇光張亮基會辦等語並由署靖州知州雷壽南稟報前來查該郡既經議撫戈鑑現與周洪印合隊自可輟赴黎平又荆竹園號匪竄動不常沅晃邊境仍以副將滕加洪參將包順科同知吳自發守備楊昌松等

分隘駐守臣維天柱既復黔事漸有可圖以東  
南未克撤必東北驟添新警大舉深入尚覺不  
遑伏讀三月二十四日

寄諭於曾國藩通籌滇黔大局一摺

許以切中機宜而湘省未能立時舉辦情形仰荷  
聖明遠燭臣惟有恪遵

廟算謹俟東路防務稍有頭緒即與駱秉章等會商  
酌定議奏請

旨辦理至此次西路官軍連旬轉戰收復天柱似尚  
著有微勞所有在事出力人員合無仰懇

天恩由臣擇尤酌保以示鼓勵

鴻施謹會同大學士一等伯湖廣總督臣官文繕摺

由六百里具

奏伏乞

皇太后

皇上聖鑒訓示謹

奏

霆營叛卒竄至攸縣現飭分勦摺

四年五月十四日

奏為霆營叛卒由江西萍鄉竄至攸縣即經官軍

擊退現飭分馳勦辦緣由恭摺奏祈

聖鑒事竊照霆營叛卒前竄江西銅鼓營地方湘省

派軍堵勦情形經臣於四月二十六日馳

奏在案二十九日欽奉同治四年四月十八日

寄諭官文奏霆軍赴川路經鄂省金口乘間潰散一

摺現在官軍既星夜跟追該勇丁等自必聞風急

竄趨向麻定江西安徽湖南等省路路可通著各

派兵勇於湖北交界地方飛速探蹤攔截等因欽

此又於五月初七日欽奉四月二十六日

寄諭鮑超所部霆營勇眾前據官文奏潰勇行至咸甯逆謀始露茲據李瀚章奏在咸甯劫掠勢甚猖獗是此起潰卒已有聚而難散之勢亟應乘其初起迅速撲滅等因欽此仰見

聖主眷懷南服

宵旰憂廛至意臣自四月二十六日拜摺後連接探報叛卒乘虛奔突剽疾異常已由銅鼓營竄及袁州一帶瀏陽一路稍鬆而醴陵情形甚急雲南按察使趙煥聯急令副將張義貴等率領和

字各營從瀏陽移至醴陵臣即檄飭出境至萍鄉滾營前進截擊又知縣劉德謙之威信全軍前令由永州馳赴茶陵尚未到防復經飛檄飭改赴攸縣以先所急如賊踪南趨即就近移紮茶陵另飭副將劉國斌親帶選鋒營師船從省河駛赴湘潭與原泊該邑之遊擊羅德煌水軍會同巡防又飭副將廖德茂分撥澄湘營戰船從衡州駛赴醴陵之淶口扼紮並檄各州縣迅集鄉團以資防範一面咨調署永州鎮總兵王永章親率章字營勇五百名移駐衡州並因西



路軍情較緩抽調副將彭芝亮知縣王錄莽老  
章字營一千五百餘名總兵彭炳武副將于高  
勝銳字左右二營一千三百餘名拔隊東來聽  
候調遣此非必專為勦辦叛卒之用亦慮閩匪  
或有竄動可以備豫不虞四月二十九日和字  
副中副左中右三營馳抵醴陵即得賊至萍鄉  
之報當偕原派赴醴之中左左右二營齊趨楚  
東橋扼要樹營一面函催左前左左老中老左  
四營由瀏陽各隘赴醴擬即合力進紮萍鄉之  
湘東市乃叛卒於五月初二日已由間道抄至

麻山張義貴立率五營六成隊伍迎截中途探  
得逆蹤已過美田橋前股衝至煙洞嶺該處南  
通攸縣北達醴治並可橫出楚東橋恐其撲營  
當即收隊適左前左左二營抵醴紮定互為聲  
援初三日張義貴拔五營全隊出擊賊乃由美  
田橋疾走船灣是夜左前左左老中老左四營  
先後齊抵四汾合隊船灣係通攸縣大路署該  
縣知縣傅以綏把總黃占魁初聞賊踪至界會  
同募勇五百名以之守隘不數分布初四日張  
義貴率各營六成隊伍由黃土嶺旁徑繞出截

勦適叛卒尾股二三千人從村舍撲出抗拒當  
即轟斃數十人負傷遁者甚夥解散脅從數百  
人天晚收隊恐賊旁竄茶陵無兵堵截即派遊  
擊歐陽壽武率中左一營加撥副中營一哨於  
三更由捷徑馳赴茶陵其餘各營於初五日出  
六成隊伍先行輜重後發中途據探叛卒因官  
軍逼近由新市疾走未刻竄至攸縣各軍追至  
高車嶺已行九十餘里天晚饑疲暫駐初六日  
黎明張義貴即率叅將何德劬游擊趙盛國黃  
朝贊都司喻咸中守備趙煥墀趙國輝等隊躡

踪緊追賊眾正由東路撲出適見我軍旗幟即  
奔向西路竄遁張義貴當令各營分路馳進傳  
以綏黃占魁等率兵勇團丁隨至各營分隊奮  
擊截殺尾股二百餘人並獲五十九人訊明分  
別斬釋其帶傷逃走轟斃淹斃者無算解散脅  
從者百餘人所獲器械不復計數攸縣一律肅  
清其大股叛卒先已渡河焚舟以阻追兵向安  
仁一路竄走張義貴飭令分路覓船渡軍再進  
據雲南按察使趙煥聯稟報前來臣查該逆日  
行百里竄走迅速每因猝不及備地方即遭蹂

躡現飭各軍兼程追勦相機分隊繞出賊前迎  
頭攔擊以冀殲滅據署茶陵州知州楊式珣稟  
臬司席寶田已率精毅營全軍由江西蓮花廳  
來援與和字中左營均於初六日先後抵州境  
至知州劉德謙所部威信軍紆程醴陵之淶口  
轉在和字各營之後查安仁以南在在空虛兵  
力固不敷徧布倉卒亦徵調不及僅有前江蘇  
按察使陳士杰廣武軍二千八百名現紮郴州  
總兵周興隆字五百名紮桂陽縣臣已飛飭  
確探堵勦又令廖德茂將澄湘營戰船駛回衡

州上邈耒河一帶以扼水路劉國斌將前赴湘潭之師船移至衡山上下游梭巡另咨催王永章速至衡州相機調度至攸縣本無城池惟該知縣汎弁於叛卒竄近邊界並不妥為籌備嚴密堵禦致被乘虛闖入雖經當時擊退肅清縣境究屬疎於防範相應請

旨將署攸縣知縣傅以綏攸縣汎把總黃占魁俱革職留營以觀後效所有寔營叛卒由江西萍鄉竄至攸縣即經官軍擊退現飭分馳追勦緣由謹會同大學士一等果威伯湖廣總督臣官文

繕摺由驛馳奏伏乞

皇太后

皇上聖鑒訓示謹

奏

截勦叛卒陣斬首逆楚疆肅清摺

四年五月二十六日

奏為霆營叛卒竄掠安仁興甯縣城即經官軍擊退於桂陽界內截勦大捷陣誅首逆楚疆肅清現飭越境會勦緣由恭摺奏祈

聖鑒事竊照霆營叛卒由江西萍鄉竄至攸縣即經官軍擊退分馳勦辦緣由業於五月十四日馳陳在案該逆自五月初六日退出攸縣向安仁竄走該縣知縣李龍章千總滕加吉集團練勇分防城隘因逆踪剽悍眾寡不敵圍總生員徐光明戰歿各團潰散致被該逆乘勢闖入縣城



幸副將張義貴於擊退攸縣賊後即於初七日  
統率和平各營渡河進發躡踪疾追逆股回撲  
即擊却之初八日馳抵安仁當即分路進攻賊  
以三股衝來張義貴偕遊擊趙盛國率副中老  
左二營由中路進派參將何德劬都司喻咸中  
率左前左左二營由右路進守備趙國輝遊擊  
黃朝贊率中右左右二營由左路進守備趙煥  
墀以副左一營接應後路奮力勦擊賊始潰走  
張義貴率副中老左副左三營由東門進知縣  
李龍章千總滕加吉等率領兵團趕至西門將

城內尾賊殲旃縣城廓清過河逃走之匪又經  
渡追二十餘里擊斃數十統計前後殺賊約三  
百名解散脅從數千陣亡勇丁四名餘逆向南  
狂奔由龍海塘竄至興甯該縣地僻山多路徑  
紛歧一可出桂東以達江右之崇義一可出桂  
陽以達粵東之樂昌知縣萬時若把總何朝棟  
以城垣低薄居民稀少難以固守督帶兵勇分  
防隘口乃被該逆從間道抄出竄入縣城趕護  
不及連日大雨如注張義貴冒雨前進十一日  
晚抵距城七里之高峰嶺而營附近有五里坪

隘口悍匪據險扼守十二日韓散守隘之賊追抵縣城興甯縣知縣萬時若把總何朝棟等率團齊至知府劉德謙之威信軍同時趕到探知逆眾宵遁渡頭司興甯縣城已無賊踪當即分路追勦行經河邊樹林伏賊齊出我軍奮勇力戰趙盛國督隊當先連斃馬步各賊該遊擊身受三傷猶復裹傷揮隊適威信軍從歧路抄出合力夾擊追奔十餘里十四日張義貴復率各營進駐流活渡計連日又殺賊數百和字營陣亡勇丁十一名威信軍陣亡都司鄒洪興一員

勇丁三名此副將張義貴統率和字等營追勦  
叛卒擊出安仁興甯縣境之情形也先是前江  
蘇按察使陳士杰探聞賊至安仁即率知縣顏  
月洲統領廣武軍由永興窺賊所向迎勦中途  
據報賊已竄踰鳳凰山陳士杰料其將由興甯  
南趨圖走江粵我軍如由永興前進恐賊行剽  
疾終成尾追之勢和字等營躡勦兵力已敷惟  
無攔頭之師則官軍追進一步該逆可遠颺一  
步桂東有險可守賊久在軍中善於乘虛勢必  
斜出桂陽由滁口司取道當飭各營折回郴州

挑八成隊伍由宜章之赤石司宵發繞出滁口  
之前一面約會記名總兵周興隆由桂陽出黃  
沙坪互相策應仍慮該逆被截回竄適候選道  
葛承霖補募左營成軍即令拔赴興甯東江扼  
駐布置既定十三日探悉賊已竄過滁口距桂  
陽之文明司三十餘里陳士杰即從郴州馳赴  
赤石十四日偵知賊分六隊同裹脅之眾約萬  
餘人分由滁口及桂陽之馬市坳竄走一直達  
文明一可通龍塘鋪二處相距僅五里許當派  
前中右三營出赤石為包抄之師顏月洲等率

親兵繼之派副中營後營出小良田為截擊之  
師陳士杰督帶親兵繼之午刻抵小良田登山  
瞭見賊由文明龍塘衝來勁旅新叛故疎密虛  
實悉成陣法陳士杰即飭親兵依山列隊副中  
後二營各張左右翼待之賊亦慮我搯其吭而  
拊其背也以悍匪直前搏戰餘股憑山布陣陳  
士杰令副中營營總唐飛舞後營營總劉中樞  
各以所部更番疊擊親兵往來策應賊雖死傷  
甚多力拒不退適顏月洲由後路抄出立派中  
營營總李仁黨直搗中堅前營營總尹楚梁右

營營總陳文富或襲其尾或擊其腰自未至戍  
鏖戰四時縱橫盪決逆勢不支紛紛敗潰餘賊  
退踞山岬周興隆亦以隆字營禦賊於百丈嶺  
斬獲不少是夕陳士杰復挑奮勇分路抄擊該  
逆不敢接仗踰山越嶺狂奔九峰一路向粵東  
竄去是役也殺賊不下三千生擒二百餘名解  
散脅從男婦四千餘人奪獲馬騾旗械槍礮無  
數倡亂首逆歐陽輝章大才均已陣斬偽天將  
黃田伯據生擒賊供亦經擊斃我軍陣亡勇丁  
僅止五名此臬司陳士杰督率廣武軍邀擊叛

卒大獲勝仗楚境肅清之情形也臣接據趙煥  
聯陳士杰等先後稟報前來當即飛飭廣武軍  
越境與粵師會勦餘逆並飭和字營威信軍進  
屯柳宜交界相機進止伏查叛卒在鄂肇變既  
悍且衆由江入楚行走甚速月餘以來派軍堵  
勦每慮不能一挫兇鋒茲幸追勦遮擊均各奏  
捷境內歲事通論始終除平江一路賴已革浙  
江臬司李元度保守外所就近調遣者惟和  
字一軍初赴巴陵瀏陽至醴陵分戍茶陵馳勦  
攸縣安仁興甯肅清三邑各將士冒雨觸暑輟



寐忍饑千里奔馳轉戰勞苦躡追迅疾奮勇接  
仗使逆踪不敢久停地方少遭蹂躪陳士杰軍  
於南路料敵決勝謀定後動部將均各用命一  
戰而克遂使渠兇授首巨股夷傷厥功甚偉合  
無仰懇

天恩先將尤為出力者准予優獎以勵戎行花翎總  
兵銜湖南寶慶協副將張義貴擬請

交軍機處記名遇有總兵缺出請

旨簡放藍翎儘先補用遊擊趙盛國擬請以參將儘  
先補用並

賞換花翎藍翎守備葉紹棠擬請以都司即補並

賞換花翎遊擊歐陽壽武擬請以叅將即補花翎前

江蘇按察使陳士杰擬請

賞加勇號同知銜知縣顏月洲擬請以同知儘先選

用並

賞加知府銜儘先遊擊唐飛舞擬請以叅將即補並

賞加副將銜藍翎守備李仁黨擬請以都司補用並

賞換花翎其餘在事出力員弁可否由臣覈其功績

酌量擇保以昭激勸之處出自

逾格鴻施陣亡之都司鄒洪興生員徐光明均請

勅部照例議卹各營陣亡勇丁另行造冊咨部議卹  
以慰忠魂至安仁興甯二縣文武各員均先練  
勇集團防守城隘嗣於逆至時或因眾寡不敵  
或因城垣低薄致被乘勢闖入雖經會同各營  
奮勇追勦即時將逆擊退肅清境內究屬防堵  
不力相應請

旨將安仁縣知縣李龍章安仁汛千總滕加吉興甯  
縣知縣萬時若興甯汛把總何朝棟俱革職留  
任以觀後效所有霆營叛卒竄掠安仁興甯縣  
城即經官軍擊退於桂陽界內截勦大捷陣斬

首逆肅清楚境現飭越境會勘緣由謹會同大學士一等果威伯湖廣總督臣官文繕摺由驛具

奏伏乞

皇太后

皇上聖鑒訓示謹

奏

--	--	--	--	--	--	--	--	--	--	--

覆陳東路軍情緊急驟難圖黔摺初四年閏五月十日

奏為欽奉

諭旨恭摺覆陳仰祈

聖鑒事竊臣承准軍機大臣字寄同治四年五月十

五日奉

上諭李鴻章奏閩賊李汪兩逆人數衆多現分竄粵東邊界並有另股由福建永定上杭回竄江西之謠江楚邊界須有重兵堵勦等語左宗棠洞悉賊情素顧大局著即迅撥得力勁兵繞出江西邊界合力兜圍李鴻章派援閩省之郭松林楊鼎勳兩

軍並著左宗棠飭赴江西湖廣邊境以備迎勦而固腹地門戶李瀚章著隨時確探閩賊消息嚴密防範以備不虞等因欽此又同日奉

上諭駱秉章奏官軍越勦黔匪疊獲勝仗一摺劉嶽昭已抵松坎著駱秉章傳諭該藩司會同李家福等乘勝進攻將正安迅圖克復節節掃蕩力解遵義之圍次第廓清疆圉黔省匪勢甚張若僅恃川軍越境勦辦尚不足以制其奔突著李瀚章抽撥勁旅由銅仁松桃一帶進兵與川軍分途進勦則賊勢為我牽掣勦辦易得手勞崇光張亮基當就

黔省現有兵力會同勦洗毋得專待客兵致悞戎  
機等因欽此並准江蘇撫臣李鴻章四川督臣駱  
秉章抄錄原奏先後咨會前來臣查湘省東備閩  
逆西圖黔氛兩路行軍均關緊要而籌將來之  
進取則西路之事方長論目前之情形則東路  
之事尤急黔中地方糜爛湘蜀皆係進兵之路  
臣初抵任時通籌大概情形即謂防不如勦所  
以驟難大舉深入者則以將才難得統領乏人  
籌餉維艱增兵無策且閩賊未平又不能撤東  
路之軍併力以圖黔事祇可節節進取隨時審



度機宜於四月十六日專摺具

奏欽奉

諭旨著照所籌辦理欽遵在案四月初九日收復天  
柱後即飭分隊扼紮長吉瓦寨浦洞木樑等處  
為漸次進規之計臣到任後言黔事者或議湘  
軍由鎮石攻入或議由思鎮攻入曾國藩前奏  
以上年阻於餉絀不能乘勝北勦鎮遠南攻都  
勻與貴陽省城通氣為可惜茲駱秉章謂湘軍  
應由銅仁松桃進取雖所論取道不同而圖靖  
黔疆則一查黔中貧瘠太甚軍必裹糧山路崎

嶮輓運匪易且嵐瘴陰翳飲食惡薄又必簡壯  
健耐苦服習水土之勇方可遣令深入此皆非  
一時所能猝辦其難一也銅仁松桃距正安尚  
有六七百里大江小江以上在在荆棘現在湘  
軍出紮玉屏天柱距銅松又三四百里千里用  
兵即使中途無梗亦必大軍鼓行後有接應斷  
非偏師所能進搗其難二也臣前調銳字章字  
等營東來以先所急計西路已抽出二千八百  
餘人五月望間荆竹園號匪掠及石阡即歸老  
巢鎮遠清江台拱等處苗匪又竄伏無定總兵

周洪印知府戈鑑等所率各軍或營黔隘或守楚陞但能控遏賊氛相機進步已足為幸勢不能再令分隊遠出其難三也所冀閩賊蕩平江粵無事即可選擇東路之軍籌運糧食為大舉援黔之計屆時謹遵三月二十四日

寄諭與駱秉章會商議奏請

旨辦理而目前未能遽進正安者則以東路情形甚為緊急也漳州郡邑俱復閩賊出竄分撲廣東之大埔及鎮平平遠和平等界逼近南韶無論該逆擾粵擾江胥為湘省之患東路各營約共

一萬五千餘人以之分派出境邀擊及沿邊扼  
守兵力遂覺單薄現今前江蘇臬司陳士杰派  
招勁卒並將總兵周興隆隆字一營併入廣武  
軍足成五千人整列十營由桂陽縣進紮粵之  
仁化署永州鎮總兵王永章統領新老章營及  
銳字營由宜章進紮粵之樂昌知府劉德謙之  
威信軍接應後路雲南臬司趙煥聯所統副將  
張義貴等和字十營駐紮郴州為各路援擊之  
師臣現飭趙煥聯陳士杰與記名臬司席寶田  
江西吉南贛甯道王文瑞等就近函商一切機

宜伏讀五月二十四日

寄諭令左宗棠親督全軍越境追躡計與前奉

敕撥繞道兜圍之師皆出江右之東路曾國藩前派  
藩司劉連捷總兵朱南桂朱洪章各軍由皖北  
馳赴瑞臨如移紮吉安則與贛南各軍聲勢更  
為聯絡兼為湘省東面屏蔽臣已緘咨會商至  
臣弟李鴻章所派提督郭松林楊鼎勳之蘇軍  
從漳州遵海而西取道粵東行踪未定臣接李  
鴻章來函以該軍繞赴江楚邊境與蘇隔遠屬  
俟將近湘界酌濟餉需就近調度臣當照所議

辦理現已遣弁馳赴粵閩探迎一俟該軍前來  
即當派員支應令其規賊所向截勦以冀近殄  
逆氛除將湘省現籌東路堵勦軍情緊急驟難  
分軍進圖黔之正安情形咨覆四川督臣駱秉  
章查照外謹會同大學士一等果威伯湖廣總  
督臣官文繕摺由驛馳陳伏乞

皇太后

皇上聖鑒訓示謹

奏



黔匪竄逼晃沅即經官軍擊退摺

四年八月十四日

奏為黔匪竄越楚界逼近晃沅即經官軍擊退恭

摺奏祈

聖鑒事竊貴州苗黨分股竄撲思州及天柱之九龍

山臣於七月初五日附片奏

聞在案提督銜總兵周洪印所派知州羅建章都司

楊玉勝由晃州率部援思六月二十五日行至

朱家場探明逆衆因楚軍出境悉數遠遁思郡

圍解惟竄擾天柱之匪盤踞漢寨一帶分掠岔

處悶松駐柱各營出隊該逆望見即奔由黃橋



地笋繞經小江仍回漢寨該處七十里匪黨千餘後股甚衆七月上旬另股由泡木溪突出逼近羊坪周洪印飭守備李茂昭嚴陣待戰派副將楊洪明進扼大魚塘知州羅建章率從九黃朝烜都司楊玉勝等分守龍溪口田壩坪以為援應該逆奔至羊坪李茂昭出隊卻之即向清溪遁去惟漢寨一股盤踞如前且出擾九寨驗洞平珍坡旺悶松泉寨高坡寨一帶我軍出隊即遁收隊復來周洪印定計先清柱境乃派都司石中瓊赴紮龍溪口替出羅建章楊玉勝及

大魚塘之楊洪明等營均由晃州斜插天柱該  
總兵親率游擊周大定都司張繼霖兩營由沅  
州直趨天柱行抵距城十五里之邦洞即遇漢  
寨之匪分股由賴洞竄來周洪印飭周大定張  
繼霖出隊迎勦維時楊洪明羅建章楊玉勝均  
率所部趕至分路馳擊賊即退奔天晚收隊周  
洪印率領親兵馳至柱城與知府戈鑑代理天  
柱縣知縣黃元齡等籌度進勦探知漢寨踞逆  
忽向清江八卦河遁去逆首陳大六另股尚屯  
坡旺款場慮其回竄此七月中旬事也竄向清

江之匪至清溪場地方遇石洞口之偽九大王  
張朝楨勾結後山洞苗逆從寨頭新場竄出兩  
股合夥掠至竹樹扶羅舊碕一帶晃州危急沅  
州亦警周洪印以天柱為楚西門戶未可空虛  
乃調周大定與都司傅啟榮之軍協同黃元齡  
義從營駐守以備坡旺款場之賊而令戈鑑楊  
洪明羅建章共率靖字飛字長勝七營星夜馳  
赴晃沅援勦二十三日賊將從十家坪過河犯  
晃石中瓊因該廳通判趙紹華之請由龍溪口  
分隊馳至與該沅守備協力拒退另股從柏樹

林偷渡亦經兵圍堵禦候選訓導姚復奇陣亡石中瓊遣隊助之賊始退去維時戈鑑等已馳抵禾灘扼紮該逆大股盤踞舊寨二十四日各營會合進勦接仗逾時賊敗惟慮路險有伏未便深入二十五日楊洪明出中路羅建章出左路戈鑑出右路將近舊寨賊衆拒戰楊洪明督隊開礮各軍奮擊逆勢大敗追殺十餘里至栗山塘林深箐密伏賊突起漫山遍野守備彭世欽怒馬衝馳戰歿行陣適戈鑑率隊趕至其預派接應之楊玉勝等三營亦由烏木溪抄出我

軍大集三面圍攻賊遂奔向柳寨遁去計先後斃匪二百餘名陣亡勇丁十五名是日逆股又分撲晃州而李茂昭黃朝烜兩營已先一日馳至即與石中瓊分路拒賊敗諸江口郭家灘欣賢堂等處其竄踞柳寨之賊因我軍扼扎禾灘要隘遂竄兩湖村勢將下犯沅州戈鑑急率所部繞出其前賊不能過遂回便水周洪印在柱連接戈鑑等二十四日以前稟報知賊勢甚眾即親率張繼霖一營迺發二十八日抵晃接署沅州府知府陳佳蕙飛函以賊至草鞋坳冷水

鋪一帶請即撥軍回顧而先一日羅建章已派李茂昭黃朝烜兩營繞赴沅州本日又令楊玉勝一營繼進行抵便水之上渡河賊即來撲該都司一面接仗一面向沅進發後隊傷亡二十餘名沅州府城經地方文武督率兵練布置守禦李茂昭黃朝烜楊玉勝等先後趕至賊不敢逼人心益固當楊玉勝遇賊轉戰時羅建章聞信由波州馳援遇賊於三眼橋揮隊敗之即至對河鋪扼扎二十九日賊復糾黨環攻營盤又經轟退戈鑑聞信赴援賊由楊柳衝簡家溪繞

出波州而戈鑑已抵河邊接仗小勝周洪印飭  
令副將譚繼善及張繼霖前往接應三十日該  
總兵留石中瓊於晃州與地方文武協同駐守  
親督楊洪明直搗而下一面函屬戈鑑率經歷  
馮千驥等四營由波州進取賊欲從紅岩竄晃  
譚善貴等率隊截勦陣斬逆目賊遂紛亂楊洪  
明由新寨抄出羅建章由對河鋪追來四面圍  
攻賊眾敗潰戈鑑逐奔二十里許賊上仙人山  
竄走該員又與羅建章各率隊伍躡擊至楊柳  
灣寨守備楊昌松率隊趕至紋洞均截殺該逆

後股奪獲牛隻百餘槍礮器械甚夥山徑險仄未便窮追計先後又斃匪六七百名滾岩落澗死者無算勇丁陣亡二十四名探聞敗賊竄歸後山洞距晃州轄境不遠周洪印即令戈鑑統領四營出禾灘羅建章率其所部出大魚塘分途進取以清近邊餘孽迭據周洪印等馳報前來臣查黔中苗教互相勾結時時侵軼楚邊每值秋穫之際尤必糾黨出掠臣於夏間整頓西路營制屬令周洪印嚴飭諸軍遇賊即行痛擊此次匪股分途竄出圖犯晃沅賴各將領疾趨



援勦立時擊退得以轉危為安惟黔匪竄楚已  
成熟徑自松桃銅仁思州以至玉屏天柱黎平  
路散而紛並無一定總隘可扼而楚軍止萬餘  
人靜則分戍動則馳援力極單薄又無餉項可  
以增兵惟有諄飭周洪印激勵諸將以勦為防  
冀遏隣氛而保邊陲以副

聖主眷懷南服至意此次接仗陣亡之訓導姚復奇  
守備彭世欽應請

勅部從優議卹以慰忠魂其在事出力人員可否由  
臣存記彙入前次克復天柱案內保獎用示鼓

勵之處出自

鴻施所有黔匪竄越楚界逼近晃沅即經官軍擊退  
原由謹會同大學士一等果威伯湖廣總督臣  
官文繕摺由驛馳陳伏乞

皇太后

皇上聖鑒訓示謹

奏

--	--	--	--	--	--	--	--	--	--

粵逆竄動現籌楚邊防勦情形摺

四年九月十一日

奏為粵東逆股竄動現籌楚邊防勦情形恭摺馳

陳仰祈

聖鑒事竊照湖南東路防務臣於夏間飭派布政使銜雲南按察使趙煥聯布政使銜前江蘇按察使陳士杰會同籌度並令出界親歷山原周勘地勢據趙煥聯稟由桂陽縣出分界嶺至九峯司查得該處四面高山中窪多田來徑紛歧無險可扼其前為鶩頸坳山巒延互為入九峯之要隘又前為風門坳係入鶩頸坳之路左為西

坑右為香蒲塘皆通九峯等處守此三隘可扼  
賊從樂昌北來之道九峯附近各嶺坳多在屏  
蔽之中惟峻峯峭立不能多築壁壘而有險可  
憑勢宜據守應以和字數營分紮風門坳西坑  
香蒲塘再以數營駐紮鶩頸坳為策應之兵迤  
東各嶺隘宜守處所與陳士杰所議大略相同  
係廣武毅武等軍任之迤西平石最關緊要其  
前約七十里臨九峯溪河所出之水口有山曰  
望嶺可稱總隘係章字威信等營任之又據陳  
士杰稟楚粵邊境形勢舊曾周覽茲復親至韶

州南雄等處重加察勘除和字各營出守風門  
等坳章字威信等營保固平石要區外該司所  
領廣武軍暨候選道葛承霖之毅武軍由桂陽  
縣出兵應於蠟嶺楓木坳扼險屯守偵賊如過  
仁化則軍可進駐城口分扼扶溪司松子嶺有  
機可乘即圖邀擊儻從始興南雄兩路來犯則  
桂陽東南並警布置較難或賊至先後異時即  
緩急異勢如先從東來亦可連營南路為備而  
陰以重兵向東如流溪君子嶺永豐三隘俱路  
窄林深可以設伏臣均飭令照議隨時會商酌

辦連接探報逆酋林八頭一股已經粵將在長樂收降偽康王汪海洋一股屢為閩師所敗又值贛軍赴粵會勦遂棄鎮平而走臬司席寶田總兵婁雲慶連破之於平遠界內該逆計圖賒死悉力狂奔臣飛飭各將領率軍出紮嚴陣備戰一面咨請廣東督撫臣迅飭水師將弁嚴扼北江一帶水道又恐韶河下游有淺涸可涉之處並請飭令加意攔截以杜敗匪竄越旋據陳士杰報已令所部廣武毅武隆字等營由泰平墟連珠崖進扼蠟嶺楓木坳並稟經臣批准添

募東勇五百人以為嚮導臣復飭參將彭炳武副將于高勝率領銳字各營馳赴桂東即令陳士杰就近授以進止機宜又據總兵王永章稟報已令章字營威信各派一營由塘村進紮望嶺據趙煥聯報派令總兵張義貴提督彭言志分統和字左右兩軍已由軍堡坳文明司先赴風門坳等處扼駐該司親督中軍各營繼發將由野豬坳而至鷺頸坳仍偵賊勢所向以東顧桂陽西策宜章臨武臣連日續接探報逆眾圍攻江西之定南龍南兩城甚猛幸經擊卻復退



竄龍定之交其勢左可出始興以達仁化曲江  
右可走信豐以窺江西中可從龍南以趨南雄  
汪海洋係悍鷲賊酋勢雖窮蹙而死黨尚有數  
萬猛撲圖逞且當孤危就殄之時則其鬪也彌  
力江閩粵兵力萃集度不敢回向東竄唯慮逸  
入西路則陽山連州連山及廣西邊境在在空  
虛恐致死灰復然仍成燎原之勢而楚省南界  
與兩粵接壤千有餘里防不勝防臣現飭各將  
領激勵士卒審機遮擊以挫賊鋒萬一該逆竟  
竄向乳源則出梅花塘右通平石宜章左通臨

武地勢平行處處戒嚴在防各軍即宜星夜繞  
赴三堡鳳頭嶺四喜水東牛市一帶以遏乘隙  
竄突查楚軍萬八千餘人備多力分實形單薄  
此外可調者尚有藩司劉連捷總兵朱洪章朱  
南桂之勇共萬五百人此三軍自金陵克復本  
應予以凱撤本年夏間因勦金口寔營叛卒經  
兩江督臣曾國藩從皖北調至江西臣前因贛  
軍赴粵即經會商江西撫臣劉坤一將劉連捷  
朱洪章二軍由吉安調赴南安並令兼顧龍泉  
又另調朱南桂一軍由臨拔赴袁州暫紮該郡

南至吉安西達楚境二者皆便前准曾國藩咨  
該三軍應撤應留由臣酌量調遣如果賊踪西  
竄則江西情形自鬆臣即當飛牘令其來楚以  
助兵力茲與劉坤一預商儻逆氛竄近湖南即  
請飛飭臬司席寶田一軍兼程疾馳回援該司  
籍隸湖南永州於楚邊山川阨塞極為熟悉必  
能所向有功所有粵東逆股竄動現籌楚邊防  
勦情形謹會同大學士一等果威伯湖廣總督  
臣官文繕摺由驛馳

奏伏乞

皇太后

皇上聖鑒訓示謹

奏



西路雪洞涼傘危急片

再臣於八月十四日將黔匪竄逼晃沅即經官軍擊退緣由恭摺奏

聞在案該逆自遁歸後山洞後旋竄逼楚軍防黔之涼傘雪洞等營意圖內擾總兵周洪印預飭守備李茂昭帶隊馳往以為涼雪聲援該逆圍撲陽寨坐卡梗塞雪洞道路時駐防雪洞同知吳自發先期因病赴晃醫調幫辦知縣吳廷甲督軍與賊相持飛稟請救駐防涼傘守備楊昌松見賊勢猖獗與吳廷甲各出隊伍分頭夾擊遇

賊於張寨臺洞將前股擊潰不料後股擁至層層兜圍楊昌松揮軍力戰千總劉玉慶帶傷奮怒奪矛而進殺賊甚眾賊始退回高寨勾溪等處此八月十九二十日黔匪擾逼雪洞防軍之情形也嗣後竄撲涼傘防營楊昌松督隊擊勦斃賊無算該逆抵死不退分擾涼防後路擄糧為長圍之計周洪印聞信恐前派李茂昭一軍難期得手添派知州羅建章督帶四營由羊坪滾營而進相機援勦而逆首龔迷分股出羊坪一帶焚掠九太白出青谿以南二十餘里佔踞

馬鬣嶺涼雪文報均斷此八月二十三日二十  
六日之情形也疊據周洪印馳報前來臣查逆  
圍撲涼雪防營周洪印已先後派李茂昭羅建  
章等軍馳往救援當可解危惟賊情詭譎誠恐  
潛竄空處彼地直通大河下達托口為入楚門  
戶宜預為籌及當飛飭周洪印激勵諸將迅解  
涼雪之圍力勦餘股勿令侵犯以固邊陲所有  
黔匪復出逼擾涼傘雪洞防軍現飭援勦情形  
理合會同督臣官文附片馳陳伏乞

聖鑒訓示謹



秦

西路防勦並涼雪解圍情形摺

四年十月初五日

奏為楚省西路官兵於黔邊疊次戰捷並涼雪圍解現籌勦辦情形恭摺馳陳仰祈

聖鑒事竊臣於九月十一日將黔賊復出逼擾涼傘

雪洞總兵周洪印先後派守備李茂昭知州羅

建章督軍援勦緣由附片陳明在案旋據稟報

荆竹園教匪勾結青苗乘間出竄銅仁同時告

急時參將包順科駐銅防堵聞信馳至太平場

駐紮與賊一再接仗賊稍退却周洪印以為太

坪場扼要之地且孤軍深入援應難資而江口

為下竄總會要路扼守較便飭令移營自固旋探賊竄至樂鄉一帶包順科恐其窺伺銅城當派都司姚雲臺蕭連甲等帶隊由挂扣渡河於樂鄉會勦賊適竄至官軍迎頭截擊殺賊甚夥賊紛紛由水竹園一路奔逃追逐十餘里因天晚山路崎嶇未便輕進當即收隊次日馳抵樂鄉賊已遠颺太坪場並無賊蹤此九月初一日至初九日擊退銅仁教匪情形也先是羅建章等赴援涼雪甫抵玉屏賊分股出丙溪白巖腳野雞坪圖撲官軍營壘見官軍勢盛即竄退山

後羅建章恐賊由偏洞走天堂斜竄地普界出  
大魚塘等處擾及腹地暫紮玉屏探賊趨向適  
周洪印續派總兵譚善貴馳赴大魚塘固守後  
路羅建章即由玉屏拔隊抵涼與周洪印先派  
赴涼之都司張繼霖及駐防涼傘守備楊昌松  
分三路援雪先將桂林溪邵洞等賊擊散進擊  
鄧寨賊卡賊抵死抗拒官軍奮勇齊進賊勢不  
支四散潰竄追殺至高寨坪忽賊後股約二三  
萬人擁至李茂昭等直前衝殺礮轟矛刺賊尸  
枕藉雪洞被圍之軍望見援師大至亦踴躍自

內殺出賊大敗奔逃立將雪營拔出移營並紮涼傘以一聲勢此八月二十九日至九月十四日赴援涼雪立解重圍之情形也疊據周洪印稟報前來臣查銅仁教匪雖經擊敗退伏狗芽場若不趁勢進擊誠恐復圖思逞而雪洞敗賊亦尚盤踞平亞距涼傘不及百里均應及時勦辦然比較緩急雪洞經此次痛勦之後其氣已餒涼傘兵力足以制賊而教匪蓄心巨測又包順科患病就醫江口一軍新派遊擊艾憲銀馳往接管兵力單弱宜先將狗芽場教匪掃除然

後并力平亞惟黔邊各營疫癘傳染十病五六  
臣一面飛飭周洪印趁賊竄伏之時趕將病勇  
撤遣醫調另補精壯訓成勁旅預備進剿復查  
遊擊劉啟富一軍駐紮大洪山去賊較遠飭即  
移紮田垌坪杜賊由銅竄楚之路俟周洪印督  
兵駛至剋期約會銅城文武協力兜圍先將教  
匪盪平再勦平亞之苗仰副

聖主廑念邊陲之至意所有楚軍疊在黔邊戰捷並  
涼雪圍解現籌勦辦情形謹會同大學士一等  
果威伯湖廣總督臣官文繕摺由驛馳

奏伏乞

皇太后

皇上聖鑒訓示謹

奏

東路籌防情形片

再楚邊東路籌辦防勦情形臣於九月初一日  
由驛奏

聞在案連旬疊據探報偽康王汪海洋股衆由江西  
定南龍南敗退圖竄信豐鐵石口新授貴州臬  
司席寶田先期趕至大破諸蓮塘坳該逆遁回  
粵界時復抄掠龍南邊境而大股盤旋和平連  
平始興翁源之間黨與垂盡鋌走彌急伺隙即  
奔竄向無定准閩浙督臣左宗棠咨已派廣東  
提臣高連陞督率總兵劉清亮道員康國器之



軍由粵追擊署浙江提臣黃少春幫辦福建軍務劉典之軍均赴南安江西撫臣劉坤一現已駐紮贛州調度將領出境勦辦臣維逆蹤奔突飄忽不常楚邊諸軍據隘紮定即可審機邀擊薄賊於險飭據雲南臬司趙煥聯查得九峯之外鴨公灘龍頸坳柞樹壠等處在風門坳左右間道歧出除總兵張義貴仍營風門坳外調令提督彭言志移紮鷲頸坳即顧左右歧徑復派參將趙盛國填紮西坑前江蘇臬司陳士杰派守備何其英率新募嚮導營東勇先赴仁化之

城口扼紮趙煥聯陳士杰均整列隊伍規賊所向以定軍行西東如竄近仁化樂昌即當出隊決戰壘接稟報所籌均尚周妥運掉亦靈署永州鎮總兵王永章等已將全軍移紮平石仍覘賊蹤所趨相機迎勦臣已飛飭在防諸軍確偵賊勢疾出掩擊以挫逆鋒參將彭炳武等四營現由桂東移至桂陽縣應否即令紮定或赴宜章已飭陳士杰就近酌辦至藩司劉連捷總兵朱洪章兩軍現已均抵南安與江閩各軍合力堵剿如即破賊於粵則楚境自安儻賊逼湖南

邊界自應星馳回援該藩司等來稟均與臣疊  
次函牘所籌相合臣復分別咨行令其隨時察  
酌緩急以定進止即由劉坤一就近指揮所有  
續籌楚邊東路防勦情形謹會同督臣官文附  
片具陳伏乞

聖鑒訓示謹

奏

東西兩路軍情片

四年十一月十六

再湖南東備粵氛西勦黔匪臣欽遵疊次

諭旨督飭各將領分別扼截勦辦當康逆汪海洋盤踞上坪之時路通始興仁化東路諸軍嚴陣備戰嗣據探報賊已竄往鎮平嘉應武平永定查康逆頻為江閩各軍所敗自八月以來豕突狼奔初無定向贛南南雄各界官軍密布賊不得逞乃復折而東走惟由和平龍川興甯平遠鎮平以至武平永定即從前由閩擾粵之熟徑往來儻忽遠則為廣饒衢徽之患近仍是江楚南

境之憂劉典黃少春之軍均已回顧閩疆江西  
撫臣劉坤一布置贛防並令鮑超超越境會合閩  
軍攔剿該逆如不得逞勢必西回未可以賊去  
稍遠遂弛邊防臣仍飭臬司趙煥聯陳士杰總  
兵王永章等列戍設備無少疎懈惟藩司劉連  
捷總兵朱南桂朱洪章三軍克復金陵後曾國  
藩本准凱撤本年因金口勇叛調至江西屬臣  
察看軍情酌定裁遣此三軍勞勩日久現值逆  
蹤稍遠自當遂其休息臣咨商劉坤一陸續撤  
遣仍由湖南江西督銷淮鹽局補給欠餉咨會

曾國藩轉飭糧臺核算報銷至西路勦辦黔匪  
臣於十月初五日

奏報後疊據總兵周洪印等稟狗茅場教匪經銅  
仁兵團約會遊擊艾憲銀之軍擊歸荆竹園銅  
境已靖平亞苗匪退往款場一帶而逆首九大  
白勦迷糾黨傾巢重擾楚邊又有另股逆首養  
效在九送革由思州羅家山而出將與合股下  
竄周洪印奔馳龍溪口晃州沅州之間往來調  
度以知府戈鑑副將李金榜總兵譚善貴分率  
浙部勦九大白一投知州羅建章率其所部勦

養寇在一月其日月夕才不累者然者言引然  
霖擊敗退往貢溪遂合大股竄撲中寨鄉圍挫  
潰又至天雷米貝戈鑑等分投馳勦敗賊於桃  
子坳碧湧落巖江等處羅建章另由龍溪口出  
隊敗賊於汪家溪其竄石霧溪者適艾憲銀歸  
自銅仁遇於徐家灣亦即擊退羅建章又從黃  
道司抄出敗諸茶店場該逆乃由朱家場向原  
路而遁時九大白股正竄近托口一帶周洪印  
以銅仁龍晃無事亟宜掃盪芷黔界內遂調回  
羅建章一軍與戈鑑等部分投勦截破諸濫泥

冷水溪巖灣苦溪頭等處而上宗節一仗尤以  
苦戰得勝把總王遇貴歿焉旋又會攻米貝破  
其卡壘賊即遁走各軍躡勦復有漲溪劈嶺貢  
溪之捷楚境肅清追過雪洞奪左洞之卡焚那  
納之棚其地總名為後山洞亦苗匪一巢穴也  
適同知吳自發率部發自涼傘與戈鑑等四軍  
會合乘勝分路繼進復破石磨添旺壩牌樓等  
處堅卡十九道士氣倍奮賊眾迎敵大創閉壘  
力拒各軍鼓勇環攻登山縱火立將石葉壘攻  
支正拿首之之卒與之竟匪司火易竄去見在



後山洞地面已無賊跡此九月下旨至十月杪  
轉戰破賊情形也臣查貴州苗教擾邊多方亟  
肆官軍分頭迎剿月餘間幾於無日不戰殺賊  
不下二千勇丁時有傷亡茲邊界業已肅清越  
境追剿百有餘里連破賊巢將士頗為用命惟  
後山洞地方與苗窟逼近相離楚邊太遠勢不  
能留軍駐守而繼此次燬平壘卡亦足令匪黨  
膽寒荆竹園老教及清台苗匪不時蠢動田垌  
坪門戶最要天柱縣當賊之衝與龍溪口晃州  
涼傘各處均不可日久空虛周洪印現今各軍

搜捕餘匪事畢分別回駐原防臣已飛飭該總  
兵督令各將弁稍為休息激勵士卒步步進規  
如果康逆就殄東路撤防藉得增軍圖黔可冀  
日有起色又欽奉十月二十一日

寄諭據勞崇光裕麟奏苗匪竄擾黎平經兵練擊退  
飭令臣速檄沿邊防軍相機援應伏查貴州奏報繞  
道馳遞到京需時計勞崇光等當於八九月間  
具奏所稱大步河餘匪敗往天柱經楚截勦似  
與臣八月十四日摺內所敘在柱擊賊為一時

出  
金道

訓示已飭防軍如聞警信立即相機援應仰慰  
廛念邊陲至意謹會同督臣官文附片具陳伏乞  
聖鑒謹

奏

合肥李勤恪公政書卷二目錄

楚湘  
湖廣

男經畬經江澧編輯

滇  
淮  
濤  
淦

黔藩稍緩到任專辦貴東軍務摺 五年正月十九日

擊退黔苗現剿教匪情形摺 五年二月十八日

籌派援黔各軍分路進剿摺 五年二月二十七日

應造天津剝船請解銀代辦摺 五年二月二十八日

一  
二  
三  
四  
五  
六  
七  
八  
九  
十

李臬司元度攻復大小壘摺 五年七月初一日

援黔獲勝並添募水陸新軍摺 五年七月二十五日

援黔獲勝并楚邊防堵情形摺 五年十一月二十二日

彙報援黔獲勝並近日軍情摺 六年二月二十九日

覆陳北琛剿辦黔苗情形摺 六年三月二十六日

奏報到任日期摺 六年四月二十八日

鄂省防守情形並北岸堅壁清野摺 六年五月十九日

黔藩稍緩到任專辦貴東軍務摺

五年正月十九日

奏為新任貴州藩司擬令帶兵入黔辦理貴東軍

務請

旨遵行仰祈

聖鑒事竊准兵部火票遞到同治四年十二月二十

七日內閣奉

上諭貴州布政使著兆琛補授欽此當即恭錄轉行

兆琛欽遵該藩司例應自行專摺謝

恩奏請

陛見惟黔省羣盜如毛貴州撫臣駐紮省垣辦理上

游軍務兵單餉絀力未能以東顧以致下游各  
府縣苗教充斥地方蹂躪不堪同治四年十一  
月總兵周洪印追賊至思州之後山洞將該處  
奸民一律勦除經臣奏報在案而探聞逆首九  
大白鯤迷勾串荆竹園老教時思蠢動窺伺楚  
邊臣以為守不如戰嚴飭周洪印一面扼防出  
竄之路一面逕取寨頭寨頭者左台拱而右清  
江為各苗總要咽喉且革夷之藩籬也譬之破  
竹先破最堅之節自然節節皆解矣第懸軍深  
入去楚逾遠設有緩急深恐呼應不靈勢非黔

省有知兵大員擇要駐紮會合勦辦必難日見  
有功貴州藩司篆務現經撫臣奏委糧儲道金  
鈞署理兆琛似不妨稍緩到任專辦貴東軍事  
由楚西馳紮鎮遠選將練兵隨時稟商貴州撫  
臣與楚軍共圖進勦於黔省大局良有裨益該  
藩司前在辰沅道任內督兵援黔該省下游形  
勢既為明悉與周洪印等情意亦均聯洽必可  
相與有成也現在湘省各路水陸防兵月餉虧  
絀甚鉅且每以東防未撤無力兼營黔事深切  
杞憂茲幸謀報粵逆汪海洋於去冬十二月伏



辜嘉應州城旋即收復餘逆竄向未定東路各軍雖未敢遽行撤調而防務漸鬆通盤籌畫亦擬酌抽兵餉協助兆琛以為憑藉之資免致無從措手合無仰懇

皇上俯念黔省軍務緊要

飭令兆琛暫停北上即由沅晃馳赴鎮遠辦理貴東軍事俟黔省下游肅清再行赴任臣為全黔大局起見是否有當謹恭摺由驛具

奏伏乞

皇太后

皇上聖鑒訓示謹

奏



擊退苗匪現勦教匪情形摺 五年二月十八日

奏為黔苗復擾楚邊疊經官軍擊退現勦銅仁教匪情形恭摺馳陳仰祈

聖鑒事竊總兵周洪印自勦辦貴州後山洞奸民擬即逕取寨頭經 臣於正月十九日摺內陳明在案乃該逆畏官軍毀其老巢先期出竄正月間由排樓坡那納小路繞出涼傘意圖牽制駐防涼傘遊擊周大守等開隊迎擊賊衆見隊即奔一敗之於壩坪哨再敗之於竹樹橫坡紛紛向雪洞遁去旋又聚集大股七八千由斗溪小晏

家寨出地堡界勢欲下竄周洪印飛調知州羅  
建章由便水過河探賊所向迎頭截勦並派總  
兵譚善貴等跟縱尾擊時賊已竄至晃州廳對  
河之石馬溪坡頭一帶驟見官軍旗幟折向柳  
寨亂竄羅建章率守備李茂昭暫紮便水扼賊  
下竄芷江要道譚善貴亦由新店過河截賊上  
犯晃州熟徑兩面夾擊該逆不敢迎敵向深冲  
邯溪奪路潰走羅建章譚善貴趕緊跟追殺賊  
無算乘勝追抵金家場溪內不料賊情狡詭預  
設埋伏於兩邊深林官軍追至賊伏齊起溪徑

既窄雨後泥滑隊伍難以施展都司石中瓊中  
鎗歿焉羅建章揮隊退出溪口里許游擊秦友  
文等率軍前往與羅建章會合復敗賊於石頭  
寨賊竄吳家寨又敗之各軍追賊至茶店場奮  
勇趕殺賊尸枕藉賊眾翻山越嶺而逃直追至  
牛場坡一帶哨探已無賊踪此正月十八日至  
二十九日勦賊情形也該處毘連銅仁思州探  
聞銅仁教匪現由黃瓜巖出撲謝家橋並有盤  
踞壩關溪之說設苗逆闖入銅境與教匪通氣  
勢必蔓延無已周洪印飭副將李金榜等移紮

碧湧顧黔芷靖會門戶知府戈鑑等防守冕州  
龍溪口自帶飛字三營震字二營馳赴銅郡會  
商銅仁文武相機勦辦疊據稟報前來臣查苗  
逆出擾意在苟且稽誅將士爭先用命屢挫其  
鋒賊膽已寒度當暫戢惟教匪同惡相濟乘官  
軍勦苗喫緊竟敢離巢作勾結之勢若不及時  
勦擊無以離其黨而伐其謀周洪印現率各軍  
赴銅勦辦如將教匪擊敗苗逆羽翼自孤然後  
併力寨頭較易得手事專則心力愈齊勢壹則  
聲威益壯務期掃穴擒渠仰副

聖主眷念邊陲至意此次擬保都司提標千總石中  
瓊奮勇追賊臨陣捐軀尤堪憫惻相應請

旨飭部從優議卹以慰忠魂所有黔苗出擾疊經楚  
軍擊退現勦教匪情形謹會同大學士一等果  
威伯湖廣總督臣官文由驛馳陳伏乞

皇太后

皇上聖鑒訓示謹

奏





籌派援黔各軍分路進勦摺

五年二月二十七日

奏為遵

旨籌派援黔諸軍分路進勦各事宜恭摺覆陳仰祈  
聖鑒事竊臣承准軍機大臣字寄同治五年正月初

三日奉

上諭張亮基奏請調席寶田等援黔各摺片粵匪竄  
陷嘉應州城席寶田一軍尚須入粵會勦一時斷  
難赴黔朱洪章現駐南安防勦正當喫緊亦難遠  
調惟李元度前在平江辦理霆營叛勇業已竣事  
若將該革員調往貴州尚屬可行著李瀚章即派

該革員酌帶勇丁赴黔助勦其應用餉需著劉坤一李瀚章於該兩省協黔項下支給或按月輪流撥給總期軍餉有著俾利師行不得稍分畛域等因欽此又於二月初三日奉

上諭李瀚章奏請令貴州藩司暫緩赴任辦理貴東軍務一摺所陳尚合機宜即著該撫傳知兆琛暫緩陛見宜由沅晃馳赴鎮遠辦理軍事粵東髮逆既平湘省東防已鬆李瀚章尤當抽撥勁兵越境入黔以資厚集張亮基仍當嚴飭下游地方文武及在防兵勇與楚軍併力夾擊並聽兆琛調遣等

因欽此仰見

皇上廑念民瘼綏靖邊徼至意遵即扎調已革浙江臬司李元度至省該革員感激

天恩雖親老丁單不敢不力圖報稱臣現調署永州鎮總兵王永章之章字營二千人同知銜候選知縣李光燦之銳字營二千人并飭李元度添募貴字營二千人合成六千人由銅仁一路進勦所需月餉約計銀三萬六千餘兩臣遵

旨咨會江西撫臣劉坤一按月各半撥給一面先籌給銀三萬兩以資料理其軍裝子藥概由湖南

支應新授貴州藩司兆琛遵奉

諭旨辦理貴東軍事臣飭其馳赴辰沅添召舊部數

千人選練成軍進紮鎮遠督同貴州下游各軍

與楚軍分途進勦先籌給銀二萬五千兩錢一

萬二千串並軍裝火器等項俾得迅赴事機此

後再按月解濟銀二萬兩軍裝子藥亦由湖南

支應凡籌發兩軍現銀暨軍裝子藥價銀將來

均併入協黔餉內劃算至總兵周洪印一軍合

計萬人現在分防邊隘并勦銅仁俟李元度到

銅即飭由天柱直趨清江台拱掃盪而前與各

軍併力迅進以成犄角之勢兆琛李元度趕緊  
整頓於三月上中旬間陸續前發惟黔省苗教  
充斥天柱以南亦盜藪也如蒙

飭下江西撫臣劉坤一飭令貴州臬司席寶田挑選  
精銳六七千人江省按月籌給餉需由黎平古  
州一路并進則布置益覺周密若夫進剿之策  
總在步步為營頭頭清理不在過圖速效急進  
省城緣黔地萬山叢雜險寨如林自賊徒肆擾  
以來城郭為墟逃亡略盡官兵深入則強者抗  
拒弱者迎降其尤黠猾者或伏匿堅巢或四散

無跡俟兵過復嘯聚如前甚至截官軍之餉道  
戕歸順之良民士練鄉團概遭裹脅而帶兵官  
又或紀律不嚴縱勇騷擾兵賊莫辨遂益堅其  
從賊之心如是雖日報克一城收一縣無益也  
從前田興恕韓超各軍多坐此弊臣以為此次  
援黔當勦撫兼施吏治與軍政并舉蓋必能剿  
而後能撫尤必講究吏治乃於軍政有補臣現  
與諸將堅明約束毋欲速毋擾民毋浪戰中伏  
毋急進省城每克復一府一縣必慎擇官吏招  
集流亡舉行屯政鼓厲團練搜捕匪首急善後

之圖以顧官軍後路為得寸得尺之計務使貴  
東一律肅清再圖他勦如此分路齊進節節打  
通定成破竹之勢縱令事無近功而勦辦機宜  
似莫要於此臣仍當隨時察度軍情諄囑諸將  
相機辦理以期仰慰

聖懷所有遵

旨籌派黔各軍分路進勦緣由謹繕摺由驛馳陳  
伏乞

皇太后

皇上聖鑒訓示謹



奏

應造天津剝船請解銀代辦摺五年二月二十八日

奏為滬陳湖南應造天津剝船事多窒礙籲懇

天恩俯准變通舊章提銀解直就近購料造辦以歸

妥速仰祈

聖鑒事竊照上年接准戶部咨奏准飭令江西湖北  
湖南排造剝船一千隻以資漕運當因湖北湖  
南兩省各應造船三百三十三隻所需內外銷  
工料運費為項甚鉅無款可籌經督臣官文會  
同湖北撫臣鄭敦謹暨臣瀚章

奏請暫緩造辦俟軍務稍平庫項充裕再行辦理

隨准戶部咨漕折一項係專解部庫折放俸甲  
之款若酌量借充船費自不致令該省為難查  
湖南應解同治元年折漕銀二萬兩迄今未據  
解部應由該督撫儘數提用並於應解本年折  
漕銀內酌提銀兩趕於近水處所設廠購料尅  
期興工力求妥速並令揀派幹員專司其事以  
期迅速萬勿稍延致誤等因具

奏奉

旨依議欽此欽遵轉行藩司糧道遵照辦理去後茲  
據藩司石贊清署糧道王葆生會詳稱前項剝

船事關漕運要需自應妥速遵辦惟查今昔情形不同實有空礙難行之處不得不縷晰陳明湖南辰沅永靖各屬原係產木之區近因苗教各匪疊次竄擾樹木多被砍伐價值倍於往時奉撥之項斷不敷用此時購料庀材甚屬不易一也從前木植平賤內銷之外尚須外銷銀五萬餘兩大率攤捐各屬近日錢漕積弊剔清州縣率皆苦累若再攤捐不肖者虐取諸民潔己者虧挪公項勢所必然若作內銷動項格於定例恐難邀准二也剝船由河運送從前河道通

暢之時尚須二三年始至天津聞上年漕糧試  
辦河運至今尚未回空此時運河未能一律深  
通運送剝船勢必節節阻滯曠日持久不無損  
壞難期適用三也剝船運津經歷數省現聞檢  
逆於鄂豫蘇齊各省竄擾無常剝船三百餘號  
每隻水手四五人長途不靖應募乏人即令勉  
強募足一聞警信必致逃散船隻徒資盜寇恐  
礙大局四也該司道反覆籌商與其拘泥成例  
事屬難行不若量為變通以收實用該司道在  
天津服官六載深悉地方情形目擊製造海船

貨船木料多出自關東並無缺乏之虞價值亦非過昂以造辦剝船例價計較尚足敷用且自外洋通商以後大沽北塘等處海船十減五六木料更屬有餘請將奉飭酌提漕折銀兩委員解赴天津就近購料排造以期迅速而免遲滯等情請

奏前來臣查此項剝船歷由湖南分造如果事無窒礙自應趕緊造送無誤漕運何敢畏難推諉請改舊章唯據該司道查明木植之缺乏價值之倍昂加以運道阻滯解送艱難以及外銷經

費之派累沿途寇盜之堪虞種種情形迥異往時照辦必致貽誤天津地方關東木料既可足供採辦價值不昂若解銀赴津就近排造較之由楚遠道造送省便既多難易亦殊似此量為變通庶幾費不虛糜事歸實濟相應奏懇

天恩俯准將湖南應造剝船三百三十三隻酌提漕折銀兩解赴天津由直隸督臣委員就近購料排造在湖南既免長途委解之難而直隸亦可供臨時轉運之用實於漕運有裨如蒙

俞允即當將部撥漕折銀兩委員趕緊解直以便造

辦理合會同大學士一等果威伯湖廣總督臣  
官文恭摺具

奏伏乞

皇太后

皇上聖鑒訓示謹

奏



--	--	--	--	--	--	--	--	--	--

奏覆黔省軍務情形摺 五年六月十八日

奏為欽奉

寄諭恭摺覆陳仰祈

聖鑒事竊承准軍機大臣字寄五月二十九日奉

上諭張亮基奏黔省餉絀兵單防勦不敷分布著兆琛恪遵前旨會同周洪印天柱之師由鎮遠等處迅速進兵仍嚴飭李元度一軍由銅仁進取與黔省各營聲息相通併力會勦應需餉銀即著李瀚章於欠解黔餉內源源撥解等因欽此仰見

皇上履懷邊徼至意 臣疊據貴州藩司兆琛稟報清

江逆苗出竄官兵擊退現竄朱家場並分竄湖南晃州邊之晏家寨等處當於五月二十二日二十四等日兆琛先後派兵馳赴玉屏親率全隊於二十五日入黔扼要截勦經該藩司自行具摺

奏明在案又據已革浙江臬司李元度稟報五月二十六日六月初二初三等日全軍由銅仁拔赴石阡府印江縣交界之平地場距大小壘賊巢十餘里又據總兵周洪印稟報江口壘逆首陳大六李如松等糾黨據壘意圖抗拒又清江

台拱逆苗一股出桃場一股出界牌窺伺楚邊  
當派知州羅建章遊擊周大定等軍分投堵勦  
乘勢并進周洪印於六月十六日親督大隊由  
天柱進兵先圖江口陳李二逆若奪此壘即進  
攻寨頭各等情竊查黔楚交界逆苗自來難辦  
嘉慶年間銅仁府石柳鄧之變其時兵力全盛  
將帥材武勦辦數年之久糜餉巨萬迄以將就  
歲事兵罷而苗仍熾又用兵數年方始肅清近  
年田興恕韓超旋勦旋叛甚至截餉戕官逆燄  
益張比皆前事之鑒也故臣於西征諸將諄諄

告誡弗遽以克城奪隘為功務求萬安而後前進業於二月二十七日摺內詳細陳之署貴州撫臣張亮基身任時艱不得不

奏催援兵急為戡定之計臣以為如瘍醫之治瘍必攻去腠裏之毒始無腐潰之慮若僅治其表終恐內毒伏鬱一發而不可收拾且苗教二逆名目殊而聲氣一攻苗則教應攻教則苗應乃一定之勢臣飭李元度一軍專辦教兆琛周洪印兩軍專辦苗三路並舉使苗教不能互救而周洪印兼顧楚邊四五兩月逆苗時出時伏亟

須嚴密防禦兆琛李元度布署未定均未便遽  
行深入甫於近日先後進兵實亦萬不得已之  
情形昨准張亮基將

奏調兆琛前赴荔波一片抄稿咨會到臣似未悉  
臣籌畫之苦衷現在荔波於四月間官軍收復  
應仍勦清台不得中輟伏願

皇上俯採芻蕘責令兆琛李元度周洪印以漸圖功  
不期速效當可圖報於萬一此臣朝夕躊躇嘗  
欲堅持初議而不敢遽請者也至諸軍餉項臣  
自三月至五月共解過兆琛銀八萬九千餘兩

又共解過李元度銀七萬六千餘兩於五月二十七日

奏明在案以後仍飭軍需局按月趕解斷不至稍分畛域所有欽奉

寄諭恭摺覆陳緣由謹繕摺由驛五百里馳

奏伏乞

皇太后

皇上聖鑒訓示謹

奏

李臬司元度攻復大小壘摺五年七月初一日  
奏為楚軍援黔大勝攻復大壘小壘現籌進勦荆  
竹園情形恭摺馳陳仰祈

聖鑒事竊臣於六月十八日將已革浙江臬司李元  
度專辦教匪貴州藩司兆琛總兵周洪印專辦  
苗匪次第拔隊入黔陳明在案茲據李元度稟  
稱六月初九日親抵思南府之平地場距大小  
壘二十餘里謀報荆竹園逆首知官兵將至派  
賊數千來援大小二壘該革員與記名留楚提  
鎮王永章熟商宜急分途進勦若待援賊入壘



益成負隅之勢必至曠日持久須一面分軍禦  
荆竹園援賊一面直攻壘賊是夜親督各營銜  
枚疾馳驀越萬山猱升而進抵大壘對山勘悉  
大小二壘並相距不遠之天台寺賊營十數座  
綿亘十餘里小河三面環繞尤以大壘為最高  
最險遂排列礮山礮先攻大壘正在轟擊間忽  
援賊大至一踞天台寺後山一趨大壘南卡該  
革員前派分禦之軍因路窄難施大隊扼險守  
往使賊不能聯絡而派紮石阡之候選知縣李  
光燦聞戰率輕騎前來助陣先是五月二十九

日何家寨圍首擒送賊謀三名到營內有吳洪起一名係偽招討大元帥正明侯伍永富之親卒伍永富者即大空賊帥也有投誠之意參將許得勝當將吳洪起保釋持印諭偕入賊巢曉以順逆伍永富尚慮官軍未必遽到遲疑未決至是見轟攻甚猛勢不能支急令吳洪起皂水過河乞降該革員派候選都司喻科癸帶大旗十人亦皂水入巢諭令合攻荆竹園援賊乃許將功贖罪伍永富得諭喜躍倒戈夾攻時援賊為偽李侯力拒不退而大空舊有荆竹偽元帥

楊大老冒三老冒及榆樹灣逃賊袁老滿等各  
紮一寨監視伍永富之軍遽見伍永富助順大  
駭奔逃賊陣大亂官軍拋擲火彈燒斃賊匪數  
百名滾巖落箐死者又數百名大壘天台寺同  
時克復楊大老冒等均死亂軍之中經伍永富  
辨識并從尸身取出偽印偽令旗偽招諭等件  
繳驗追賊八九里始收隊伍永福跪接官軍入  
壘安撫降衆傳令薙髮呈繳軍器派軍分紮大  
壘天台寺等處擬乘勝進攻小壘而伍永富跪  
求暫緩一宿率令歸降次日黎明小壘偽元帥

張宏權果叩營伏地投誠於是附近各巢皆反  
正復派軍分紮小壘安撫如前是役也計共解  
散被脅男女二千餘名奪獲槍礮刀矛八百餘  
件此六月初十十一等日擊敗荆竹園援賊連  
復大壘小壘及天台寺賊巢之實在情形也迭  
據稟報前來臣查荆竹園為教匪第一堅巢大  
小壘又荆竹園第一緊要門戶山勢周遭四十  
里千仞懸巖一水旋繞上有土田二百畝東西  
均止一路可通自山脚至頂路各六七里石卡  
八九重奇險萬狀從前貴州派總兵金泰文沈

宏富等勦辦兩年之久大小數百戰未能得手  
李元度冒險出奇力爭先著斃援賊如拉朽奪  
堅巢如摧枯實為入黔之師戰功稱首大小壘  
外尚有從賊之壘如高家廟席家山馬鞍營大  
園子等處二三十巢均須節節掃平散賊黨而  
孤賊勢乃可進攻老巢仍須勦撫兼施妥為布  
置以清後路臣飭該革員在壘暫駐俟後路各  
事宜辦有眉目再為搗穴擒渠之計此次尤為  
出力之留楚記名提鎮振勇巴圖魯王永章擬  
請

交軍機處記名專以提督遇有缺出先行請

旨簡放同知銜即選知縣李光燦擬請免選知縣以

同知直隸州知州留於貴州即補花翎儘先參

將前署貴州柳霽營游擊許得勝擬請以副將

升用先換頂戴花翎游擊銜候選都司喻科癸

擬請以游擊歸湖南即補並加參將銜其餘員

弁兵勇仰懇

天恩容臣擇尤保獎以昭激勸至臣前欽奉四月十

八日

寄諭李瀚章片奏請賞還李元度原銜頂戴等語著

俟革員立功後再行奏請等因欽此欽遵在案現  
在已革布政使銜浙江按察使色爾固楞巴圖  
魯李元度審機度勢冒暑涉險出入羊腸鳥道  
中力奪堅壘實屬果敢任事謀勇兼優可否  
賞還原銜頂戴之處出自

逾格鴻慈謹會同大學士一等果威伯湖廣總督臣  
官文繕摺馳陳伏乞

皇太后

皇上聖鑒訓示謹

奏

援黔獲勝並添募水陸新軍摺

五年七月二十  
五日

奏為彙報援黔勝仗並現在添勇籌防情形恭摺

馳陳仰祈

聖鑒事竊臣於七月初一日將已革浙江臬司李元

度攻克大壘小壘並貴州藩司兆琛思州之捷

陳明在案教匪一股自失大小二壘即派悍賊

數千分守各處旋有苗匪自施秉竄至天印攻

破民壘又圍攻楓香坪救世坳萬福壘分股攻

撲馬上坪平旺各寨以為教匪聲援經候選知

縣李光燦奮擊該逆敗竄回巢六月二十三日



附近大小壘之高家田郝家田響水塘柴家壩  
豌豆土五處賊巢見官軍勢盛皆赴李元度營  
前泣訴被脅苦狀李元度諭以速擒監守老賊  
贖罪二十四日整隊而前賊果捆殺老賊薙髮  
繳械二十五日甘家寨密約投誠二十六日生  
擒老賊雷得勝據供賊以全力守馬鞍營席家  
山大園子三寨三寨者荆竹園第三重門戶也  
二十七日分三路進兵李光燦銳字營先克席  
家山章字營繼克大園子李元度親督貴字營  
見兩處得手勇氣十倍併力銳攻復克馬鞍營

於是楓香坪老鷹巖太山壘月亮巖黃鱔田關  
牛洞蝦蟆場亢家巖水塘哨溪高橋十一寨老  
賊焚巢遁歸荆竹園官軍進紮十二山自十二  
山以東一律掃蕩此李元度一軍勦教大勝之  
情形也苗匪一股自思州之敗知官軍決計深  
入以大股阻截驛路以散賊分布要隘為負隅  
之計先是六月十九日距天柱縣二十里之江  
口壘賊首陳大六旬賊攻新場之營周洪印派  
都司李茂昭馳詣坡旺擊敗之同日逆賊數千  
由順洞竄鹿洞河欲入江口壘併力拒守又經

游擊周大定馳詣小艾擊敗之並擒斬著名渠魁送花一名二十四日北琛派營運紮鎮遠府衛兩城留千總鄭大成一軍守尖峯山為鎮遠後繼驛路屯賊不料官軍驟至二十八日由巖門岔溪一帶奔竄鄭大成出擊賊即敗走二十九日鴨溪田壩等賊約二千餘人一竄大橋知府陳昌運等迎擊一竄文德關副將吳勝金等迎擊賊勢不支四散狂奔北琛慮軍士疲乏派總兵黃秀林由青谿赴鎮遠助戰七月初二日抵鎮城賊由鴨溪擁衆二三千猛撲衛城營盤

黃秀林率都司鄧第武等設伏以待斬馘無算  
並用火箭焚燬賊巢初四日兆琛知鎮遠無賊  
即由青谿馳抵印水正約會周洪印由長吉瓦  
寨會攻初九日苗由高寨婁寨木界分三股竄  
至青洞橋頭土地坳等處欲撲印水城總兵黎  
得亮等分投截勦賊敗回巢此兆琛周洪印兩  
軍勦苗迭勝之情形也疊據稟報前來各軍攻  
勦接仗詳細情形除由兆琛分晰具

奏外臣查李元度紮十二山距荆竹園不過二十  
里兆琛紮印水距寨頭不過四十里周洪印長

吉之軍距寨頭亦僅三十五里均可望及時進  
取惟荆竹園背臨牂牁江李元度所勦係江內  
教匪而江外教匪上抵遵義綏陽桐梓正安下  
抵湄潭龍泉思南安化婺川皆屬賊巢必須斷  
其來援之路庶攻勦較易現籌添設舢板戰船  
四十隻扼守上下江使江內江外之賊聲氣隔  
絕又據李元度稟稱到處置守兵單難資分布  
經臣准令先後添營總計續募水陸新勇二千  
六七百人所需餉項在前奏每月三萬六千兩  
之外而黎平股匪糾約三丙革夷各苗分三股

而出已至古州之空申空列九歪烏路等處欲  
撲王寨天柱該處與湖南之靖州會同毘連不  
能不先事預防楚已無兵可派臣與兆琛往返  
函商每月由楚協餉三千兩檄交兆琛派署古  
州鎮劉元勳就地練勇堵禦並由兆琛撥營協  
守以期鞏固邊疆稍慰

宵旰憂勤於萬一抑臣更有進者川省原有防軍駐  
紮酉陽秀山以防江內江外教匪侵逸現楚軍  
進攻荆竹園老巢江內可以無虞臣愚擬請

皇上飭下四川督臣以防邊之師作為會勦之師即

由秀山或酉陽建瓚而下與李元度聲勢聯絡  
會商進勦庶幾更易得手是否有當謹會同大  
學士一等果威伯湖廣總督臣官文繕摺具

奏伏乞

皇太后

皇上聖鑒訓示謹

奏

援黔獲勝並楚邊防堵情形摺

五年十一月二十一日

奏為彙報援黔勝仗並逆苗出竄楚邊官軍擊退  
現仍嚴密防範情形恭摺馳陳仰祈

聖鑒事竊臣於七月二十五日將三路入黔之師疊  
次收復地方陳明在案自後瘴疫盛行各營皆  
病新授湖南藩司兆琛一軍於七八兩箇月督  
率未病之勇攻克橋頭寨里並鎮遠府衛兩城  
親紮印水調度前進該逆遽以大股圍撲鎮營  
其時防軍多半染疫不能抵禦潰圍而退派防  
之游擊鄧第武業經兆琛



奏參革職拿問臣以為鎮遠殘破之區賊既無所  
垂涎官兵難以久駐暫可緩圖仍飭北琛迅將  
病勇挑換精足規取寨頭適施洞口之苗出擾  
雷打墳將近馬鞍山龍頭坳一帶記名提督周  
洪印派提督武義山等敗之於鮎魚鋪地蒲界  
高海等處賊窰由款場回巢遂會同北琛於九  
月二十七十月十一等日攻克上德明下德明  
並附近响水高峯賊巢進逼頗洞屢報獲勝如  
果日內得手則寨頭失險攻勦較易此北琛周  
洪印勦苗之情形也前浙江臬司李元度一軍

駐紮大壘瘴疫尤劇猶能於七月二十五二十八等日攻克豔山紅水田溝馮家山茶樹灣等寨九月十八十九等日荆竹園教匪勾合清台逆苗同竄石阡府左路之焦園冷水溪等處即補司知直隸州知州李光燦遇賊於筆架山設伏而進將苗教二千餘衆擒斬殆盡十月初一初二等日復有逆苗出銅仁府之大坪場焚燒民壘游擊胡巨慶迎擊賊先期颺去現在疫氣漸退該營病勇亦皆挑換擬即進攻荆竹園此李元度勦教之情形也查苗教被勦窮蹙勢必

下竄楚邊圖掣官軍回顧正在檄飭布置間旋據各路稟報賊果由朱家場竄至田埂坪又由田埂坪分股竄向高樓坪小紅溪一帶距晃州僅數里已入楚邊鎮筭晃州麻陽同時喫緊經留防後路之道銜候選知府戈鑑迅率各營截擊署鎮筭鎮總兵祥慶辰永沅靖道楊翰調派兵勇扼紮要隘兆琛周洪印聞信各派一二營助勦賊不敢偏於十月二十五二十六等日由謝家橋竄抵銅仁北門外銅仁告急李元度恐糧道有礙派營援銅戈鑑亦率營馳至賊繞由

清水塘逕趨大興場竄入亭子關都司張開武等奮勇出擊賊潰竄唐家寨一帶該處係由鐵礦場回巢舊路邊地分投搜勦已無賊踪復據探報寨頭逆首有糾約九大白等逆分數大股出擾之謠未便因賊退鬆懈臣疊經諄諭沿途防軍遇賊卽勦固住前敵後路使兆琛周洪印李元度等軍不至牽綴得以併力滅賊仰副聖主拯民水火至意所有援黔屢勝並苗逆出竄擊退現仍嚴密防範情形謹會同大學士一等果威伯湖廣總督臣官文恭摺馳

奏伏乞

皇太后

皇上聖鑒謹

奏

彙報援黔獲勝並近日軍情摺九年二月二十九日  
奏為彙報援黔各軍勝仗並擊退出竄股賊現籌  
妥密布置恭摺具

奏仰祈

聖鑒事竊去年十月十一月十二月黔中戰事已先  
後由湖南藩司兆琛

奏報在案查兆琛自克頗洞十二月間總兵黎德  
亮將青洞賊棚焚毀本年正月間雪後分飭各  
軍來賊無備猛徧賊卡將南蛇壘一字梁馬鞍  
壘寨塘杉木壘小壘平耙瓦廠坪等巢穴踏平

并最險之寨滾攻破又連破轉水岩門董家溝等處共克大小壘寨十二斃賊無算餘賊遁竄此北琛一軍連勝情形也前浙江臬司李元度去年十二月初九日探聞荆竹園新添河西賊黨數千當加準備賊果出南東北三卡來犯各軍奮擊先將北卡一股擊敗東卡繼之均追入卡門兩重忽瘴霧大起南卡十六里之羅家岩援賊七八百從大霧中抄出官軍之後兵賊莫辨幾至大挫提督王永章邊曉堂率部接應仍將敗賊驅入十內查點弁勇頗有傷亡嗣後賊

屢出屢被擊退旋克盃家岩本年正月間賊不  
得出卡耕作拚命狠爭無日不戰現擬長圍以  
困之此李元度一軍連勝情形也先是苗教勾  
通分擾各軍後路以圖牽制撲銅仁時李元度  
派軍回勦賊受創退踞小江口本年正月間由  
太平場竄亞魚場距晃州二十里而思州屬後  
山洞另股由鹿洞河出新場趨米貝逼近沅州  
天柱屬之青溪石埂等逆出王寨渡河竄黎平  
之銀洞蔓延密洞藕洞擾及靖州之排洞一帶  
北琛迅撥龍武等軍回顧並飭候選道戈鑑分



投堵勦提督周洪印適患病請假至沅飛商北  
琛將該提督所部暫行抽回派總兵羅章才進  
勦亞魚場該逆由思州屬之龍領坳敗竄回巢  
總兵李金榜勦排洞賊遁小江與王寨合股回  
巢戈鑑在晃州賊撲晃廳不得逞向中寨禾灘  
竄去米貝之賊竄黃壇橋將撲沅城即選道羅  
建章駛至賊退竄冷水溪一帶戈鑑軍抵原神  
場賊撲營擊敗之退竄羅岩江又敗之遂取道  
會同與李金榜會齊靖州屬之下鄉塘湖賊勢  
正熾官軍至則退向地笋地貝經各軍擊勦由

王寨渡河回巢此賊竄楚邊各軍擊退情形也  
迭據稟報前來查該逆因官軍進勦紛出以擾  
後路黔楚錯壤路路可通雖不能遽為楚害而  
農事方興亟須防護李元度進逼荆竹園老巢  
勢難暫撤兆琛以後路緊要派周洪印所部令  
其回勦竄賊該軍之力稍單只可暫圖畫守臣  
飭令就地嚴密設防不必遽進周洪印肅清沿  
邊餘孽出紮天柱以分賊勢而衛春耕斟酌情  
形再議進止至入黔各軍水陸運糧皆在數百  
里以外轉運之路莫非該逆出沒之路若冒昧

前進而後路不繼軍行一日無糧即難設想兆  
琛周洪印現議仿昔人屯田之法將附近上下  
德明及長吉瓦寨絕產一律募丁開墾如果辦  
有成效即可藉以贍軍兼議添築城堡大軍能  
進若干遠望堡亦沿築若干遠不專為護坐計  
而於坐政尤有益 臣以為辨黔賊之法莫良於  
此迅囑舉辨冀副

皇上屢念邊陲至意所有援黔各軍勝仗並擊退下  
竄股賊現籌安密布置緣由謹會同署湖廣總  
督臣譚廷襄恭摺馳

奏伏乞

皇太后

皇上聖鑒訓示謹

奏

--	--	--	--	--	--	--	--	--	--	--

覆陳兆琛剿辦黔苗情形摺日六年三月二十六

奏為遵

旨據實覆陳並現籌布置情形恭摺奏祈

聖鑒事竊臣承准軍機大臣字寄同治六年二月十

一日奉

上諭據左宗棠奏湖南布政使兆琛素不得力諱敗  
為勝虛糜餉項及各省捐輸請飭湖南撫臣將該  
軍分別撤減另擇勇幹大員代其統領以收餉節  
兵精實效各等語兆琛援黔之軍屢報勝仗是否  
兆琛有諱敗為勝情事抑或李元度等所報不盡

可信該藩司雖由李瀚章派往而該撫受恩最重若稍有迴護致使軍餉虛糜黔事無益何以自安著即查明據實奏聞並著酌量減撤或另派得力大員統帶以收實效劉焜業已起程即著於接篆後酌度情形妥籌辦理庶於黔事有益欽此聞

命之下感悚難名伏查陝甘督臣左宗棠所奏係為大局起見臣何敢稍涉迴護惟該督臣相距遠遠所聞未確不能不為

皇上詳細陳之兆琛自奉

旨升授貴州藩司臣於去年三月間奏派帶兵入黔

與記名提督周洪印前浙江臬司李元度為三路之師除李元度係貴州撫臣張亮基奏奉諭旨赴黔周洪印本在湖南西邊防堵外兆琛先於咸豐六年至十年疊在楚西剿賊並越境勦辦黔逆克復地方有功升任湖南撫臣駱秉章先後奏保由縣令游擢道員其時左宗棠在駱秉章幕中代辦軍務章奏該員得力與否知之必詳臣無庸復贅一詞至此次進兵以來去年夏秋疫癘盛行各軍不服水土十病六七臣甚危之而兆琛等堅忍耐苦仍挑換病勇節節圖進



並無遠巡之意剿苗剿教各深入數百里兵事  
進為勝退為敗北琛周洪印李元度有進無退  
是即勝仗之實據惟去年八月間賊偷襲鎮遠  
府衛兩城北琛所派防軍潰退該藩司於十月  
二十一日自行附片陳奏在此此外別無敗潰  
情事左宗棠謂其諱敗為勝或即指此李元度  
去年十二月間進攻荆竹園南東北三卡均攻  
入第二重卡門正欲搗穴擒渠旋因賊乘霧抄  
官軍之後兵賊莫辨未能得手陣亡弁勇二三  
百名將士競前立功與畏葸挫衄者有異臣亦

於本年二月二十九日奏明在案從不敢代為  
諱飾若夫糜餉項以事黔此議初之自臣從前  
湖南只防不勦臣查楚西與黔緊鄰延袤千數  
百里萬徑千蹊隨在皆可闌入黔省苗教變亂  
十餘年矣各路愈竄愈熟兵從官道堵截賊自  
山僻去來備左遺右顧後失前有必防之賊而  
無一定可防之路即有善防之法亦總無撤防  
之期不得已而計出於勦乃一入黔境即須步  
步設防兵分力單進勦已閱一年貴東迄未掃  
盪此臣所日夜焦灼不待左宗棠之奏而早深

自刻責者也溯查嘉慶初年正極盛之時而黔  
賊一呼至煩川滇楚粵六七省之兵力餉力十  
年而後戡定以今較昔時勢之艱難不啻倍蓰  
區區一楚省之兵餉遽欲謀黔臣殊不自揣量  
幸賴

聖恩高厚不責速效量力而進或於黔事漸有裨益  
諭旨飭臣酌量減兵臣愚以為勦則有增而無減防  
則可稍減而不可太減李元度已徧荆竹園擬  
長圍以困之此一軍斷難議減仍須於銅仁酌  
添防軍以顧後路周洪印現回楚邊勦辦竄賊

自應遵體

聖諭飭將所統一萬人裁去二千挑留精壯分布湖南之沅州晃州靖州一帶願住腹地然後由貴州之天柱斟酌進取北琛正在酌裁間欽奉三

月初三日

上諭北琛現稟商李瀚章酌量增兵以資調度即著該撫迅速增募數營揀派得力將弁統帶交北琛調遣趙煥聯席寶田告假在籍並著李瀚章另募勁軍飭該二員統帶分防邊境以便前敵之軍一意勤賊等因欽此仰見

皇上知人善任至意當即恭錄轉飭北琛不必裁勇  
暫就貴州之八弓以至思州一帶紮住相機辦  
理前雲南臬司趙煥聯適在省城與臣接晤據  
稱年逾六旬多病難以涉險係屬實情未使勉  
強前貴州臬司席寶田穩練可靠臣曾與商帶  
兵之事該員尚不固辭荷蒙

聖明指示另派統帶大員即擬以席寶田接替北琛  
第現交夏令黔中瘴氣中人輒病去年舊轍可  
鑒非進兵之時俟新撫臣劉崐到任如仍以勦  
為防將周洪印裁勇騰出之餉飭席寶田於入

秋後另招六七千人繼進必臻妥洽北琛現係  
湖南藩司與去年黔藩辦黔事微有區別本職  
責任綦重未可久於在外屆時或令席寶田專  
典兵事飭北琛回省接受藩司篆務庶於黔楚  
均無貽誤抑臣更有慮者黔省兵餉兩空斷不  
能遙聯聲勢別省亦無可撥之兵多協之餉楚  
以獨力支撐只覺其難未覺其易伏願  
皇上格外寬假不遽迫以功效俾帶兵之員各盡所  
長得寸則寸得尺則尺庶幾易有頭緒劉崐計  
當不日抵楚臣於會晤後必舉所聞所知一一

詳告以待抉擇仰副

宵旰憂勤於萬一所有遵

旨據實覆陳並現籌布置情形謹繕摺馳陳伏乞

皇太后

皇上聖鑒再臣欽奉

上諭後遵即分別確查並檄飭裁勇布防務求妥善

是以覆奏稍遲合併陳明謹

奏

奏報到任日期摺六年四月二十八日

奏為恭報微臣接署督篆日期仰祈

聖鑒事竊臣於四月十三日交卸湖南撫篆十八日  
起程赴鄂當經恭摺

奏報在案茲於本月二十五日抵鄂二十六日准  
前署湖廣總督臣譚廷襄飭委武昌府知府黃  
昌輔督標中軍副將鳳昌將總督關防暨

王命旗牌文卷等件齎送前來臣當即恭設香案望  
闕叩頭祇領任事伏念鄂省自去冬以來捻逆疊  
竄入境撫臣曾國荃督飭各路兵勇馳勦躡擊



賊屢受大創而為日過久江北各屬地方不無  
蹂躪凡籌餉籌兵察吏安民一切均關緊要臣  
惟有竭盡愚忱與撫臣和衷商辦以期仰答  
高厚鴻慈於萬一除循例恭疏

題報外所有微臣接署督篆日期謹恭摺具  
奏伏乞

皇太后

皇上聖鑒再臣經過地方南省雨暘時若民情安帖  
北省去冬至今未得大雨現二麥已收新秧未  
插農民望澤甚殷急盼甘霖速布合併陳明謹

奏



鄂省防守情形並北岸堅壁清野摺十六年五月十九

奏為敬陳鄂省現在情形會商籌辦防守乘捻逆遠竄督飭北岸各州縣添修寨堡力行堅壁清野恭摺馳陳仰祈

聖鑒事竊捻逆由棗陽趨犯豫境鄂軍布置防守臣

國荃二十六日自德安起程回省與臣瀚章面商一切業於四月二十五日馳

奏在案嗣因捻逆出境遠颺臣國荃一面飭令鄂軍俱赴防所一面由雲夢孝感漢川漢陽等屬二十八日馳抵省城沿途經過之區詢知昔稱

澤國今皆苦於亢旱時過芒種未能分秧民情  
洶洶臣等彌切惶悚五月以來率同司道虔誠  
步禱兼旬雖時沾霖霖究未渥沛甘霖各府縣  
所報大率相同深恐大兵之後繼以凶年則安  
民禦寇殊鮮長策惟有恐懼修省冀迓庥和庶  
鄂省尚堪措手所尤慮者鄂省北岸與皖豫秦  
三省接壤綿亘二千餘里捻逆疊次闌入此勦  
彼竄避實乘虛往往視無備之鄉更肆蹂躪上  
年經前督撫臣飭令北岸各州縣舉修寨堡民  
情尚多觀望臣等嚴飭各屬於有寨之處切實

加修無堡之區趕緊添築並扎委署安襄鄖荆  
道唐協和候補道洪璠前德安府知府董紹昌  
升用知府吳廷華督率各委員會同地方官紳  
分投辦理次第興工統限秋間一律告竣為未  
雨綢繆之計臣等復思堅壁之法固責民出力  
自衛然必官為經理未事之前給以守具臨警  
之際調兵救護事平之後准其擇優保獎作其  
能守之氣而堅其固守之心凡濫紳劣衿不准  
謀充堡長頒發條約使家喻戶曉賊至運糧入  
堡賊退出寨照常營生仿古人聚則為兵散則

為農之意藉輔兵力之不逮如或刁民違抗或  
地方官虛應故事臣等照例究辦隨時叅撤以  
示懲儆庶經久遠而免流弊除飭該府縣一律  
認真籌辦並派鄂軍分防各邊隘外所有鄂省  
北岸各州縣添修寨堡力行堅壁清野各緣由  
謹合詞恭摺由驛馳

奏伏乞

皇太后

皇上聖鑒訓示謹

奏

合肥李勤恪公政書卷三目錄

湘廣  
楚湖

男經畬經江澧編輯

滇淮  
濤淦

擒逆竄入東境派軍助守運河摺 六年六月初六日

覆請仍飭豫省防守紫荆關摺 六年六月十七日

奏派姜玉順赴豫扼守紫荆關摺 六年七月初十日

裁撤霆軍接招霆峻新營摺 六年七月二十八日

婁雲慶一軍暫難速往東省摺 六年十月二十六日



覆陳修約事宜摺 六年十一月十二日

鄂省軍需竭蹶懇留本年京餉摺 六年十二月初九

叩謝 天恩摺 七年正月十八日

擬將紫荆關防軍檄調回鄂摺 同日

天津練餉酌運制錢並籌議鼓鑄摺 七年正月二十

巡閱海塘工程情形摺 七年五月二十四日

乍浦頭圍仍難設關徵稅摺 七年七月十八日

織務銀兩勢難悉數解濟摺 七年八月二十九日

奏覆裁併釐卡摺

捻逆竄入東境派軍助守運河摺

六年六月初六日

奏為捻逆深入東省鄂中防務較鬆現籌派軍越

境助守運河西堤恭摺仰祈

聖鑒事竊自任賴竄豫鄂軍布置防守並飭北岸各

州縣趕修寨堡經臣等於五月十九日

奏報在案嗣疊准湖廣總督臣李鴻章咨捻逆入

豫避兵疾趨突入山東曹縣分擾定陶城武鉅

野五月十二日由東平之戴廟搶過運河迤東

十四十五等日逕竄泰安等處聞信之餘彌深

憂憤先是李鴻章檄調劉銘傳等軍分赴曹單

豐徐舊河堤聯絡扼紮並函商皖豫鄂三省各  
抽派萬人赴堤協守騰出遊擊之軍冀威賊於  
黃運之交臣等正調撥間忽又接李鴻章緘告  
局勢遽換所商抽派之軍擬協守東蘇運河西  
岸杜其回突而今劉銘傳潘鼎新等於東三府  
步步緊逼制賊奔竄擠入登萊海隅以圖聚殲  
臣等查劉銘傳潘鼎新昔年曾建此策時兩江  
督臣曾國藩以東省完善不忍令其蹂躪因勅  
畫守運東之議兩年以來極有成效然而兵力  
之不齊人事之利鈍往往出於意料之外現東

省既經賊擾劉銘傳等復申前說李鴻章以為  
因時制宜得辦且辦亦係萬不獲已之苦衷臣  
等力所能為亟應共維大局現酌調派防黃安  
各隘記名提督譚仁芳馬步十一營派防麻城  
等處記名總兵劉維楨馬步十四營兩軍合而  
為一均由河南光羅息縣馳赴歸德府聽候李  
鴻章調遣並飭湖北軍需局籌湊該二軍一月  
餉銀八萬餘兩即日令其啟行並一面遴派妥  
員前赴河南周口歸德一帶察看適中之地設  
局轉運庶幾無虞匱乏就目前情形而論鄂東

幸尚無事所可慮者秦桧屢挫不振有回竄豫  
鄂之謠鄂之西防未可鬆勁幸陝甘督臣左宗  
棠五月十三日由襄陽取道新野南陽趨潼關  
與幫辦軍務劉典出荆紫關之軍犄角併進迎  
頭攔擊或不至有鋌走之虞如再守住運河西  
堤東賊不得復出非徒鄂省之幸即皖豫皆受  
其福萬一仍未辦到致賊逸出亦惟有與李鴻  
章會商防勦仰副

聖主拯民水火之至意再鄂疆亢旱臣等率屬虔誠  
祈禱已於五月二十日至六月初三日疊獲澍

雨五六寸各府州縣稟報大略相同節逾夏至  
氣候稍遲雜糧晚禾尚堪補種合併陳明以慰  
宸廛所有檢逆深入東省鄂中派軍越境助守運河  
西堤緣由謹合詞恭摺馳陳伏乞

皇太后

皇上聖鑒訓示謹

奏

--	--	--	--	--	--	--	--	--	--

覆請仍飭豫省防守紫荆關摺  
六年六月十七  
奏為欽奉

諭旨恭摺覆陳仰祈

聖鑒事竊臣等於六月十五日承准軍機大臣字寄

六月初七日奉

上諭李鶴年奏豫軍出境堵剿並籌防西路一摺張  
總愚股匪被勦窮蹙竄豫實在意中豫省防兵祇  
能顧商雒一路紫荆關門戶洞開不可不預為防  
備著李瀚章曾國荃酌派重兵嚴密堵禦等因欽

此仰見



聖謨廣運防患未然之至意臣等查鄂省前准李鶴  
年咨擒逆撲過運隄深入山東臨朐諸城一帶  
商調鄂軍助守運河西堤杜其回竄當派記名  
提督譚仁芳記名總兵劉維楨統帶馬步二十  
五營前往聽候李鴻章調遣業於六月初六日  
奏明在案鄂軍經此次抽派後正慮沿邊遼闊兵  
力不敷分布特以大局所關不敢稍存畛域之  
見至西路秦捻臣等亦甚顧慮唯接左宗棠咨  
會覆奏入關籌辦情形摺內聲明張總愚屢敗  
渡渭向西北而走左宗棠出潼關扼竄河南之

路幫辦軍務劉典出荆紫關扼東南竄豫竄鄂  
之路甘肅提督高連陞溯漢水而上由鄖陽以  
抵洵陽之蜀河口登陸北達西安扼由興安漢  
中竄蜀竄鄂之路是左宗棠入關各軍皆屬迎  
頭擊勦臣等用敢一意派軍東行不為首尾兩  
顧之義所惑方李鶴年奏請鄂軍代守荆紫關  
之時蓋尚未知鄂已派重兵赴豫東也現在鄂  
中既無可調之軍而荆紫關距鄂城二千餘里  
道途遙遠人地俱生且軍行越境彼處無大將  
就近督率亦恐於事無益臣等再四熟籌與其

事後貽誤不若先事陳明惟有請

旨仍飭河南撫臣李鶴年俟鄂軍譚仁芳劉維楨等  
馳抵東境防守運堤後仍於豫省酌量抽撥一  
軍馳防荆紫關地勢既便呼應較靈一轉移間  
於東西兩路防勦均有裨益所有欽奉

諭旨恭摺覆陳緣由謹合詞具

奏伏乞

皇太后

皇上聖鑒訓示謹

奏

奏派姜玉順赴豫扼守荆紫關十六年七月初十日

奏為遵

旨派兵赴豫扼守荆紫關恭摺覆陳仰祈

聖鑒事竊七月初六日承准軍機大臣字寄六月二

十七日奉

上諭李瀚章曾國荃奏請飭豫省撥軍馳防荆紫關

一摺張逆盤旋渭北蓄意東趨荆紫關一路自應

派兵扼守該署督等何得以道途遙遠軍行無大

將督率等語意存諉卸所有荆紫關一路仍著李

瀚章曾國荃迅派得力人員統帶勁兵星速前行

認真扼紮儻該署督等堅持己見徒藉口於無兵  
可撥致捻蹤乘間竄出蹂躪中原是該署督等不  
顧大局朝廷斷不能曲貸也等因欽此臣等欽奉  
之下惶悚難名伏念鄂省地廣兵單本無大枝  
勁旅堪勝西防重任者前於六月間撤麻城黃  
安之防派譚仁芳劉維楨馬步二十五營東赴  
濟甯助守運河西堤其西路則僅留唐協和姜  
玉順兩軍分防隨州襄棗一帶客兵如鮑超之  
霆營正在酌量撤留婁雲慶甫經抵鄂日內始  
行招募今奉

諭旨訓誨周詳臣等何敢稍存諉却再四思維於無  
可抽撥之中撤駐防隨州之記名提督姜玉順  
馬步十一營馳赴豫境浙川一路扼守荆紫關  
以防張逆回竄唯武員帶勇出境採買米糧往  
往與地方官紳難期呼應靈動臣等復商派湖  
北候補道王開福同往荆紫關照料該軍營務  
以期聲氣聯絡並諭令總局司道毋論何款先  
奏解姜玉順口糧銀四萬兩以利速行嗣後該  
軍月餉即解至襄陽分局轉運接濟惟鄂軍一  
再抽撥沿邊甚屬空虛且軍餉極絀之時設法

騰挪庫局為之一空京餉協餉解撥維艱臣等  
無任焦急所幸左宗棠之軍三路入關目前當  
抵秦中李鴻章籌辦膠河運河兩防計在張網  
羅以困賊勢似此情形仰仗

皇上威福東賊或難逸出西賊亦可攔截大局幸甚  
臣等不敢拘泥淺見專顧境內惟有勉力圖效  
以重西防仰副我

聖主思患預防之至意所有遵

旨派兵赴豫扼守荆紫關據實覆陳緣由謹合詞恭

摺具

奏伏乞

皇太后

皇上聖鑒訓示謹

奏



--	--	--	--	--	--	--	--	--	--	--

裁撤霆軍接招霆峻新營摺

日六年七月二十八

奏為裁撤霆軍十八營接招霆峻新營並挑留馬

隊籌給川資飭赴濟甯助剿恭摺仰祈

聖鑒事竊臣等先後准兩江督臣曾國藩咨提督鮑超傷病深重代懇回籍養病一摺欽奉六月十

八日

上諭著准其開缺回籍調理所部各營著記名提督婁雲慶接統以專責成等因欽此又欽奉六月二

十一日

上諭譚廷襄奏此軍人數較眾內多降勇一議遣散

勢必藉端索餉枝節橫生祇可議分不可議撤等語所奏不為無見著曾國藩李鴻章設法籌辦總期駕馭得宜毋滋事端等因欽此又准湖廣督臣

李鴻章咨欽奉六月二十七日

上諭譚廷襄奏鮑超一軍祇可議分不可議撤當諭令曾國藩李鴻章設法籌辦婁雲慶計可到營鮑超所部作何統率或即令該軍分扼荆紫關及另作調遣之處著曾國藩李鴻章迅籌妥辦等因欽此仰見

聖明燭照

指示周詳無任欽感查曾國藩前飭霆營裁撤馬步  
十八營令蘇州藩司丁日昌上海海道應寶時籌  
銀五萬兩解鄂補給遺勇欠餉其不敷之數議  
由湖北軍需督銷各局湊銀四萬兩一併解交  
霆軍營務處宋國永妥為辦理臣等復派記名  
道馮邦棟馳往幫同照料旋據馮邦棟等稟報  
霆軍馬步共三十二營業將春字五營親兵一  
營馬隊十二營清給口糧繳出鞍馬鎗礮軍火  
各項於七月初一初四等日一律遣撤完竣其  
勇丁或赴霆竣營應募或回籍歸農均尚靜謐

先是曾國藩函商十八營遣撤後其所留十四營仍交宋國永照料駐紮樊城預備緩急徵調婁雲慶於六月杪到鄂遵照曾國藩咨會章程在安陸府一帶募勇五千名曰霆峻營已於七月初間前往開招由鄂措給資費銀一萬六千兩計月內可以成軍中秋後即可移駐黃州訓練數月聽候曾國藩李鴻章調遣又據宋國永稟稱霆營所繳馬匹除疲瘦倒斃外尚多精銳若置之閒散殊為可惜臣等以東捻雖被圍圍凶馘尚熾非厚集兵力多備馬軍互相策應難

以制其衝突因一面飭令霆營原帶馬隊之記  
名提督唐仁廉等挑選驍壯戰馬一千匹酌留  
得力弁勇如數備帶鞍韉洋槍迅赴濟甯大營  
一面函商李鴻章酌令編立營制重整規模並  
籌解銀一萬兩發給該馬勇川資以利速行現  
在陝甘督臣左宗棠已入潼關鄂軍姜玉順十  
一營即日馳扼荆紫關是西路門戶可期穩固  
至於東省膠萊河防漸已辦成李鴻章函不日  
可以督師進剿仰仗

聖主威福鄂省東西兩路均可無虞得以撤去不易

撤之營藉慰

宸衷於萬一除咨會曾國藩李鴻章詳晰奏報外所  
有裁撤霆軍十八營甚為安靜接招霆峻新營  
並挑留馬隊籌給川資飭赴濟甯助勦各大概  
情形謹合詞恭摺馳

奏伏乞

皇太后

皇上聖鑒訓示謹

奏

婁雲慶一軍暫難速往東省摺

六年十月二十  
六日

奏為婁雲慶一軍現未整頓就緒暫難速往東省

據實覆陳仰祈

聖鑒事竊臣等於十月二十日承准軍機大臣字寄

十月十二日奉

上諭婁雲慶在安陸募勇五千現計早可成軍著李

瀚章曾國荃飭令該提督即日拔營馳赴東省歸

李鴻章調遣李瀚章等不得藉詞留鄂並著李鴻

章飛速迎提以厚兵力等因欽此臣等即應欽遵

照辦先是七月間由蘇鄂措給該提督資費銀



兩在安陸府一帶開招成軍移駐黃州訓練業  
於七月二十八日陳明在案惟查該軍半係霆  
營舊勇半係就地招募新勇在舊勇之習氣未  
除固須認真振刷而新勇之訓練未久尤宜加  
意整齊前准兩江督臣曾國藩咨開霆營未撤  
之十四營以九營歸提督鄧訓誥統帶以五營  
撥交婁雲慶統領飭令由樊城移赴黃州部勒  
如法期於一律改觀刻下尚未接鄧訓誥稟報  
自樊城拔隊日期此婁雲慶一軍其名已成而  
其實猶未悉成之情形也臣瀚章抵鄂後適臣

國荃回省因餉項支絀萬分遂會商酌撤營頭  
騰出月餉贍給出境各軍嗣派提督譚仁芳總  
兵劉維楨馳赴運河協守又派提督姜玉順赴  
荆紫關協防本省之存營無多邊圍之空虛可  
慮在臣等仰承

聖謨保鄰即以自保何敢稍分畛域藉詞留鄂致令  
東省有兵力單薄之憂惟該軍新集整理實未  
就緒營伍尚未合併難以遽賦啟行臣等除一  
面函詢曾國藩李鴻章查示前敵情形並一面  
飛囑婁雲慶俟鄧訓誥所部到黃安後趕緊訓

練聽候調遣外所有婁雲慶一軍現未整理就緒暫難速往東省緣由謹合詞恭摺覆陳伏乞

皇太后

皇上聖鑒訓示謹

奏

覆陳修約事宜摺

六年十一月十二日

奏為遵

旨豫籌修約謹抒所見逐條登覆恭摺密陳仰祈

聖鑒事竊臣於九月二十三日承准軍機大臣字寄

同治六年九月十五日奉

上諭總理各國事務衙門奏豫籌修約事宜請飭濱  
海沿江通商口岸地方將軍督撫大臣各抒所見  
一摺著曾國藩等俟總理衙門密函條說寄到時  
審時度勢妥籌萬全以濟時艱而副委任詳細覆  
奏毋得徒託空言原摺著鈔給閱看等因欽此旋

接准總理衙門密函條說臣悉心籌度竊維西人之為患垂數十年戰守撫和在

廷諸臣欽承

聖訓宏濟艱難固已算無遺策矣咸豐十年變出倉卒實我

朝二百年來未有之事猶幸轉危為安於無可如何之中為萬不得已之計暫時羈縻與之議款非中國之智力果不逮也亦時勢迫之使然耳自茲以後

朝政修明於上百官濯磨於下在事臣工時時存

報敵之心祇以中原未靖邊患方殷自強之謀不能無待外攘之策第可潛圖茲當換約屆期如請

覲

遣使銅綫鐵路以及內地設行棧內河駛輪船並販鹽挖煤各省傳教等事種種要約凡英法俄等國之狡情皆不出總理衙門所逆料迨來歲換約時虛聲囑喝在所不免有總理衙門諸臣權衡輕重隨時奏明一切仰決於聖心於其可許者許之其不可許者拒之未有不盡

美盡善也而乃

垂詢及於芻蕘遂使疎逖之臣與聞柔遠之政聞命之下惶悚難名臣忝任封圻今日之約章即異日之法守苟有一得之愚敢不共維大局謹就總理衙門函商各條不揣固陋逐一登覆繕具清摺恭呈

御覽敬備

廷臣採擇除函復總理衙門外所有遵

旨籌議緣由謹恭摺密陳伏乞

皇太后

皇上聖鑒再臣因辦理本屆丁卯科武闈鄉試甫經  
完竣是以繕摺稍遲合併陳明謹

奏





謹將總理衙門函商各條逐一登覆繕具清摺  
恭呈

御覽

一議請

覲一條查外國使臣本有隨班朝賀之例各外國

欲瞻

殿陛亦足見向化之誠當今

聖主幼冲

皇太后兩宮聽政即中國王大臣尚且隔簾奏事必不  
屑望見外國使臣況西國自云和好有何陳

訴而必以近

天子之光為榮乎似宜俟下屆換約時我

皇上親政萬幾決於

聖心乃准朝見較為得體至儀節尤須斟酌強其行  
跪拜之禮恐有所難即謂中國夷狄各行其  
禮不特彼國覲禮我未深知恐為所給且中  
國設若准遣使臣往聘如行夷禮未免蹈自  
即於夷之譏若行華禮又嫌以華臣而屈膝  
於夷之誚總理衙門擬權其適中者用之最  
為允當即使不拜不跪亦不過等諸立仗之

馬而已在我

聖度寬宏固無不可容納者且正可為中國遣使外  
洋地步或就華洋參酌各半定與國使臣入  
覲之禮中國設或遣使往聘禮亦如之仍由鴻臚  
序班太常糾儀不得稍有攙越儻或違節失  
敬中國即布告各外國不准該使臣二次入  
覲或亦肅朝儀之一端也

一議

遣使一條伏思中國本無赴外國應辦之事使臣  
之體又與洋商自相往來者不同現在各國

所以迭請不已者意謂華洋既稱敵體而無一介相通未免終以夷狄視之但遣使長駐則專對之才必慎其選每年使臣四出經費亦屬不貲考春秋嘗有王臣下聘諸侯之禮或酌定年限輪流遣使赴泰西各國聘問一次一則藉以覘其虛實察其動靜一則考究外臣在中國苛求詰責之事是否出自該國主之意似宜擇中國讀書明理有操守而又通曉外洋語言文字者數人由總理衙門察看才具不惜給予虛銜派充使臣之任計功

授賞如奉使果不辱

命俟其回報總理衙門之日准賜

召對陞以官階在中國既可以歷練曉暢夷情之人  
才亦足以俯順外洋之請即於以後事勢似  
亦不無裨益

一議銅綫鐵路一條查銅綫之用信息靈捷故  
各國爭之甚力彼族輪船一日千里近又有  
小輪船之議議而未允又議銅綫揆其意欲  
使數千里信息達於俄頃夫中外和好豈與  
爭信息之遲速哉獨事機緊要時彼速我遲

利害分焉儻能阻止所全實多至鐵路係為  
火輪車而設火輪車之利又過於輪船彼欲  
由直隸之天津達京師由緬甸達雲貴廣東  
由江蘇之上海達湖北漢口屢見於外國新  
文紙因我之所不欲持論愈堅然築室道謀  
初無成議聞鐵路中偶遇磚石即有覆轍之  
虞其中傷人之患無一得以自全者而又燒  
之可斷挖之可斷即或應之彼亦未必果能  
行也且壞我地方之田廬感我民間之生計  
眾怒難犯羣起相鬪勢有必然彼若以自能

看守防禦為詞我即答以官不能禁亦不能  
賠設或民間意外滋生事端不在官場違約  
之列非故難之亦實情至理耳

一議內地設行棧內河駛輪船一條查內地行  
棧不過為賣洋貨買土貨而設上年定章洋  
商由關口運洋貨入內地者完納半稅在內  
地請運照辦土貨至關口者亦在關口完納  
半稅守此不失是洋商之入內地者其寓居  
與設行所爭祇在幾希之界所辨亦在疑似  
之間可慮者為華商包庇釐稅耳夫包庇之



弊體匪洋商必不出此設有不安本分之人  
冒充洋商公然漏稅縱之則違例禁之則傷  
和兩俱不可中國釐金必大減色當用兵需  
餉之時經費不無支絀中國之患亦與國之  
憂也似宜俟軍務全平酌立行棧妥定章程  
中國無事豈惜細微之利斷然持不可哉至  
內河輪船一節其注意原在湖絲而拖帶華  
船闖關出口尤與行棧之包庇無異洋人之  
入內地貿易遊歷者從前條約及現行章程  
均令體面洋商出具保結由領事官照會監

督給予執照凡遇交涉事件以及錢債小案  
呈請地方官及委員辦理如不能結再由領  
事官照會監督提訊如洋人未請執照任意  
游行經中國地方官訪聞准執送有領事  
之處各按該國例懲辦可為至周且密猶不  
免意外滋事若輪船駛行內河一船之人賢  
愚不等地地方下吏耳目難周奪中國之利害  
一猶小啟外國之釁害實大近來不肖洋人運  
賣洋火通賊之案層見疊出毋亦彼國之羞  
乎與其亡羊補牢不如調琴未雨堅以拒之

度亦無他

一議販鹽挖煤一條此二宗久為彼族所垂涎  
鹽為中國大利實難任其侵越不得不堅忍  
以相拒至如何預籌良策使彼族自不生心  
應由各路鹽政督同鹽務各官悉心籌畫臣  
未敢妄贊未議至挖煤之利遜於鹽務遠甚  
蓋彼族以中國取煤不得其法用力多而獲  
利少若以彼法行之用力易而得利倍然產  
煤之山且多係民人產地未開者購買難以  
相強已開者窮黎恃為生計且野性不馴之

輩動以千百西人冒昧前往勢必激生事端  
應以實情諭止如彼族瀆請不已則先與約  
定設或華人爭利械鬪州縣各官位卑力弱  
封疆大吏地隔遙遠急切不能保護均不在  
違約之列

一開拓傳教一條此事已無可再開自弛禁以  
來各省毀堂阻教之案不一而足其始華人  
恃眾其後仍係華人喫虧蓋教民有傳教士  
可恃傳教士有領事官可倚領事官有地方  
官可問地方官顧全大局不能不曲為調停

以此防患猶救火而抱薪也然天下之大勢  
繫乎民心民心之大防存乎士氣近三十年  
來變故疊起而士氣未嘗少衰即民心大可  
恃也天主教自唐時已有之今所傳唐人石  
刻景教流行中國碑即彼教入中國之始其  
種類不繁良由唐以後大儒輩出趨嚮聖賢  
異端化為烏有此明證矣方今多事之秋勢  
難禁止惟有就從前條約中議定各節堅持  
勿失仍通飭各省辦理交涉教務案件務須  
平心靜氣不以爭理為長而以審勢為務庶

幾於不背條約之中隱寓轉移之術他日元  
氣漸充賢人君子力持正議彼族無置喙之  
地方將自悔多事耳



鄂省軍需竭蹶懇留本年京餉摺

六年十二月初九日

奏為鄂省軍需工賑萬分竭蹶懇請酌留京餉以

維全局恭摺仰祈

聖鑒事竊湖北省本年奉撥京餉計藩庫應解銀三

十萬兩鹽庫應解銀十萬兩江漢關稅應解銀

三十萬兩前署督臣譚廷襄前撫臣曾國荃因

軍事萬緊於四月間奏請暫時展緩旋准部議

奏改為八月以前解到一半年終埽數解清等

因在案自當遵依籌解無如時勢萬難不得不

據實陳請者查鄂中東征馬步及留防水陸各



軍有月餉之需寔軍及陝甘淮黔甯夏等省有  
協撥之需軍火器械有製造轉運之需通計每  
月不下五十餘萬兩所恃以供支放者錢漕而  
外惟關稅鹽釐為大宗而每月所收之數牽長  
補短斷難供一月之用本年四月以後捻蹤東  
竄遣撤冗營清發欠餉及卹賞各項又在月需  
之外百計搜羅仍多虧欠六七月間譚仁芳劉  
維楨姜玉順等軍調派出省該軍月餉至今僅  
發至八月留鄂水陸各營六月之餉尚未發清  
積欠已逾百萬應撥各省協餉亦未能如數撥

解宿累未完新逋又積此軍餉支絀之實在情  
形也溯自上年冬間捻逆闌入鄂疆蔓延安德  
漢黃等府屬征兵雲集供應浩繁本年四月賊  
甫勦退而旱魃為災田稻不能下種收成歉薄  
入秋襄水陡漲濱河一帶均被衝淹是寇氛肆  
擾於前商賈因之裹足災祲疊告於後民情更  
屬拮据錢糧無可徵收釐稅大形減色雖被災  
黎庶大半復業無庸照例請  
帑賑濟然亦須籌撥錢文量加撫恤庶窮而無告  
者得免凍餒之憂現議修鍾祥等邑潰堤為以

工代賑之舉縱使撙節度支已在十餘萬緡以外入款不及往年之六七而出款較往年不啻倍蓰此出入懸殊萬難周轉之實在情形也軍需支絀如此工賑緊要又如彼時值隆冬餉源枯竭若不豫為籌備誠恐士卒有譁潰之虞窮黎苦饑寒之迫設有意外所損尤鉅明知京餉要需未便輕議截留致干咎戾第當無可如何之會再四躊躇與其因循瞻顧貽憂患於將來曷若據實滙陳圖補苴於先事惟有籲懇

天恩俯准將本年藩庫欠解京餉銀十萬兩江漢關

欠解京餉銀十萬兩一併酌留俾資接濟之方  
而顧目前之急其餘應解各款除已解清外仍  
當如數籌解不敢再有短少據總局司道具詳  
前來謹合詞恭摺具陳伏乞

皇太后

皇上聖鑒訓示施行謹

奏

--	--	--	--	--	--	--	--	--	--	--

叩謝 天恩摺 七年正月十八日

奏為叩謝

天恩仰祈

聖鑒事竊 臣於正月十五日准吏部咨同治六年十

二月十八日奉

上諭李瀚章著調補浙江巡撫等因欽此又准湖廣

督臣李鴻章咨同治六年十二月二十二日奉

上諭李鴻章加恩著賞加一騎都尉世職李昭慶著  
以鹽運使司候補等因欽此又奉同日

上諭李瀚章著賞加頭品頂戴等因欽此聞

命自天感悚無地伏念臣以江蘇巡撫調署湖廣總督幾及一年毫無寸補茲復蒙

恩調補浙江巡撫該省兵燹之餘瘡痍未復挽回民氣亟冀風從整飭官常庶同星好而且鹽漕海塘諸大政罔非目前緊要之事宜如臣顛愚曷勝負荷臣弟鴻章勦擒山東幸能收效皆

朝廷之指授豈臣子之庸公

賞以延世之榮已切非分之懼又臣弟昭慶不過隨同馳逐亦荷

聖恩以鹽運使司候補撫躬循省兢業滋深至臣未

效前驅虛慙敵愾復邀

賞加頭品頂戴在

皇上懋官懋賞原

雨露之無私在臣門何德何能乃

日月之偏照惟有共圖奮勉益勵慎勤冀報

高厚生成於萬一所有微臣感激下忱謹繕摺叩謝

天恩伏乞

皇太后

皇上聖鑒謹

奏





擬將荆紫關防軍檄調回鄂摺 同日

奏為捻竄豫省河北荆關無庸設防擬將防軍分別撤留檄調回鄂恭摺仰祈

聖鑒事竊去年七月間奉

旨派記名提督姜玉順馬步十一營馳赴豫境浙川

一路扼守荆紫關經臣瀚章會同前湖北撫臣

曾國荃陳明在案到防後陝捻沿黃河窺伺晉

鄙該處藉以無事嗣准陝甘督臣左宗棠咨捻

由陝西宜川縣屬渡河竄過山西吉州又疊准

湖廣督臣李鴻章河南撫臣李鶴年咨捻入山

西旋由垣曲突竄河南懷慶府屬之濟源縣寢  
寢北趨幸直隸河南有攔截之師山東有派剿  
之師殲滅自易查荆紫關在黃河直南捻擾懷  
慶係黃河以北距荆紫關甚遠姜玉順一軍已  
成虛設該軍向隸前西安將軍多隆阿征皖征  
陝本有欠餉同治三年前湖廣督臣官文奏調  
來鄂積欠愈鉅加以五年冬間六年春夏捻在  
湖北境內援軍四集供億浩繁度支不繼新欠  
又十餘萬臣等以該軍出省遠防恐因餉絀滋  
事飭局大批接濟不令藉口然千里轉輸設有

缺乏寔營前車可鑒。臣瀚章、臣璟再四熟商，目下東檢已平，西檢尚遠，邊境無事，亟應早為之計。因設法勉湊銀十餘萬兩，解赴該營，飭姜玉順會同湖北候補道王開福、就荆紫關防所將該十一營中之開、左、勝、中、勝、左、步、隊、三營先鋒、左右馬隊、二營補清、新舊欠餉，妥撤歸農，仍留步隊六營調回襄陽樊城一帶駐紮，以備調遣。如此一部署間，該營欠項稍輕，存營需餉有限。地方小警足資彈壓，並可騰出餉力為異時緩急之需。仰副

聖主輯兵裕餉至意所有拾竄河北擬將荆關防軍  
分別撤留調回鄂省緣由謹合詞恭摺馳

奏伏乞

皇太后

皇上聖鑒訓示謹

奏

天津練餉酌運制錢並籌議鼓鑄摺七年正月二十八日  
奏為遵

旨覆陳仰祈

聖鑒事竊承准軍機大臣字寄同治六年十一月初

五日奉

上諭戶部奏請飭濱臨江海各省解錢籌銅一摺著  
李瀚章何璟於鹽卡釐卡收款內每年酌提制錢  
三十萬串由輪船裝運天津交崇厚擇地嚴密收  
存聽候提用酌提錢文准照銀價劃抵應解京餉  
其制錢一千合銀若干及運腳若干即著各該督

撫議定具奏所提之錢務須年清年款以兩年為止不准稍有短解此項錢文即名為天津練餉以昭慎密其湖北施宜等處向多銅礦著該督撫飭屬招商試辦酌抽礦稅試行有效即籌款收買商銅以裕鼓鑄至濱海商賈向有販運紅銅條銅等項應如何招商收買之處並著各該督撫妥速議奏等因欽此復准戶部鈔錄原奏咨商到臣當即轉飭司道妥議去後伏念京師乃根本之地錢法為日用所關當十大錢經市廛相率折減積久滋弊致礙通行今欲為規復制錢之計而籌

及於運錢抵餉以備積儲並議及於開礦籌銅以資鼓鑄

聖謨廣遠臣等自當合力圖維查鄂省每年應解京餉合藩糧鹽關各庫不下百萬兩於各項京餉中酌解現錢似尚力所能為惟鄂省百貨釐金及鹽釐兩項所收錢文統年計之不為不多其中有的就地易銀解省者有就近撥充軍餉者冊報之錢非實皆解省之錢即就解省者而言今日收繳明日開支隨來隨去僅能周轉目前東南各省均未開鑪錢止此數若同時運錢則錢



以見少而價昂勢必有妨民用此臣等所日夜  
焦慮者也然部臣求接濟之方

朝廷殷變通之利苟可設法亟宜遵奉試行擬於  
本年應解各京餉項下酌運制錢二十萬串以  
實京師現在銀價每制錢一千約值六錢有零  
將來起運時低昂之數實難預料應各歸各批  
按照市價覈實開報每解錢一批或二三萬串  
或四五萬串總以錢之整數合計銀數一面批  
解一面分別奏咨至由漢運滬由滬運津所需  
輪船水脚及上下駁力包皮繩索等項大略制

錢一千需銀一錢有零每次批解將銀價運費  
分計併算在應解京餉項下一併開支以歸簡  
便俟運足二十萬串後如錢價不致驟昂民用  
亦無窒礙仍當隨時酌量續解不敢以奏定二  
十萬之數稍事拘泥此項錢文恪遵

諭旨名為天津練餉庶昭慎密若夫鑄錢必先開礦  
自係當務之急鄂省施南宜昌鄖陽一帶重巒  
疊嶂容有產礦之處兵燹以前曾否開采無可  
稽考咸豐五六等年房縣興山巴東等處試采  
無效歷有成案銅苗不旺可知茲欽奉

聖諭飭臣等招商試辦尤須加意查訪如實在有礦  
可開再行奏明舉行第恐無益有損未便因部  
臣已有成議率爾出此其產自東洋之紅銅條  
銅漢口等處向未行用商販不至采買較難惟  
四川瀘州地方向係滇銅聚集之所雖滇省軍  
務未平采買不易或者瀘州一帶有存積銅斤  
尚可招商轉運未始非便捷之一法臣等飭由  
司道詢訪得實次第議辦仰副  
皇上整飭圉法至意所有遵  
旨覆陳緣由謹合詞恭摺具

奏伏乞

皇太后

皇上聖鑒訓示謹

奏



巡閱海塘工程情形摺七年五月二十四日

奏為巡閱海塘工程情形現仍督飭趕辦恭摺具  
奏仰祈

聖鑒事竊維浙省海塘工程為下游列郡田廬保障  
關繫至重臣到任之初未能深悉情形當即詳  
細面詢前撫臣馬新貽略知梗概適值陰雨連  
旬山洪暴漲臣深慮新築柴壩埽坦或有姓陷  
當即飛飭該管道督率廳備隨時搶護幸保無  
虞一面將應辦要事稍為料理即於五月十一  
日出省率同署杭嘉湖道杭州府知府譚鍾麟

前杭嘉湖道陳瑀候補道林聰彝沿塘履勘自  
李汎至尖山計程一百五十里三防原建石塘  
一萬七千餘丈坍塌者四千四百餘丈均築柴  
壩以堵其缺西中兩防業已工竣東防缺口未  
堵者尚九百餘丈該處潮勢稍緩不致漫溢現  
飭廳備趕緊搶築年內可以完工新築海甯繞  
城石塘一律完整惟二坦竹篾因潮汐衝激間  
有撥損責成在工員弁隨時修補以固頭坦至  
西防開辦石塘釘椿已及百丈砌石層數過半  
而採辦石料椿木均屬維艱工匠又祇此數約

須一年以外方能歲事臣查前撫臣馬新貽在任數年於塘工一事竭力經營先挑土塘以禦潮汐旋築柴壩以堵缺口茲又開辦石工以垂久遠實已籌畫盡善臣惟有循舊督飭在局在工各員分任其事寬籌經費趕集夫料照常興辦俾得早日完竣以副

聖主軫念海隅蒼生之至意惟石塘全恃外埽坦水以護其根現在西中兩防舊塘趕築柴坦尚有未竣工二千丈而翁汎以東埽坦無存塘身孤立擬俟西防最要石工做有眉目一面購辦石



料接續興辦一面抽撥夫役工匠趕將東防坦  
水八千餘丈先行建復庶幾保一丈舊塘即省  
一丈新工此外鹽平兩汎土塘少有埝陷已據  
杭防道勘估委員堵築其坳裂石塘當俟三防  
工竣第次興修臣勘畢後於十五日回省瞬屆  
伏秋大汎潮汐盛旺塘工尤為喫重除嚴飭杭  
防道督率廳備弁兵認真巡防隨時保護毋稍  
疎忽外謹將臣查勘塘工情形及照常趕辦緣  
由恭摺具

奏伏乞

皇太后

皇上聖鑒訓示謹

奏

--	--	--	--	--	--	--	--	--	--

乍浦頭圍仍難設關徵稅摺七年七月十八日  
奏為浙海關所管乍浦頭圍二分口仍難設關徵  
稅懇

恩照舊停徵以昭覈實恭摺仰祈

聖鑒事竊照浙海關兼管平湖縣屬之乍浦分口每  
年額徵稅銀二萬八千二十三兩零海鹽縣屬  
之頭圍分口每年額徵稅銀五百九十二兩零  
二共應徵銀二萬八千六百十五兩有奇前因  
兵燹之後人民稀少商賈不至貨稅毫無節經  
前撫臣左宗棠馬新貽厯次

奏請暫緩開關仰蒙

恩准在案准於本年閏四月到任後因餉需支絀設法籌辦以為該二分口停徵數年民氣諒可漸復商賈諒已通行方擬督飭該關道察看情形酌量開徵以重課稅適奉

諭旨飭令採辦洋銅運京鼓鑄等因當經密查得乍浦口岸自遭賊擾不但市廛蕩為平地生意全無且居民寥落商船片帆不至業於

奏報買銅摺內聲明在案茲准戶部咨開乍浦頭圍二口早經肅清居民復業商貨現已流通亟

應設法稽徵礙難再行展緩請自奉

旨之日起即行照舊啟徵不得藉詞宕延等因具奏

同治七年四月初八日奉

旨依議欽此欽遵行文前來臣當即行飭該關道設法辦理茲據護理浙海關甯紹台道文廉詳稱乍浦頭圍二分口同隸嘉興府屬昔年賊氛犯浙首櫻其鋒蹂躪數載受害最重廬舍成墟商賈斷絕實無稅銀可徵屢蒙

奏准停緩在案該道上年到任後屢囑地方官查察情形有無起色皆稱荒涼如故實緣該二口

每年額徵稅銀專藉採辦東洋銅船並福建木船及閩廣糖貨等船進口納稅以為大宗錢糧自遭兵燹蘇省採辦洋銅官民二局均已停運木行殘毀客幫星散無復運木至彼即有一二舊牙亦皆遷往上海貿易至閩廣糖貨近因客商貪便類皆雇用輪船裝載而乍浦一岸不在通商之列火輪等船不准進口以故運蘇之貨取道上海運浙之貨借徑甯波因此乍浦口岸竟為貨物所不通商賈所不至再四查詢委係商賈絕跡無稅可徵且自各國議准通商以後

常稅徵數多為洋稅侵佔然彼盈此絀同為  
朝廷府庫之財原屬無分畛域而因時變遷情形  
今昔不同即可由此推及所有乍浦頭圍二分  
口關稅實係不能遽議開徵等情詳請具

奏前來臣查該道所稱乍浦頭圍二分口無稅可  
徵委係實情與臣前次所查情形亦復相同惟  
他處地方肅清數年後尚能日有起色何獨乍  
浦口岸依然白地推原其故皆因承平時商船  
輻輳聚市海濱客民為多鮮有土著若輩有利  
則揮之不去無利則招之不來滄桑之變今昔



迥殊一則地鮮居民客商無可投止二則洋船  
攘奪海艘無儀可承二者相兼招徠無法若徒  
設關於荒煙蔓草之中不但無益課稅且亦多  
糜經費況市肆有無不能掩人耳目詳加訪察  
該二分口實難開設合無仰懇

天恩俯准將乍浦頭圍二分口應徵關稅照案停徵  
如果數年後民氣漸復商賈重聚應隨時察看  
情形酌量辦理以昭覈實除咨戶部查照外理  
合恭摺具

奏伏乞

皇太后

皇上聖鑒訓示施行謹

奏

--	--	--	--	--	--	--	--	--	--

織務銀兩勢難悉數解濟摺

七年八月二十九日

奏為浙省庫項支絀織務銀兩力難悉數籌濟據  
實陳明仰祈

聖鑒事案查前因織造衙門織辦一切活計司局已  
解銀錢為數不少猶不敷用司庫力難多籌經  
升任撫臣馬新貽

奏懇嗣後仍由釐局每年解錢十二萬串外再由  
司庫每年籌解銀二萬兩以為定數奉

旨該衙門議奏欽此嗣經內務府會同議覆行令速  
籌解濟並經戶部於奏覆織造請添織務銀兩

案內以浙省有撥解京餉各項要需籌款自屬  
不易如織務實關緊要款項實有不敷應由織  
造會同該撫酌覈量織務之多寡緩急妥為籌  
撥並令織造力求搏節實用實銷按年造冊題  
銷等因在案茲據布政使楊昌濬詳稱現准織  
造咨稱工部奏派各色綵綢擬再趕辦二千五  
百疋解來銀三千兩不敷甚鉅難免貽悞咨催  
照數撥解等因查浙省同治三四年至本年七  
月止由局解過錢四十三萬六千餘串由司解  
過銀十五萬四千餘兩是否概由織造按數辦

解造銷部中必有冊案可稽其中即如綵綢一項前奉戶部彙同

誥勅行令在於地丁項下撥解銀一萬兩業已由司先後移解銀二萬四千兩數與奉撥之數早已有盈無絀均經詳請分別奏咨在案今織造疊催司中籌解不得不將大局情形再為縷陳蓋國家科徵有定制用有常必有不竭之源方濟無窮之用詔訪浙省從前織辦大運及一切活計每年不過需銀六七萬兩自咸豐三年金陵不守江甯織務改由杭州辦運於是派辦日多需

費甚鉅而工匠人等亦覺人少事浮致有增設  
養匠銀兩一款現在金陵早已恢復是否照舊  
派織姑不具論惟浙省肅清數載民氣究未復  
元力缺於人利遺於地雨暘偶愆旱潦失宜是  
以前數年所收錢糧不過一百萬有零近年招  
集流亡修治水利催勸墾種勤督催科而究限  
於生聚未繁開墾未遍故所收亦不過一百二  
三十萬兩他如釐捐一項本非久常之計且因  
人少貨滯商力不支輸納大形短絀此收數未  
能充裕之實在情形也至於每年用款如本省

年例應支各項以及留防勇丁薪糧海塘善後  
經費加以奉撥京餉甘餉黔餉滇餉天津餉均  
屬刻不可緩之款每年竭以正賦罄以釐捐終  
屬不敷接濟以致撥餉未能清解放款更難清  
給竭蹶情形已可概見且本省各營兵餉已奉  
議准加增每年又須添用銀四五十萬籌畫尤  
非易易此用款十分支絀之實在情形也在織  
造專司織務是以專計織費在司庫不僅兼顧  
織務是以未能專濟織用然猶於數年間無可  
籌措之中除牙釐局解過錢四十三萬六千餘



串之外仍由司庫勉力籌解銀十五萬四千餘兩亦以織務緊要不敢耽延推諉之故此又不分畛域通籌合作之實在情形也今籌款者計力已竭而辦織者需用日寬與其術乏點金將來為人譏過之地莫若情先直布俾其另籌妥辦之方嗣後織務銀兩除奏定之數總當陸續籌解並將恭辨

皇上下婚活計竭力解濟外其餘苟有可籌亦不畫地自限若必如織造之悉數取給則歲入有常深恐顧此失彼貽悞不止織務一項應請織造

先將司局解過各項料工銀錢逐一覈明奏報  
一面遵照戶部奏復之案酌覈籌辦免致有誤  
要需等情詳請

奏咨前來臣查京協各餉與織務銀兩同屬要需  
奈浙省所入有限若專濟於無窮之織務必致  
貽悞首要之餉項誠如戶部所奏浙省帑項未  
充且有撥解要需籌款不易實為顧全大局之  
論司庫既難悉數解濟可否懇

恩飭下織造先將司局解過銀錢造銷後仍照戶部  
奏覆之案酌覈籌辦免致有悞要需除咨戶工

二部暨內務府查照外理合恭摺具

奏伏乞

皇太后

皇上聖鑒訓示謹

奏

奏覆裁併釐卡摺

奏為遵

旨查明浙省釐捐及裁併局卡情形恭摺覆陳仰祈  
聖鑒事竊臣承准軍機大臣字寄同治七年八月二

十五日奉

上諭前據御史吳鼎元奏請裁併釐局等語各省釐  
局為接濟軍需而設勢難遽議裁撤如有分設局  
卡較多之處亦應量為裁併著李瀚章斟酌情形  
辦理至局員局紳網利侵漁等弊尤須嚴加查覈  
務令涓滴歸公毋任中飽等因欽此伏查東南各

省自咸豐年間用兵既久度支告匱餉需萬無  
可籌不得已抽收釐捐取其百分之一二以資  
軍食有識者莫不知損於民者無幾益於

國者甚大我

朝深仁厚澤二百餘年正賦之外絲毫無取於民  
為軍餉而計及釐捐特一時權宜之舉以故商  
民雖經鋒鏑猶復竭力輸將未聞稍有抗違者  
也唯貿易之人銖鎰必較但見烽煙稍遠即又  
希冀停捐以節蠅頭之利疆臣大吏雖明知事  
宜罷撤而通籌全局何敢自施小惠以博名譽

貽誤要需耶即如浙省克復數年一切經費仍以釐金為大宗京協各餉防兵口糧海塘工用此數大端取給於釐金者十之六七開銷於正供者十之三四原定章程分為起驗兩項起捐酌收貨價百分之三驗捐減半浙東八郡道里較寬收兩起兩驗浙西三郡僅收一起一驗此外經過局卡照票放行概不重捐立法之初本從輕便嗣以河港紛歧商人每多繞越分設小卡杜其偷漏非設一卡即有一捐數年以來因軍需稍節先後已將各屬分卡陸續裁併十餘

處坐賈亦兩次覈減此浙省厯辦釐捐之情形也臣於七八月間因捻逆盪平協餉當可稍節復定自明年正月為始全省坐賈釐金一律停免通行曉諭在案欽奉前因臣遵經督同司道細加體察悉心酌覈除行商以及絲捐洋藥捐各項照舊辦理現又於各府裁併局卡十六處約計明年釐捐收數已減去銀四五十萬兩實不敢再行多減致誤大局至辦理釐捐易滋流弊臣到任以來隨時留心嚴密查訪各府局均係知府同知為總辦尚知自愛其分卡中有州

縣有佐雜員役既多人品難齊稍有不洽者均  
即隨時撤換並咨部斥革有案各該員尚知奮  
勉現無網利侵漁之弊臣仍當督同司道嚴飭  
各委員潔已奉公以濟實用謹將查明浙省釐  
捐及現在裁併局卡情形恭摺覆陳伏乞

皇太后

皇上聖鑒謹

奏



--	--	--	--	--	--	--	--	--	--	--

合肥李勤恪公政書卷四目錄

楚湘  
湖廣

男經畬經江澧編輯

滇  
淮  
濤  
淦

查明兩浙鹽務情形摺 七年十一月二十八日

浙江新漕海運事宜摺 七年十二月十三日

浙江墾荒請仍照原定章程摺 八年四月十三日

投首土匪復行謀叛緣由摺 八年五月二十五日

招商試辦蘇松常鎮太引鹽摺 八年五月二十八日

恭謝

天恩摺

八年十二月十六日

兩浙票鹽辦理整綱摺 八年十二月二十三日

請將旗營米折緩議加增摺 九年四月二十八日

整頓水陸各軍大略情形摺 九年七月十三日

恭謝

天恩摺

九年八月十六日

查明兩浙鹽務情形摺 七年十一月二十八日  
奏為遵

旨確查兩浙票鹽近年收支課釐數目業經報部並  
現辦大概情形恭摺覆陳仰祈

聖鑒事竊臣承准軍機大臣字寄同治七年九月二  
十五日奉

上諭有以奏兩浙鹽務敗壞已極連年奏銷缺額過  
多請飭整頓一摺鹽務為國課攸關自應覈實經  
理乃兩浙自試行票鹽以來徵收課釐並未按年  
報銷辦理毫無成效亟應妥議章程期於經久著

李瀚章按照所奏各節體察情形應如何興利除弊之處詳細議定奏明辦理至販運私鹽本干例禁尤當督飭弁兵認真巡緝不得藉口於化私為官致滋流弊其歷年應行報銷之款即飭運司趕緊造冊報明戶部以憑核辦原摺著鈔給閱看等因欽此伏查兩浙杭紹嘉松溫台六所每年額銷正引八十萬五千餘道應徵商課正銀三十二萬五千餘兩合之縣場竈課額銀十一萬五千三百餘兩共銀四十四萬餘兩是為正課又解部公費銀十四萬兩零銅斤腳價銀三萬兩前

鋒護衛銀一萬兩庶吉士銀八十兩內務府獲  
價銀一萬兩是為雜課共計正雜銀六十餘萬  
兩與原奏之數不甚懸殊自同治四年改辦票  
運計四年分共收課釐銀六十九萬一千餘兩  
五年分收銀七十五萬五千餘兩六年分收銀  
六十三萬九千餘兩又歷年徵收縣場竈課銀  
二十三萬二千餘兩統計三年共收銀二百三  
十一萬八千餘兩加以應扣場竈災荒蠲緩銀  
兩按照原額每年六十餘萬計之收數尚不短  
絀歷經遵照部咨按半年一次造冊咨送戶部

查覈此三年中解過京餉內務府經費參價等銀六十三萬兩湊撥各省協餉本省軍需塘工經費共銀一百一十萬兩亦均奏咨有案此外內閣都察院飯食內務府擡費將軍織造津貼養廉各官俸廉役食滿營馬價生息提塘報資書院膏火善舉經費共銀十四萬餘兩各屬緝私局用十七萬餘兩均屬收支有據並無含混尚有向撥鹽課暫歸釐金之貴州協餉十一萬五千兩及江省鹽釐銀兩與撥解藩庫必須支放之款不在其內此歷年徵收票鹽課釐解支

數目而原奏失實者也至兩浙鹽務敗壞非今日始而浙西為尤甚案據運司詳道光年間私鹽漸盛官引滯銷正課有虧則以雜墊正年復一年正愈虧而雜愈墊不特報部外銷之河餉公息商捐巡費各項銀兩不能支給即應行解部之雜款亦皆入墊道光二十年後水患頻仍海疆多事私鹽日益充斥官引更形壅滯始尚以雜墊正漸至無雜可墊於是減成收課而課款愈絀銷鹽日少綱引積年不領咸豐三年後竟至停辦奏銷此道光咸豐年間浙省鹽務敗



壞情形部中有案可稽者也當世道承平戶口蕃盛銷數且如此短絀則商運之不足恃已有明證迨咸豐庚申以後兩浙引地盡為賊擾舊商既已困乏復遭兵燹不但無殷實之家且多人亡戶絕其賊未擾及之海疆島嶼窮民多竄匿其間戶口日繁生計日拙遂至煎販私鹽毫無顧忌自同治三年省城克復兩浙漸平前撫臣左宗棠察知舊商無可責認議改票鹽前撫臣馬新貽踵而行之疊經奏奉

諭旨允准票運之法按引按斤統收課釐此即從前

正雜課之寓名三年中雖銷鹽引數僅一百萬有奇然課釐兩項收銀亦有二百八萬餘兩收數較盈於前而鹽不加價民不受困雖地方凋敝之餘戶口大減銷數未能起色而

國課無虧雜款尚可敷衍蓋以昔時中飽之資概歸公用也化私為官原非善策然兵革之餘民無生計愚民窮則玩法寬猛皆難卷查同治三年冬浙西議改票鹽前撫臣左宗棠先於岱山設局按鹽抽釐未能辦成而定岱私鹽多潑賣於蘇松常鎮各屬前撫臣馬新貽查雍正乾隆

年間本有發帑收買代鹽配銷之案因於江蘇  
吳淞口設局收買按月定以二千引分成搭銷  
另派舟師僱募輪船分投巡緝不准再由別口  
進港以杜侵灌乃未及數月代人聚衆滋鬧旋  
即撤局停收拿犯懲究並嚴飭認真緝私以衛  
引地其南沙餘姚等鹽數本不多向由商人收  
買完課搭銷此外並無化私為官之事官運亦  
僅試辦票鹽初於商販不繼之處偶一行之現  
已停止上年秋間前撫臣馬新貽以浙西官運  
票運地屬隔省呼應不靈未有起色議遵奉部

行將蘇松常鎮太四府一州引地責成各州縣各歸各境自行籌款或招商販集資領運接近年銷數酌定共領銷票鹽六萬三千引照原額十分二成有零俟試辦有年察看銷數再行加一成領銷等情奏經部議准辦而於應銷引目改為舊額十分之八並聲明如有殷商情願認運自松所為始按現銷票運實數加增認運某處招商有人即將某處官運停止等因惟因原請銷數僅止十分之二部定銷數十分之八數目懸殊官商皆未領辦此兩浙肅清以後各前撫

臣辦理鹽務之情形也。臣自楚赴浙，訪詢浙省鹽務，知浙西銷數短絀，路過蘇州，即與江蘇撫藩各臣商計變通辦法。到任後，查知浙東銷數尚屬可觀，惟浙西則疲敗已極。亟擬設法整頓，無如地勢人情均難措手。緣松蘇等四府一州濱海沿江，波港紛歧，緝私難以著效。若添僱巡船，費用甚鉅，款無所出。該省文武各官情殷本省公務，於鄰省督銷不無主客之分。辦理實無良法。旋准蘇撫臣咨會據蘇州等府縣議詳復引認運等情，即擬招商承運，認岸包課。乃此議

甫行而出而認運者聞內有革員全安清暗中營謀意圖網利商人因之裹足經臣咨會蘇撫臣嚴飭各該府縣實力招復引商加增認運去後始據蘇州等府詳據商人潘宏昌等陸續認銷引地因所認之數較之近年銷數所增無幾復經駁飭加增並妥議一切章程以便覈明具奏現在尚未定案臣查上年十二月部臣議覆兩浙松所改歸官運摺內聲明如有殷實引商情願認運者應即飭令松所為始等語是亦以浙東票運尚可暫行浙西則必求變通臣悉心酌

數浙東歷年粟運所收正課釐捐並不短絀應  
仍照舊辦理暫緩更張浙西蘇松等四府一州  
應改歸商運以重課稅而節浮費除督飭運司  
查明殷實引商飭令加數認運妥議章程會同  
蘇撫臣確數另行具

奏外謹將查明兩浙鹽務情形恭摺覆陳伏乞

皇太后

皇上聖鑒訓示謹

奏

浙省新漕海運事宜摺七年十二月十三日

奏為浙省來歲新漕籌議海運章程恭摺奏祈

聖鑒事竊照同治八年起運七年分漕白糧米仍行  
海運經臣督同在局司道將應辦一切事宜悉心  
籌畫分別趕辦並將新漕約徵米數具

奏在案所有杭嘉湖三府屬有漕各州縣兵燹以  
後田多荒廢雖經設法勸導竭力招墾無如地  
廣人稀勢難全闢當據各州縣先後稟報各有  
新墾之田與上年原熟者一律插種乃因夏秋  
之間雨水過多高田尚易寬洩而低區悉遭淹



沒一時車戽不及致有成災成歉之處民情久困未蘇仍不得不酌量情形分別蠲緩庶於

國課民生兩無窒礙現將杭嘉湖三屬仁和等二十二州縣荒歉田地覈實剔除計起運漕白正耗米三十二萬九千九百六十石零經剝商耗等米三萬五千六百六石零漕白餘剩耗米一萬一千四百三十六石零又白糧剩耗項下申糙米一千三百九十三石零總共起運米三十七萬八千三百九十七石零又帶運六年分富陽縣原緩漕米二百二十石零已飭各屬趕緊

開倉慎選乾潔好米妥速徵運總期商船乘風  
放洋漕糧早登

天庾茲據省局司道將新漕海運事宜就上屆成案  
參以時宜酌議章程十四條會詳請

奏前來臣覆覈無異相應繕具清單恭呈

御覽是否有當理合恭摺由驛具

奏伏乞

皇太后

皇上聖鑒訓示謹

奏

謹將浙省同治八年起運七年新漕酌議海運  
章程繕具清單恭呈

御覽

一委員分辦以專責成也查海運省局為總匯  
之所提綱挈領事務極繁除由臣督同司道  
通籌全局外所有僱船催兌以及文案勾稽  
派撥經費等事均關緊要現已督飭各員趕  
速悉心籌辦以期周妥其上海天津二處仍  
照章飭委滬局總辦委員候補知府王維圻  
幫辦委員候補同知彭祖壽赴滬設局將兌

務一切提前經理其天津交米係糧道專責  
一俟周歷嘉湖等處並赴滬查驗米色後即  
帶同津局總辦委員中防同知朱其昂幫辦  
委員即補知縣貝晉恩等於明春趕速赴津  
會同直隸委員妥為辦理仍將滬津兩局木  
質關防各一顆札發該員等行用以昭信守  
一起運新漕仍由上海受兌放洋白糧米石循  
案裝盛麻袋首先運滬也查浙省海運糧米  
向由上海交兌商船責成滬局委員會同蘇  
省委員及地方官先將泊船處所勘定庶兩

省商剝各船不致擁擠所有紳商稅行斛手亦應查照向章由上海局預為招集以免臨時缺誤其起運白糧向用蔴袋裝盛首先運滬由蘇省派撥寬大沙船承載頭批放洋本屆自應一律照辦惟查嘉湖二屬嘉興等十二縣應運白糧委因籽種不齊米多柔嫩舂辦即成糲碎難以照額全運業經援案奏請剔荒徵熟覈計起運白糧粳糯正耗及經剝商耗等米共二萬六十七石零分裝蔴袋兌交沙船首批開行仍照章於漕白正糧內提

出樣米一斗裝入麻袋粘貼印花交海船帶  
津由委員呈請

欽派大臣查驗

一海運商船宜設法預籌並由蘇省多撥沙船  
移浙濟用也查浙省白糧向來專用上海寬  
大沙船裝運其餘漕糧儘裝甯船之外如有  
不敷由蘇省派撥沙船及東衛船濟用咸豐  
三年海運案內經蘇省奏定章程以派雇沙  
船責成滬局倘有米無船即將蘇省經辦委  
員參處歷久遵循在案竊思辦理海運以雇

船為首先要務近年商情疲乏船多停朽誠如部議修整舊船以資湊濟業經派委幹員赴甯會同甯波道府縣將蛋船三不像船悉數攬雇並將尚堪修艙之船逐一查明督令上緊興修不准一船遺漏惟本年起運米數較增需船更多自應照章由蘇省委員多雇沙船及可靠東衛船移浙應用毋使停米待兌除咨明江蘇督撫臣飛飭遵辦外應請飭下江蘇督撫臣轉飭局員將浙省白糧米石趕撥寬大沙船承載其餘浙漕先儘甯船派裝倘

有不敷多撥沙船並可靠之東衛等船隨時  
移浙俾得隨到隨兌不致有誤運限

一經耗剝食商耗等米仍照數支給並商耗飭  
帶本色運津也查天津剝船食米每漕白米  
一石給米一升一合五勺通倉經紀耗米每  
白糧一石給米一升八合漕糧一石給米一  
升五合此項經耗俱係由津運通向章隨給  
剝船食米每石給米一升一合五勺又商船  
耗米每白糧一石給米一斗漕糧一石給米  
八升以上各款悉照舊章於河運給丁耗米



款內分別支給務以本色隨正斛交海船不  
准私自折乾至給商耗米原備到津盤量折  
耗之用如正供交足後尚有盈餘即由津局  
委員按市給價收買以備留抵正漕之不足  
仍嚴飭各屬於上海裝兌時全以本色斛交  
並由上海局委員嚴禁水手人等私行變賣  
以免到津短絀又查原給丁耗米內除給經  
耗剝食商耗之外尚有餘剩耗米並白糧餘  
耗項下應行申糙米石照案隨同正漕一律  
搭運交倉以實倉儲

一津通經費照案備帶簞羨等款仍按數抵解也查歷屆海運除通倉毛竹蓆片由糧道衙門附同輕齎由關等銀照例批解外所需天津官民剝價及津通正雜各款均由浙省委員帶津會同直局委員按照米數分別支用本屆海運自應查照成案覈明數目備帶赴津以資應用其銀或交海船分帶或由妥商滙兌隨時動撥其應給經紀箇兒錢飯米折色及廳倉茶果等銀均係按米計算動支仍照章將應領簞羨餘米價紙張等款按數抵

解不敷銀兩卽由津局如數解交以供支放  
一商船准帶礮械防護並由商捐輪船護運仍  
責成沿海水師實力巡防也查商船放洋向  
准各帶礮械軍器防護於抵津時呈繳出口  
時給領並由商董選備輪船出洋巡護仍責  
成沿海水師鎮將統帶備弁兵船遞相護送  
在案第查海洋巡緝關繫緊要竊恐奉行日  
久虛應故事自應嚴加整頓以收實效今屆  
海運除由甯商寶順輪船選派幹董多撥壯  
勇備齊礮械駕駛出洋迎護外並經臣咨明

江蘇督撫臣轉飭蘇省護運鐵皮輪船互相  
接應務保無虞並咨本省水師各鎮嚴督沿  
海將備實力巡緝不准稍有懈怠其山東直  
隸洋面請

旨飭下各督撫提鎮督飭水師各按所轄洋面認真  
迎護如有疏虞惟各該水師是問仍照案開  
具專任分任各職名先行送部查考

一天津交米之後循舊責成經紀並正漕完竣  
續到米船仍由天津道驗收也查道光六年

欽奉

諭旨海船到津難免經紀需索刁捐著軍機大臣屆期  
奏請欽派一二員前往等因又奉

諭旨商船到津委員將樣米送交欽派大臣比對米色  
按冊驗收其過剝事宜責成坐糧廳帶同經紀一手  
經理交米委員將漕糧交給剝船即為竣事毋庸到  
通以免推諉等因歷經欽遵辦理在案本屆仍由委  
員將樣米呈驗俟

欽派大臣驗收斛交剝船即責成經紀承管運通與  
商船無涉責任既專則剝船中途攙雜使水  
等弊不禁自除又歷屆海運均由戶部屆時

奏請

欽派大臣赴津查驗並倉場揀派坐糧廳酌帶經紀  
斛收正漕米數全完續到米船即由天津道  
驗收運通今屆應請照辦一俟正漕米數報  
完續到米船即責成天津道查照成案驗收  
運通

一海運經費委實不敷請酌量加增仍覈實支  
銷也查海運經費業於同治三年議籌運費  
案內奏准將杭嘉湖三府屬漕截行月折色  
甯處等八府屬本折月糧及向來給幫行月

南月經費食米飭屬變價批解應用每石以八錢為率前屆海運因商船苦累復經奏准每石加給水腳銀一錢五分在於杭嘉湖三府屬折色行月及車夫經費丁字沽正耗暨津租各款內開支並聲明另行加給之款不在原定八錢數內由糧道衙門造冊報銷在案惟查近年津次輪船往來與漕船互相磕碰時有沈船失米之患上屆海運於大沽口岸添設外局分委員董多派巡船相機引避藉免疏虞且漕糧逐年遞增上海兌務必須

多派員役盤驗彈壓兼以百物昂貴一切所需經費較倍於前通盤覈計委實不敷業經奏准部議於原給經費八錢及另案加給水腳一錢五分之外每石酌加銀五分即以津租各款及給丁行月車夫等銀項下動支奉旨依議欽此欽遵在案今屆仍當督飭各局員覈實開支摶節動用其加給水腳及酌增運費統由糧道衙門造冊報銷以歸簡易

一天津剝船應寬為籌備以免停米待剝也查商船放洋風色順利揚帆捷駛自可連檣抵



津必須多備剝船隨到隨剝庶免守候擁擠  
况津次洋船林立時有磕碰之虞米石久悶  
船艙炎日易於蒸變亦非慎重之道剝船自  
應寬為籌備庶糧米隨驗隨卸商船得以迅  
速回南無誤接運應請

勅下直隸總督轉飭天津道縣趕將新舊官剝一律  
上緊修造完整仍多雇寬大堅固民船接濟  
庶於恤商利運兩有裨益

一商船水腳等項照案覈給並二成免稅酌定  
賞罰也查海運商船除覈給耗米外每米一

石給予水腳銀四錢前因商情苦累奏准每石加給銀一錢五分現在商困未蘇應請照案加給其神福犒賞蓆片氣筒鐵鍬土筐斛手繹夫等項均係例給之款亦應照章分別支給凡商船八成載米准令二成帶貨各海關查明免稅又載米較多之船商分別給予職銜若已捐至五品無可再加統於事竣後奏明酌獎其各船在洋如有遭風鬆艙等事卸載後驗明大桅已砍貨物已棄查照糧船失風之例奏請豁免並照例優卹如貨物未

拋獨棄官糧者雖鬆船屬實所少米數仍令  
賠補商船在津設有事故應令呈報所在地  
方縣汛驗明通報確查屬實亦照遭風豁免  
之案辦理所少米石由津局於備帶經費內  
動支買補交倉事竣奏咨作正開銷歷經遵  
行在案本屆自應一律照辦又洋藥一項不  
在二成帶貨之例若攜帶洋藥仍令照案水  
路每百斤徵銀三十兩以防包私漏稅  
一商船二成免稅之貨仍以米石計斤並船旁  
跨帶竹木照案免稅也查商船承運官糧奏

准八成載米二成載貨免予輸稅如所帶貨物在津未能銷完准其轉至奉天銷售即由津局另給免稅單照以憑出口查驗至所帶二成貨物自應按斤計石業於前屆海運案內奏准以一百二十觔為一石其船旁跨帶竹木原因遠涉重洋為保護漕船之用亦經奏准免予輸稅各在案本屆海運仍請

勅下三口通商大臣暨直隸總督轉飭天津等各海關一俟運糧商船進口即由海關查明所帶二成貨物照案准以一百二十斤為一石其

船旁跨帶竹木仍請一律免稅以示體恤  
一商船回空裝貨仍請照免天津牛莊等處關  
稅也查商船卸運回空生計以北洋豆貨為  
大宗近因夾板洋船攘奪其利沙船日就疲  
乏前已欽奉

諭旨准令此項卸運回空船隻裝貨南下時免交北  
稅漕船到津米石交清後即由津局蘇浙糧  
道分別填給該船原裝米數某日交清准在  
天津牛莊自運回貨全行免稅印照持赴天  
津牛莊各關呈驗放行交米未清之船概不

給照其甯波等處船隻應請一律准予免稅  
並由戶部會同總理各國事務衙門議准在  
案復因商船驗卸後放空出口或往奉天牛  
莊或往奉天之錦州蓋州或往山東之膠州  
石島煙臺利津大山各口岸販貨本無一定  
又經奏奉

諭旨准將各船放空出口無論駛往奉天山東各口  
販貨均准一律免稅亦在案本屆海運自應  
遵照奏定章程一俟米船交卸後按船給予  
免稅印照無論駛往奉天山東等各口岸販

貨一律免予納稅其交米未清之船概不給  
照以杜拖欠

一米船抵津交卸嚴禁經紀斛手剝船需索浮  
費也查商船運糧抵津經

欽派大臣查驗米色後即由直局派撥剝船起卸並  
督令經紀斛手迅速斛收一經卸交清楚即  
令回空原所以恤商情而速運務第恐各商  
船抵津經紀斛手及剝船戶等向商船勒索  
浮費業於歷屆海運案內聲請嚴禁在案本  
屆仍請

勅下直隸總督轉飭天津道縣直局委員嚴禁剝船人等不准藉端勒索並由倉場總督轉飭坐糧廳督令經紀斛手秉公斛收毋許留難刁捐庶商船不致受累兌卸可期迅速

一天津交米仍將部頒鐵斛帶津較對也查歷屆海運將本省部頒鐵斛委帶赴津俟

欽派驗米大臣抵津後即將帶津鐵斛與倉場衙門木斛天津鐵斗一律較對準確方始開斛交兌歷經遵辦在案本屆海運照案先由糧道衙門飭提各州縣收漕木斛解省較驗後即



將部頒發斛委員攜帶赴津較對以免參差

浙省墾荒請仍照原定章程摺

日八年四月十三

奏為浙省墾荒事宜應請仍照原定章程辦理並各屬本年錢糧仍應分別徵蠲恭摺奏祈

聖鑒事竊准部咨議覆太僕寺少卿彭祖賢奏聲明

陞科例限以廣開墾一摺請

旨飭下該督撫詳慎講求妥議章程奏明覈辦再該京卿所請續報水旱墾田六年十年概不起徵之處是否能行亦應一併詳議以昭慎重等因

同治七年十二月十一日具奏奉

旨依議欽此鈔錄原奏行文到浙經查開荒不外勸

墾勸墾不外恤農浙省杭嘉湖全衢嚴六府屬  
及紹屬之諸暨一縣荒蕪各產前經升任撫臣  
馬新貽擬定招墾章程通飭各屬遵辦並奏奉  
諭旨覽所奏墾荒事宜尚屬詳盡該督惟當督飭各  
該地方官實心實力次第興辦等因欽此欽遵各  
在案內有定租賦一條議將荒蕪各產有主者  
責成業主招佃墾種交租輸賦其有久荒之產  
墾本較重業主當年尚不收租者准請蠲本年  
糧賦及必應請免兩年租賦者惟責各州縣確  
查何產有租何產無租以分徵蠲至無主產業

亦責各州縣查明招佃先給印單墾種准以開  
徵之年為始免租二年此二年內糧賦亦按年  
請蠲以後照額徵輸始而無主繼而有主出認  
者亦查明取結飭令業主酌給墾戶工本或仍  
給原佃之人佃種改照有主之產辦理終久無  
主認管者准其作為己業報稅過戶其僧道逃  
亡故絕之廟產亦照無主民產一律招墾准免  
租賦二年後報明撥作書院育嬰堂等項公用  
照例完納糧賦各等因籌畫似已詳盡歷年勘  
辦各屬荒蕪案內新墾各產糧賦如有未獲豐

收暨山陬瘠區賊擾較深者均經奏蒙

恩施分別半蠲全蠲及當年全蠲次年半蠲凡此曲  
予優卹無非重農足食欲廣招徠起見年來開  
墾之數雖漸加增而未能遽復原額者良由此  
次賊擾幾遍雖四民同受其毒而農夫為尤甚  
被擄者捐軀鋒鏑避匿者餓填山谷流散既少  
故生還無多本地之農不敷耕本地之土各鄰  
省同被賊擾均有荒產孰肯舍近圖遠此實限  
於人民稀少並非招徠之不力亦非有所畏而  
不前也所有墾荒事宜原定章程遵行數年官

民相安亦無更勝一籌之策應請照舊辦理毋庸另議更張轉滋閭閻疑惑即彭祖賢請照報墾水旱田例六年十年概不起徵之處誠如部議條例所載係指新開田地而言與熟田拋荒情形不同亦請毋庸置議際此東作正興各屬荒產急應乘時設法招墾本年錢糧仍不能不別熟徵輸容臣督同藩司嚴飭各州縣廣招墾種務使荒土年少一年糧額得以漸復仍俟栽種齊全查勘荒種各分數另行奏請分別徵蠲以昭覈實據署藩司劉齊銜具詳

前來理合恭摺具

奏伏乞

皇太后

皇上聖鑒勅部查照施行謹

奏

投首土匪復行謀叛緣由摺

八年五月二十五日

奏為投首土匪復行謀叛業經水陸兵勇擒斬格殺殆盡地方一律肅清恭摺奏祈

聖鑒事竊維浙省台州府屬民情素稱獷悍承平之世擄搶燒殺擒拷勒索即無虛日其抗官拒捕等案層見迭出行同化外地方官慮激事端率皆敷衍粉飾苟延目前遂至養癰貽患民不聊生粵逆竄擾後更屬暗無天日自同治三年署台州府知府劉璈抵任力求整頓練集兵勇督率所部搗穴擒渠殲除著名首要四百餘名此



外情節稍輕者寬其既往予以自新稟經前升  
任撫臣馬新貽批准將招撫首民分發各標編  
伍効力餘黨遣散歸農內如首鼠兩端之項連  
三等立正典刑乘間脫逃之葉力田等仍行拏  
辦惡燄為之少斂詎料該匪收合餘燼漸聚漸  
衆倚恃温台交界山徑叢雜仍復時為民患甚  
至勾結洋盜搶劫擄殺而發標各匪亦多潛行  
逃回肆行如故臣抵任後節次嚴飭地方文武  
會拏懲辦嗣復添調楚軍前營同知成邦幹前  
往會同原駐台屬楚軍副中營參將李勝才扼

要兇拏以補兵役之不及先後擒獲徐小池等七十餘名擇尤正法匪勢雖形窮蹙首要未能擒除正在懸賞購線併力窮搜即據葉力田等於本年正月間率黨覓保籲求請照前案立功贖罪准予自首經署黃巖縣知縣孫熹察其情詞懇切稟商劉璈暫令帶同夥伴隨營捕匪據陸續投首點名分隊計共二百二十四名造冊具稟到臣當以葉力田等稔惡多端肆害閭閻已非一日均係死有餘辜因搜拏緊急情迫自首不得濫行准免唯據該府等代為籲懇祇得

仰體

皇上好生之德暫許開其一綫用示格外之仁當飭令交署定海鎮總兵張其光署黃巖鎮總兵陳紹分別強弱酌派水師各營撥給口糧隨同捕匪立功贖罪原冀化莠為良改除梟性詎於四月初九日署鎮陳紹按點該首匪等出洋巡緝突有陳元里等脫逃即飭追捕經守備黃文琮將陳元里獲住搜出私信竟有暗約匪夥仍復謀叛約期攻城圖謀不軌情事該署鎮立即知會劉璈等各率員弁兵勇分路捕勦隨據陳紹

稟稱在洋格殺葉力田季九龍等五十八名溺斃黃得根等十二名又據成邦幹稟稱在黃邑擒斬包戒玉黃其根等三十三名格斃蔡太羊等六名又據孫憲稟稱在洋斬斃盧弓林屠飛雲等三十五名並將金得利等三名正法又據劉璈稟稱督同參將李勝才署臨海縣知縣陳寶善署台州協副將唐湘遠擒斬格斃漳定斌蔡顯明趙興魁等三十七名並將王克證等四名正法綜計此次殲除積匪一百八十八名合之上年陸續正法之項連三等約有二百五十

名均係上屆投首在逃在散始終怙惡之犯由  
該知府劉璈查明稟報前來臣查該匪等倚恃  
溫台交界山僻二百餘里聚黨亡命負嵎肆虐  
此擎彼竄出沒無常久為溫台居民心腹之患  
迨經勅而兼撫撫而復勅辦理逾年禍根始得  
悉拔雖有一二漏網亦各斂迹逃生地方現已  
一律肅清寔賴羣策羣力不分畛域始將積年  
巨憝悉行剷除俾兩郡生靈可期登衽席而享  
仁壽所有在事出力員弁不無微勞足錄可否

仰懇

天恩俯准給予獎勵之處出自  
恩施謹繕具清單恭呈

御覽其餘出力兵勇以及屢次傷亡勇弁除飭另給  
獎卹外謹將懲辦投首土匪復行謀叛緣由會  
同閩浙總督臣英桂恭摺具

奏伏乞

皇太后

皇上聖鑒訓示施行謹

奏

--	--	--	--	--	--	--	--	--	--	--

招商試辦蘇松常鎮太引鹽摺

八年五月二十八日

奏為江蘇蘇州等五府州屬鹽務招復引商分地  
認數設局委員督銷先行試辦請暫免州縣督  
銷考成恭摺仰祈

聖鑒事竊照江蘇蘇松常鎮太五府州屬鹽務經前  
撫臣馬新貽奏改官辦上年正月間接准戶部  
咨遵

旨議奏內開官運之法非不可試行而額引之數亦  
未可驟減請如所奏暫行改章試辦其年額應  
銷引目應仍照銷引舊額酌減十分之二作為



官運暫領引額按數核計考成應繳各項課款  
照商運一律交納先課後鹽准由各該州縣自  
赴運司衙門請領代引照單各赴各場配鹽運  
銷統俟試辦一年後有無成效再由該撫奏覆  
核辦如有情願認運者應即飭令自松所為始  
按現銷票運寔數加增認運概令先課後鹽正  
雜並交某處招商有人即將某處官運停止俟  
試辦數年逐漸增復舊額較之州縣領銷似有  
把握等因奉

旨依議欽此恭錄行知遵照當經咨商江蘇撫臣飭

查咨覆各屬兵燹之後戶口凋零人煙寥落計  
丁合引相去懸殊即照原議二成領銷寔已萬  
無把握若於二成之外再有加增更屬無從設  
法惟有責成五府州趕緊招復引商飭照原奏  
二成認運自議緝私章程先行試辦一二年俟  
有成效再行逐漸增運試辦期內督銷考成暫  
免核計請彙核具

奏等因即經行據浙江鹽運使江蘇布政使浙江  
牙釐總局司道會同詳稱蘇松常鎮太各屬從  
前完善之時銷數不過十之五六現在戶口十

減其七該州縣錢漕較重政務本繁未能兼顧  
官運而引地為商人世業事關切已請招復舊  
商復行引鹽查上年原奏銷數六萬三千引僅  
止十分二成有零而部定銷數十分之八數目  
懸殊應飭各商加增認運去後始據蘇州等府  
詳據商人潘宏昌等陸續認銷引地因所認之  
數較之近年銷數所增無幾當以運銷票鹽各  
地情形不同沿海地方不及一成地居腹裏者  
本有二成且訪知各舊商資本不裕勉強承認  
以圖復業各新商竟有無貲佔認者而各地票

商存鹽尚有數萬引飭局停運並札各局員督  
商查明存鹽前半課暨成本路費並銷鹽遠近  
日期之應得餘利令認商償還並令將後半課  
先行完納俾認商不能無本空認而票商亦得  
別謀生理茲據各局員分稟查明本利議定價  
值照數交清票商將鹽盤收於本年二月初六  
起至三月初一等日先後接辦行運等情查五  
屬三十一州縣暨同配杭嘉所場鹽與鎮屬昆  
連先於五年間認包之建平一縣共三十二州  
縣認包鹽數有六萬六千引雖較舊額相去懸

殊而與票運所銷已增不少與其嚴辦票鹽耗費既多得不償失莫若減復引鹽而課款不虛惟引鹽舊章十載不行不特案卷蕩然無所憑證且情形異昔亦難照行惟有溯查鹽誌參酌票章擬具條陳先行試辦一二年仍由運司督飭州縣暨甲引各商察看情形籌議緝私疏銷之法以期增引計考漸復舊規等情會詳請

奏前來臣查浙西引地敗壞已久自改行票運設局辦理以來定岱私鹽多潑販於蘇松常鎮太各屬雖殫竭心力設法巡緝總未能稍有起色

緣該五屬州縣濱江沿海汲港紛歧若多派巡  
船需費不貲多設分局糜費滋多是以前撫臣  
馬新貽不得已而

奏請改章試辦責成各該州縣自行籌款領運嗣  
經部議准辦而於銷數改為舊額十分之八相  
去懸殊官商皆未領辦臣到任後節次咨准江  
蘇撫臣飭據蘇州等府縣招復引商潘宏昌等  
陸續認銷鹽數共六萬六千引按年核數如有  
短少責令賠課先行試辦一二年暫免計考仍  
令運司督飭州縣商人設法緝私疏銷如有成

效再行增引計考漸復舊規除咨吏戶二部查  
照並將章程冊結咨送戶部外合將江蘇蘇州  
等五府州鹽務招復引商分地認數先行試辦  
暫免州縣考成緣由會同護理江蘇撫臣張兆  
棟恭摺具

奏並繕清單敬呈

御覽伏乞

皇太后

皇上聖鑒訓示謹

奏

謹將江蘇蘇松常鎮太五府州改復引鹽酌議  
章程十二條繕具清單恭呈

御覽

一請發代引印單護照給商完課捆鹽運銷也查  
引鹽商人向來赴運司衙門先請鹽政所發買  
鹽印單憑單請領部引入場捆鹽並於掣鹽時  
呈繳單引過掣然後完課給予水程又憑程再  
請部引現甫試辦不特不及請引即印單水程  
轉展給領亦多周折請由鹽政頒發代引印單  
入場捆鹽並另給護照運銷以省案牘



一先課後鹽應令商人全完課銀後入場捆鹽也  
查引鹽商人向來先請部引印單捆鹽過掣然  
後完課票鹽章程則於請領買單護照之前先  
完半課其後半課則於銷鹽時由各府局收完  
今既復引鹽自應查照引章全完課款惟先請  
單引入場仍俟捆鹽過掣方能完課行運事較  
紆迴商人既有所不便且恐該商等捆鹽之後  
延不完運應令商人先完全課給予引單捆配  
並將護照發所如過掣無弊立即發照運行以  
歸簡捷

一掣驗引鹽應於票章之中參用引章也引鹽舊章程先本分季四掣嗣分上下半年兩掣至票鹽章程因兵燹之餘商力不足准其隨到隨掣以免守候現在認商似應查照票章于春季夏初秋季冬初隨到隨掣俾示體恤仍參用引章於夏間舊銷之前將上半年應掣包認之鹽冬間菜銷之前將下半年應掣包認之鹽一併完課掣運以利行銷

一引鹽完課應俟運司釐定科則另詳咨部備查也引鹽完課向分正雜科則按引徵完票鹽章

程則按斤抽收釐課無分正雜從前浙西之杭嘉湖蘇松常鎮太八屬地情暢滯不同按引徵課自一兩數錢至二兩餘不等舉辦票鹽時該八屬地方沿海沿江私鹽易灌是以按斤抽釐減於浙東各地該八屬場鹽每斤概抽釐課錢八文岱鹽成本較輕則每斤十文而八屬中之蘇松常鎮太五府州係隸蘇省軍興之時向抽鹽釐嗣經浙省分設各局整頓鹽務而江蘇鹽釐未能即停票商完納每斤八文十文釐課之外未能再令完繳江釐因以四文五文作為浙

課四文五文作為江釐令商人分別完繳在案  
今五屬改辦引鹽自應以釐歸課復還科則業  
經咨准兩江督臣江蘇撫臣函覆停免抽釐除  
飭運司察看各地暢滯情形查照成例釐定重  
輕科則妥議章程詳明定案另行咨部備查

一五屬各地應分設兩局委員督銷也引商行鹽  
從前皆自行巡緝疏銷向不委員督率惟此時  
新商既非熟習舊商亦已生疏地方文武州縣  
營汛以及營兵縣捕誠恐呼應不靈自應委員  
督銷以資統率聯絡而五屬地方寬廣並應分

設兩局以蘇松太為一局常鎮為一局至委員  
薪水應由各地商人自行籌備不請官項以省  
經費

一五屬辦巡銷鹽應准其通力合作也五屬地情  
雖異十年廢弛則同江海緝私實與內地緝私  
相為表裏而彼此銷鹽皆滯亦有彼善於此者  
此時甫經試辦各地皆無把握彼此若不相通  
整頓難期有濟所有各地商人緝私銷鹽一切  
事宜自應通力合作以收實效

一包認六萬六千引之課款應責令照數全完也

各地商人既經具結認包且由三所甲商出具保結引有絀銷即當賠課應於每屆年終合計五屬銷數如不及六萬六千引責令甲引各商照數賠完案係通力合作應行通銷通賠至本年己巳綱六萬六千引各地認商係於二三月間先後接辦其票商正月初一以後二三月以前所銷之鹽應歸認商六萬六千引數內核計一年銷數以昭公允而杜欠課

完課錢文應令商人易銀納庫也查票章係按斤抽錢現暫照數完繳而軍車解支均須銀款

自應令商人於完課時查照市價將應完錢文核數易銀完納以便解支

一巡緝私鹽應照票鹽經費飭商自行分提嚴辦也五屬私鹽充斥辦理票鹽時海巡江巡內巡經費浩繁此時商巡如不照辦官引難銷現今甲引商於完課之時自行按引計斤抽提存儲公所仍照票鹽巡費分別支用內巡每斤定以一文江海巡每斤定以二文以嚴巡緝

一五屬各州縣督銷考成應請暫免也此時既復引鹽原應並復考成是以該署運司前詳仍請

復還茲該署司等復查五屬引鹽甫經試辦正雜科則尚未釐定而該商人等雖已分地認包寔係通力合作盈絀併計包完六萬六千引似應暫免考成請俟試辦一二年後察看各地銷鹽暢滯情形再行定額計考惟商人行鹽全恃州縣督率辦理方能有濟各州縣中如有以鄰省鹽務意存膜視以致銷引日滯者仍隨時詳請撤任參處其有認真督辦行銷暢旺之員亦應酌獎以示勸懲

一五屬引商鹽課應查照牙釐局收支冊分上下



半年查造並於次年造報奏銷也兩浙票鹽詞  
銀係由牙釐局收支造冊移司詳咨此項引商  
鹽課係由運司衙門收存運庫解支自應於上  
下半年援照票鹽收支冊另行造冊彙案詳咨  
並於次年十二月彙冊奏銷以清款目

一五屬各地整頓暢銷後舊商爭認加引應完預  
課也現在招復引商原屬儘招舊商但行鹽商  
人當惟力是視舊商有力自應認包舊商無力  
應招新商是以現在各地新商之認包者不少  
所有該地無力舊商無資盤買票鹽此時難於

認包而力雖不逮心寔不甘一經各地整頓暢銷之後按年加引難保舊商不出而爭認紛紛訟擾屆時並無存鹽當買即飭令驗資當即發還仍不能知其有力無力自應先定預課章程凡舊商之爭認引地者認引一道即令其預完二引課銀認至十百千引者皆加倍預完此項銀兩存儲道庫俟該商運銷引鹽逾於認額之時准於完納課銀之中十成搭扣一成陸續扣還以審商力而息訟端

--	--	--	--	--	--	--	--	--	--

恭謝

天恩摺

八年十二月十六日

奏為恭謝

天恩仰祈

聖鑒事竊臣接准部文同治八年十二月初七日內

閣奉

上諭李鴻章現赴貴州督辦軍務湖廣總督著李瀚  
章署理楊昌濬著署理浙江巡撫所遺浙江布政  
使著楊昌濬揀員署理欽此又承准軍機大臣字  
寄同日奉

上諭本日已有旨令李瀚章署理湖廣總督並令楊

昌濟署理浙江巡撫李瀚章著即馳赴湖北將應  
解餉需源源轉運毋令缺乏等因欽此欽遵到臣  
當即恭設香案望

闕叩頭謝

恩訖伏念微臣調赴浙江到任年餘於巡洋海塘兵制

鹽漕諸大政以及地方各事無不竭盡心力次  
第籌辦仰蒙

聖訓周詳幸免隕越方慚報稱之未能乃荷  
隆恩之稠疊自

天申命伏地悚惶臣服官湘鄂雖歷多年而總督兼

轄兩省地當孔道華洋雜處責任匪輕籌解餉  
需尤關緊要深慮弗克勝任現已催令署撫臣  
楊昌濬趕緊接印俾臣得以迅速赴楚以便臣弟  
鴻章交卸入黔專力軍事仰副

高厚鴻慈於萬一所有微臣感激下忱謹繕摺叩謝  
天恩伏乞

皇太后

皇上聖鑒謹

奏



兩浙票鹽辦理整綱摺 八年十二月二十三日  
奏為浙東及杭嘉湖三府票鹽辦理整綱以杜流  
弊並捐輸經費以濟塘工要需仍俟試辦數年  
再行定制恭摺奏祈

聖鑒事竊查浙鹽改票以來行之數年雖有明效而  
票商並無限制聽其隨時領運紛紛搶銷類多  
某記字號不列真名的姓設有弊端難於究詰  
自應分綱認運以專責成除江蘇五府州屬招  
商認運業經奏奉

恩准試辦不計外其浙東各屬及杭嘉湖三府行票



之地經臣飭藩運二司會同牙釐總局司道將如何計票分綱以期變通盡利妥議詳辦去後嗣據議覆請照准鹽章程令商人呈報真名的姓查照票運最多年分銷數核加額引分地認運按春秋兩季完課掣運以庚午年春綱為始給予執照循環轉運並查從前鹽務本有塘工生息之款茲擬仍令綱商分別銷地暢滯按引捐輸一次以濟塘工經費仍准查照塘捐定章一體請獎旋據各商分地認定按年運銷計徽州府六萬引每引捐銀一兩二錢共銀七萬二

千兩廣信府五萬四千引衢州府四萬二千引  
均每引捐銀一兩共銀九萬六千兩嘉興府一  
萬四千引湖州府連廣德州共三萬四千引浙  
東之諸義浦三縣共一萬六千引均每引捐銀  
八錢共銀五萬一千二百兩金華府六千四百  
引嚴州府一萬二千四百引杭州府六千引均  
每引捐銀六錢共銀一萬四千八百八十兩共  
認每年綱鹽二十四萬四千八百引繳到捐銀  
共二十三萬四千八十兩當即給予印照執守  
此後逢綱驗照收課運鹽不再捐輸以卹商力

惟現係辦理票運整綱並非復引其完課捆運行銷各事宜仍應悉照票章辦理請俟試辦數年察看商力情形再行定制等情會詳請

奏前來臣查此次辦理整綱捐輸既有裨於塘工要需而浙東及杭嘉湖票運年有定額商有認地不致如前搶銷從此稍有規模可冀漸復舊制仍俟試辦數年察看商力情形再請定案至各商捐繳經費尚屬踴躍合無仰懇

皇上天恩准照捐輸塘工經費定章一體給予獎敘以昭激勸除將前項銀兩札飭藩運二司發典

生息或另行發存生息以作塘工歲修並令妥議章程以垂久遠外合將辦理浙東及杭嘉湖三府票運整綱並捐輸塘工經費緣由恭摺具

奏伏乞

皇太后

皇上聖鑒訓示謹

奏



請將旗營米折緩議加增摺

九年四月二十八日

奏為荊州旗營俸餉照議加增米折無款給發擬請緩加恭摺仰祈

聖鑒事竊准戶部咨以荊州將軍巴揚阿等奏旗營生計艱窘請酌加餉米經部議俸餉加給一成米折每石暫增銀二錢給銀一兩四錢仍令該將軍隨時體察俟米價平減仍歸定額一兩二錢以昭撙節等因具奏奉

旨依議欽此欽遵移咨到臣當即轉飭司道遵照辦理去後茲據湖北布政使張建基詳稱旗營俸

餉向在宜昌鹽課荊州商稅兩項下撥解此次  
加給俸餉除荊州商稅前已按月儘數撥解無  
存外擬請專在宜昌鹽課項下查照部議於八  
成之外再加一成給發等情當經臣等批飭如  
數照發在案又據湖北糧道丁守存稟稱查鄂  
省徵收南糧原以供旗綠各營兵米之需溯自  
咸豐八年奏定改折章程南米正耗每石折徵  
銀一兩六錢五分又加水腳銀一錢五分每年  
共額徵銀二十二萬六千七百餘兩除歷來坍  
沒清淹奏准停徵並每年遇災請緩及徵不足

數等項不計外約實徵銀不過十五六萬兩此就中稔之年而言若同治八年水災過大則止徵銀十三萬餘兩其中每年尚應提出水腳銀一萬二三千兩係奏明撥歸軍需局發餉之用此糧庫每年所收米折之大概數目情形也至支放章程旗營自咸豐八年起每石折銀九錢迨至同治三年奏加三錢每石折銀一兩二錢每年約支銀十二萬八九千兩又綠營每石折銀七錢始終未議加增每年約支銀一萬五千數百兩以一歲所入之南糧放各營議定之米



折僅敷周轉若遇災歉太甚蠲緩必多則收數  
即入不敷出此糧庫每年支放米折之大概數  
目情形也現奉荊州將軍奏加米折業經部議  
每石暫增二錢自應遵照辦理無如庫藏空虛  
就目前情形而論實屬無款可加况一加之後  
即成定章按月供支刻不能緩若如部覆俟米  
價平減仍歸定額之議籌畫固為周至但思米  
貴之日必係災緩之年米價既昂則加款勢難  
復減而徵數既緩則庫項終屬不敷設有貽誤  
關係匪輕該道職有專司不得不通盤籌畫預

先據實陳明等情請示前來 臣等伏查荊州旗營生計艱窘自應量為調劑以示體恤現已查照部議俸餉加給一成核計每歲增銀三萬二千兩有奇似亦足資調劑惟米折一項出自南糧計自改折以來每石雖收銀一兩八錢而通年核算除停徵緩徵民欠及水腳撥解軍餉不計外其實徵到庫者按照正額不過三分有二若統計額徵之數似尚有餘而確核實收之銀恆形不足該糧道所稟委係實在情形不敢壅於

上聞此外如藩鹽兩庫歲入各款僅敷京協及本省各餉之用亦屬無可挹注且查綠營米折每石僅發銀七錢而旗營向定一兩二錢相形之下已覺多寡懸殊今若再行加增似不足以昭平允設或綠營亦紛紛請益更難籌措此時如勉強應付將來必難為繼與其掣肘於後曷若慎重於先臣等公同商酌擬請將米折一款緩議加增如蒙

俞允恭請

勅下荊州將軍遵照臣等為款絀時艱量入為出起

見是否有當謹合詞恭摺具陳伏乞

皇太后

皇上聖鑒訓示謹

奏

--	--	--	--	--	--	--	--	--	--	--

整頓水陸各軍大略情形摺 九年七月十三日

奏為遵

旨整頓長江水師並將現辦情形恭摺覆陳仰祈

聖鑒事竊臣等承准軍機大臣密寄同治九年六月

十四日

上諭據宋晉一聞長江水師遠遜於前營制漸形

疏懈並有不法水勇假差邏為搶劫江面盜案屢

嚴地方官不敢捕拏恐日久肆行轉致

貽害等語著馬新貽李瀚章劉坤一郭柏蔭劉崑

按照曾國藩所定章程會同黃翼升時加整頓務

使士卒驍壯號令嚴明一面檄飭各地方官遇有水勇搶劫案件即行捕拏究辦不准互相容隱擾害商民等因欽此仰見

皇上慎重江防綏輯東南至意下懷曷勝感悚臣等伏查長江水師設自同治元年原以久練之勇改為經制之兵湖北所設荊州陸溪口兩營屬湖南岳州鎮總兵統轄蘄洲巴河田家鎮三營屬漢陽鎮總兵統轄其各缺始於七年間分別揀員借補飭令分巡歸標維時臣柏蔭正署督篆會同長江提臣黃翼升嚴飭各該將備督率

弁兵勤慎操防聯絡巡查又經本任督臣李鴻  
章隨時整飭江面盜匪斂跡辦理頗收成效本  
年春間臣瀚章自浙來鄂由蘇省溯流而上所  
過沿江地面留心察看各營水師礮船士卒均  
皆驍壯隊伍亦極整齊似尚足資控制迨抵任  
後訪聞大江時有乘船客商被匪謀害之事檢  
查却無報案民間謠言四起甚且及水師有  
不法兵勇所為者臣等隨督飭兩司委員嚴密  
訪拏旋據該委會同各該地方官暨水師員  
弁先後拏獲匪犯張瞎四等十餘名訊認各攜



划船攬載客商迭次中途圖財謀命不諱當將各犯照例分別正法梟示業經恭摺

奏報在案從此羣疑盡釋輿論翕然而數千里江面亦未聞再有行船失事茲欽奉

諭旨飭令整頓水師臣等竊思長江水師最關緊要原定分汛巡防章程立法本極周備惟是江路綿長地方遼濶誠恐耳目難周日久生懈惟有會同黃翼升和衷商榷力為整頓通飭各營凡遇水兵病故革退必須慎選精壯勤妥之人考補足額不准以游勇及老弱濫行充數並督飭

各該將備嚴明紀律認真操練巡邏務使遠近  
聲勢聯絡宵小無從竊發以安行旅而資防禦  
仍隨時察其勤惰分別舉劾一面檄飭所屬濱  
江各州縣留心密查儻有礮船水勇自犯搶劫  
立即捕拏務獲稟報究辦如敢互相容隱定與  
失察之該管營弁從嚴參辦斷不敢稍涉寬縱  
致滋廢弛所有整頓長江水師情形謹合詞恭  
摺覆

奏伏乞

皇太后

皇上聖鑒訓示謹

奏

恭謝

天恩摺

九年八月十六日

奏為恭謝

天恩仰祈

聖鑒事竊臣接准兵部火票遞到同治九年八月初

三日內閣奉

上諭直隸總督著李鴻章調補李瀚章著補授湖廣  
總督等因欽此當即恭設香案望

闕叩頭謝

恩伏念臣才識至庸措施鮮當謬攝兼圻之任方深  
覆餗之虞茲蒙

重錫恩綸補授斯缺 臣弟鴻章復調任畿輔同氣並  
膺夫重寄

殊榮疊被於臣家聞

命自天悚惶無地查湖廣自經兵燹元氣未充加以  
水患頻年民生益絀撫輯不容稍緩而治軍籌  
餉察吏通商諸務尤應竭力維持悉心區畫自  
惟駑下懼弗克勝目今人材輩出內外不乏賢  
能微臣兄弟獨荷

隆施既滋叨竊之慚彌切滿盈之戒第思武漢為長  
江樞紐形勢扼要正須力求整練共濟時艱儻

博退讓虛名轉涉自謀暇逸惟有益加惕勵倍  
矢愚誠冀大局之漸平再瀝陳夫微悃臣本擬  
籲懇

陛見跪聆

聖訓俾一切有所遵守惟現值江防喫緊撫臣郭柏  
蔭適在闡中監臨鄉試臣責任綦重未能遽行  
遠離容俟科場事竣防務稍鬆屆期察看情形  
恭摺陳請入

覲所有微臣感激下忱謹繕摺叩謝

天恩伏乞

皇太后

皇上聖鑒謹

奏

合肥李勤恪公政書卷五目錄

湘廣  
楚湖

男經畬經江澧編輯

滇淮  
濤滄

籌款興修緊要隄工摺 十年正月二十一日

越南貢使過境日期摺 十年六月初七日

前任督臣勳績最著擬請建祠摺 十年七月初五日

勇丁借補行伍毋庸另定章程摺 十年九月初一日

恭報起程赴湘日期摺 十年十月二十一日



查明湘省文武辦理匪徒情形摺十年十二月初一

現籌清查保甲分設防營片十年十二月初一日

察看湖南撫藩均堪勝任摺十一年三月二十八日

湖北省城請建故大學士祠摺十一年四月初五日

湖北留防各營及釐捐局卡摺十一年五月初七日

請裁免川鹽陸課摺十一年八月初八日

請將田關移設鄢家場摺十一年八月二十八日

遵旨密保堪膺重任司道摺十一年十一月二

籌款興修緊要隄工摺 十年正月二十一日

奏為江鄂連界地方隄工緊要委員勘估籌款興  
修恭摺具

奏仰祈

聖鑒事竊照湖北黃梅縣清江等鎮與江西德化縣  
之封一等鄉連界濱江臨湖前有沿江隄向係  
化邑修築以禦江水後有驛路隄向歸梅邑民  
間派土承修以禦湖水兩隄輔車相依田地廬  
舍藉資保障上年因江湖盛漲各堤間有被水  
漫潰以致田成巨浸水落之後經臣等咨會江

西撫臣劉坤一委員會勘籌修旋據江西九江  
廣饒道景福九江府知府邵子彝湖北黃州府  
知府英啟會稟稱查勘沿江隄雖經被水洗刷  
修補工費無多尚能就地籌集興辦惟驛路隄  
自清江鎮之丁字壩起至黃泥塘止計長六十  
里上年被湖水漫潰九口通隄殘缺勘估土方  
工價共需銀一萬四千餘兩亟宜及時修復惟  
地方頻遭水患民情困苦勢難責令派集土費  
溯查乾隆三十二年因該隄冲坍曾經由鄂動  
用公項修築並免民間扣還有案此次事同一

律稟請援案撥款興工等情並准劉坤一以江  
省應否協濟咨商前來臣等伏查黃梅縣驛路  
隄與江西德化縣之沿江封廓隄唇齒相依外  
禦江流內障湖水互相保衛不可偏廢既據該  
道府等勘明驛路隄潰口工程緊要自應籌款  
興修隨經會同督飭湖北藩司在於釐金項下  
酌撥錢二萬串由司揀委熟悉隄務廉幹妥員  
馳赴黃梅會商該縣知縣覃瀚元趕緊廣集人  
夫將該隄各工堅實修築勒限春汛前一律完  
竣報請驗收照例具結保固以杜草率偷減等

弊其經費除已撥外實尚不敷若干應令覃瀚  
元核實開報續請給發毋庸再由江省協濟至  
此項隄工向係民間派土自修茲因工大費鉅  
官為撥款本應照章按畝攤繳但地方疊被水  
災閭閻實形拮据請即免其徵還俾紓民力嗣  
後該隄歲修之工仍歸梅民自行承修其德化  
縣沿江封廓隄即由江省籌費修築以清界限  
而專責成除咨行江省飭令德化縣趕將沿江  
隄一律培修完固共資保障外所有撥款興修  
江鄂連界隄工緣由謹會同江西巡撫臣劉坤

一恭摺具

奏伏乞

皇太后

皇上聖鑒訓示謹

奏

--	--	--	--	--	--	--	--	--	--	--

越南國貢使過境日期摺 十年六月十七日

奏為恭報越南國貢使過境及馴象出境各日期

仰祈

聖鑒事竊臣等前准廣西撫臣蘇鳳文咨會越南國  
恭遣使臣阮有立等賚進

貢品儀物及馴象飭屬照例應付護送前進等因  
當經行司查照向例飭委候補直隸州伍繼勛  
補用知縣袁璣由水路前往湖南巴陵縣入境  
首站地方迎護該國使臣及儀物候補知縣上  
官振勳督標中營都司特蘇布由陸路前往湘



鄂交界地方接護象隻所有馴象抵省起程日期並倒斃隨象一匹緣由業經臣柏蔭由驛具奏聲明倒象齒牙皮骨俟收拾晒乾交使臣帶京在案茲該使臣恭賚

貢品於五月十三日由巴陵縣水路入湖北嘉魚縣境經該委員督同沿途地方文武逐程護送十九日行抵武昌省城臣等率同司道照例待以筵宴隨從人等給予犒賞因現值襄河夏汛泛漲上水舟行遲滯改由漢口登陸前進臣等隨添委武昌城守營守備方順帶兵護送並將

倒象皮骨齒牙晒晾乾潔用箱裝儲飭交該使  
臣一併隨帶赴京是月二十七日起程並分飭  
漢陽協派兵送至灑口統帶忠義營提督劉維  
楨派撥弁勇接送至小河溪再由統帶升字營  
提督周得升派勇接護出境由河南前進該使  
臣等行走極為安靜經過各屬應付照料俱無  
遲誤並據護送馴象委員知縣上官振勳等稟  
報逐站護送象隻及隨從象醫人等於五月十  
三日出湖北應山縣境至河南信陽州交替一  
路均稱安謐等情前來除飛咨直隸河南督撫

臣一體飭屬應付接護外所有越南國貢使過境及馴象出境各日期謹合詞恭摺謹陳伏乞

皇太后

皇上聖鑒謹

奏

前任督臣勳績最著擬請建祠摺

十年七月初五日

奏為前任湖廣督臣勳績最著遺愛在民籲懇

天恩俯准建祠湖北省城以慰忠藎而順輿情恭摺

仰祈

聖鑒事竊前任湖廣總督大學士臣官文由侍衛起家游升將軍咸豐五年蒙

文宗顯皇帝特達之知擢授湖廣總督暨為

欽差大臣督辦軍務維時武昌省城已三次失陷湖北府州縣大半被髮逆蹂躪官文受事後與原任湖北巡撫臣胡林翼同心協力籌餉練兵開

誠布公信賞必罰將士觀感奮興皆樂於効命  
從此鄂軍聲威日振是年十月克復德安郡城  
六年十一月攻克武漢其餘黃州等郡縣以次  
恢復全楚肅清繼復籌辦東征事務派撥水陸  
各軍分赴三江皖豫協勦不分畛域接濟餉需  
安慶金陵先後克復東南大定實賴官文協助  
之力為多

錫爵酬庸壘蒙

恩命無待臣等贅述矣惟查官文任楚督十二年之  
久當地方兵燹之餘能持大體與厯任撫臣和

衷共濟講求軍事吏治善政難以枚舉民氣得  
漸復元至今鄂省紳民稱頌不置本年正月官  
文在京病故已蒙

特詔優卹並入祀

京師賢良祠而鄂省實為該故員立功地方合無  
仰懇

天恩俯准建祠湖北省城如蒙

俞允擬在前建胡林翼祠內添設官文一位即將此  
祠改為官文胡林翼合祠該故員等生則共効  
忠蓋沒則同享馨香既順報祀之人情亦節造

祠之經費並請

勅部列入湖北祀典每年在於司庫兵餉截曠項下撥給祭品銀二十兩飭令地方官春秋致祭以垂久遠所有前任督臣勳績最著擬請建祠緣由謹合詞恭摺具

奏伏乞

皇太后

皇上聖鑒訓示謹

奏

勇丁借補行伍毋庸另定章程摺

十年九月初一日

奏為遵

旨酌議湖南撤回勇丁借補行伍毋庸另定章程恭摺覆陳仰祈

聖鑒事竊臣承准軍機大臣字寄同治十年六月十

七日奉

上諭據御史張沅奏湖南莠民滋事條陳辦理一摺湖南撤回勇丁前曾効力行間內多保有官職間散日久生計維艱該御史請將撤回楚勇酌量補入行伍以示體卹著李瀚章劉崑體察情形妥議



章程具奏等因欽此伏查自粵捻各匪平定遣撤  
勇丁各省皆有而兩湖最多內有曾立戰功洵  
保副參遊都守者人數既多賢愚不一雖例准  
投標候補而人浮於缺拔補無期久置閒散誠  
恐其生計維艱同治四年臣在湖南巡撫任內  
早慮及此曾將投標人員分隸撫標三營酌定  
額數教習弓馬分別月給弓箭銀兩按期校閱  
既得選拔真才亦冀潛消獷悍當將辦理情形  
恭摺奏奉

諭旨著照所請該部知道欽此欽遵在案嗣臣調任

楚督隨將湖北省出師凱撤投標員弁仿照前  
辦湖南章程挑選年力精壯者酌給弓箭錢文  
飭令中軍副將督率練習弓馬隨時調齊考校  
即以弓馬之優劣定署補之後先蓋因該員弁  
等打仗是其所長弓馬或未嫻習使之操練心  
志有所專注不致游散妄為非此難獲署補則  
人知自奮技藝可期漸熟又給弓箭銀錢以資  
生計俾得安心學習於體卹之中已寓培植之  
意近年各省提鎮暨副參遊等官我  
皇上所簡任補用者軍營出力之員為多都守千把

由軍功出身者更不乏人矣其餘候選人員准  
歸部選各省保歸候補者准其歸標由督撫臣  
酌發各營學習弓馬遇有缺出如果人地相宜  
且准酌量借補

國家成全器使之恩至優極渥稍知自愛者亦當  
義命自安不敢作奸犯科似無庸另議章程徒  
滋紛更而失政體至該御史原奏所稱守備以  
下准其借補本省營兵一節臣查兩湖各標鎮  
協營兵丁內有先曾當勇而後充兵者亦有先  
充營兵辭退當勇營頭撤回復又充兵者在該

管營員但能擇其年壯技可者挑募足額不能  
盡裁現兵而另召勇補况兵丁係歸千把外委  
管轄若以曾保守備等官強令入伍借補營兵  
不特官階崇卑倒置約束為難抑且情意難孚  
辦理諸多窒礙陸營情形與新設長江水師事  
例迥殊未可執此例彼自軍興以來各路遣回  
楚勇已保官職者固多未得功名者尤難數計  
行伍例有定額充募者原多曾經當勇之人勢  
不能於額外更求安插且此輩安分務業者居  
多未必盡皆貧苦其游手滋事豈盡迫於饑寒

乃一二刁悍之徒素性桀驁或創立會名或藉端勾結地方官果能嚴查保甲整理團防遇有不法者隨時隨事密拏嚴懲自可消患未萌似亦不必另籌辦法除通飭各州縣認真整齊團練力查保甲以清亂源而靖地方外合將酌議情形謹會同湖南巡撫臣劉崐恭摺覆陳伏乞

皇太后

皇上聖鑒訓示謹

奏

恭報起程赴湘日期摺 十年十月二十一日

奏為恭報微臣起程日期仰祈

聖鑒事竊臣承准軍機大臣字寄同治十年十月初三日奉

上諭湖南散勇會匪遍地皆是該處有司專以敷衍了事養癰貽患深切隱憂著派李瀚章馳驛前赴湖南將該省文武各官粉飾貽悞各情確切查明據實參奏毋得以奏報肅清在前稍為迴護等因欽此仰見

皇上綏靖疆宇思患預防至意臣跪讀之餘曷勝欽

悚伏查湖南近年以來各路軍營遣散勇丁陸續回籍人數既多良莠不一間有結會為匪情事即如本年四月間益陽龍陽兩縣先後被匪陷城經湖南撫臣劉崐署提臣李明惠調派貴州補用道李光燦記名總兵楊名聲參將羊瀛等會同水陸各軍分投攻勦立將兩城克復並勦捕竄散各匪地方一律平靖疊據各該營縣稟報並准劉崐咨會節次

奏明在案臣以此股匪徒雖不久即行撲滅誠恐餘孽漏網勾結為患疊次嚴飭地方文武實力

查拏行保甲以分邪正整團練以禦匪徒雖據各縣稟覆認真奉行閭閻靜謐猶恐或有諱飾凡遇南來紳士隨時接見詳詢湘中情形僉謂自龍益兩縣會匪勦滅後地方俱屬救靖今歲秋收豐稔民情安恬等語各府縣亦無據報匪徒聚眾滋事之案茲欽奉

寄諭前因究竟現在洞庭西湖港內及道州等處有無土匪潛聚六月間武岡州果否被圍益陽龍陽之變實係因何起衅道員李光燦等軍能否得力有無擾累臣已遴委湖北候補知府劉縻



補用知縣蔡炳榮先行前往改裝易服分赴道州等處確切密查一面將署中公事趕緊清理定於本月二十一日帶印起程由水路馳赴湖南省城遵

旨逐一嚴查儻地方文武各官有粉飾貽誤情弊即當據實從嚴參辦斷不敢稍涉迴護瞻徇自取咎戾謹將起程日期恭摺由驛具

奏伏乞

皇太后

皇上聖鑒再 臣帶印公出署中尋常日行事件照例

飭委湖北藩司代印代行其有軍務及緊要公  
事仍包封遞送 臣行轅核辦合併陳明謹

奏

--	--	--	--	--	--	--	--	--	--

查明湘省文武辦理匪徒情形摺

十年十二月初一日

奏為遵

旨來湘查明地方文武辦理匪徒委無粉飾貽誤各情恭摺據實覆陳仰祈

聖鑒事竊臣承准軍機大臣字寄同治十年十月初三日奉

上諭恭親王呈遞巴揚阿稟函內稱湖南益陽龍陽匪徒已散道州土匪尚有一二千人風聞武岡州有六月初旬被圍之說至龍陽之變實由該邑鄉紳陳少海恃與巡撫劉崑之子為親家倚勢貪功

草菅人命誣殺團首劉秀芝遂至激成衅端陳少  
海全家被害帶兵道員李先燎副將陶藻參將羊  
瀛均未捕獲一人羊瀛一軍尤甚於賊鄉人切齒  
現聞著名匪首施玉山聚四五百人在武岡山內  
竊藏又洞庭西湖港內有大頭目劉鴻怡原係湖  
北候補縣丞棄官為寇湖南州縣賢否不齊或辦  
案稍有枉縱該匪等即藉口滋事請據稟轉奏派  
員查辦等語湖南散勇會匪遍地皆是有地方之  
責者宜如何認真妥辦消患未萌若如所陳各情  
是該處有司專以敷衍了事養癰貽患深切隱憂

著派李瀚章馳驛前赴湖南將該省文武各官粉飾貽誤各情確切查明據實參奏毋得以奏報肅清在前稍為迴護其整飭吏治保衛地方各事宜亦著詳悉熟籌奏明辦理再巴揚阿又稱夥匪內現有偽天王東王西王南王北王名號並肆用從前洪秀泉偽記等語並著李瀚章嚴密訪查如果實有其事即應迅速派兵掩捕盡法懲治以遏亂萌原稟著鈔給閱看將此由五百里諭令知之欽此當經欽遵飭委湖北候補知府劉縻候補知縣蔡炳榮先行分往道州等處密查臣即帶印

出省業將起程日期恭摺由驛

奏報在案臣經過沿途地方察看均極靜謐十一

月初三日行抵長沙省城隨將巴揚阿函內所

陳各節摘錄案由札飭湖南藩臬兩司詳細確

查接晤紳僚周諮博訪茲據署湖南布政使增

壽署按察使夏獻雲會同稟覆並據該委員劉

際蔡炳榮先後自各處查明回省分別開摺稟

呈前來臣復調集卷宗細加查核如道州土匪

尚有一二千人武岡州六月初被圍又匪首施

玉山聚眾竊藏武岡山內一節查道州上年十

月曾有匪徒滋事業經辨結奏報武岡州自去  
年六月教匪蕭逢源等被獲懲辦後地方一律  
安堵實無土匪麇聚本年六月武岡州城並無  
被圍之事境內亦無匪首施玉山其人如果該  
兩州聚有匪黨四五百人及一二千人斷難掩  
人耳目非特地方官不能諱飾該處紳民亦豈  
毫無見聞其為謠傳之說無疑又如龍陽之變  
由邑紳陳少海恃與巡撫劉琨之子為親家倚  
勢貪功誣殺圍首劉秀芝致成衅端全家被害  
一節查陳少海即陳景蒼係龍陽縣舉人辦團



多年素稱公正本年二月益陽匪首劉道美龍陽匪首劉鳳儀等在龍益交界地方潛謀聚眾陳景倉聞知赴縣密報該縣知縣張奉祥亦先訪聞會同益陽縣馳往掩捕當獲劉恆盛等及劉秀三訊認結會謀逆不諱通稟正法維時益陽縣知縣黃應誥拏獲匪首劉道美之父劉家實收禁勒交其子劉道美等遂先襲益陽縣城焚署劫獄因挾陳景滄報洩之嫌將其父子三人殺害即撲犯龍陽縣城經官軍勦散此龍益兩縣會匪起事根由實在情形也案內並無劉

秀芝名目詢之已革龍陽縣知縣張奉祥亦無  
陳景滄誣殺劉秀芝之事該匪等圖謀不法陳  
景滄身為團董報官捕拏理所當然不得謂之  
激變且僅父子三人死難尚非害及全家現咨  
准前湖南撫臣劉崐覆稱僅有一子聚中早已  
病歿與陳景滄並未結過兒女姻親訪之官紳  
所稱僉同是陳景滄無倚勢貪功誣殺肇衅情  
事信而有徵又如帶兵道員李光燦副將陶藻  
參將羊瀛均未捕獲一人羊瀛一軍尤甚於賊  
鄉人切齒一節查龍益會匪滋事時前撫臣劉

崑飭派貴州補用道李光燦率勇馳往勦辦署  
提臣李明惠飭令常德協副將陶藻常德府知  
府瑞琛飭令候補參將羊瀛先後帶隊援勦擒  
斬匪目龔定範等多名立將兩城克復並將竄  
逸各匪陸續搜捕殲斃李光燦嗣又會督營縣  
拏獲逆首劉道美等並匪黨鍾九如等一百九  
十餘名訊明正法是李光燦一軍勦匪既力獲  
犯亦多頗為有功惟陶藻先於帶兵赴援龍陽  
時未能力保縣城遽行潰退迨滄港土匪乘機  
搶掠並有潰兵同搶情事業經前撫臣劉崑奏

參拏問飭發審辦其羊瀛所帶勇丁僅三百名  
係屬團勇未諳紀律鄉民不無怨聲未及一月  
即經調回裁撤又如洞庭西湖港內有大頭目  
劉鴻怡原係湖北候補縣丞棄官為寇夥匪內  
現有偽天王及東西南北等王名號並肆用從  
前洪秀泉偽記一節臣飭查湖北歷年官冊並  
無劉鴻怡之名又飭據湖南藩司查覆亦無益  
陽縣劉鴻怡分發湖北及告假回籍文卷洞庭  
湖面乃長江水師汎地經臣檄委岳州鎮總兵  
彭昌禧親往西湖各港汎遍歷密查實無劉鴻

怡在彼潛匿至會匪為首者向稱老冒餘則依次以哥弟相稱亦無偽天王等號及肆用洪逆偽記跡據又如龍陽縣雷姓勸伊叔入會不從殺傷五口地方官僅以謀殺族叔辨結一節查前據署龍陽縣知縣姚詩德稟訪有會匪雷伯旺曾隨眾陷城焚掠嗣復挾嫌殺其族叔雷文朋一家五命潛逃躲避經該縣尋跡拏獲訊實斬梟是該犯本屬餘匪並非另股辦理尚無輕縱又如益陽縣藍畦有哥匪二百餘人殺傷當商陳丁普數口地方官置若罔聞一節查本

年六月益陽縣屬藍溪地方有龍益餘匪蕭鏡  
之等竄至焚搶殺斃曹一元吳月三二命團總  
陳丁普挈眷遷避並未被害經守備王成杞等  
追捕當斃蕭鏡之等十七名餘匪溺死甚眾曾  
據營縣稟報嗣又續獲段春山等七名一併正  
法藍畦係藍溪傳寫之訛該地方官業經獲犯  
懲辦並非置若罔聞所有雷伯旺及藍溪被劫  
殺人兩案業經前撫臣劉崐彙入清查益陽等  
處逸匪摺內

奏明在案以上各節均經臣明查暗訪委屬實在

情形臣昔服官湖南多年地勢民情向所熟悉紳士相識者多迨任楚督於湘省地方文武稟牘莫不留心披閱遇湘中官紳過鄂亦必詳詢一切如有匪徒聚集之事臣必早有所聞咨飭查辦斷不能任令營縣含混隱飾茲已揚阿據商人所傳各節想因五六月間龍益土匪勦散後四處分竄遠道謠傳展轉失實不知經官軍節次搜捕匪犯業經殲除地方早就肅清矣惟湖南士紳雖能敦崇義氣而民情向稱浮動遇事議論滋生近來各路勇丁遣撤歸里守分安

業者固多結會為匪者亦所難免若輩意圖搶劫一擊便散地方官但能平時留意訪緝臨事赴機迅速不致釀成巨患目前弭盜之法以慎選牧令為第一要著臣現與署撫臣將湖南庸劣不職各員據實另摺參劾仍隨時嚴加考察以緝捕之勤惰定賞罰之等差吏治修明人心自靖各府州縣團練保甲皆已舉行惟恐與省中聲氣未能聯絡業經會商署撫臣詳悉熟籌另片附

秦州縣如均得人保甲果能認真並於要隘處所



調紮水陸各營分佈巡防縱有不逞之徒潛圖竊發亦可隨時勦除矣至前撫臣劉崐當龍益會匪猝起時派兵勦捕立復兩城辦理尚為迅速訪詢在籍紳士彭玉麟曾國荃劉典郭嵩燾等僉謂該前撫為人廉正坦率辦事勤快臣與劉崐共事頗久亦知其素性爽直不致有意敷衍自蹈欺罔之咎惟於雷伯旺及藍溪搶劫殺人兩案獲犯懲辦後並不詳敘案情明晰奏報僅彙入清查逸匪摺內未免疎略應請

旨交部議處已革益陽縣知縣黃應誥拏辦會匪未

能迅獲正法僅將犯屬收禁著交致被匪眾陷  
城劫獄後雖隨同克復功難抵過業由前撫臣  
劉崐參革永不敘用惟事因該革員辦理不善  
所致情節較重應請發往軍台効力贖罪以示  
懲儆湖南候補參將羊瀛帶練勦賊雖無騷擾  
重情第約束不嚴致招物議咎無可辭應請以  
守備降補已革常德協副將陶藻業經拏問應  
俟審明歸於另案擬結道州武岡及洞庭西湖  
等處均查無土匪聚集應毋庸議李光燦辦匪  
既屬認真其所統各營亦頗得力仍飭扼要分

紮以資鎮壓而策後效所有查明議擬緣由理  
合繕摺由驛覆陳伏乞

皇太后

皇上聖鑒訓示再臣拜發此摺後擬於本月初五日  
起程回鄂合併陳明謹

奏

現籌清查保甲分設防營片

十年十二月初一日

再保衛地方之法莫善於清查保甲分設防營  
兩端臣前通飭湖南各府州縣力行保甲業據  
一律遵辦所慮各屬距省遠近不一聲氣未盡  
聯絡現與署撫臣籌商擬在省城設立保甲總  
局責成臬司會督紳士妥為辦理仿照明臣王  
守仁十家聯牌法飭令各州縣選派公正廉明  
紳耆將城鄉戶口逐細清查登冊每十戶編列  
一牌聯名互相結保以便稽察如有結會為匪  
者准九家首告儻敢徇隱發覺一體連坐設有

各家不肯聯保之人則必非善類即由團族查明送官究治無論窮鄉僻壤概行編查不准稍有遺漏各鄉團首每季出具並無會匪切結呈送州縣州縣亦於年終彙出總結申賚省局以備考核而聯聲氣地方有團練者聽其自行辦理不必官為抑勒致滋流弊唯稽查固貴周密而控制尤賴兵威查省城內外現紮總兵于高勝長沙協副將韓殿甲所帶銳右巡防等營兵勇二千三百餘人省城附近之平塘金盆嶺及省東之醴陵茶陵省南之湘潭永州道州安

仁暨省西之安化益陽等處已飭貴州補用道  
李光燦將所統銳中等營勇三千餘人擇要分  
紮西北之常德龍陽沅江等處已飭提督王永  
章率所帶振字營勇一千三百人分紮巡防西  
南之衡州寶慶宜臨一帶現有直隸委用道楊  
澍候選知府顏錫蕃候選同知魏鼎薰分帶廣  
武寶安等營勇一千餘人分別扼守至水路要  
隘洞庭湖及沅江等河係長江水師汎地原有  
礮船分駐其內河上游之靖州辰州常德一帶  
則有總兵周禮濂知府吳大安都司劉斌所帶

水師船勇一千二百餘人下游之省河岳州湘  
益澧安等處則有副將陳海鵬參將廖楚勝黃  
德游擊羅德煌所帶水師船勇二千二百餘人  
衡永河內則有副將廖德茂水師船勇五百餘  
人節節分巡似此水陸各處棋布星羅即偶有  
土匪竊發徵調既便勦辦亦易不致蔓延為患  
足以仰紓

宸廑再查湖南勸辦捐輸向有米捐援黔捐閩捐三  
局貴州另有協黔捐局一省捐局紛歧章程雜  
出有傷政體糜費滋多臣現經咨商署撫臣酌

量裁併應如何歸併之處由該署撫體察情形

奏明辦理謹附片具陳伏乞

聖鑒訓示謹



A large, empty table with 10 columns and a thick border. The table is oriented vertically on the page. The columns are of equal width and are separated by thin vertical lines. The entire table is enclosed in a thick black border. On the right side of the table, there are two small, dark, triangular shapes protruding from the edge, one near the top and one near the bottom.

--	--	--	--	--	--	--	--	--	--

察看湖南撫藩均堪勝任摺

十一年三月二十八日

奏為遵

旨察看湖南巡撫布政使均堪勝任恭摺據實覆

陳仰祈

聖鑒事竊臣前在湖南省承准軍機大臣字寄同治

十年十月初八日奉

上諭王文韶吳元炳署理撫藩各篆能否勝任著該

督隨時察看據實具奏等因欽此臣當即欽遵察

看署撫臣王文韶精細廉明平正通達署理撫

篆均堪勝任隨即附片覆

奏並聲明署湖南布政使吳元炳尚未抵湘俟到任後再行察看密陳在案數月以來臣隨時留心查察署撫臣王文韶吏治認真講求辦事俱臻結實於防境援黔及整頓地方各務均能督飭通省官紳措置合宜又署布政使吳元炳於上年十二月內由鄂赴湘行抵監利縣途次與臣會遇接見數次其人誠樸開朗才識明練到任三月有餘理財用人悉臻妥洽臣復密加採訪撫藩一切政績均堪勝任所有遵旨察看緣由理合恭摺由驛覆陳伏乞

皇太后

皇上聖鑒訓示謹

奏



湖北省城請建故大學士祠摺

十一年四月初五日

奏為故大學士功德在民請於湖北省城建立專祠並補陳賢勞實蹟仰祈

聖鑒事竊臣恭讀本年二月十二日

上諭大學士兩江總督曾國藩學問純粹器識宏深秉性忠誠待躬清正著追贈太傅照大學士例賜卹賞銀三千兩治喪賜祭一壇加恩予諡文正入祀京師昭忠祠賢良祠並於湖南原籍江甯省城建立專祠其生平政蹟事實宣付史館等因欽此

仰見

聖主篤念忠良之至意無任欽感又准署兩江督臣  
何璟咨送摺稿到臣所陳曾國藩勞蹟並其立  
身行政諸大端均甚切當其敝咸豐十年以後  
軍事亦極詳明惟自咸豐初年創立水陸二軍  
率以東征及歷年在鄂在江艱危拮据情形尚  
有未盡蓋何璟與曾國藩共事在咸豐十年以  
後聞見有所未詳其勢然也臣於咸豐三年署  
善化縣任內經曾國藩檄調從軍前後近十年  
知之較悉欽奉

諭旨將其政績事實宣付史館則採擇不厭周詳謹

再為我

皇上補陳之咸豐二年曾國藩典試江西行入江境  
聞訃丁母憂回籍時長沙解圍未久武漢繼失  
土匪蜂起兵勇陸續過境強擄民船所在劫掠  
曾國藩奉

特旨幫辦團防查匪事宜因時局艱難○容已而奪  
情視事又非其所安比經奏明將來無論建立  
何項功績均不敢仰邀議敘及抵長沙立擊擄  
船遊勇梟示河干頒發鄉團族團執照凡從賊  
勾賊各匪責成團總戶族捆送前後擒斬數百



人自後賊屢犯湘各屬匪徒無敢應者皆其先  
機能斷之效也由是延訪人才拔羅澤南王金  
李續賓張運蘭等使練陸勇拔彭玉麟楊岳斌  
黃翼升鮑超等使練水勇又以陸營廢弛奏參  
長沙協副將清德特保游擊塔齊布且云塔齊  
布將來如打仗不力臣甘與同罪塔齊布等均  
感激思奮力戰成名皆其知人善任之效也三  
年賊圍江西曾國藩命羅澤南等赴援解圍後  
函商江忠源奏請創立水師為三省會剿議是  
年冬親赴衡州督造戰船經費無出惟以忠義

激勵人心勸捐濟用四年二月統率水陸兵勇  
六千人行抵長沙賊已由岳州竄陷湘陰甯鄉  
曾國藩派營擊退追勦至岳州會王鑫挫於蒲  
圻岳州再失賊仍由甯鄉竄湘潭其時長沙西  
南北三面數十里外賊踪遍野省城危甚曾國  
藩令塔齊布率陸勇彭玉麟楊岳斌率水師上  
勦湘潭而親率水師二營陸勇一營下勦靖港  
三月二十九日靖港戰敗曾國藩自咎調度無  
方投水三次幕客親兵力救乃免四月初二日  
湘潭克復盡焚賊舟乃自劾靖港之失疏請治

罪不以湘潭同時大捷稍自寬飾也七月整軍東下克復岳州廣東總兵陳輝龍水師敗於城陵磯褚汝航等死之曾國藩堅持不動閏七月塔齊布羅澤南擊敗陸賊轉戰而前八月二十三日遂克武昌十月十三日大破田家鎮戰績均詳奏牘十二月水師破湖口賊卡衝入鄱陽湖盡焚賊艘而老營之紮九江對岸者被賊用小舟襲焚事機危急曾國藩慨然曰大臣不可辱復欲投水經幕客親兵強掖渡江夜入羅澤南軍中五年正月入江西重整水陸各軍賊自

北岸上竄武漢再陷方其在江西也以客軍當  
敗挫之餘呼應不靈動多觸忤曾有三難之奏  
然一聞賊陷弋陽廣信即命羅澤南等力戰復  
之七月攻克義甯又分攻湖口會塔齊布卒於  
九江鄂事日棘復令羅澤南等赴援與胡林翼  
會攻武昌以全大局是年冬逆首石達開自崇  
通陷瑞臨另股賊自廣東來會江西八府五十  
餘州縣皆淪於賊湖南文報不通乃分九江之  
軍以援吉安而自率舟師回駐省河官民倚以  
為固六年春吉安失守周鳳山失利樟樹鎮其

分攻撫建者皆不能下時餉源罄竭枵腹轉戰  
軍無怨言皆曾國藩忠誠所感也是年七月胡  
林翼派曾國華劉騰鴻等援江西進攻瑞州駱  
秉章派劉長祐等進攻袁州派曾國荃進攻吉  
安湖南之路始通會撫州陸營失利乃令移駐  
貴溪以保浙東一綫之餉路七年三月曾國藩  
丁父憂回籍八年夏復奉

命統軍援浙其時瑞臨撫建皆經湘軍克復八月曾國  
荃克吉安曾國藩擬由建昌入浙九年移駐撫  
州攻克景德鎮旋奉入川之

命中途經官文胡林翼奏請改而援皖駐宿松克太湖  
戰績均詳奏牘至十年四月補授江督充

欽差大臣以後事蹟何璟所陳甚詳臣亦由贛南道  
奏調廣東籌餉兵竊維曾國藩識力之堅毅志  
慮之忠純持躬之謹慎久在

聖鑒之中豈待微臣陳述惟前後艱危拮据情形有非

奏報所能詳者似不妨合兩摺以備史館之採  
擇也臣聞曾國藩初入翰林即與故大學士倭  
仁太常寺卿唐鑑微甯道何桂珍講明程朱之  
學克已省身得力有自遭值時艱毅然以天下

自任忘身忘家置死生禍福得喪窮通於度外  
其大端則在以人事

君平按士類能決其人之賢否推誠布公不假權術  
故人皆樂為之用其過人之識力在堅持定見  
不為浮議所搖進攻安慶江甯則建三路進兵  
之議勦辦擒匪則建四面威賊之議其後成功  
不外乎此所創水師尤能制賊死命蓋賊自湖  
南竄踞金陵盡掠沿江船隻乘風日蹙數百里  
飄忽無常瀕江各郡縣一日數驚自曾國藩水  
師東下扼駐一處即能保全一處當武漢再陷

時胡林翼以孤軍困守城下而賊船不敢上越  
金口一步漢鎮貿易均移至新堤籌辦鹽釐捐  
輸藉濟軍餉胡林翼屢次奏稱曾國藩創立水  
師其功甚大蓋身在事中故能言之深切其後  
曾國藩遣羅澤南馳援武昌惟時江西四面皆  
賊旦夕不能自保祇以通籌天下大勢非力爭  
上游則金陵無可規復之理是以自留江西支  
持危局而特遣勁旅進攻武昌此其深識遠略  
公爾忘私尤有古人所不能及者是曾國藩底  
定東南之功尤以經營武昌為一大關鍵查羅



澤南李績賓胡林翼官文均經奉

旨於湖北建立專祠現在鄂中士民間曾國藩溘逝莫不咨嗟感慕籲請建祠以宗報享相應請

旨勅建曾國藩專祠於湖北省城以順輿情而彰忠蓋所有請建專祠並補陳賢勞實蹟以備史館採擇各緣由謹會同湖北撫臣郭柏蔭恭摺由驛具陳伏乞

皇太后

皇上聖鑒訓示謹

奏

湖北留防各營及釐捐局卡摺十一年五月初七日

奏為遵

旨查明湖北留防各營及釐捐局卡大概情形恭摺

覆陳仰祈

聖鑒事竊臣等承准軍機大臣字寄同治十年十二

月初八日奉

上諭吏部左侍郎胡家玉奏時局艱難宜豫籌挽救一摺軍營勇丁招募立營自應核實辦理若如所奏各營勇數捏報虛額冒支軍糧此等情弊殊堪痛恨著各直省督撫於現有各營認真查覈務按

實在數目歸併立營如有營官以少報多情事立  
即從嚴懲辦以儆效尤該侍郎請將各省防勇陸  
續裁汰多不過暫留七八千人少或酌留三四千  
人自為節餉起見著各督撫體察情形奏明辦理  
各省抽收釐金因軍餉孔急未能概行停止其有  
可以裁減局卡之處並著酌量情形分別辦理等  
因欽此仰見

聖慮周詳纖微必燭下懷曷勝欽佩伏思治軍原以  
禦患理財尤貴因時湖北地當衝要從前軍興  
傍午水陸營勇不下六七萬人迨髮捻蕩平防

務漸鬆經各前督撫臣陸續遣散多營均曾  
奏報有案臣等現復節次裁撤堅字忠義等營水  
陸勇丁三千七百餘人誠以時局艱難宜籌節  
省也目前鄂省防營步隊則有忠義八營升字  
三營共七千九百餘人水師則有健捷等營大  
小礮船二百四十號共三千七百餘人又督撫  
提三標及城守營暨鄖陽宜昌兩鎮標操防官  
兵共三千七百餘人漢陽協洋鎗隊官兵三百  
餘人又有提督譚仁芳所帶仁勝一軍計五千  
一百人前調赴陝勦匪經陝西撫臣奏留駐防

秦境餉仍由鄂分半解濟以上各營共每月需餉銀六萬五千兩有奇又油燭等錢一萬餘串皆係出之本省由軍需局支放其湖北提臣郭松林所統武毅步隊五營馬隊二營計四千二百餘人現紮襄樊係直隸督臣李鴻章舊部淮軍餉歸後路糧台發給不在楚軍之列統計鄂省防營為數雖尚不少然陝甘獮氛猶熾貴州苗逆未平各路軍營勇丁過境者絡繹於道深恐游勇混雜勾結土匪滋事湘省會匪伏莽時慮蠢動必須擇要紮營方足以資鎮壓且近因

規復引地疏消淮鹽自襄鄖以至黃德棗延數  
千里均與秦豫接壤潞私北私到處侵灌非撥  
營堵緝懾以兵威難收實效長江雖已添設水  
師分布汎地但僅防江面而不及內河楚北素  
稱澤國各屬河湖港汊紛歧巡緝既不可廢且  
多係陝甘運餉要道尤賴礮船分段駐防隨時  
護解庶免他虞就目前時勢而論鄂省水陸防  
營實有未可遽撤者况裁撤勇丁必先清給歷  
年積欠之餉為數鉅繁一時難籌給發容臣等  
隨時揆度情形通盤籌畫苟有可以減撤之營

即當督飭司道設法籌備餉項妥為辦理湖北  
現有各營疊經臣等留心訪察勇丁皆屬實在  
數目委無以少報多情弊仍當嚴密稽察如有  
不肖營哨員弁捏報冒支立按軍法重懲以昭  
炯戒至鄂省各屬原設釐金局卡自同治七年

臣柏蔭

奏明裁減之後商民稱便歷久相安雖歲入釐款  
較昔略絀而奉撥京協餉需及長江水師專餉  
藉資解放似未便再行裁減訪查各局卡委員  
尚知廉謹自守涓滴歸公並無中飽苛索情事

臣等仍隨時督飭認真經理總期於民無損於  
餉有益以昭核實而杜流弊所有防營及釐捐  
局卡大略情形謹合詞恭摺覆

奏伏乞

皇太后

皇上聖鑒訓示謹

奏



--	--	--	--	--	--	--	--	--	--	--

請裁免川鹽陸課摺

十一年八月初八日

奏為請裁川鹽陸課以輕商本而廣銷路恭摺具  
奏仰祈

聖鑒事竊照湖北各屬原係淮南引地前因江皖兩  
省髮逆踞擾運道梗阻經前督撫臣會摺

奏請借行川鹽並准票潞各私一體銷售在於各  
州縣分設局卡抽收陸課以濟民食而裕軍餉  
迨江皖克復長江路通疏銷淮引復經前署督  
臣郭柏蔭先後

奏請將北潞二私停課禁銷僅有川鹽及湖北應

城井鹽二項照舊抽課所收課錢數目按季  
奏報在案本年經臣會同前兩江督臣曾國藩奏  
請川淮劃界分銷接准戶部議覆武昌漢陽黃  
州德安四府專銷淮鹽不准川鹽顆粒侵入安  
陸襄陽鄖陽荊州宜昌荆門五府一州仍行借  
銷川鹽並令裁撤武漢黃德四府原設抽收川  
課各局卡等因遵經截至本年正月底止將該  
四府局卡全行裁撤其應銷川鹽之安陸府所  
轄鍾祥京山潛江天門及荆門州暨所屬當陽  
遠安共七州縣向設有抽收川鹽陸課局卡仍

按月徵解惟襄鄖毘連豫陝素為北潞各私所  
侵佔現雖嚴加堵緝而路逕紛歧仍不免偷越  
灌入查川鹽為鄂餉大宗今既不准侵入武漢  
黃德四府而可銷之襄鄖安荆各屬又難敵北  
潞二私是銷路日滯餉課日絀矣且川鹽自蜀  
入鄂數千里灘高水急運道既艱花費亦鉅在  
宜昌總局每觔完納課錢十八文成本已重若  
於正課加課之外再抽陸課無以廣疏銷即無  
以裕餉源於鄂省大局甚有關礙體察情形自  
應變通辦理除鄖陽府屬之竹山一縣所售川

鹽係由陸路肩挑背負而來未宜局納稅仍  
應抽納陸課外其安陸府屬之鍾京潛天四縣  
荆門州暨所屬當遠二縣月徵川鹽陸課錢文  
請以本年七月初一日為始一律裁免以輕商  
本而廣銷路於鄂餉不無裨益據湖北布政使  
張建基署鹽法道唐嘉德會同詳請

奏咨前來臣覆核無異除咨部外謹會同湖北巡  
撫臣郭柏蔭恭摺具

奏伏乞

皇太后

皇上聖鑒再川鹽課稅向以宜昌總局收數為大宗  
按季專案

奏報應仍循舊辦理其餘各屬所抽陸課係彙同  
應城井課分案附片具報今僅存竹山一縣課  
錢及應城縣井課核計每月收數無多應請改  
為年底彙報一次以歸簡易合併陳明謹

奏

A large empty table with 10 columns and a thick border. The table is oriented vertically on the page. On the right side, there are two small, dark, trapezoidal shapes protruding from the table's edge, one near the top and one near the bottom.

--	--	--	--	--	--	--	--	--	--

請將田關移設鄆家場摺

日十一年八月二十八

奏為原設田關之處河道淤塞請移設鄆家場更名鄆關以杜偷漏而重課稅恭摺具陳仰祈

聖鑒事竊照湖北荊州鈔關稅務向委荆宜施道兼管分設中北東西支柳正柳支調大正大查彝田港港支等關共一十四處例征竹木等項正稅並盈餘共銀二萬五千四百兩有奇全賴水道疏通商船暢行方能征收足額查潛江縣屬田家洲所設田關濱臨襄河距澤口二十餘里凡有襄河船隻由澤口而入者應在該關報



納稅課後西至高家場一帶集場東歷監沔等處直達大江而之武漢惟田關以上之東西河道淤塞多年從前原無港汊舟楫不通近年因澤口附近之桃子埠並柳支關下各堤塍潰成兩口內已冲刷成河一片汪洋舟楫往來無滯夏秋漢水失漲商船均進桃子埠口繞出柳支關下口而達大江即使將來潰口修復或冬令水涸仍可進澤口在田關以下集場起貨該埠相距田關較遠無從稽查以致商船每多漏稅現查澤口東岸毘連之鄔家場相距武漢襄樊

均約六百里為襄河適中之地該場商賈繁盛  
檣帆雲集且係進澤口至田關必由之路似應  
酌量變通將田關移設鄆家場改名鄆關凡有  
往來進口船隻責令照例輸稅以杜偷漏而裕  
國課伏查乾隆五十一年前荆宜施道陳大文請  
將楊關移設調絃口更名調關郝關移設越市  
口更名越關又道光年間前荆宜施道溫予巽  
請將周正關移設柳家集更名柳關均經  
奏准改設征稅著有成效茲請將田關改設鄆家  
場核與成案相符據荆宜施道孫家穀移由湖

北布政使張建基核議具詳請

奏前來臣等伏查設關征税例有定額而地方情形今昔不同必須因時制宜今荊州鈔關從前分設田關之處既因河道淤塞商船多由桃子埠潰口繞越漏稅自應將該關移設澤口附近之鄆家場地方以昭周密而杜偷越相應請

旨准將田關移設鄆家場更名鄆關仍令照額征收俾商民循舊輸納而稅課較有起色是否有當謹合詞恭摺具

奏伏乞

皇太后

皇上聖鑒訓示謹

奏

--	--	--	--	--	--	--	--	--	--	--

遵 旨密保堪膺重任司道摺  
二十一年十一月十六日  
奏為遵

旨酌保所屬及外省賢能各員據實密陳恭摺

奏祈

聖鑒事竊 臣前准軍機大臣字寄同治十年十一月

初三日奉

上諭為政首在得人各省藩臬兩司有用人理財察  
吏安民之責果能用當其材庶吏治民生可望日  
有起色該藩臬等歷練既久並可備異日封疆之  
選關係甚為緊要著各直省督撫於所屬運司道

府中隨時留心察訪如有通達治體卓著循聲堪勝兩司之任者出具切實考語據實密保並將該員等才具長短分析臚陳以備國家因材器使即非屬吏而有賢能素著為該督撫所真知灼見者亦不妨切實聲敘等因欽此仰見

皇上慎簡乃僚虛己旁求之至意臣跪誦之餘曷勝欽佩伏思藩臬兩司承流宣化弼教明刑稽察屬僚責任綦重况此時之藩臬即異日之封疆必須器識過人方可期以大受然得人難知人尤難且疆寄忝膺厯官數省平日於所屬各員

以及外省司道中隨時留心訪察其才能素著者洵不乏人然或謹飭有餘而肆應不足或文名藉甚而辦事迂疏或渾厚和平而臨事殊少剛斷或精明強幹而措施未盡合宜欲求體用兼備之才實非易覲臣愧乏知人之明誠恐鑑衡失當覆餗貽譏是以數年以來從不敢輕言薦舉也茲蒙

皇上求才佐治

天語垂詢臣謹於素所深悉之員復加考核擇其尤為可信者臚列陳之查有江西布政使劉秉璋



稟質端方才識明敏有體有用不剛不柔昔年  
勦辦原任兩江督臣曾國藩軍務忠貞克矢艱  
險不渝嫻習兵機通達吏治足勝重任湖南布  
政使吳元炳氣局開展才識明通處事周詳居  
心正大雖軍務嫻否未能深悉然其端慎寬博  
足以鎮俗長人浙江糧儲道如山識力精強吏  
治練達昔在鄂省服官尚有矜才使氣之時近  
已斂才就範敬事飭躬洵不可多得之才廣東  
候補道吳贊誠心精力果識練才優勤可理繁  
誠能服眾雖言詞簡默不以便給爭長而公正

待人久孚物望故歷任俱著循聲辦事亦最勇敢湖北鹽法武昌道黃昌輔宅心端正志趣忠良內恕外溫適時利用民情吏治練習精詳湖北漢黃德道李明墀才明識練有守有為洞悉事機通達政體辦理中外交涉事件尤能權而得中湖北候補道蒯德標志慮堅貞性情慤實雖外才微欠敏捷而實事求是自誠而明實為人所不能及以上七員均係才猷出眾德量俱優可備

聖明採擇且既真知灼見理合出具切實考語繕摺

密陳伏乞

皇太后

皇上聖鑒謹

奏

合肥李勤恪公政書卷六目錄

楚湘  
湖廣

男經畬經江澧編輯

滇  
淮  
滄

請免抽川鹽入湘鄰稅片

澧州川鹽鄰稅仍請停收摺 十二年五月十三日

襄鄖試辦官運川鹽片 十二年十一月初四日

公安縣城地處低窪擬遷高阜摺 十二年十二月十日

查明李光昭家道並不殷實片 十三年三月初三日

刁民違禁築隄訊明懲辦摺 十三年五月二十六日

吳王氏苦節堪憫懇 恩旌表摺 日 十三年七月初六

裁改員缺專司防護萬城大隄摺 日 十三年八月初三

籌議海防江防各事宜摺 十三年十一月初四日

恭謝 天恩摺 十三年十一月十七日

驚聞大變請 抑悲懷摺 十三年十二月二十六日

整飭歸州灘務明定章程片 光緒元年五月初一日

籌辦情形先行密陳摺 元年八月十九日

到澳日期並合籌大概情形摺 元年十月二十五日

請 飭各督撫訪拏會匪片

請免抽川鹽入湘鄰稅片

再湖南岳州常德澧州三屬從前行銷川鹽經前湖南撫臣駱秉章奏准抽收鄰稅旋由前兩江督臣曾國藩議定加抽鄰鹽釐稅咨行辦理誠以楚岸為淮南引地故於鄰鹽稅課特重而軍餉亦藉資取給也上年規復舊制又經臣會同曾國藩奏准戶部議覆將兩湖各屬川淮二鹽劃界分銷湖南議以澧州一屬准銷川鹽餘則盡歸淮銷嗣因湖北川銷日滯餉課驟絀經臣查明川鹽入鄂先在宜昌總局每觔完納課

錢十八文成本已重若再抽收陸課無以廣疏  
銷即無以裕餉源奏請將應銷川鹽之安陸荆  
門等府州月徵陸課一律裁免准部議覆照行  
在案查湖南准銷川鹽現僅澧州一屬之地與  
昔年情形懸殊川商運鹽自宜昌完課後轉運  
至澧運費及應納釐金為數甚鉅成本較重現  
在銷路又窄商販每多虧本裹足不前因而宜  
昌川課日形短絀於鄂省餉源大有窒礙伏思  
湖南所抽之鄰稅即與湖北之陸課無異今鄂  
省川鹽陸課既已停收則湘省川鹽鄰稅亦應

裁免且此項鄰稅係歸淮南由南督銷局派員在於澧州花畹岡地方設局徵收僅有一州之鹽收數無多徒滋糜費無補於淮而有損於鄂臣再四籌維似宜變通辦理所有運湘川鹽入南省境後除釐金仍令照舊完納外其鄰稅一項應請自本年三月初一日為始一律免其抽收並將花畹岡之局即行裁撤以輕商本而節糜費除咨兩江督臣湖南撫臣查照轉飭外理合附片陳明伏乞

聖鑒訓示謹



奏

澧州川鹽鄰稅仍請停收摺

十二年五月十三日

奏為湖南澧州所屬川鹽鄰稅仍請援案停收以昭大信而歸畫一恭摺仰祈

聖鑒事竊臣前因兩湖川淮二鹽劃界分銷川鹽成本較重湖北省所徵川鹽陸課上年業已奏准停收請將湖南澧州花畹岡川稅局一併裁免現經戶部覈議覆奏以此項鹽釐既係前兩江督臣曾國藩議加鄰稅案內咨行辦理是增設之初意在疏銷淮鹽因而加重川稅今川淮二鹽雖已分界行銷而澧州昆連岳常二府均屬

淮南引地如將鄰稅一局裁撤恐川鹽成本日  
輕必致隨處侵銷佔攔淮引現當整頓淮綱嚴  
杜私銷鹽價低昂尤不可不權衡輕重免致喧  
賓奪主有礙淮嵯大局所有該督請將澧州花  
畹岡地方抽收川鹽稅釐裁撤之處應毋庸議  
等因奉

旨依議欽此欽遵咨行到臣自應遵照辦理惟思為  
政貴持大體定章不宜兩歧稅課未便重徵商  
民必使信服從前湘鄂所屬各府州川淮並銷  
故有加抽川稅之議今則劃界分售湖南淮歸

川銷者僅有澧州一屬與昔年情形迥異湖北  
應銷川鹽之安陸荊門等府州月徵陸課既已  
奏准裁免而運銷澧州所屬之川鹽同一先在  
宜昌完納正加各課湘省亦不應再抽鄰稅若  
謂澧州昆連岳常二府慮恐川鹽本輕隨處侵  
銷殊不知鹽界既經劃定越境即以私論地方  
官果能講求緝私認真巡查川商何敢侵越自  
罹法網且湘省各府屬淮南引地均已規復舊  
制現僅一州之地分歸川銷更不致喧賓奪主  
查此項鄰稅當日原定每觔抽收錢八文以五

文歸淮三文歸湘上年經臣以川商裹足鄂餉驟絀咨商前署兩江督臣何璟湖南海臣王文韶減為每觔抽收五文以三文歸淮二文歸湘旋准王文韶咨以湘省應分之二文為數無多於餉無礙已允一律裁免是以現僅抽收歸淮之三文覈計通歲收數甚微無補淮蹇而徒有重徵稅課之名不足示民以信實有傷於政體臣忝任兼圻通籌全局不敢以已奉部駁稍涉遷就相應請

旨將運銷湖南澧州之川鹽援照鄂省成案仍准免

收鄰稅其花畹岡所設一局即予裁撤以昭大  
信而歸劃一理合恭摺具陳伏乞

皇上聖鑒訓示謹

奏

--	--	--	--	--	--	--	--	--	--

襄鄖試辦官運川鹽片

十二年十一月初四日

再湖北川淮二鹽前經奏准分界行銷襄鄖為  
川鹽分地該處毘連秦豫向被潞私侵灌經臣  
飭屬嚴加堵緝一面行令募商開設川鹽牙行  
以廣招徠乃因川鹽自宜昌運至襄樊從沙市  
內河行走道遠費鉅川商每多裹足而淮鹽色  
味較劣民間不願買食行銷綦難誠恐潞販乘  
機騰至有礙川淮銷路亟應設法籌辦現經北  
鹽道會同宜昌川鹽總局詳請籌備錢本試辦  
官運補商運之不足顧引界之藩籬即在樊城



地方設立官運局委員經理陸續運銷以濟民  
食而衛引地所有襄鄖試辦官運川鹽緣由理  
合會同湖北撫臣郭柏蔭附片具陳伏乞

聖鑒謹

奏

公安縣城地處低窪擬遷高阜摺

十二年十一月十六日

奏為縣城地處低窪屢被水患現擬遷建高阜地

方恭摺具

奏仰祈

聖鑒事竊照湖北荊州府所屬之公安縣縣城建於

明末濱臨大江為鄂省最低之區本境各隄均

在下游全賴江陵松滋二縣隄塍保障自咸豐

十年江陵毛尖隄工潰口以後每值夏秋汛漲

江水直射入境城垣即被漫溢城內廟宇衙署

倉庫監獄考棚民房大半傾頽雖歷年集費擇

要修葺而水患頻仍旋修旋圯難期經久本年  
水勢更大以致該縣全境被淹成災經日等恭  
摺會

奏在案前據署公安縣知縣周承弼稟轉據閩邑  
紳耆公呈請將縣城移建東南鄉唐家岡地方  
該處為閩邑適中之區地勢較高可免水患繪  
圖稟請委員勘估撥借款項舉辦等情當經批  
司飭委湖北即補知府吳守葆儀前往會勘稟  
辦茲據印委各員稟覆會督紳耆工匠人等親  
詣所擇之唐家岡地方查勘該處形勢綿亘秀

麗砂護迴環廣袤二十餘里南通澧州北連江陵東趨石首西抵松滋居一邑之中數百年來從無水患遷城於茲洵稱穩妥詢諸紳耆士庶俱各樂從情願捐資勦助工程當將應建城垣基址暨

文廟並祀典所載各廟宇以及衙署倉庫監獄考棚各地逐一按方踩定插標籤記查舊城周圍五里零三分本屬因隄為城今擬酌減二里零二分周圍量寬五百五十八丈計三里零一分城垣仍用土築城外留地一丈五尺以作城濠修

橋建閘以便水從西流曲折而東下達沱河以  
至洞庭再該縣孫黃驛原設對河舊城之西南  
角距城五里今移新城東北角亦離城五里仍  
屬舊站驛路毋庸移改所有前項工程撙節估  
計共需錢三萬七千九百五十串有奇但地方  
素無殷商富戶一時實難籌鉅款而工程緊要  
若待民間捐集實屬緩不濟急應請籌借錢二  
萬串以便剋日興工所借之款查照派土舊章  
按糧集費歸還除明後兩年所集之費仍須歸  
工動用外請以同治十五年為始分作五年由

紳首彙收陸續繳解還款一面遴選公正可靠紳士董理其事擇吉興工等情由湖北布政使林之望核明詳請具

奏前來臣等查公安縣舊建縣城濱臨大江地勢極低一遇汎漲即被淹浸本年夏秋之交水勢過大以致城內衙署廟宇民房宛在中央竟成澤國旋雖涸復而城垣房屋多已傾圮茲既據該縣會同委員督率紳耆勘明縣屬東南鄉之唐家岡地居高阜堪以建城自應將縣城移建該處庶可一勞永逸相應請

旨准將湖北公安縣城移建縣屬唐家岡地方以順  
輿情而免水患至該縣所稟工大費鉅驟難捐  
集亦係實在情形現經臣等批飭在於沙市釐  
金項下借撥錢二萬串發交該縣紳首趕將應  
修各工次第認真興辦其餘不敷錢文仍由該  
縣就地設法籌捐濟用所借釐錢並准以同治  
十五年為始分作五年查照派土章程按糧收  
解還款此項工程現雖借撥釐金日後仍應歸  
還即與民捐民辦無異將來工竣請免造冊報  
銷以歸簡易除咨戶工二部查照外所有縣城

地處低窪屢被水患現擬移建高阜地方緣由  
謹合詞恭摺具

奏伏乞

皇上聖鑒訓示謹

奏



--	--	--	--	--	--	--	--	--	--	--

查明李光昭家道並不殷實片

十三年三月初三日

再前准內務府咨據候選知府李光昭呈請報捐修理

圓明園木植飭令起運省分查驗免稅放行等因

臣等查李光昭寄居漢鎮多年向未販運木植家道並不殷實素行不端現有被控盤踞擾害案件未結其人其言均屬難恃伏思

圓明園工程重大所需木植理應及時採辦現既  
欽奉

諭旨飭下各省督撫臣辦理自無不設法多方購覓

似不必令市僧報捐致傷大體且李光昭報捐  
之數核價不過十萬兩於大工無甚裨益而推  
之六省之廣期諸十年之久其欺罔情形已可  
概見將來藉端騷擾影射流弊滋多臣等愚昧  
之見可否將此項木植專歸官辦免其報効以  
崇體制而杜弊端之處出自

聖裁謹附片具

奏伏乞

聖鑒訓示謹

奏

刁民違禁築隄訊明懲辦摺

十三年五月二十  
六日

奏為刁徒強勒鄉民違禁築隄聚衆圍署逼示委  
員帶兵查拏獲犯訊明懲辦恭摺具陳仰祈

聖鑒事竊照湖北潛江縣所屬大澤口支河為消洩  
襄水故道上通荊州綿亘百餘里兩岸均有隄  
塍以資保障前因潛江之深河潭隄潰口節經  
札飭地方官集費興修旋有已革千總嚴士連  
煽惑沔陽江陵監利等州縣鄉民不修深河潭  
老隄輒在該河口門內何家到地方攔築橫隄  
塞斷河流據潛江縣稟經臣等以事關數邑農

田水利飭據漢陽荊州安陸三府會同勘明稟  
覆該河被堵襄水消洩路少上游兩岸部隄潰  
決堪虞此隄萬不可築已由該府等示諭禁止  
詐嚴士連於該府等詣勘時糾衆恃蠻挾制因  
見垸民畏法停工復與已革縣丞銜田秉臣相  
商私設隄局按畝勒派夫費邀允民人劉子才  
幫同經理收錢督工並令民人王葆衡在局寫  
帳抑勒沔陽州連界各垸民一體出夫稍不遂  
慾即行趕牛拆屋受害者不下數十家皆畏兇  
莫敢告發經署沔陽州知州王元曾查知示禁

嚴士連挾忿獨自起意於本年三月十九日脅同附近各垸老幼男婦三百餘人執旗持械齊至沔陽州城將州署圍住逼令該州繕給准其歛費告示始行退散當據王元曾稟報維時臣等已先訪聞札委營務處候補道張蔭桓統領忠義軍提督劉維楨會同酌帶營勇馳往拏辦嚴士連等均聞風逃匿王葆衡旋即自行赴縣投首張蔭桓等督飭署潛江縣知縣戴昌言諭令紳士武舉鄭超一等及嚴姓戶族設法踴捕隨將嚴士連田秉臣劉子才一併拏獲時值襄

河夏汎盛漲該處私隄不待剗毀而已被水冲  
決檄飭該道提犯研審據各供認前情歷歷如  
繪開錄供摺呈送前來臣等伏查此案嚴士連  
違禁擅築私隄堵塞官河抑勒派夫恃強拆屋  
擾害良民已干法紀乃因地方官查禁復敢糾  
脅多人越境圍署逼官給示尤屬兇頑即與光  
棍無異按例罪干斬決當即批飭將該犯就地  
正法以昭炯戒田秉臣於嚴士連脅衆圍署逼  
官之時雖未豫謀同往惟輒聽嚴士連私設隄  
局勒派夫費亦屬不法應於首犯斬罪上減一

等擬杖一百流三千里定地發配折責安置劉子才聽從收錢督工應於田秉臣流罪上減一等擬杖一百徒三年解配折責充徒限滿詳釋王葆衡訊僅幫同在局管帳且據自首情尚可原應照不應重律擬杖八十酌加枷號一箇月滿日折責發落其被嚴士連逼脅同行之男婦人數既衆又均不知姓名應請從寬概免查究以省株累而安民心至潛江縣深河潭隄潰口現值汛漲無從施工請俟秋後水落委員會同地方官勘估籌修完固俾資保衛所有刁徒藉



築私隄聚衆逼官給示獲犯訊明按擬懲辦緣  
由謹合詞恭摺具陳伏乞

皇上聖鑒訓示謹

奏

吳王氏苦節堪憫懇 恩旌表摺十三年七月  
初六日

奏為疆臣胞妹苦節堪憫籲懇  
恩准旌表以維風化恭摺仰祈

聖鑒事竊照現任湖南撫臣王文韶之胞妹吳王氏  
適浙江錢塘縣舉人吳錫熊為繼室同治二年  
婚於京邸甫及三月吳錫熊以病遽亡維時該  
氏年僅二十七歲哀毀逾常矢志守節因翁姑  
早逝本族散處各省無可依歸歷隨該撫侍母  
任所平日淒其之況不敢自露恐遺親憂且以  
未得一嗣為夫後思悴神傷漸成瘵疾同治十

年該氏夫弟吳鈞生子源議立為嗣以在襁褓之中且僑寓湖北未能抱養十二年十月間正擬來鄂攜孤親為撫育而病遽增劇遂於十月三十日身故該氏有家而驟失所天已屬逾常之慘有子而未能一面尤為賫恨以終准王文韶造具事實清冊咨請查核就為

### 奏懇

旌表前來查定例凡節婦守節十年而身故者准其旌表臣維吳王氏賦性柔嘉持躬淑慎甫共鹿車之挽遽悲鸞鏡之分一子承祧隔關河而未面十

年矢志茹冰蘖以終身雖為閼閼之名媛無異  
茅簷之苦節既符年例宜荷

旌揚臣與王文韶誼屬同僚見聞較確相應仰懇  
天恩俯准將已故節婦吳王氏照例

旌表以維風化除將事實清冊咨送禮部並咨明浙  
江撫臣查照外理合恭摺具

奏伏乞

皇上聖鑒訓示謹

奏



裁改員缺專司防護萬城大隄摺

十三年八月初三日

奏為荊州萬城大隄緊要擬請裁改員缺專司防

護恭摺仰祈

聖鑒事竊照荊州水師營制兵燹以前額設守備千

總各一員把總二員外委額外各一員兵二百

十二名因萬城大隄緊要仿照河工例撥兵建

卡駐防嗣同治八年新設長江水師營汛經前

兩江督臣曾國藩等奏請將該營員弁兵丁裁

撤旋經前兩江督臣馬新貽等於續議長江水

師分別改留裁汰各員弁案內

奏經部議准留守備一員兵九十二名防護隄工  
歸宜昌鎮統轄各在案竊維立法貴於因時循  
名必須責實萬城大隄地段綿長工程緊要為  
荊州全郡及下游保障每遇盛漲險工疊出節  
節需人防護儻搶救稍疏關繫億萬身家性命  
僅一守備既慮其周歷難遍且稽查勤惰須歸  
附近上司統屬宜昌鎮相離過遠耳目不及查  
斯隄向由荊州道府督修利害切身則經營倍  
力弁兵既有防護隄工之責即當歸其管轄似  
宜倣照浙江海塘營汛之例將防隄弁兵改隸

荆州道管轄庶事權有所專屬而文武聯為一體於隄務較有裨益臣等公同商酌擬將該營員缺酌量裁改以歸實際而免疏虞相應請

旨將荊州水師營守備裁去改設千總外委額外各一員分段專防萬城大隄改歸荆宜施道管轄毋庸再隸宜昌鎮標以專責任如蒙

俞允其一切營務章程再飭司道會議詳咨立案臣等為慎重隄防起見是否有當謹合詞恭摺具陳伏乞

皇上聖鑒敕部核覆施行謹



奏

籌議海防江防各事宜摺

十三年十一月初四日

奏為遵

旨籌議海防江防各事宜恭摺覆陳仰祈

聖鑒事竊於同治十三年十月初六日承准軍機大

臣密寄九月二十七日奉

上諭總理各國事務衙門奏海防亟宜切籌將緊要  
應辦事宜撮敘數條請飭詳議一摺據奏庚申之  
釁創鉅痛深當時姑事羈縻原期力圖自強乃至  
今並無自強之實本年日本兵踞臺灣番社雖疊  
經飭令各疆臣嚴密籌防自問殊無把握若再不

切實籌備後患不堪設想亟應實力講求同心籌  
辦堅苦貞定歷久不懈以裕國家久遠之圖該王  
大臣所陳練兵簡器造船籌餉用人持久各條均  
係緊要機宜著詳細籌議將逐條切實辦法限於  
一月內覆奏此外別有要計亦即一併奏陳總期  
廣益集思務臻有濟不得以空言塞責原摺單均  
著鈔給閱看將此由六百里各密諭知之等因欽  
此仰見我

皇上整飭武備思患豫防之至意跪誦之餘莫名欽  
悚臣竊謂治國在乎得民自強始能馭遠有備

然後無患籌防尤貴先圖

國家深仁厚澤二百餘年凡食毛踐土之人無不情殷敵愾民心尚能固結兵威自可振興惟華洋情形不同自海口通商以來各國難免覬覦日本尋釁生番是其明證先事圖維尤賴內外臣工同心協力講求戰守機宜庶幾外侮潛消而自強可收實效謹就總理衙門王大臣等原擬練兵簡器造船籌餉用人持久各條逐細籌議辦法參以管見另繕清單恭呈

御覽伏候

飭下會議施行抑臣更有請者東南防務固宜認真圖謀西北征軍尤貴及時清理新疆回逆尚未勦滅淨盡自難遽議撤兵惟現在統帥太多事權不一各路之營勇難稽則餉項之饋輸無定統計關內外各軍月餉歲以數百萬計東南各省財力半耗於此刻下創辦海防需用浩繁日久恐難兼顧似應

飭令西征各統帥大臣汰弱留強損無益之兵以濟有益之用愚昧之見是否有當恭候

聖裁所有遵議江海防務情形理合專摺由驛覆

奏伏乞

皇上聖鑒訓示謹

奏

--	--	--	--	--	--	--	--	--	--

謹將遵議總理衙門原擬六條參以管見開列  
清單恭呈

御覽

一曰練兵籌辦江海之防水師最關緊要而扼  
紮險隘護守礮臺陸軍亦宜並重李鴻章左  
宗棠所部各軍均係百戰勁旅各省留防之  
師亦皆久歷戰陣他如經制綠營額兵所挑  
選精壯教習洋鎗者以及長江水師均足以  
備戰守惟內地與海洋情形迥異有事征調  
恐遷地弗良難期得力蓋海中風濤之險非



所素習故也擬請於南北兩洋分設輪船外  
海冰師查閩粵江浙等省向設艇船巡洋近  
來外國鐵甲輪艘大而堅利自非艇船所能  
禦然沿海原設艇船不必盡巡外洋內海內  
江內河皆資梭緝且外洋無戰事萬一開仗  
仍在海口應請將艇船酌減數成即以其餉  
添充外海輪船水師之用酌留數成隨同輪  
船操演所有外海輪船以一船為一營隨帶  
艇船若干隻數船為一軍中設鐵甲輪船一  
隻弁兵水手概不雇用洋人如何酌定營制

及俸餉公費均由南北洋大臣與濱海各省督撫察看形勢妥議奏辦將來成軍後即令巡洋捕盜勤加練習庶幾操縱自如聲勢聯絡足備不虞其各海口駐防陸軍仍認真操演以資策應至長江上游口岸地居腹內前設水師礮船頗已周密祇須隨時訓練歷久不懈不必另添防兵致滋糜費

一曰簡器各國鎗礮愈出愈精津滬閩等處廠局製造亦有成效自不難益求精進為利用計暫宜購之外洋為經久計必須製自中土

此時水陸礮臺與水陸各軍所需洋鎗巨礮  
應由各員訪求精品配搭購辦他如英國製  
造之後鎗礮能於數里外攻破鐵甲船又有  
電氣水雷沈之水底置之海口可以轟擊鐵  
船並應廣為購辦如式仿製惟外洋鎗礮等  
物每有變換式樣即稱創造應飭各廠局將  
購到各項逐一演試擇其精利者督飭工匠  
仿造暫勿驚博誇奇總期成一器即得一器  
之實用從此推勘入微日臻美備庶可無待  
外求

一日造船閩滬設立廠局製造輪船慮遠思深  
實為防禦外侮探源之策現在中國所製輪  
船雖不及外洋之精較之前數年日見改觀  
駕駛不用洋人是其明效熟能生巧自可精  
益求精倘因惜費議停不獨進境無從並十  
餘年之苦心數百萬之餉項均歸虛擲總理  
衙門王大臣等堅持定議具徵卓識惟目下  
創立外海水師自造之船斷不專用不能不  
酌量添購而鐵甲船為屏蔽全軍衝擊敵軍  
之具亦屬萬不可少應由南北洋大臣酌量

購買擇海口最深之處駐泊以後當令津滬各廠局詳求製造之法其購自外國之船即可歸各廠局修理長江上游口岸亦均宜各購輪船分作三層上可置礮中可屯兵下可裝貨仿照外國公司輪船之例平日撥交招商局令在沿海及長江上下攬貨以開利源有事仍備調遣庶不虛糜養費應請

飭下東南沿江各省督撫臣每省先行籌款各購輪船一號嗣後酌量財力或三年或五年每省添購輪船數號將見愈久愈多中華大利不

致為他人所分而每年生息保險之費既可  
借充庫儲設遇有事亦可運解兵餉器械矣  
一曰籌餉四成洋稅原備不虞之用陸續借撥  
所存無多此時創辦防務一切經費自當由  
各省統籌全局移緩就急湖北省購買輪船  
擬即在本省釐金或川鹽課稅項下酌撥濟  
用惟南北兩洋創立外海水師置備兵船鎗  
礮為數浩繁未易籌措應請仍於四成洋稅  
項內提撥若干先行酌購輪船鐵船數號配  
搭應用鎗礮並請將各海關以後所收四成

洋稅留撥幾成以備海防之需別項軍餉概不准借支目前裕餉之道惟有先就利之出於自然者設法導之直省現試辦開挖煤礦若有成效其利實非淺鮮各省之有煤礦及銅鐵礦者均可仿照開挖以廣利源既可以供各廠鑄造及輪船之用其所餘者亦可出售助餉惟各地方情形不同有無窒礙應由各該省督撫臣詳細訪查妥籌辦理

一曰用人自來有治法尤賴有治人不得其人雖有良法亦終無濟軍興以來著名宿將現

尚不乏其人然或宜於陸路不宜於水師或  
熟於內江不熟於外海或人雖驍勇與主帥  
素不相習亦難所向有功誠以將須帥用兵  
隨將轉果統帥得人其所部之軍自精銳可  
用膺此任者必威望素著知兵文職大員各  
將官或係舊部或由訪選拔擢庶意氣相孚  
可收指臂之效從前出力各統將或年齒漸  
衰已成暮氣或艱難久歷思就安閒未必人  
人可用竊意英才輩出亟宜博求新進教練  
成材其統帥或由



朝廷特簡或即令南北兩洋大臣兼任以一事權

一曰持久貞固足以幹事謀一事而不能持久  
何以有成而往往廢於半途者一誤於局中  
之急忽一誤於局外之阻撓此次總理衙門  
王大臣等所議各條籌慮深遠防患周詳禦  
侮之道莫切於此局中局外宜一心一力共  
與維持毋忘往事毋惑人言自始至終堅苦  
貞定歷之永久而無或稍渝斯公忠同盡自  
強之效有操券可卜者

遵議丁日昌海軍水師章程片

再正在覆奏間准總理衙門咨議覆廣東巡撫  
代奏丁日昌豫擬海洋水師章程六條請

旨飭下彙入前奏一併妥籌議覆鈔錄咨行到臣伏  
查丁日昌所擬各條核與總理衙門前奏大致  
相符第一條擬設輪船水師自是要著惟沿海  
艇船似亦未可盡廢查各省原設艇船若有輪  
船帶領巡防海口更資得力臣於議覆練兵條  
內請酌減以充軍餉仍留數成隨同輪船操演  
誠以無輪船則艇船可廢有輪船則該艇藉為

護符接仗時即與輪船無異且可存儲軍火糧  
食况沿海多有輪船所不能到之處艇船盡撤  
防護難周未敢輕議第二條沿海修築礮臺仿  
照西式應由沿海各督撫斟酌辦理其演礮及  
守臺之法應如丁日昌所議切實操練以收實  
效第三條選練陸兵與水師相表裏持論未為  
無見惟水師登陸名義未符易滋流弊應俟會  
議時核定第四條沿海地方官宜精擇仁廉幹  
練之員查牧令有親民之責當慎選賢能不獨  
沿海為然應由各省督撫隨時留心整飭似可

無庸置議第五條北東南三洋分設提督三員  
與臣改設外海水師之議大同小異惟艇船所  
裁歸外海輪船者其原設水師提鎮中即可酌  
量裁改另立營制不必復行添設以節經費應  
否如斯聽候會議第六條三洋分設機器局即  
總理衙門簡器造船之意應候會議時酌定所  
有續奉飭議各條謹就管見所及附片覆

奏伏乞

聖鑒訓示謹

奏

--	--	--	--	--	--	--	--	--	--	--

恭謝

天恩摺

十三年十一月十七日

奏為恭謝

天恩仰祈

聖鑒事同治十三年十月初八日內閣奉

上諭本年十月初十日恭逢

慈禧端佑康頤皇太后四旬萬壽普天同慶已將京外

大員查明現有老親年屆八十以上者優加賞賚

因思大學士直隸總督一等肅毅伯李鴻章湖廣

總督李瀚章之母教子有方均能為國宣勞重膺

疆寄李鴻章削平巨寇勳績尤多朕心甚為嘉悅

其母年近八旬祿養承歡康強逢吉允宜特沛恩  
施著賞給御書匾額一面紫檀三鑲玉如意一柄  
大卷江綢袍褂料二疋大卷八絲緞袍褂料二疋  
以示錫類推恩闡澤覃敷至意欽此十一月十五  
日由臣弟大學士直隸總督李鴻章專弁敬謹  
賚送到鄂臣母當即恭設香案率同臣等望

闕叩頭謝

恩祇領伏念臣母榮叨翟茀疊受

鸞封際

慶典而命錫者三屆稀齡而歲增其五萱堂就養

君恩許遂烏私

楓陸延禧

聖壽欣絲鶴算欽惟

慈禧端佑康頤皇太后德音懿燦景祚龐洪燕拂瑤筐  
銜母地母天之字鳳鏘金卮總履中履順之符

憶當十稔

垂簾垓埏普謚茲值四旬

衍筴寰海臚歡我

皇上瑞輯蘿圖馨承蘭膳星流昴宿思石紐之劬勞  
電繞斗樞本軒邱之鞠育祈年宮裏



手捧瑤觴長樂階前

躬扶玉輦極

九重之

尊養共祝升恆合萬國之懽心

覃敷雨露凡茲耆耆並沐

推恩豈料慈親同邀

錫類考定例八旬以外在廷始荷

榮頒計文階一品之中臣母獨蒙

曠典仰

璇題之四字螭匾騰輝麗銀榜於三霄

螭毫灑潤松喬垂蔭春暉比及全家竹箭有筠

天語許其益壽欲取吉祥之意瓊鉤則柄握梅檀長  
承衣被之榮金繡則品兼綺縠里閭紀盛僚采  
欣瞻况臣職未効涓埃

天心特深嘉悅念臣弟克除巨憝秉

廟謨而尙敢言功在

微臣

忝領兼圻盡官守而更無足

錄迺荷

溫綸曲獎無非

教孝以作忠從茲

異數欽承直以

國恩為家慶螳忱徒結黿戴難名臣惟有勛勵諸昆  
共圖報稱承歡親舍祝

頤祉之方長恭矚

奎章仰離明之有耀

天意常如人意效賡颺於萬歲千秋

賜衣想見

宵衣調寒燠於五風十雨願竭蘭單下駟驅策康衢

永隨蓬島仙禽銜籌海屋所有微臣感激下忱謹

繕摺恭代臣母叩謝

天恩伏乞

皇上聖鑒謹

奏



驚聞大變請 抑悲懷摺  
十三年十二月初六日  
奏為驚聞大變請

抑悲懷仰祈

聖鑒事竊臣接准部咨同治十三年十二月初六日內閣奉

上諭本月初五日酉刻

大行皇帝龍馭上賓朕欽奉

慈安端裕康慶皇太后

慈禧端佑康頤皇太后懿旨入承大統等因欽此跪讀之下悲慟莫名伏念

大行皇帝冲齡踐祚秉承

皇太后慈訓懋修典學聖敬日躋撫億萬衆待治之民  
掃十數載稽誅之寇武功文德焜耀寰區自上  
年親政以來旰食宵衣勤求上理方冀長延景  
錄永托昇平迺因感受天花奄捐臣庶薄海內  
外罔不泣血椎心

皇太后顧復劬勞感悼何能自己惟是

鼎湖弓劍邈矣難攀神器有歸

皇上已入承大統萬幾至重悉賴

懿旨親裁伏求

俯抑哀思允釐庶政用以副

列祖

列宗之付托即以慰

大行皇帝在天陟降之靈瞻望

闕廷曷勝虔籲臣楚疆奉職永隔

軒車搶地呼天悲號靡及格於成例不獲叩謁

梓宮稍伸哀慕惟有率同僚屬慎固封圻際天崩地圻

之時何敢自全軀命念

國計民生之重勉思共濟艱難所有微臣哀籲下忱

理合繕摺具陳伏乞



皇太后聖鑒謹

奏

整飭歸州灘務明定章程片

光緒元年五月初一日

奏為整飭歸州灘務明定章程籲懇

敕部立案以垂久遠恭摺仰祈

聖鑒事竊照湖北宜昌府屬歸州巴東等州縣瀕臨

大江為楚蜀出入要道節節皆灘而歸州之新

灘為尤險每當水涸亂石林立波濤洶湧客船

往來上灘下灘必雇本地熟諳水性之人拉放

或將重載提剝馱運一切向有定章緯夫水手

攜長人等各立夫頭分董其事均由新灘同知

管理嗣因人夫衆多歸州派差彈壓遂以支應

差使為名抽取陋規而劣紳地棍亦因之勾串把持視為利藪巧立名色任意勒索稍不遂慾即不肯將船拉放客船履險勢急不得不多給錢文甚有不法棍徒駕駛小划如遇客船遭風擱淺即藉稱救護乘危搶劫客商船戶均受其害咸豐九年經前督臣官文前撫臣胡林翼訪聞嚴拏懲辦並將辦理不善之員撤參示儆一面明定章程往來商船所需縴夫視船隻之大小定人數之多寡不准額外勒加多索分文又籌給該地方官辦公經費毋許書差營弁藉端

需索劣紳地痞不准從中干預仍於緯夫馱夫等項各立夫頭責令管束妥為經理揀委幹員常川駐灘督率各幫首士認真稽查自定章後迄今十餘年帆檣絡繹商民稱便茲據各幫首士恐夫頭人等日久玩生復蹈故轍稟請轉詳奏咨立案以垂久遠等情由湖北布政使林之望按察使王大經荆宜施道孫家穀核議章程開具清摺會詳前來臣等查核所議灘務章程均屬妥協洵足以利商旅而免流弊相應請旨敕部立案俾垂久遠除將章程咨部查照外謹合

詞恭摺具陳伏乞

皇太后

皇上聖鑒訓示謹

奏

籌辦情形先行密陳摺  
元年八月十九日

奏為遵

旨籌辦情形先行恭摺密陳仰祈

聖鑒事竊臣於八月初十日湖南桃源縣途次欽奉

七月二十八日

上諭英國馬嘉理被戕一案情節甚重李瀚章甫於  
七月十八日起程即著迅速馳抵滇省會同劉嶽  
昭岑毓英將此案實在情形查究明確柏郎被阻  
之事著一併詳查即行據實奏聞並一面會同妥  
速籌辦以杜釁端等因欽此跪誦之下欽悚莫名

旋於八月十六日行次沅陵縣接准總理衙門  
密咨以英使威妥瑪照會縷述案情鈔黏附送  
前來 臣詳加核閱該使所述馬嘉理被戕柏郎  
被阻各情前此照會皆以李珍國為主使此次  
又謂其姪叔君統帶兵勇又據喀乾土人所云  
中國官員楊大人調兵攔阻英官約會札賴土  
司協助等語於李珍國外添出楊姓謂其居心  
構怨詭譎恍惚其詞固難遽信第馬嘉理柏郎  
由緬入滇該地方官員有無調兵阻擊情事實  
為緊要關鍵必須查出確情方足以折服彼族

之心臣到滇之後萬一岑毓英受其屬吏朦蔽  
彼時察訪甚難誠如

聖訓所云儻稍涉含糊致彼族有所藉口豈能當此  
重咎查有湖南綏靖鎮總兵李勝心地明白謹  
慎耐苦臣已密札飭調該總兵改裝易服由川  
東取道徑赴騰越蠻允一帶逐細密訪是否楊  
姓調派官兵抑係地方團勇土兵李珍國之姪  
是否在场馬嘉理究係何人所害一一查清根  
柢再行進省面稟庶可腳踏實地相機措手臣  
現駛抵辰州日內即行起早迅速赴滇所有先



行籌辦情形恭摺由驛密陳伏乞

皇太后

皇上聖鑒訓示謹

奏

到滇日期並合籌大概情形摺元年十月二十五日

奏為恭報臣等到滇日期並合籌大概情形請

旨先將辦理不善之文武地方官革職審訊仰祈

聖鑒事竊於光緒元年五月二十三日欽奉

上諭本日有旨派李瀚章前往雲南查辦事件著即

迅速赴滇將馬嘉理被戕一案會同該督撫秉公

訊結欽此八月初八日奉

上諭著吳棠傳知前侍郎薛煥迅速赴滇幫同李瀚

章辦理一切以資得力等因欽此臣等恭報起程

後遵即按站前進臣瀚章於十月十六日臣煥

於十月二十三日先後抵滇沿途明查暗訪到  
省後會晤臣毓英面詢大概情形並調核全案  
卷宗將提到已獲各凶犯迅速派委幹員研訊  
確情另籌辦理具奏臣等伏查馬嘉理前次由  
滇赴緬執有總理衙門護照沿途地方妥為護  
送無誤嗣該洋人等由緬回滇中隔野人土司  
地界該處向多匪徒與野人勾結劫掠行旅其  
時騰越紳民紛紛傳播謂洋人帶有洋兵多名  
將入關內該紳民素未識洋兵舉動恐其入境  
欺辱是以集團自衛身家而不法匪徒乃與野

人伺隙乘機劫殺釀成事端雖該洋人自緬境折回未先知會地方官派人迎護而騰越廳同知吳啟亮於紳民聚團時未能開導彈壓豫防其漸及至中途失事疊經臣毓英嚴檄勒拏數月之久始行獲犯緝捕遲延致外國有所藉口實屬辦理不善署騰越鎮總兵蔣宗漢於專轄地方出此巨案毫無覺察亦有應得之咎相應請

旨將騰越廳同知吳啟亮署騰越鎮總兵蔣宗漢一併撤任暫行革職歸案審訊如查有調兵阻止

及指使戕害情事再行照例從嚴究辦臣等連日會商意見相同謹合詞恭摺具陳伏乞

皇太后

皇上聖鑒訓示再雲貴督臣劉嶽昭至今尚未回任是以未經會銜合併陳明謹

奏

請飭各督撫訪拏會匪片

再臣瀚章據兼署雲貴督臣岑毓英送閱軍機大臣字寄光緒元年十月十九日欽奉

上諭劉坤一奏匪黨潛滋請飭密查妥辦等語據稱江蘇匪徒內有安清道友哥老會兩大起安清道友多在江北所有劫殺重案及包販私鹽掠賣婦女皆其夥黨所為哥老會蔓延湘鄂浙閩雲貴川陝安徽江西各省而江蘇尤多近來該匪等各立山名堂名甚至分設偽官製造偽印及旗幟等項漸有萌動之勢著該督撫等不動聲色密查妥辦

偵拏首惡各匪務期弋獲按律嚴懲哥匪多係前  
在軍營將弁其中甘為游蕩者固多迫於饑寒者  
亦復不少並著各該省督撫寬為收標仿照江西  
奏准章程給予半俸以示體恤等因欽此仰見

聖主思患豫防之至意臣忝膺疆寄管見所及未敢  
以奉使出省緘默不言敬為我

皇上陳之各省匪徒自立會名妄行不法承平之日  
已難保其必無近年軍務甫靖各營裁撤勇弁  
守分安業者固多其素性獷悍肆為不法者百  
中不無一二全在大吏督飭地方文武隨時設

法嚴拏有犯必懲若慮其生事隱忍含容犯案  
後又或拘牽例文不肯立時嚴辦則匪膽愈大  
日久必至滋蔓昔年粵捻之興未始不由大吏  
姑息養癰之所致也至慮其為匪遂謀所以贍  
卹之此舉則似是而非近來各營將領每以會  
匪滋多為詞恫喝大吏大吏不察甚至藉許招  
募以為開銷侵蝕地步

國家帑項有數豈能似此浪費現在各省收標凡  
軍營保舉人員取有身家清白甘結即予照准  
為例本寬人亦不少除有差委給予薪資外其



平時操演花紅獎賞數已不貲勢難再議優給  
立功將弁何至盡皆不肖贍養身家之典僅足  
鼓勵中材至於不逞之徒雖足食豐衣難革本  
性況此等會匪有已保官職有係屬平民既難  
盡予收標卽給俸亦豈能遽戢奸志若照江西  
辦法概給半俸不特度支難繼甚且良莠不分  
若輩將以食俸為護符更恐肆行無忌是會匪  
本屬散處反令招聚省城關係實非淺鮮江西  
所定章程本非良法儻再推及各省一律仿照  
轉長奸邪之志殊於政體未合劉坤一所陳雖

屬一時權宜之計究恐貽患將來有損無益合  
無仰懇

天恩飭令各省督撫臣嗣後務須認真督飭訪有會  
匪立即拏辦犯案者盡法懲治以期消患未萌  
其身家清白收標各員仍行量材差委有功則  
優加鼓勵無庸另議體卹章程庶於營務地方  
兩有裨益愚昧之見是否有當伏乞

聖鑒訓示謹

奏



合肥李勤恪公政書卷七目錄

湘廣  
楚湖

男經奮經江澧編輯

滇淮  
濤隘

恭謝 天恩摺 二年二月初六日

遵查滇撫被參緣由摺

遵查英員被戕被阻全案情形摺

密陳洋員觀審及赴緬情形摺 二年四月十六日

叩謝 天恩並到川日期摺 二年十月二十七日

楚岸淮鹽引地未可驟禁川銷摺

恭謝 天恩摺 三年二月十八日

世職日多請照章量予限制摺 三年三月十四日

請將漢陽宜昌水師改為陸營摺 同日

叩謝 天恩摺 三年七月十八日

恭謝

天恩摺 二年二月初六日

奏為恭謝

天恩仰祈

聖鑒事竊臣於光緒二年二月初四日在雲南省城接准兼署湖廣督臣翁同爵咨會轉准吏部咨開光緒元年十二月十九日內閣奉

上諭四川總督著李瀚章調補欽此臣當即恭設香案望

闕叩頭謝

恩伏念臣忝督楚疆於今六載涓埃未効報稱毫無

去年七月間遵

旨馳赴雲南查辦事件茲復仰邀

恩命

簡任西川查川省北接陝甘東聯湘鄂西通番藏南  
界黔滇戶口殷繁幅員遼濶總督兼管巡撫事  
務舉凡吏治民生餉源軍政以及鹽茶課稅中  
外邊防在在均關緊要如臣禱昧深懼弗勝將  
來履任之時惟有殫竭血忱督率屬僚力求整  
頓以期仰答

鴻慈現在馬加理一案雖已訊有端倪而英國參贊

格維納等於正月二十三日甫入滇境俟到省  
訂期觀審後與前侍郎臣薛煥等妥慎籌商折  
中定讞除將辦理情形另行具

奏外所有微臣感激下忱謹繕摺由驛叩謝

天恩伏乞

皇太后

皇上聖鑒謹

奏





遵查滇撫被參緣由摺

奏為遵

旨密查覆奏恭摺仰祈

聖鑒事竊臣前准軍機大臣密寄光緒元年十一月

初八日奉

上諭侍郎郭嵩燾奏特參釀成事端之撫臣請旨嚴懲一摺據英國緡譯官馬嘉理被戕一案岑毓英意存掩護歸罪野人並不查明實情奏報亦不研考事理詳求善處之方等語此案前據岑毓英奏報業經拏獲兇犯提解到省聽候訊辦現在李瀚

章諒早到滇著即詳細推求秉公研訊岑毓英有  
無掩護情事並著據實查明總期持平辦理免滋  
藉口等因欽此惟時臣甫抵滇未敢率行覆奏現  
在馬嘉理被戕一案業經英員觀審所有詳細  
情形另行恭摺具

奏遵將郭嵩燾所參岑毓英各條逐一查覈馬加  
理前次由滇赴緬執護照通行無阻迨與柏郎  
由緬回滇隨帶緬兵洋兵多人紳民聞聽謠傳  
聚團自衛乃致關外匪徒乘機劫殺實地方文  
武所不及防岑毓英查無先期檄飭文據騰越

各土司轄境向以八關為限馬加理被戕地方  
在銅壁關外二十五里萬峯竦峙巒疊雜居乃  
化外羈縻之地其人自居巖洞者亦有被擄  
漢民及敗狃竄入者既在野山界內不能細加  
區別一概呼為野人現訊拏獲各犯供認搶劫  
不諱委非歸罪騰越在雲南極邊距省窻遠馬  
加理被戕後岑毓英疊飭嚴拏一經報獲即行  
具奏其時犯未勘審祇能據稟入告致與現訊  
供情稍有未符尚非有心掩護楊玉科署理提  
督在事出以後本與此案無干李珍國嗾眾阻

攔供證確鑿並有密函可據不得謂牽連在內  
伏查岑毓英肅清滇省其功誠不容沒惟身任  
督撫於此等重大案件未能迅速辦結責以遲  
延之咎本屬無詞若如原參各條似得之遠道  
傳聞未為允當臣不敢代為掩飾至賓旅為五  
禮之一古先哲王垂為鉅典我

朝所頒會典通典諸書於內外蒙古及俄羅斯交  
際事宜臚列至為詳備居今稽古學禮從周正  
士大夫所宜究心者近日泰西各國環集中土  
變通盡利存乎其人尤為當務之亟郭嵩燾湛

深經術探本立言凡在臣工目擊時勢均宜互相勗勉共濟艱難不得故為高論致違

國家懷柔遠人之意所有遵

旨查覆緣由謹繕摺密陳伏乞

皇太后

皇上聖鑒訓示謹

奏

--	--	--	--	--	--	--	--	--	--	--

遵查英員被戕被阻全案情形摺

奏為遵查英員被戕被阻詳細情形恭摺覆陳請  
飭籌議定擬以成信讞事竊臣等自上年十月到滇  
後提訊戕害馬加理之犯供並密查卸署都司  
李珍國顯有計阻英員之意當經據實奏參奉  
旨李珍國著先行革職分別研鞫等因欽此欽遵在  
案數月以來臣等督飭奏調道員丁士彬知府  
蔣銘勳等會同雲南布按兩司更番訊取供詞  
復由臣等親提審問現經英國參贊格維納等  
來滇觀審訖謹將全案顛末及查究情形為



皇太后

皇上敬陳之馬加理於同治十三年十一月到滇先  
經兼署雲貴督臣岑毓英遵照總理衙門文函  
飭屬妥護已革騰越總兵蔣宗漢已革騰越同  
知吳啟亮奉文後商派都司徐成林迎護到騰  
會晤款洽仍派兵役護送出境馬加理瀕行有  
致蔣宗漢謝函為證訊據蔣宗漢吳啟亮供稱  
馬加理祇言往迎柏郎並無何日回騰囑令迎  
護之說去後亦無文函知會等語此馬加理初  
次過騰平安出境之情形也馬加理由騰赴緬

境新街後與柏郎會合初擬由拱硿南坎入滇之永昌府一路行走迨至拱硿被馱貨野人損壞行李復折回新街改由蠻幕前進於光緒元年正月十三日行抵南平河有路人告知護送英員之緬官謂戶宋河有匪徒攔路柏郎惑之馬加理以途係已經徑自進發十五日住宿蠻允之緬佛寺次日意欲往迎柏郎行至戶宋河即遇久慣路劫之山匪而通四臘都等糾約夥附以逃狃地匪約百餘人向索過山禮馬加理開鎗斃其夥匪一名匪眾一齊上前將馬加

理及其賓從四人一併殺害劫去隨行馬匹什物及緬佛寺內行李看守之漢人一名當時逃去此馬加理在戶宋河被戕之情形也柏郎自馬加理由南平河分身後越日亦即前進行至雪列地方因行囊食物未到仍回南平留從人石雨田在雪列與馬加理先行帶往後留在彼聽信之通事李合興等候前途消息柏郎於十七日在班西山下被眾三面合圍阻其去路經護送印度緬甸各兵開鎗擊斃數人並於後路樹林放火始各潰散其在場目擊者即劫殺馬

加理之腊都因聞南平馱載甚多復糾夥往劫據供其中有就地山匪有內地逃出漢奸及業已正法逆狃李國淪之子李發羽黨不期而會者共約近二千人等語此柏郎在南平河被阻之情形也當馬加理之既西也騰民間地方官示諭洋員往來照約護送本無他意惟騰境自狃逆倡亂十有餘年賴闔境有

國初時舊立都團名為十八練殺賊克城已革副將銜叅將李珍國實為團首即英國駐京使臣威妥瑪照會所稱李協台即李四者也因頻年

剿散餘匪潛伏關外時圖報復騰民恐其謀知  
英員帶兵來滇乘機混入以李珍國正在干崖  
壩尾奉札解散波三海馬二股匪事宜函促回  
騰齊團保境檢查紳眾原函祇囑李珍國會團  
守衛初非計阻洋兵奈李珍國並不回騰竟自  
居間發難布置截阻揮霍犒金欲為攤索資費  
地步齎函紳眾極力鋪張紳等力難禁遏遂各  
自齊團防守境內據總兵李勝密訪及蔣宗漢  
吳啟亮等面供該練地實無團勇出境李珍國  
原信已據紳眾呈繳研訊蔣宗漢吳啟亮僉供

李珍國祕謀事前實不知情事出之後始聞人言及之此查出李珍國計阻洋人入境之情形也臣等查英國駐京使臣威妥瑪照會總理衙門所稱馬加理被戕柏郎被阻情形旁觀傳述不無所聞異辭而核其地界及起事日期與臣等查訊各節尚屬相符至照會內稱喀乾土人告知柏郎聞中國官楊調兵攔阻一節訊據蔣宗漢等供稱該處帶兵員弁實無楊姓其人至開化鎮總兵楊玉科是年正月半後始由京回至省城更無干涉又照會內稱攔擊柏郎之漢

兵執械吶喊聲言係李協台親姪叔君一節訊據李珍國供稱該革弁全家均死狃匪之難祇有族姪李含興此次隨同英員由緬回騰另無子姪名喚叔君及名與叔君二字同音之人又照會內稱馬加理被害後割取首級懸掛廳城一節訊據蔣宗漢吳啟亮供稱實無此事眾目昭彰斷難掩飾兇犯腊都等供稱實係殺死後就近拋棄尸宋河內臣等檄飭現署騰越總兵同知等懸賞購求屍首認真設法打撈據稟實因日久漂沒連撈八日之久未能撈獲等語尚

係實情至照會內指稱李珍國串通某頭目攔阻英官不許進入中國及額游客從孟磨起程風聞李珍國已在各土司地方布置兵勇駐扎各寺語經臣瀚章派往密查之總兵李勝親赴騰越蠻允訪查道路之口均稱係李珍國所為而該革弁研訊十餘次始終狡避是以英國使臣威妥瑪照會內所稱喀乾土人斬取擊斃首級之漢兵又蠻允司棉官函述殺害馬加理之中國人又告誡緬人毋與英人同行之華姓順姓或宋姓劉姓又從騰越下來未進蠻允城夜



間人聲嘈雜約帶三四千兵亦係劉姓順姓或  
宋姓又告知緬國探子俄瑪姓謂由打英人地  
方回來之中國某姓官員又李珍國在孟磨不  
允派隊護送額游客時一律阻撓之某頭目又  
事後因未能殺盡英官及跟同之漢人緬人懲  
辦統兵官等之駐蠻允中國楊官員各種情節  
各項人等均無憑拘傳訊究且照會內亦未能  
指出名字或名姓俱無勢難將凡與同姓及毫  
無把柄之人妄拏追訊徒滋紛擾惟各路之布  
置皆緣李珍國一人之主謀無由治其脅從應

即咎其主使李珍國雖堅不承認其寄騰城紳  
眾一函並蔣宗漢吳啟亮亦供事後聞李珍國  
實有各路布置之事憑證昭然已同鐵案即照  
眾供確鑿即同獄成之例子以應得之罪百喙  
奚辭蔣宗漢吳啟亮訊無調兵攔阻情事李珍  
國秘謀事前實不知情惟明知英員將由緬甸  
來滇徒以未據馬加理先期知照未能預籌迎  
護迨案出以後又不能趕緊拏辦雖後來帶兵  
捕獲犯賊尚知愧奮究屬疎忽於前業經臣等  
奏參暫行革職野山地居土司界外匪徒分崗

爭雄羣呼為野人官屬聚出沒為害行旅此次  
劫阻英員之犯除上年官軍往捕格斃裴六而  
都而糯雷大裴小陀而敢幹等五十餘名並就  
擒後在騰越監斃六濫幹阿用二名在省監斃  
麻幹一名又起解在途脫逃蘭小紅一名途次  
因傷身故而排幹阿弄二名節將解到匪犯  
而通四腊都而腊感而肝陸濫當而幹爾同  
巴即而腊而剛幹而排腊而樣雙施奶等共  
十一名分別譯訊並未刑求該首犯而通四  
腊都供認起意糾搶拒殺馬加理及其跟隨

四人腊都又供認糾夥前往南平河圖搶柏郎  
從犯而腊感而肝陸濫當而幹爾同巴即而腊  
而剛幹而排腊而樣雙施奶供認戶宋南平兩  
處分投從劫各不諱亟應明正典刑庶野匪稍  
知斂跡緬滇道路可期通暢惟案關中外交涉  
臣等未便遽行擬結謹將查究詳細情形據實

臚陳請

旨飭下總理衙門詳慎籌議會同刑部分別定擬以  
成信讞除飭將已革總兵蔣宗漢已革同知吳  
啟亮妥慎看管已革都司李珍國及匪犯而通

四等十一名分別監禁訊無不合之通事李合  
興交保候傳在逃之匪犯蘭小紅咨由兼署雲  
貴督臣岑毓英勒緝務獲歸案辦理起獲馬加  
理馬匹什物共五十六件已點交英國參贊格  
維納等收回取有單據全案供招並李珍國寄  
紳眾原信咨送總理衙門備查外謹會同兼署  
雲貴督臣岑毓英合詞繕摺具

奏伏乞

皇太后

皇上聖鑒訓示施行謹

秦

--	--	--	--	--	--	--	--	--	--

密陳洋員觀審及赴緬情形摺

二年四月十六日

奏為遵

旨密陳恭摺仰祈

聖鑒事竊臣等於四月十二日行抵四川瀘州屬納  
谿縣途次接准軍機大臣密寄光緒二年三月  
十九日奉

上諭總理各國事務衙門奏觀審洋員到滇並陳英  
國使臣議論情形一摺威妥瑪赴該衙門辯論此  
案據稱格維訥觀審後須到緬甸或仍由內地回  
京或由海道北來俟接其文書後說出辦法如不



肯行自有辦法等語意存挾制惟格維納一經赴緬則辦理益無憑藉勢必枝節橫生且恐其回京後威妥瑪信其一面之詞百端狡執更形棘手著李瀚章薛煥悉心查辦務須實事求是並須就格維訥未經赴緬之先將案中緊要關鍵及罪名各節逐一切實擬議有以折服其心再行奏明辦理至格維訥將來赴緬時並派明幹文員伴同前行即作為查看邊界貿易情形至滇緬交界為止以示防維等因欽此臣等遵查英員被戕被阻詳細情形及格維訥等觀審後啟程赴緬日期業於

三月初七日由驛具奏請

飭總理衙門會同刑部籌議定擬並聲明臣瀚章啟  
程東行迎摺北上臣煥亦即回籍調理拜摺後  
遵於三月初十七日先後起身四月十二日  
同抵納谿縣界適奉

寄諭仰蒙

聖訓周詳曷任欽佩伏查臣等查辦此案計閱五月  
之久沿途周諮博訪並調派湖南綏靖鎮總兵  
李勝改裝易服親赴蠻允地方詳密詢問到滇  
後提集各犯飭委研訊十數次供吐如繪格維

訥等觀審畢詢以能否悅服僅據將無從查考  
數條略為指述及臣等逐條辯駁格維訥又謂  
彼無議辯之責早經威妥瑪囑咐為詞臣等查  
威妥瑪滿腹奢望特以滇案為波瀾無論如何  
查辦均難保其到京毫無翻異若就案情而論  
臣等在在實事求是無可再查威妥瑪所最重  
者馬加理被戕柏郎被阻必須究出主使及犯  
證供詞無不確鑿現在首從各犯何人起意何  
人下手直認不諱革弁李珍國計阻洋人入境  
亦查出致團練信函足為鐵據並有與馬加理

柏郎同行目擊之李合興為證均係緊要關鍵  
其餘照會所指未能查出數條或傳聞互異或  
名姓全無在彼族強指為關鍵於案情實不為  
緊要臣等勢不能捕風捉影妄拏追訊紛擾徒  
滋至罪名一層強盜行劫得贓武弁斂財生事  
律有明條臣等前奏所以不遽援引定擬者緣  
事關中外交涉與內地案件不同威妥瑪去歲  
來函及梅輝立赴總理衙門面述謂此案若但  
憑外省訊斷無益有損格維訥等抵滇又首先  
索取照會不得遽行處治臣等儻將罪名按例

斷定萬一威妥瑪橫加駁斥豈能改易爰書尤  
恐總理衙門因此轉形棘手臣等籌商再四實  
有萬不得已之苦衷業經密陳定邀

洞鑒格維訥等此次西去明係查看情形預為通商  
地步臣等亦早慮及原議面商辦法藉作轉圜  
乃引逗多方該參贊等始終不提一字臣等勢  
難強聒與語且其行甚急臣等若固留之彼必  
緘默如故且恐波折橫生愈無以仰紓

宵旰是以該參贊等赴緬照章派員護送並未提明  
查看貿易滇緬向以蠻允為界將來許其通商

似亦以此地為適中臣等與前署雲貴督臣岑毓英密商已久迨臣等啟行時岑毓英適值聞計丁憂當經詳細告知雲南布政使潘鼎新密授機宜令其預為規畫此次欽奉

諭旨復經密飭遵照新任雲貴督臣劉長佑計日應可到滇一俟暑退瘴銷即可徐為勘辦臣等在途疊接地方官稟報格維訥等已過大理日內可達緬界印委各員妥為保護諒無疏失附慰宸厪謹專摺由驛密陳伏乞

皇太后

皇上聖鑒訓示謹

奏

叩謝 天恩並到川日期摺  
二年十月二十七日

奏為叩謝

天恩並報微臣行抵四川省城日期恭摺仰祈

聖鑒事竊臣於七月初六日由皖力疾赴川當將起程日期專摺具

奏一面泝流上駛八月間行次宜昌時值峽江盛漲驛路被淹改由施南順慶一帶前進山深雪早嶺峻途紆復因感受風寒略有耽閣十月二十三日始抵成都護督臣文格辦理武闈正在分場校閱未經竣事難即交卸並據咨開光緒



二年十月初十日准兵部火票遞到九月十一日內閣奉

上諭李瀚章著調補湖廣總督欽此臣當即恭設香案望

闕叩頭謝

恩伏念臣猥以菲植渥荷

隆施頻年忝領楚疆涓埃未効去歲奉差滇省隕越尤深迺征塵甫拂於巴江

恩命重移乎鄂渚稍紓蚊負庶幾民俗之曾諳近遂烏私尤荷

聖慈之曲體捐糜莫報感激難名惟新授四川督臣  
丁寶楨尚無來蜀之信護督臣文格又因調任  
山東巡撫疏請

陞見臣另有奉

旨交查東鄉縣匪眾滋事一案應否俟丁寶楨到任  
接辦抑先行接受四川總督篆務以便確查研  
訊未敢擅專伏候

諭旨遵行所有微臣感激下忱及行抵四川省城日期  
謹繕摺由驛叩謝

天恩伏乞

皇太后

皇上聖鑒訓示再臣此次拜摺係借用四川總督關

防合併陳明謹

奏

楚岸淮鹽引地未可驟禁川銷摺

奏為楚岸淮鹽引地未可驟禁川銷籲請展限辦理以保實餉而順輿情恭摺仰祈

聖鑒事竊臣於途次接准護四川總督雲南巡撫臣

文格咨開七月三十日准軍機大臣字寄光緒二年七月十三日欽奉

上諭沈葆楨奏收回淮鹽引地應遵部議迅速舉行一摺據稱以淮鹽原有之楚岸仍令歸淮於楚省餉需大有裨益非僅毫無所損現在滇黔肅清正宜移侵楚之川引復從前之舊額等語所奏甚是

即著李瀚章文格翁同爵王文韶遵照部議迅速  
辦理其應如何剔除積弊嚴杜私銷之處並著沈  
葆楨等會商妥辦等因欽此遵

旨寄信前來並准部文議覆御史周聲澍禁川復淮  
一摺酌擬章程五條又議覆御史吳鴻恩川釐  
未可更張片奏一件奉

旨依議欽此各等因咨行遵照事關數省大局通盤  
覈計不特目前時勢窒礙甚多第將川淮歲入  
之數兩相比較酌劑盈虛已於

國餉有虧而民情亦難遽順伏查淮鹽定額以六

百斤為一引每引收課釐銀六兩一錢四分川  
鹽入楚每引收課釐錢十千八百文合銀六兩  
二錢六分四釐加以川省每引收銀三兩零六  
分一釐二毫川鄂兩省併計每引實收銀九兩  
三錢二分五釐二毫湖南澧州花畹岡鄰稅每  
斤八文尚不在內淮鹽一引實已較川鹽少收  
課銀三兩一錢八分五釐二毫現准川鹽行銷  
荆宜安襄鄖荆澧等府州查舊額銷淮數目僅  
止十四萬六十餘引原分界時已准兼售淮鹽  
鄂省歲收川稅約錢一百六七十萬串合銀百

萬以上加以川省歲收六十餘萬合計每年應收銀一百六十餘萬兩淮鹽行銷武漢黃德等府最旺之區舊額銷數四十三萬餘引不准川鹽顆粒侵灌每年竭力疏緝所銷不過十餘萬引茲將行川之地全數歸淮照武漢等府現銷之數按成科算每年不過多銷四五萬引收銀三十萬兩左右於餉項虧損已鉅徒令兩淮有收回引地之虛名而先失川鄂兩省一百六十餘萬之實款非計之得也如沈葆楨所奏每年令淮商包完鄂釐銀九十萬兩無論岸課用數

向有定款未可損彼益此即使如數解鄂下短  
之款仍歸無著淮網於行銷多年之岸未能徵  
收足額而新議規復之地又焉能必其溢額包  
完耶若專責成淮商商人惟利是求豈能不顧  
成本傾解私囊年年包完鄰省餉需且票商與  
岸商不同票商有利則趨無利則停官亦難為  
驅迫其情事應先計及至部臣謂淮鹽課有定  
額不能絲毫虧短如有虧短不難查出立追姑  
就淮銷武漢等府統計每年短銷額引不為不  
鉅未聞執法追繳蓋以既改票章但計課餉盈



虛不問銷數多寡今何舍已成之課餉而今川  
鄂交受其困與其日後紛擾何如姑守定章查  
鄂省川課每年動撥滿營兵餉二十六萬有奇  
戶部十萬固本六萬荆宜水師二萬數千其他  
各省協餉本省防營大半取給於此川省行鄂  
鹽課每年動撥京外各餉及本省軍餉亦不下  
數十萬未聞准商包完之議此項又將何出遽  
行禁止兩省短收過鉅斷難照舊撥解必須另  
請改撥恐彼時部臣亦有為難現在防海征西  
以籌餉為第一要義為

朝廷計當合天下全局統顧兼籌縱不能別謀富國之方豈可以億萬現銀付諸一擲部臣原奏亦稱淮課川釐均為餉需所繫使相較兩無贏縮何煩固為爭執必拘拘焉議覆古章此誠破的透宗之論議覆吳鴻恩奏片內稱同治十二年分湘鄂收數一百萬兩未嘗計及川省臣今所稱歲收一百六十餘萬係合川鄂兩省實收現數部臣又謂引地全數歸淮可收百二十餘萬與沈葆楨所云九十萬兩數亦不符且屬懸揣之詞短絀勢所必至語云利不百不變法

取鄂省所收之數與淮課較優絀已分合川鄂  
兩省所收之數與淮課較直有天淵之別兩淮  
既為鄂計何不併合川計現在周聲澍沈葆楨  
先後陳奏部臣力主其說嚴定一年之限行令  
臣等妥籌臣何敢故違成議惟荷蒙

聖恩俾任疆圻明知餉源所繫利害所關苟隱忍不  
言將來必致無可補救謹就所擬章程五條逐  
細籌度均覺辦理過驟並據署四川布政使杜  
瑞聯鹽茶道蔡逢年以川邊銷路未復應照舊  
章暫准行楚會詳請奏前來理合據實籲懇展

緩敬為

皇太后

皇上縷晰陳之一請封私井以塞來源查川省鹽井  
報部總數本有八千八百餘眼之多額銷邊引  
向配捷富榮三廠行楚川鹽則專配捷富兩廠  
兩淮所指之私井業經護督臣文格委員周厯  
確查據稟捷為自遭賊擾井窳多半歇業每遇  
奏銷皆係賠繳課稅舊井尚且無力煎燒豈有  
餘力開鑿私井榮縣額井三十二眼現在井枯  
窳減僅存十二眼內有三眼水已就枯全推之

井實止九眼富順鹽井除報部額數外咸豐年間奉文募商開鑿增添新井一百餘眼應照新章封禁惟捷為榮縣廢竭之井百數十眼尚未修復正賴通融調劑以贏補絀彼此相抵於額數並無浮溢此事係前督臣駱秉章廣為設法竭力招徠始有成效地產所萃人力所營昔年勸諭而開之今日強迫而封之無論勢難遽行亦覺於理未順况汲井燒竈何止數十萬人水陸裝運又不下數十萬人無業窮民易聚難散必須妥籌善策逐漸施行非三五年所能就理

此必應展緩者一也一請疏邊引以分銷路查川鹽行銷本省外貴陽昭通向有口岸滇黔肅清末久岸埠房屋器具馱運等項被燬無存舊商死絕逃亡間有一二存者資本罄盡驟難整理復充故近日行邊川鹽止在川邊營運不能直達本岸積引七萬餘張專賴楚岸分銷藉資挹注臣去秋今春道經雲貴各府縣往往數十里內罕見人煙實緣戶絕丁稀以致銷微引滯兼之舟楫不通肩負驟馱利輕累重沿途局卡林立咨禁視為具文邊省苦瘠之區專恃此項

釐金以充軍餉勢不能強令撤裁故新商莫肯承認非俟一二十年後流亡復業丁口滋生不能舉辦此必應展緩者二也一請復巡卡以遏來路查川鹽入楚在平善壩設卡驗票至宜昌納稅兩淮派有監掣委員稽查數目行之近二十年商民恪守定章相安無事今部臣飭令改設巡卡而引乾隆三十五年成案設卡兩處巡船數隻現在武漢黃德四府緝私分卡數十處礮船巡勇數百人偷漏尚多誠以兵燹後奸匪游勇到處皆有其肯以販私為業者尚是自謀

生路儻巡緝過嚴若輩轉謂官長絕其衣食或  
致昧

國家之例禁民情不古豈能執乾嘉盛時以相比  
例若兩淮於平善壩設卡查緝不嚴則有名無  
實是變有稅之鹽而無稅成本愈輕奸販愈眾  
淮網現銷之岸且不能保如果廣籌經費分紮  
重兵實力堵截勢必激成事端擾累良善後患  
不堪設想此外夾帶包攬亦有思慮所宜及而  
勢所必至者此必應展緩者三也一定限期以  
復舊制查川省鹽井深至五六百丈井底自能



出火各廠燒鹽有用煤炭者亦有引取地火者  
大都逼近民廬毗連街巷日久不汲則火發燎  
原必須鎔鐵數萬斤投入井口務令溷乾火熄  
方可謂之封禁現查新井確數雖止富順界內  
一百餘眼約計人工鐵價數已不貲此項巨款  
應由官給一時何從籌措加以億萬失業之眾  
鋌而走險何所不至必須滇黔元氣大復邊銷  
日廣然後人得謀生臣此次由鄂入川商販聞  
信哀求動盈千百沿江緯夫船戶私憂竊歎愀  
然喪其樂生之心情形岌岌可慮此必應展緩

者四也一請講煎煉以利銷路查此條係兩淮專政沈葆楨摺內厯指積弊籌議新章法良意美經此一番整頓敵川自可無疑惟蚩蚩之氓非目覩其色口嘗其味豈能家置一喙強令信從淮鹽果有起色將來運至武漢等府自必歡聲雷動行川之地本准淮鹽分售互相比較美惡判然民生日用所需豈肯舍貨高價賤之淮鹽而食貨低價貴之川私不禁之禁莫善於是特未可驟而致耳此必應展緩者五也以上五條僅就部臣所議默參時勢平情酌覈實難依

限舉行為政在得民心不宜操之過急利弊所  
關尚不止此未敢瑣瀆

宸聰總之時局方艱餉源尤重伏願

乾綱獨斷弗遽信淮商九十萬之虛數輕棄川鄂一  
百六十餘萬之實餉弗專順一隅之商情致絕  
川鄂兩省億萬商民之生計俾部臣可無另籌  
改撥之勞疆吏亦幸免貽誤顛仆之咎

國計民生兩有裨益愚昧之見是否有當伏乞

皇太后

皇上聖鑒訓示再臣行抵成都與護督臣文格籌議

意見相同業已據詳咨商未准兩湖咨覆是以  
未經會銜合併陳明謹

奏

--	--	--	--	--	--	--	--	--	--	--

恭謝

天恩摺

三年二月十八日

奏為恭謝

天恩仰祈

聖鑒事竊臣前在四川途次准兵部發交提塘官恭

齎到

欽賜

御製詩文集各一部臣當即恭設香案望

闕叩頭謝

恩祇領欽惟

穆宗毅皇帝堯仁天覆

湯德日新秉

懿訓於

兩宮被龍袞而治臻上理震威稜於八表靖狼烽而業

致中興溯當

典學青闈以迄

親臨丹宸金壺灑潤光燦麟毫玉簡披珍香浮麝墨

為章雲漢擷典謨誓誥之精託興風詩繼喜起

明良之製我

皇上寅承大寶

申命儒臣薈萃芸編勒成一集雕鏤棗版昭示千秋

十三年治定功成永懷

宵旰億萬世家絃戶誦共覩

星雲臣蠡測才疎豹窺學淺忝兼圻於鶴渚莫酬

君父深恩叨

寵賚於

螭墀願作子孫資所有微臣感激下忱謹繕摺叩謝

天恩伏乞

皇太后

皇上聖鑒謹

奏





世職日多請照章量予限制摺

三年三月十四日

奏為湖北省庫款異常支絀世俸漫無限制擬請仿照湖南章程量予變通以昭撙節而裕庫儲恭摺仰祈

聖鑒事竊照軍興以來文武員弁紳團人等或臨陣捐軀或守城殉節

朝廷憫念忠蓋無不立沛

恩施予以襲職原係賞延後世以示優卹乃鄂省近年請襲各項世職愈積愈多綜計歲支俸銀不下四萬八千兩有奇此後請襲領俸源源而來

難以數計年復一年伊於胡底現值庫藏空虛  
稅釐減色奉撥京協各餉多而且急放款日見  
其增庫項日形其絀

國家經費有常而世俸則有加無已若不急議變通  
目前既難支持將來尤難為繼臣與司道等再  
四籌商擬請仿照湖南

奏定章程分別減支酌量定額以資周轉嗣後  
除年已及歲後驗明膂力未充及自行稽遲  
並不投標暨未諳弓馬患病成廢四項世職  
俸銀一概暫停支發外所有發標學習並年

未及歲各世職全半俸銀凡係承襲騎都尉以上者按照原額各減五成支發雲騎尉以下者按照原額各減四成支發其丁憂終養例食半俸暨兼襲應食全半俸各人員均照前項減成支給統以光緒三年四月為始一律照辦查現在通省發標學習及兼襲各項世職共計五百六十名應請即以此數作為定額其定額後續有增添作為額外世職按照部咨單開名次註冊遇有缺出不論品級不分營分即以名次在前之員頂補支俸其年末及歲世職多係孤苦

藉俸養贍毋庸定額准其照章一律支食減成  
半俸以示體恤如此量子變通庶世俸稍有限  
制而司庫亦藉資周轉矣據湖北布政使孫衣  
言詳請具

奏前來臣覆覈無異除咨戶兵二部查照外謹會  
同湖北巡撫臣翁同爵湖北提督臣李長樂恭  
摺具

奏伏乞

皇太后

皇上聖鑒勅部議覆施行謹

奏

--	--	--	--	--	--	--	--	--	--

請將漢陽宜昌水師改為陸營摺

同日

奏為查明湖北漢陽宜昌各協營經制水師今昔情形不同擬請改為陸營以專責成而符名實恭摺仰祈

聖鑒事竊照湖北漢陽協營經制水師濱臨外江內河自同治七年新設長江水師後先經兩江督臣曾國藩等奏請裁撤繼經兩江督臣馬新貽等以該處華洋交涉河港紛歧續議奏准酌留改駐又宜昌鎮標經制水師前後二營濱臨川河兼轄水陸塘汛歷經分段駐防各在案伏思



立法貴在因時循名必先責實近年以來長江  
既設水師營汎內河又有楚軍礮船棋布星羅  
上下梭巡布置已極周密較之舊設經制水師  
員弁駐守一處尤為得力是今昔情形迥然不  
同查舊制水師向係水陸兼轄地廣兵單已不  
免顧此失彼而其中專轄陸汎又居大半凡遇  
護送餉鞘遞解人犯等事悉歸陸汎經理雖營  
分名曰水師差遣多在陸路此漢陽宜昌舊制  
各營僅有水師之名而無水師之實也向例遇  
有各該營員弁出缺應以水師人員請補近因

水師本缺無人往往揀補綦難即如上年宜昌水師後營遊擊缺出本班既不得人湖北通省又無水師都司不得已以水師守備越級請升例章雖屬准補而員缺究覺相懸臣與司道等公同商酌與其虛設水師而事無實效不如全改陸營而責有攸歸且查原設戰哨巡船向有應領經費若改為陸營可將此項裁除以節糜費相應請

旨將漢陽宜昌經制水師各協營改為陸路專營遇有缺出即以陸路人員請補以符名實如此酌

量變通庶於水陸汎地各專責成而於新舊營  
制兩無妨碍矣如蒙

俞允其有以後變通未盡事宜再飭司道隨時會議  
詳咨立案臣為劃清營汎起見是否有當謹會  
同湖北巡撫臣翁同爵湖北提督臣李長樂恭  
摺具

奏伏乞

皇太后

皇上聖鑒勅部核覆施行謹

奏

叩謝

天恩摺

三年七月十八日

奏為恭謝

天恩仰祈

聖鑒事竊臣於光緒三年七月十四日准兵部交由

提塘官恭齎到

御賜

欽定勦平粵匪方略勦平捻匪方略各一部臣當即  
恭設香案望

闕叩頭謝

恩祇領伏念潯梧小醜倣擾東南潁毫游氛蔓延西

北設險難憑乎天塹青犢狂奔盜兵敢弄於潢  
池朱鳶屢警

文宗顯皇帝三辰秉化九伐宣威夕埃占烽丕振撥麤  
之勢

宵衣命將已成掃箠之形方期王屋烏流弓橐毋野豈  
料堯年鶴語

鼎鑄軒湖

穆宗毅皇帝丁武作求

前吮克迪

媯簧翊運展龍馭而式秉

兩宮

湯鉞除殘斷鼉足而永維四極兵銷建業旌旗驕日月  
之光煙掃齊州帶礪勒河山之券

十一征大功耆定衽席同登億萬年有道縣長坂埏普

謚我

皇上敬

天法

祖圖易思艱際方略之告成軫前勞而

錫賚猥以禱昧仰荷

隆施捧十襲之

螭函切五中之龍戴微臣廿年從宦曾厠戎行三楚兼

圻愧無報稱念予漸劍炊於昔日益當軫恤民

依繹斧柯毫末之微言尤貴勤求吏治行見西

陞凱奏

縉成秦誓三篇更瞻

北極奎光永燭洛溪萬丈所有感激下忱理合繕摺

叩謝

天恩伏乞

皇太后

皇上聖鑒謹

奏



--	--	--	--	--	--	--	--	--	--

合肥李勤恪公政書卷八目錄

相廣  
楚湖

男經畬經江澧編輯

滇淮  
濤滄

覆核江督奏請收復引地摺 三年十月二十八日

憑陳禁川復淮關繫數省大局片

刁衿在樊口築壩調兵平毀摺 三年十一月十八日

招募墾荒於鄂省情形未合摺 四年四月初十日

川鹽釐稅礙難加增片

匪徒違禁築壩派兵拏辦摺 四年七月十六日

派兵勦匪事關重大滙陳管見摺 四年九月初一日

樊口創建石閘復陳滙辦情形摺 四年十月二十四日

遵旨馳赴湖南帶印起程摺 四年十二月十九日

訪拏訟棍獲訊供詞懸殊摺 四年十二月十八日

樊口創築石閘現在籌議情形摺 四年十二月十八日

查明湖南撫臣辦匪無誤摺 五年正月初五日

覆覈江督奏請收復引地摺

三年十月二十八日

奏為覆覈兩江督臣沈葆楨奏請收復引地包認餉銀章程未能允洽秉公妥議恭摺遞陳仰祈聖鑒事竊准鹽規復引地一案欽奉

諭旨令臣等妥速會商先期奏定等因當經恭錄分咨各督撫臣因此案應由兩淮鹽政立議臣等互相斟酌意見相同方可舉辦故未敢冒昧覆

奏光緒三年十月二十日准兩江督臣沈葆楨咨開收復引地包認餉銀業經議定章程一面具奏一面咨請將各節是否允洽秉公妥議覆

奏並摺稿一件咨送到鄂復經檄飭布政司鹽法道覈議去後會以未能允洽仍應變通展緩詳請具

奏前來臣又博訪周諮虛衷參酌查沈葆楨原奏內稱現欲復淮須事事為川鄂設想臣敢不披瀝愚誠處處為

國計民生設想兼為淮商設想以冀籌策萬全推行無弊查淮鹽以六百斤為一引五百引為一票每引商本銀十一兩四錢三分課釐銀六兩一錢四分共銀十七兩五錢七分每引售價銀

十八兩僅獲利銀四錢三分今因包認餉銀每引攤銀二兩計短銀一兩五錢七分商賈惟利是圖斷無甘心年年虧折之理加以淹消滯跌何處取償事不近情豈能共信淮商深知其弊故延宕將及一年未肯包認直至部文催迫乃始勉強具結仍俟兩年以後川鹽銷盡方為完納之始商情之不順可知况川釐停後川鹽按淮引計算每引驟減銀九兩三錢二分失業之衆覬此厚利何事不可妄為曾國藩有見於此故擬加重川釐徐與相敵曾國藩百計增之沈

徐楨一旦停之是為川商開一利源必至徧地  
皆私淮南並不能保其原有之引地臣慮其困  
運商也運商虧折既多勢必停票不運場商無  
柰惟有減價跌售沈徐楨札飭運司有設卡添  
巡辦公經費統由場商籌備由棧扣繳等語前  
項事宜均須於引地未復川私未禁以前豫為  
布置積存垣廠之鹽甫謀銷路尚未開網乃使  
先措鉅款是欲調劑之而反朘削之臣慮其病  
場商也鄂餉百萬川餉六十萬均係實確數  
川事且不過問即以鄂論凡川鹽到岸必令完

清釐稅始准行銷淮商包認之銀亦應於入境時一律豫徵以昭公允而示大信否則以現錢易賒帳智者不為沈葆楨前奏九十萬之課釐與此次所定七十萬之攤派虛數徒懸實銀何在且並決其必致短絀者以沈葆楨札飭運司有統於售鹽後由局扣解一語該商等迫於威令其敢於包認者亦恃有此層將來售出若干扣繳若干售不足數即解不足數該商等亦不任其咎是有結與無結同豈能共信在沈葆楨必謂淮釐售後完納係曾國藩所定章程不知



此乃江路甫通金陵未復創辦伊始暫予通融  
文內聲明只有初行時略為展緩權宜之制未  
可永遠遵循沈葆楨原奏內稱鄂省川釐加稅  
內有分解淮局之款統在此百萬中分別抵扣  
等語查鄂省川課十八文向於加稅五文項下  
分半充餉分半歸淮最旺之年歲收百二十萬  
見於戶部原奏近日收數漸減而光緒二年分  
尚收至一百八十八萬五千串有奇除解淮局  
錢二十六萬一千九百串外實在充餉錢一百  
六十二萬三千一百串零臣前疏所稱一百萬

兩已將解淮之款提出不計豈可再於此中分別  
折扣目前京協各餉刻不容緩如沈葆楨所稱  
立限一年截止川鹽出運再限六箇月運竣  
六箇月銷竣等語川鹽截止出運以後來源已  
絕課稅無出此一年中鄂省支發各款已屬懸  
而無薄沈葆楨又稱包完以後統於年終截數  
總算缺則令商補納屆時短絀過鉅憑何取挹  
鹽未售竣憑何完繳縱令勉強抑勒其事已在  
來年且來年又有包認之銀舊欠新逋層累日  
積終歸無著臣慮其誤

國計也川省井商本有召募賴其濟餉底定東南  
昔也設法招徠今忽痛加堵勦於理未順勢本  
難行曾國藩前建復淮之議奏內亦云川引侵  
淮雖紊紀綱實有萬難遽變之勢誠篤論也荆  
襄各屬軍民食川已久今忽改令食淮以民間  
日用之需強所不習必致驚疑如果加以抑派  
勢且比戶騷然臣慮其感民生也沈葆楨奏稱  
兩年以後限滿尾數由川商覈算成本歸淮商  
收買搭銷似是兩全之計然川竈鹽如山積萬  
一蜂擁而來淮商已認百六十萬之餉銀又須

另籌數十萬金以資收買未必有此巨本勢必  
抑勒減扣釀成事端且從此橈雜不清販川則  
多獲九兩有零之重利運淮則坐虧血本一兩  
五錢七分相去何啻天淵奸商改販川私藉口  
搭銷更難究詰况川省托業井竈者不下數十  
萬人沿江橈夫船戶又不下數十萬人不逞者  
居其大半間雜苗犴賦性凶頑別無恆產上年  
一聞禁川之信蠢然欲動臣途次目擊心憂不  
及徐俟接篆遽有陳奏實由於此若輩知之始  
就馴貼李鴻章吳棠翁同爵文格丁寶楨厯次

奏陳以為大慮今擬堵絕川私添造礮船召募  
早隊如臨大敵萬一鋌而走險計惟悉數殲除  
是以百萬生靈慘沒鋒鏑絕民生計勢必致於  
橫決其為患恐不止川鄂兩省目下西陲奉靖  
海防喫緊甚至借及洋款何堪再辦軍需臣慮  
其激事變也伏思川淮分界章程本係臣與曾  
國藩會商奏定原議准川行銷五府二州之地  
歸還淮網須俟黔滇邊引一律暢銷以後而仍  
以體察情形不戾時宜為主現在川省官運黔  
鹽甫經試辦成效未睹丁寶楨奏濟楚銷路未

可遽停請俟積引銷竣再行辦理丁寶楨籍隸黔中深知兵燹後戶口蕩然猝無把握故欲需以數年誠恐黔銷未暢濟楚先停川省億萬衆無所歸宿別滋事端如導水然支河分洩巨漲自消強遏其流必致橫潰臣愚以為當以滇黔課收如額之日為禁川立限之始不當以沈葆楨此奏奉

旨之日即為立限之始也臣與曾國藩昔年奏定分淮之界不准川鹽侵入分寸分川之界仍令淮商酌設子店撥售零引原欲民間習慣自然逐

漸進步彼此斟酌具有苦心乃後任兩江各督  
臣徒慕收復之虛名不求立法之本意自曾國  
藩故後襄鄖等處遂無人運鹽前往良規中廢  
人咸惜之前本因川淮鹽色優劣判然致難暢  
銷今沈葆楨奏稱現飭分司場員講求煎鍊可  
與川鹽相敵兩淮既有此潔白如霜之品何不  
早濟楚民必遲至禁川以後應請

飭下沈葆楨將各場提淨之鹽酌配引數運赴襄鄖  
等五府一州與川鹽一併行銷作為試辦由臣  
隨時稽察不准在武漢黃德一帶私行灑賣致

侵正引該商等暫免攤派成本尚輕自必踴躍  
爭先可冀漸推漸廣川鹽價高難與相敵將不  
禁而自絕實釜底抽薪之妙策與曾國藩昔年  
定界初心適相符合如數年以後分川界內布  
滿淮鹽黔滇川銷亦臻暢旺屆期或議禁川或  
尚須展緩再行察酌情形會商奏辦至楚督身  
任地方督銷緝私是其專責引地規復以後一  
切事宜均應仍復舊制猶之淮廠課程職在兩  
江非兩湖督撫臣所敢越俎異日邊銷果暢川  
粟果停舊設各局卡應即改歸兩湖督臣派委



節制以一事權而專責成愚昧之見是否有當  
謹悉心秉公妥議恭摺由驛滙陳伏乞

皇太后

皇上聖鑒訓示再湖北巡撫係臣兼署毋庸會銜合

併陳明謹

奏

滙陳禁川復淮關繫數省大局片

再川鹽行銷鄂湘二十餘年積重難返臣前與曾國藩商定分界章程行之甫及數年尚無流弊即欲更改亦須籌策萬全乃沈葆楨並未遵旨與臣等先期會商遽行陳奏其摺內一則曰短解絲毫願當其咎再則曰願受湖北督撫臣叅劾不敢置辭不計事之濟否但作此負氣之詞於國計民生毫無裨益臣正摺所議各節非故與沈葆楨為難實有見於禁川復淮關繫數省大局措置一乖必至不可收拾與其貽誤於事後無

可挽回何如審慎於事前冀臻妥善是以披竭  
愚忠未敢緘默謹附片陳明伏乞

聖鑒謹

奏

刁衿在樊口築壩調兵平毀摺

三年十一月十一日

奏為武昌等縣刁衿違禁逞強糾眾斂費在於樊口攔河築壩有礙水利調派兵勇前往平毀拏辦恭摺由驛具

奏仰祈

聖鑒事竊照湖北武昌縣樊口地方外濱大江內通梁子等湖袤延八百餘里與江夏大冶等縣接壤同治初年及十三年間據該處紳民以樊口港內民屯田地每遇汎漲江水從口灌入即被淹沒呈請在於港口建築壩閘經前督撫臣暨

臣先後委員勘明該處築壩建閘窒礙多端稟由武昌府議覆樊口長港內通諸湖自港口至黃柏山止計長數十里兩岸原有老堤賴以捍衛後因坍塌致盛漲時江水倒灌低處誠不免被淹然梁子等湖衆流俱匯此港而達於江如建石閘雖足以抵禦倒漾之江水而內湖水漲無路可出泛濫橫溢恐向不被淹之處亦將被潦為害更大况該處水路內通數邑集鎮糧食貨物皆係船運建築閘壩舟楫不通商旅裹足尤於民食及釐課有礙節次明晰批駁上年前

撫臣翁同爵接准武昌等邑紳士由京寄來公  
函仍申樊口建閘之請又經飭委候補知縣陳  
豪前往會縣履勘審度地勢利害該處梁  
子等湖數百里之水向由樊口出江別無宣洩  
之路一經建閘下板堵禦如遇大雨時行各湖  
水無分洩其間沿邊田地必先受淹而夏汛盛  
漲之際內外均不免沖決為患委實利少害多  
批飭不准舉行在案詎有武昌縣廩生郭瑞麟  
候選訓導胡書田大冶縣武舉皮周福黃岡縣  
生員劉玉田於本年春夏間竟敢違禁逞強糾

眾斂費在於樊口地方築壩將河堵塞並私立  
埠頭抽收船釐把持勒索擾累商民即經臣訪  
聞札飭各該縣剴切示諭開導勒令平毀乃郭  
瑞麟等恃眾抗違如故茲據大冶武昌江夏等  
縣紳士商民楊鳴遠楊辛葵袁兆麟等紛紛呈  
由各該縣稟經武昌府知府方大澍查明地方  
受害及郭瑞麟等藐抗情形開摺繪圖轉請調  
派礮船營勇會縣將壩剴毀嚴拏各首犯究辦  
等情前來臣查楚北素稱澤國江漢雨水自江  
夏合流東下汎漲之時勢極洶湧全賴沿江各

湖以資分洩樊口為入梁子等湖之咽喉若將該口堵築則水無消路就武昌一邑而言已屬害倍於利若以全省地勢揆之則不獨下游黃梅等縣堤工可慮即上游各州縣江堤亦必有潰冒衝突之患乃郭瑞麟等膽大妄為輒敢糾眾強行築壩抗諭不毀並私設釐卡勒索商民實屬藐法已極事關通省水利未便稍事姑容隨檄調管帶漢陽操防營洋鎗隊提督宋德鴻武昌城守營參將樊國泰酌帶兵勇礮船並委武昌府知府方大澍會同馳往督縣率令兵勇



於十一月初八九等日將樊口私壩全行剷毀  
商民莫不稱便查拏郭瑞麟等先已逃避營勇  
概行撤回酌留礮船數號暫駐該處會同地方  
官嚴拏在逃各犯解省審辦嗣後樊口地方永  
遠不准建築閘壩責成各該縣隨時稽察每年  
冬季將並無違禁私築緣由出結通齎查考以  
利水道而昭慎重除將郭瑞麟等衣頂分別咨  
部斥革一面仍飭勒拏務獲解報歸案訊究懲  
辦外所有辦理情形理合恭摺由驛具

奏伏乞

皇太后

皇上聖鑒訓示再湖北巡撫係臣兼署毋庸會銜合

併陳明謹

奏



招募墾荒於鄂省情形未合摺

四年四月初十日

奏為招募墾荒於鄂省情形未合恭摺覆陳仰祈  
聖鑒事竊臣於光緒四年三月二十日准軍機大臣  
字寄三月初二日奉

上諭翰林院編修吳觀禮奏請飭招募晉豫流民等  
語據稱晉豫兩省匪徒蠢動流民被脅勢將他出  
請飭秦楚皖駐兵境上且招且遣自係為安插流  
亡起見著李瀚章邵亨豫體察情形迅速籌辦務  
臻妥協等因欽此並抄原摺一件到臣當即詳加  
披繹查湖北西北各郡毗連陝豫上年該兩省

荒旱成災饑民流入境內絡繹不絕臣等先期  
籌畫除武漢兩府設立粥廠外一面派委妥員  
在襄陽府屬之樊城老河口分設粥廠及平飯  
所多處酌撥倉穀多者至五千石少者一二千  
石不等並於鄖陽府屬之竹山縣漢陽府屬之  
黃陂縣或籌給鉅款以賑施或借發倉穀以平  
糶並倡捐廉銀為各廠柴炭資遣之需凡饑民  
到境皆令造冊給牌按名支放自上年十一月  
起至本年三月初均各安靜就食嗣聞本籍得  
雨念切歸耕復每名給與一月口糧錢米分起

資遣其疾病產痘不能起程者仍留贍養施散  
藥餌俾資存活此鄂省辦理情形也吳觀禮所  
請勒兵境上自因防患而設查湖北提臣李長  
樂現駐襄樊復有武毅馬步水陸全軍及健捷  
營礮船升字營陸勇分布襄鄖德黃邊境均屬  
晉豫交界扼要之地隨時梭巡足資彈壓毋庸  
另行添撥防兵至饑民之與匪類判然不同匪  
類凶狡性成借荒煽惑聚眾滋事非嚴加勦辦  
不可臣前因河南鄧州刀痞蠢動當即派兵越  
境會勦首逆就擒脅從解散業經

奏明在案饑民志在求食並不多事鄂省近來賑  
遣何止數萬逐細查察從無攜帶器械及身藏  
利刃之人吳觀禮所陳於匪類饑民混而為一  
未免漫無區別若如所擬張貼告示該饑民等  
將謂溝壑殘生絲毫不敢妄為官忽疑我為賊  
勢必怨讟悲傷非所以收人心而廣

聖澤至皖省池太等處荒田十餘年來遷徙之民逐  
漸開墾刻下有無曠土可容數十萬人未能深  
悉且由陝豫赴皖沿淮而下較為近便不須由  
鄂境襄陽德安經過若如吳觀禮所奏派員招

募護送至皖轉拂饑民之情無此政體所有未  
能辦理緣由謹會同湖北撫臣潘蔚恭摺由驛  
覆陳伏乞

皇太后

皇上聖鑒謹

奏



A table with 10 empty columns. A small mark is present in the fifth column.

--	--	--	--	--	--	--	--	--	--

川鹽釐稅礙難加增一片

再准戶部咨核議幫辦河南賑務刑部侍郎臣袁保恆奏請加川鹽釐稅抵還豫賑借款一摺應由川楚各督撫臣查明覆奏再行定議等因光緒四年二月二十日奉

旨依議欽此抄摺飭速議覆遵即檄行湖北鹽法道蒯德標總辦宜昌川鹽局湖北候補道吳元漢悉心查核去後茲據詳稱近年川鹽入楚每百斤抽課錢一百八十文川收引稅銀六錢零合錢一千文加以運本水腳約錢三千有零現在

時價每百斤僅售錢五千數百文本無餘利若  
再加徵錢文必至無力販運課稅虛懸餉源立  
涸礙難舉辦據實詳請覆

奏前來臣查鄂省京協各款及荊州旗營俸餉專  
恃川釐為大宗自淮南議復引地商販各懷觀  
望近日收數甚形短絀臣前與曾國藩奏定川  
稅每斤加至十八文意在使價與淮鹽相敵本  
係格外加重無可再增今若勉強抑勒既已困  
商亦實病民間閭日用之需每斤驟貴至十文  
八文實駭觀聽且以豫省賑務借款取償於川

鄂商民似未得情理之平勢必眾怨沸騰奸徒  
乘機煽惑尤恐滋生事端部臣以賑款固當速  
籌餉項亦須兼顧未據准行飭令詳查覆議誠  
有見於目前時局首在保固饌源不欲使  
皇上虛受此加派之名拂民情而傷

國計也至行湘川鹽除宜昌收稅外復抽鄰釐七  
文已覺重累故每年收數甚少今擬加徵准署  
湖南撫臣崇福函開事多窒礙應請均毋庸議  
謹會同署湖南撫臣崇福附片覆  
奏伏乞

聖鑒謹

奏

匪徒違禁築壩派兵拏辦摺 四年七月十六日  
奏為武昌縣匪徒違禁脅衆復欲強築樊口橫壩  
不服彈壓調派水陸營勇前往查拏解散獲犯  
懲辦恭摺具陳仰祈

聖鑒事竊照湖北武昌縣樊口地方內通梁子等湖  
為分洩江水要道上年因有廩生郭瑞麟等歛  
費攔河築壩有礙通省水利經臣瀚章委員帶  
兵前往剷毀飭拏郭瑞麟等先已逃避當將該  
廩生等衣頂咨革恭摺具  
奏聲明該處永遠不准建閘築壩欽奉

諭旨轉飭出示曉諭遵照旋據武昌黃岡大冶等縣  
會稟郭瑞麟等赴縣投首請責成督修樊口港  
內舊有兩岸直堤暫緩解省審辦亦經批准在  
案詎有武昌縣已革武生胡炳盧與汪幗沅王  
炳太等家無田產素行無賴以堵塞樊口舟楫  
不通往來商民貨物須搬運過堤可以把持漁  
利本年四月間膽敢創議聚眾復築橫壩經該  
縣訪聞委令縣丞楊孟祥前往開導該匪等不  
服彈壓肆行咆哮即於五月初三日糾集黨羽  
逼脅鄉愚強拆居民屋基剝岸石塊用船裝運

在於樊口地方強築河壩兇橫不法據武昌黃岡等縣稟請撥兵拏辦臣等當即札委候補知府黃式度並調管帶漢陽營洋鎗隊提督宋德鴻暨駐紮武昌附近之忠義左營弁勇巴河等營水師礮船馳赴樊口會同地方官妥為彈壓解散相機拏辦並將新築私壩創毀胡炳盧與汪惘沅等仍敢逃聚西坂鄉間逼令各堡鄉民出人意圖抗拒凡不從者即將其房屋或拆或燒甚至將派往探路之縣差捉去吊拷並戕害勇丁一人種種兇惡情形實同叛逆亟應從嚴



捕剿以遏亂萌而肅法紀又經臣等檄飭統領  
忠義軍提督劉維楨添調營勇親往會商黃式  
度等督同水陸各營分布圍捕迨劉維楨等進  
捕時被脅鄉民業已解散胡炳盧汪愜沅等自  
知眾寡不敵乘間逃逸拏獲姜興璧等九名一  
面出示安撫設局清查戶口編立保甲取具紳  
耆永不再築樊口橫壩甘結地方靖謐續獲首  
犯汪愜沅到案由黃式度會同黃州府知府英  
啟督縣審據供認前情不諱提訊姜興璧等僅  
供聽從築壩餘情無實證供尚游移據各該文

武先後稟報前來臣等伏查樊口為洩消江湖諸水要道有關通省水利數十年來未經堵塞前因愚民妄為復經

奏明永禁建築壩閘如該處民人果將兩岸舊有直隄修復亦可藉禦水患乃該犯胡炳盧與汪惲沅等皆家無田產之人膽敢違禁脅眾復築美其名則稱為保衛田廬究其實則意在盤撥漁利不計水道之通塞不顧沿湖數縣居民之害始而不服地方官彈壓迨派兵前往膽敢網差燒屋戕害探勇實屬形同化外惟首要各犯

不過數人汪惘沅當經獲案胡炳盧等因脅從解散勢孤畏懼乘間遠颺橫壩早經剗毀地方安分良民應令各歸農業即經檄飭劉維楨等暫留忠義軍正左一營屯紮武昌並礮船二隻駐泊樊口會拏逸犯餘俱撤退回防所獲各犯惟汪惘沅一名情節較重罪無可逭業已批飭就地正法以昭炯戒其姜興璧等九犯暫行監禁俟緝獲胡炳盧等質訊明確再行究辦除仍嚴飭該府縣會同水陸各營懸賞購緝勒拏胡炳盧王炳太等務獲稟報盡法懲辦外所有辦

理情形謹合詞恭摺具

奏伏乞

皇太后

皇上聖鑒訓示謹

奏

--	--	--	--	--	--	--	--	--	--	--

派兵勦匪事關重大滙陳管見摺四年九月初一日

奏為派兵勦匪事關重大謹就管見所及恭摺滙

陳仰祈

聖鑒事竊臣恭閱邸抄光緒四年八月初一日奉

上諭御史李廷簫奏近來各省州縣往往因誅求百姓不遂所欲輒誣指為抗拒率請派營彈壓武弁志在邀功妄加勦洗又有帶兵武員遇有迹涉可疑及仇隙之人指為叛逆擅用刑誅流弊滋多請飭嚴禁等語各省留駐營勇原以備豫不虞藉資征調若如所奏各節轉致貽害鄉民殊堪痛恨嗣

後各省督撫不得輕派營勇致滋擾累並嚴禁武員專擅殺戮如所屬員弁有賊虐無辜者即照專擅誣殺律懲治儻不認真查察或縱容徇隱定將該督撫分別懲處以肅營制而靖地方欽此跪誦之下仰見

皇上整飭戎行子惠黎元之至意欽佩莫名伏思設兵所以衛民而綏良必先除暴各省地方每值土匪蠢動立即派營往捕先聲所播足以解散脅從首犯勢孤易於擒獲免致滋蔓難圖此誠消患未形之至計也鄂湘兩省地當天下之衝

軍興以後游勇及哥老會匪屢經懲創未絕根  
株平日潛蹤鄉里無異平人一經莠民藉端煽  
聚旬日之間輒盈千萬本年平江桃源及河南  
鄧州等處匪徒滋事臣與南北撫臣一聞稟報  
當即派營往剿得以散脅擒渠迅速歲事僅誅  
首要數名餘皆斂戢均經

奏報在案目前時勢艱難人心不靖各督撫臣職  
膺疆寄凡地方官稟請派營彈壓皆審慎再三  
詳加探訪果有聚眾實跡抗拒確情或匪徒勾  
結日多或城池勢在危急萬不得已始准調兵



斷無輕舉妄動有心害民之事近日地方官吏庸懦畏事者多遇有土匪潛蹤往往多方掩覆深恐兵勇到境支應薪芻致滋賠累更有一種莠民假托公事聚眾斂錢地方官不能禁止甚至聲稱攻城劫署兵到始各解散事定之後則又播散謠言指地方官為禍首故皆動色相戒莫肯舉發必至逆跡昭然無可隱飾或經上司訪聞或被紳民控告始敢請兵亦從無誣指良民率請彈壓之事武員奉調出省匪徒果即解散隊伍星夜撤回自可無虞擾累如仍負嵎抗

拒此等亂民例得格殺勿論然臣猶慮其志在邀功迭經嚴飭各營凡有拏獲匪徒概令解交地方官訊明稟辦不准在營殺戮水陸各將弁均尚懍遵約束雖有疑似不至濫誅縱有仇隙何能報復故亦無擅用刑誅妄加勦洗之事此湘鄂兩省歷年辦理實在情形也臣愚以為地方官懷私捏稟各營弁專擅殺戮律有明條敢有犯者不難叅革治罪該御史李廷簫或因聞邊省有似此之案遂疑各省皆然為慎重民命起見致有此奏顧法貴求於無弊而患當慮其

未然儻各省懍遵

嚴諭稍有誤會轉致因噎廢食互相諱匿規避處分  
事發而州縣不敢請兵稟到而督撫不敢派隊  
徘徊觀望貽患養癰徒隳將士之心而長奸徒  
之志從前粵逆之亂即因初起時辦理因循馴  
致不可收拾所當懸為永戒也相應請

旨敕下各督撫臣將該御史所指各節通飭文武各  
員嚴申誥誡如有土匪竊發及莠民聚眾滋事  
仍責成地方官星速稟報督撫一經查確立即  
派隊往勦不得稍涉拘泥務保善良免滋後患

愚昧之見是否有當謹繕摺遞陳伏乞

皇太后

皇上聖鑒訓示謹

奏



樊口創建石閘覆陳應辦情形摺十四年十月二日

奏為樊口創建石閘關係民間利病遵

旨查明具奏一面飭議舉行並將應辦情形恭摺

陳仰祈

聖鑒事竊臣等於光緒四年七月間具奏武昌縣匪

徒違禁脅眾強築橫壩派營查拏解散獲犯懲

辦一案九月初一日差弁賈回原摺內開軍機

大臣奉

旨樊口築壩一事關係民間利病業經派員查辦著

該督撫聽候諭旨遵行欽此茲又恭閱邸抄十月

初一日奉

上諭前據御史李廷簫奏湖北樊口堤閘關繫農田  
民命委員勘報不實請飭覆查當派彭玉麟等前  
往確查茲據彭玉麟奏樊口堤閘於濱湖農田民  
命所關甚重必須將濱江黃柏山起至樊口四十  
里之大堤趕緊修補再於黃柏山以上添修里許  
樊口以內宜修一石閘其橫直寬廣可以度地布  
置並應設立埠頭搬運貨物均由民間自行經理  
官則嚴立條規重懲需索等語該處堤閘既據該  
前侍郎查明有裨國課民生而於漁戶商販尚無

大害自應權衡輕重酌度興修即著照所請由李  
瀚章等督飭屬員趕緊辦理毋任該地方官拘泥  
成規稍形鬆懈此次所築堤閘實因地勢變遷必  
須興辦既可於民田有益而江流宣洩亦無妨礙  
他處情形不同不得援以為例其修堤建閘及被  
水災區應如何減免錢糧之處並著查明具奏等  
因欽此跪誦之下欽悚莫名伏查武昌縣樊口  
地方內通梁子等湖周圍八百餘里匯於一口  
出江載在

大清會典一統志



欽定明史地理志諸書數千年來從無議建閘壩之事  
同治元年武昌縣知縣龍雲始據紳士稟請築  
壩前撫臣嚴樹森以此壩一築水無分洩大江  
兩岸必別有衝決之患嚴飭不准三年紳士等  
復申前請前督臣官文以水漲之時內外沖激  
閘壩斷難支柱必有損於堤工顯為斂費肥己  
起見立案不行六年前撫臣曾國荃以前此師  
次黃州採訪輿論如在樊口築壩僅附近西楊  
二畝田廬受益而內湖積水別無消路各邑被  
淹必廣樊口與鄰境同係

朝廷赤子豈能損彼益此飭縣嚴禁前升任布政使臣何璟以樊口修建閘壩如果有利無害數百年來何竟無人議及該紳民欲派費於附近六縣從中漁利勒指商船索取閘費膽敢豎旗歛費擅自興工要挾實屬目無法紀其平日刁悍強梁概可想見飭將已修工段平毀出示永禁此歷任辦理情形也光緒二年前撫臣翁同爵接准京官公函議建閘壩委員覆勘以此處興建利少害多重申禁令廩生郭瑞麟等抗違不遵糾眾強築將河堵塞並私立埠頭抽收船

釐把持勒索臣瀚章回任後疊據受害紳民控告並該管府縣查明商民被擾及郭瑞麟等藐抗情形稟請派營查辦事關通省水利未便稍事姑容故檄調兵勇將該處私壩創毀

奏明嗣後樊口地方永遠不准建築閘壩欽奉

諭旨轉行遵照今歲春間突有革生胡炳盧汪惘沅等家無田產但冀盤剝獲利糾衆復築鄉民有不願者立將房屋燒毀始而不服地方官彈壓甚至捆捉縣差戕害勇丁形同叛逆不得已派營前往查拏始各解散此臣等先後辦理情形

也竊惟湖北之水江漢為大江水自巴東縣入境漢水自鄖西縣入境分流千餘里至漢口而合流其勢浩大外則支河港口內則巨澤重湖節節碁布星羅足為分殺停瀦之地使之紆徐委折逐漸東趨故前史所載水患希見自後世與水爭地設堤防以禦之水道日窄然沿江沿湖亦祇有順水直堤從無堵水橫壩歷考名臣奏議留心湖北水利如阿桂汪志伊等僉以疏濬支河為要凡宣洩積水之路被居民阻塞者乾隆五十三四等年迭奉

諭旨照例嚴治其罪並飭勒碑永禁伏讀道光十一年  
上諭本年湖廣等省水漫成災如果平日講求水利江  
湖通暢何致釀成水患著於濱臨江湖地方詳加履  
勘如有壅遏水道之處必當設法查禁使漲水得資  
宣洩則害除而利可興等因欽此此外欽奉

諭旨甚多不能備錄煌煌

祖訓深切著明誠

帝王經世之宏謨萬古不易之準則也樊口地方外江  
內湖為古來洩水要道山川如故並無變遷壅  
塞其流為害滋大惟口內西楊畝一帶周圍三

十餘里建閘以後田禾受益較多該處居民紛  
紛訴請百端聳聽臣瀚章亦幾為其所搖迨屢  
次親歷其地察其形勢復博訪周諮通籌全局  
始知建築閘壩其害有五謹為

皇太后

皇上縷晰陳之樊口內苞湖澤九十有九其源甚遠  
其浸甚廣每逢春夏各縣山水畢匯於湖僅恃  
此一綫之口以出江江水盛漲之年亦倒漾而  
入內外相連汪洋一片即至冬令水涸口門尚  
寬廿餘丈壩固為害閘亦無益議者乃謂築壩

則湖水無出勢不可行築閘以時啟閉可資消  
洩不知樊口係兩面受敵之地既須洩出湖水  
又慮灌入江水豈能兩全況下牐必在桃汛以  
前放牐應俟霜降以後此數月中如大雨時行  
諸湖有漲無消漫溢何可限量無論向來各洲  
地春收豆麥悉付波臣即濱湖數百頃稻田亦  
必盡遭淹浸受害之家歸咎於閘勢必此築彼  
毀械鬪相尋巨案疊出是不建閘僅止水大年  
分江水倒灌入湖盛夏不無可慮建閘即水小  
年分湖水亦無消路妨農病稼歲以為常甚至

激成事端其害一也江水經由之道譬之人身湖河港汊猶四肢之脈絡所以宣行血氣也今堵塞湖口是截去肢體僅留胸膈也胸膈不快頭足皆病口不能洩則尾閭洩之沿江各堤雖不能指定南岸北岸要之川壅必潰理有固然嘉慶年間監利之水港口沔陽之茅江口皆因橫堵一堤上游石首江陵大受其害近日修吳家改口遂溢於天門之岳口是其明證樊口為江漢合流以後南岸洩水首區一經築塞則上下堤防皆有岌岌可危之勢其害二也樊口內



湖之民農漁參半漁有應完之魚課蘆課農有額設之地丁漕糧向係一律啟徵溯查同治元年至今十六年中僅止三年蠲緩厯有成案可稽足見水小之年湖水消洩入江江水不致灌入仍可普獲豐收建閘後江魚不能入湖漁利全無即農田因積水難消亦耕作俱廢不特正供無著而此無數失業窮民何以為生又沿湖市鎮林立該口帆檣上下百貨流通釐收最旺口門一堵舟楫皆停課於何出惟西楊畝附近居民縱禾稼被淹仍可踞埠頭以恣勒索坐獲

其利徒感民生無裨

國計其害三也鄂中為天下咽喉樊口乃省城後路自來論形勢者江夏與武昌並重咸豐年間鄂省三陷三復軍械饟糈多轉運於梁湖建閘後湖內淤泥隨流下注壅積口門數年後愈聚愈高閘將淪為平地萬一有事徵兵轉餉必須沂江而上屯儲無所運調不靈失地露軍兵家切忌我

朝運際隆平固無慮此而閘內湖水盛積一旦沛然橫決下流郡縣之民蕩析離居皆意中事其

害四也大江兩岸如新灘口沌口金口沙口陸谿口富池口等處皆係江湖貫通與樊口情形無異居民屢請堵築疊經據理駁斥如樊口建閘雖有他處不得援以為例之

諭旨而小民何知必謂利害相同形勢相似何以辦理兩歧難免怨咨交作且見樊口之民情強橫築官遂准行萬一相率效尤糾衆逞兇肆無忌憚必盡堵諸口而後已江水建瓴而下孤行數千里兩旁無可停滯無可宣洩驚波剽悍一瀉無餘下游數省之田廬何堪設想其害五也以

上數端灼然易曉在創議築閘者耳聞目見不  
過樊口附近之一隅臣等所慮者實繫乎通省  
之水利東南之大勢是以奸民聚訟將及二十  
年厯任督撫臣嚴禁於先臣等復力持於後無  
非欽遵

列聖諭旨循守厯辦章程又慮西楊畝一帶地方時受  
水災曾於上年

奏明准於口內兩岸添築直堤以資保衛區區經  
畫之苦心初不敢求諒於眾人亦不敢自明於  
君父惟受

恩深重忝領重圻儻欲見好愚民為敷衍目前之計  
或因廷臣論奏遂於將來故變不為先事陳明  
則獲戾滋大前侍郎臣彭玉麟奉

旨來鄂查辦未經調核案卷如何覆奏其摺片各稿  
未據咨送茲蒙

諭旨勅臣等督飭屬員趕緊辦理何敢固執成見稍  
涉遲疑謹已遵

旨轉飭司道秉公妥議應如何嚴立條規重懲需索  
遴選公正紳士責令自行集費興修及聽民設  
立埠頭一節有無窒礙並飭詳查議覆再行具

奏除黃柏山堤工本係民捐民辦自當飭令趕緊  
修補被水各處如何分別輕重減免錢糧應歸  
另案辦理外所有樊口石閘關繫民間利病及  
應辦情形謹合詞恭摺由驛具陳伏乞

皇太后

皇上聖鑒訓示謹

奏

--	--	--	--	--	--	--	--	--	--

遵 旨馳赴湖南帶印起程摺

四年十二月十九日

奏為恭報遵

旨馳赴湖南帶印起程日期仰祈

聖鑒事竊臣承准軍機大臣字寄光緒四年十二月初四日奉

上諭有人奏湖南各屬莠民滋事未能認真整頓請嚴飭懲辦一摺據稱湖南常德府等處本年七八月間疊有匪徒滋事現仍未靖撫臣邵亨豫性耽安逸凡遇警報視為故常保甲團防有名無實請飭認真整頓等語著李瀚章馳赴湖南秉公確查



據實具奏等因欽此並抄錄原奏一件到臣跪誦  
之下仰見

皇上慎重疆圉之至意欽佩莫名伏查湘省伏莽未  
靖時虞竊發本年七月間有匪犯馬元即李復  
勝綽號馬三將軍本係桃源縣會匪漏網餘黨  
輒邀約多人潛至常德府謀於十五日夜間爬  
城搶劫該府縣暨千總魏成章等訪聞立即帶  
同兵役拏獲二十七名訊供稟報批飭將起意  
首犯馬元馮英勝及同謀搶劫匪犯江玉堂羅  
世浩羅宗祥羅澤祥王澤清羅維順何道安蕭

開元湛東生文愾燕等十二名一併就地正法  
餘係誤聽邀約不知謀情當即分別辨結八月  
間永綏廳匪徒在於衛城聚衆局賭地方官訪  
聞拏獲羅四旺尤廣太等帶署訊供詎匪首廖  
宣明率帶黨與聲稱奪犯擁至東門經文武員  
弁督領兵勇掩捕陣斬多名擒獲首匪提同羅  
四旺尤廣太二犯駢誅梟示餘匪悉已解散又  
益陽縣南溪地方於八月十五日夜間突有匪  
徒入市焚掠都司劉昌秀奮勇勦捕陣亡適管  
帶振字營提督王永章所派副將蔣其順帶勇

趕到擊斃首賊雪大塊陳萬勝等匪眾潰散各  
勇分途追勦擊斃無算續經搜獲曹小滿歐陽  
春劉喜麻子等正法迭據各文武稟報地方早  
經安靖細核原奏所陳各節雖傳聞不免異詞  
均係實有其事亦均隨時辦理完竣湖南係臣  
兼轄省分每遇警報撫臣既立派營勇往捕臣  
又迭次函牘商辦均幸隨即清結當永綏益陽  
前案辦竣後臣與撫臣往來函商恐餘匪未靖  
須及時清查以除後患經撫臣揀委候補知府  
莊賡良永順府知府周幹分赴常德永順及辰

沅乾永鳳各府廳會督地方文武逐細搜查舉  
行清團清族之法如有潛匿匪徒責令緝送據  
報查獲之犯亦皆懲辦臣又與撫臣會飭營鎮  
府縣以緝犯責成武弁訊供責成文員期無枉  
濫目下湖南通省地方均尚一律靜謐堪以仰慰  
聖鑒至該省被匪處所民間或有訛言且各路遣撤  
營勇其不肖者難保無不法情事應即遵

旨馳往將團防保甲事宜嚴立章程認真整頓現屆  
歲暮本署公事業已趨緊清理定於十二月二  
十二日自鄂帶印起程所有籌議情形及撫臣

邵亨豫近日居官如何容俟抵湘後逐細密查  
再當據實覆

奏謹將起程日期先行繕摺由驛具陳伏乞

皇太后

皇上聖鑒再臣此次赴湘督署日行事件檄委湖北  
藩司代拆代行遇有緊要之事仍隨時包封遞  
送臣行次核辦合併聲明謹

奏

訪拏訟棍獲訊供詞懸殊摺

四年十二月十八日

奏為奉飭訪拏訟棍獲訊供詞懸殊查無被控案

據應否就案議結請

旨定奪恭摺仰祈

聖鑒事竊照前兵部右侍郎彭玉麟覆奏湖北樊口

宜修石閘案内欽奉

諭旨訟棍袁甲甫即增生袁兆麟楊光朋著該督撫

嚴拏務獲從重懲辦等因欽此並先准彭玉麟咨

開以奉

旨來湖北查辦案件親訪有武昌府大冶縣土豪首

惡訟棍袁甲甫即增生袁兆麟綽號害人精慣  
行武斷鄉曲訛索愚懦生端報復常時盤踞府  
縣城內買通刁書蠹役舞文弄弊朋比為奸包  
攬詞訟變亂黑白為害良民冤苦萬狀又勾同  
地棍楊光朋借端斂費以濟袁甲甫之惡被害  
冤苦之家皆欲食袁之肉而寢其皮似此土豪  
棍徒若不急速嚴拏盡法處置分別究辦不獨  
害百姓不能聊生而該犯通同府縣書役朦蔽  
致害地方官多受巨案之累實堪痛恨咨請飭  
縣設法密拏務獲分別究辦等因當經臣等飭

據江夏大冶等縣稟獲增生袁兆麟監生楊光朋到案行司飭委漢陽府提審並札飭該府縣查明袁兆麟等平日有無武斷包訟被人告發案據稟覆確訊究辦一面附片

奏明旋據武昌府知府方大澍江夏縣知縣宗景藩武昌縣知縣凌心垣大冶縣知縣林佐先後查明稟覆批司飭府歸案核審去後茲據署湖北按察使惲彥琦詳稱據漢陽府知府嚴昉將此案審明錄供議擬解司該署司親提研訊緣袁甲甫即增生袁兆麟楊光朋即監生楊鳴遠



均籍隸大冶縣耕讀為業素各守分彼此住居  
寫遠先不認識楊光朋向充楊姓戶首經營公  
產因族大丁多禁止賭博為非偶有不守家規  
之人楊光朋輒喚至宗祠責懲議罰致招族眾  
怨恨稱其武斷昔年又因親戚周姓自盡幾與  
余姓涉訟楊光朋勸令余姓齋醮寢事袁甲甫  
與楊光朋所住各村地近梁子等湖每年湖水  
漲發向由武昌縣屬之樊口地方消洩入江田  
屋始得耕種居住光緒三年有武昌縣人郭瑞  
麟等在樊口創築橫壩堵遏湖水不能消洩袁

甲甫因時交冬令田屋久被水淹當將受害情形自作詞稿同本處紳耆赴縣呈訴並進省赴武昌府暨督轅呈請挖毀拘究適楊光明及素不認識之江夏武昌大冶三縣紳耆余蘭坪等亦因樊口橫壩受害來省控訴與袁甲甫會遇詢悉情由遂聯名具呈惟時已據武昌府縣稟奉督撫院飭將橫壩創毀並於袁甲甫等呈內批飭嚴拏郭瑞麟等究辦詎聽從築壩各居民挾袁甲甫聯名上控差拘之嫌即以袁甲甫包攬詞訟武斷鄉曲買通書差舞弊害民並勾同

楊光朋借端斂費以濟袁甲甫之惡等情布散  
謠言希圖陷害袁甲甫等聞知欲赴縣訴辯因  
未查知何人捏造無從指控四年九月內適奉  
欽差前兵部右侍郎彭玉麟親至該處查辦案件訪  
聞奏奉

諭旨飭挈審辦行據江夏等縣拘獲袁甲甫等解司  
稟奉

奏明並札飭確查袁甲甫等有無武斷包訟被控  
案據歸案核訊行司報委漢陽府知府嚴昉審  
辦旋據武昌府及江夏武昌等縣查明稟覆袁

甲甫等僅止上年與本邑紳耆聯名呈請挖毀  
樊口橫壩一案平日並無武斷鄉曲包攬詞訟  
亦無藉端斂費買通書差舞弊害民被人告發  
案據並據大冶縣申賁同治七年據袁甲甫同  
李善發赴縣呈控吳載陽等侵佔湖業旋經鄉  
鄰調處將湖業掉換請息一案又於十二年間  
據袁甲甫同保正李紹玉呈控黃光煥開設煙  
館恐藏匪類經縣傳訊屬實將黃光煥枷責發  
落一案各卷宗聲明此外實無告人及被人控  
告案件等情又經飭發核審茲據該府訊議詳

解到司本署司親提研訊無異此案袁甲甫楊  
光朋各因郭瑞麟等在樊口創築橫壩水無消  
路以致田屋被淹不能耕種居住出而控訴袁  
甲甫自作詞稿與紳耆聯名具呈係為保衛田  
廬事屬切己與包攬他人詞訟不同即袁甲甫  
在縣呈控吳載陽等二案或因業產被佔或慮  
藏匿匪類皆非好訟多事楊光朋身充戶首因  
族人不守家規喚至宗祠責罰乃屬分所應為  
均無不合既據該府縣逐細查明出具印結並  
無另有包訟武斷以及斂費買通書差舞弊害

民被人告發案據所有被訪各節訊據供稱係由築壩居民布散謠言挾嫌陷害尚屬可信袁甲甫即增生袁兆麟楊光朋即監生楊鳴遠應請均毋庸議省釋歸業是否允協理合詳請察核具

奏等情前來伏查此案袁甲甫即增生袁兆麟楊光朋即監生楊鳴遠現經署臬司惲彥琦親提研訊據供情詞核與彭玉麟所訪各節大相懸殊且據武昌等府逐細查明出結稟覆袁甲甫等實無被人告發案據並非真正訟棍惟係奉

特旨飭拏之人未敢遽行省釋應否即照該司所詳  
議結抑或

勅下刑部再加確覈議覆遵行之處伏候

聖裁除將全案供詞造冊咨部謹合詞恭摺具

奏伏乞

皇太后

皇上聖鑒訓示謹

奏

樊口創築石閘現在籌議情形摺十八年十二月  
再樊口創建石閘前奉

諭旨遵即飭議舉行

奏明在案月餘以來經臣等迭次嚴催據武昌府  
知府方大湜轉據武昌縣知縣凌心垣等稟稱  
遵各曉諭周知一面邀請紳耆來城會議該縣  
向分內外八鄉內四鄉紳耆竟無一人進縣僅  
傳到城紳王家璐王羽儀陳之儲三名西楊畝  
生員葉芳閣霖溶二名議請建閘一座約需工  
費七萬畝內民糧不過二千有奇應在於內四



鄉及江夏黃岡大冶三縣派費興修均由該紳等開報復經傳到監生杜承恩武生余鼇紳耆郭培城三名僉稱受益之區自應協助惟閘工不敢承首等語先行稟復前來臣等查集費建閘必須衆情欣願稍涉派累即於

諭旨有違未便據武昌縣城及西楊畝一二生監之言遽行定斷現在該縣內四鄉暨江夏黃岡大冶三縣紳民尚無一人集議若僅就武昌縣城畝紳士開報處所遽令外縣外鄉按畝出資難保無抑勒情弊當即批飭再行設法分別廣為

勸諭公保首事趕緊集費承修務順四縣輿情  
不得任意苛斂仍飭嚴立條規重懲需索由司  
核詳覆

奏外所有該縣官紳現在籌議情形謹合詞附片  
具陳伏乞

聖鑒謹

奏



查明湖南撫臣辦匪無誤摺 五年正月初五日  
奏為遵

旨查明湖南通省地方現均綏靖撫臣迭次辦匪尚  
無貽誤據實覆陳仰祈

聖鑒事竊臣於上年十二月十六日承准軍機大臣  
字寄初四日奉

上諭有人奏湖南各屬莠民滋事未能認真整頓請  
嚴飭懲辦一摺據稱湖南常德府等處本年七八  
月間迭有匪徒滋事現仍未靖撫臣邵亨豫性耽  
安逸終日誦經禮佛文酒自娛凡遇警報視為故

常保甲團防有名無實請飭認真整頓等語湖南益陽永綏等處匪徒滋事業據該撫將查辦完竣緣由具奏有案惟所稱常德府有馬三將軍及馬元等糾眾謀逆一案未據該撫奏報究竟該省迭次辦理情形若何巡撫為封疆大吏責任綦重邵亨豫有無因循怠玩貽誤地方之處著李瀚章馳赴湖南秉公確查據實具奏不得稍涉瞻徇湖南屢有匪徒蠢動隱患堪虞除常德等處外通省地方現在是否安靖著李瀚章一併訪查具奏原摺著抄給閱看將此由四百里諭令知之欽此 臣遵

即帶印出省由水路來湘業將起程日期及上年七八月間湖南匪徒滋事之案均經辦理完竣緣由恭摺具

奏在案臣於去臘二十七日抵湘後復經調核卷宗周諮博訪所有益陽永綏土匪及常德府馬元等糾衆謀逆案件派兵勦辦情形均與撫臣邵亨豫迭次咨奏相符湘省地接粵黔苗徭錯處夙號巖疆加以各路遣撤營勇過多其中良莠不齊每虞藉端滋事是以應任各撫臣節次分設防營扼要控制邵亨豫到任未久適值警

報迭至當將留防黔境之提督蘇元春毅新營一軍星夜調回分紮辰沅寶晃一帶復將分發補用道黃習溶所統綏定營一軍調回省城分紮金盆嶺及醴陵湘潭一帶永綏益陽等處匪徒滋事時得以迅速赴機尅期蕝事又慮餘匪未淨委候補知府莊賡良永順府知府周幹馳赴益陽永順及辰沅乾永鳳各府廳會督地方文武清查搜捕冀絕根株現在湘省防軍除毅新綏定兩營外長沙及瀏陽甯鄉平江岳州等處則有參將韓廷貴所統巡防營衡州朱亭等

處則有提督戴登高所帶鎮湘後營永州則有  
總兵謝晉鈞所帶鎮湘左營郴州良田司等處  
則有提督李前復所帶鎮湘右營安仁龍海塘  
等處則有提督趙聯陞所帶鎮湘副左營道州  
江華等處則有提督黃家茂所帶鎮湘副右營  
常德龍陽桃源益陽等處則有提督王永章所  
帶振字營桂陽臨武等處則有知府顏錫蕃所  
帶廣武軍互相犄角策應甚靈其水路要隘洞  
庭湖及沅江等河係長江水師汎地原有礮船  
分駐內河上游之洪江長常等處則有提督周



禮濂所帶長勝水師下游之省河岳州湘益澧安等處則有總兵陳海鵬副將黃德參將羅德煌都司趙尚琦所帶選鋒水師衡永河內則有副將廖德茂所帶澄湘水師節節分巡水陸聯為一氣即偶有土匪竊發征調既便勦辦自易不致蔓延為患以上水陸各軍或係舊駐老營或係撫臣邵亨豫權衡緩急隨時撥換布置甚為周密調度亦合機宜目下湖南通省地方委屬一律靜謐邵亨豫前任湖北巡撫時臣與共事五月之久深悉其廉正忠謹勤於政事此次

來湘密加詢訪僉稱其講求吏治惟日孜孜即  
如去秋常郡偶被水患當時籌款撫恤冬令趕  
築堤塍災黎咸受其惠且通飭各屬清查義倉  
存儲增廣勸諭冀備不虞遇有警報莫不迅速  
派營往捕立時撲滅又如去冬巴陵縣屬偶有  
匪徒會聚撫臣先期風聞遠撥巡防右營三哨  
馳往彈壓拏辦謠傳頓息實無怠玩因循及誦  
經禮佛之事惟係翰林出身屢掌文衡平日誥  
誡子弟訓課諸生娓娓論文是其本色素性善  
飲而有節並不廢事自膺疆寄痛加抑損量亦

漸減此湖南通省現均綏靖及撫臣近日居官之實在情形也湘中土匪屢有蠢動隱患堪虞誠如

聖慮上年永綏益陽常德之案業經撫臣先後派營勦辦完結而各屬伏莽尚恐未盡必須先事預防查保衛地方莫善於團防保甲湘勇向稱勁旅近時各屬團練均仍整齊並未廢弛至保甲事宜臣於同治十一年冬間曾與升任撫臣王文韶仍照明臣王守仁十家聯牌法參以湘省情形商定章程刊刻成書通行遵辦果能恪守

成法實力奉行各清各團各清各族匪類自無  
可潛蹤第恐日久懈生現復會商撫臣督飭司  
道申明舊章嚴檄各府州縣振刷精神認真整  
頓如有拏獲首要匪犯錄供稟報或由省委員  
前往或就近解交該管道府覆審明確委係情  
真罪當法無可貸即行就地懲辦毋庸照例解  
勘免致長途踈脫以昭炯戒而絕亂萌地方官  
如陽奉陰違虛應故事定即擇尤叅辦斷不敢  
稍存姑息仰副我

皇上戢暴綏良之至意所有查明湖南通省地方現

均綏靖及撫臣迭次辦匪尚無貽誤理合據實  
恭摺覆陳伏乞

皇太后

皇上聖鑒訓示再臣拜摺後擬於日內起程回鄂合  
併陳明謹

奏

合肥李勤恪公政書卷九目錄

楚湘  
湖廣

男經畬經江澧編輯

滇  
淮  
濤  
滄

樊口建閘連 旨嚴立章程摺 五年二月二十一日

沔陽等處撥借公款修築潰隄摺 五年三月二十八日

黃柏山大隄修築工竣片 五年八月二十四日

密保將才摺 五年十一月二十一日

密保賢能各員片

浙江節婦黃朱氏請旌片 六年四月十六日

籲懇 抑哀摺 七年四月初三日

遵議加增洋藥煙土稅捐摺 七年六月十九日

籌辦海防並陳管見摺 十六年五月十二日

叩謝 天恩摺

恭謝 天恩摺 十六年八月二十日

廣東小圍姓礙難弛禁辦理摺 十七年四月二十七日

省河沙路鐵樁工程完竣摺 十七年十月初五日

查閱虎門各礮臺及雷廠河樁片 十七年十二月十日

樊口建閘遵 旨嚴立章程摺 五年二月二十

奏為樊口創建石閘遵

旨嚴立章程繕具清單謹呈

御覽恭摺仰祈

聖鑒事竊臣等前奉光緒四年九月三十日

上諭前據御史李廷簫奏湖北樊口堤閘關係農田

民命委員勘報不實請飭覆查當派彭玉麟等前

往確查茲據彭玉麟奏樊口堤閘於濱湖農田民

命所關甚重必須將濱江黃柏山起至樊口四十

里之大堤趕緊修補再於黃柏山以上添修里許



樊口以內宜修一石閘其橫直寬廣可以度地布  
置並應設立埠頭搬運貨物均由民間自行經理  
官則嚴立條規重懲需索等語該處堤閘既據該  
前侍郎查明有裨國課民生而於漁戶商販尚無  
大害自應權衡輕重酌度興修著照所請由李瀚  
章等督飭屬員趕緊辦理毋任該地方官拘泥成  
規稍形鬆懈等因欽此又奉十一月初六日

上諭前據彭玉麟奏遵查湖北樊口地方宜修補大  
堤建築石閘當照所請諭令李瀚章等飭屬辦理  
茲據李瀚章等奏一面飭議舉行並稱樊口建閘

惟於西楊畝附近一隅有益而江湖盛漲之時皆  
難宣洩有害通省水利等語所奏亦不為無見惟  
建築石閘究非堤壩可比但當察看江外內湖水  
勢消長以時啟閉既可宣洩盛漲又可保衛田廬  
未始不可兩全該督等所稱下閘必在桃汛以前  
放開應在霜降以後殊屬拘泥成說至應如何嚴  
立章程重懲需索之處著李瀚章等督飭屬員妥  
議辦理將來建閘以後利病若何仍准隨時體察  
情形據實具奏欽此跪誦之下欽悚莫名遵即轉  
飭司道秉公妥議應如何嚴立章程重懲需索

選公正紳士責令自行集費興修及聽民設立  
埠頭一節有無窒礙併飭議覆當經恭摺

奏明一面專檄嚴催去後茲據湖北布政使王大  
經署按察使惲彥琦鹽法武昌道蒯德標漢黃  
德道何維鍵等詳稱此案奉札後遵即轉行各  
府縣曉諭周知並邀集紳耆會議兩月以來僅  
傳到武昌縣城及西楊畝生監數名議請按畝  
出費並令外鄉外縣協助興修而武昌內四鄉  
及江夏大冶等縣紳民竟無一人與議事關  
特旨飭辦要件未便任令日久宕延且值春汛將臨

誠恐無知愚民見小欲速以為創建石閘工鉅費繁狃於郭瑞麟胡炳盧之故智仍在該處強築橫壩激成事端是以由該司道督同府縣秉公妥議擬立章程八條並聲明建閘後江魚不能入湖蘆葦亦難如前滋長應完魚課蘆課能否照額徵收另行確查核辦至埠頭脚夫及具保之戶均屬等倫既虞瞻顧欺隱未能實心辨公尤恐苛索把持轉致藉端騷擾是便民而反以病民於情勢似多窒礙應請委員督飭經理惟此處建造石閘係數千年來未有之創舉現

雖議立章程尚未確有把握將來利病苦何仍當凜遵

諭旨隨時體察情形據實詳請具

奏等因前來臣等伏思該處創建石閘工程浩大必須慎之於始辦法尤宜畫一免致臨事周章細核所議章程如建口門派首士定經費立埠頭限保固籌歲修慎啟閉各節均尚周妥相應繕具清單恭呈

御覽如蒙

俞允即由臣等轉飭各屬曉示紳民一體遵照趕緊

辦理此次

奏定以後儻有強橫之徒不由公保擅自聚眾飲費抗不遵建以時啟閉之石閘仍敢私築橫壩壅遏水道貽害地方即行嚴拏懲辦以肅

功令而儆奸頑再革生胡炳虛上年糾眾築壩附近民人汪炳煌汪顯全汪顯願等不肯附和立時將其房屋焚燬並捉去忠義後營隊勇張祥順綑燒斃命情形異常凶惡即彭玉麟查覆摺內亦稱其向係滋事之徒現在被害被戕之家屬環叩伸冤案懸未結應否照案勒拏務獲審

訊明確按律擬辦之處伏候

命下遵行所有樊口創建石閘遵

旨嚴立章程重懲需索各緣由謹合詞恭摺由驛具

陳伏乞

皇太后

皇上聖鑒訓示謹

奏

沔陽等處撥借公款修築潰隄摺

十五年三月二十八日

奏為湖北沔陽天門等州縣上年隄潰被水民情困苦分別撥借公款以工代賑恭摺具

奏仰祈

聖鑒事竊照湖北地方濱臨江漢各州縣全賴隄滕保障向係按糧派土官督民修上年夏汛盛漲以致沔陽天門黃梅等州縣各隄漫潰成口當經臣等行司委員馳往會同地方官查勘令照舊章就地集費興修並將大略情形恭摺奏報聲明俟該印委各員勘估稟覆到日應修潰



隄如民力實有未逮者再當酌量撥借公款在案旋據漢川嘉魚二縣續報被水漫隄潰口飭據委員會同各該地方官先後勘估稟覆已潰隄段均屬刻不容緩之工亟宜修復惟工費浩繁若令全數就地派捐委實民力不逮所有各邑被水情形以天門漢川二縣為最重沔陽州次之黃梅嘉魚二縣又次之臣等伏查潰口各隄雖由各該州縣在於受益之區照章派捐土費第工大費鉅驟難捐集且地方既遭水患秋收失望民情尤形困苦不得不酌動公款分別

撥借藉資接濟隨即督飭司道詳加體察通盤  
籌措在於所提一成釐金善後項下動給天門  
縣錢一萬串沔陽州錢八千串皆係作為撫卹  
之資俾得以工代賑又動給黃梅縣修築驛路  
隄工銀三千兩以上四款均請免其籌還又撥  
借嘉魚縣修築江堤錢三千串黃梅縣修築梅  
家口等隄錢八千串此二項仍應責成地方官  
督飭紳首俟今歲秋收後即在受益各區循照  
向章按畝攤繳分年徵解還款似此分別辦理  
庶各隄得以及時興修而民力亦可稍紓茲據

湖北布政使司王大經彙案具詳請

奏前來除仍飭催沔陽等州縣將業已興工各隄  
趕緊修築務於春汛未漲以前一律完固以資  
保障外所有湖北上年潰隄被水各州縣分別  
撥借公款以工代賑緣由謹合詞恭摺具

奏伏乞

皇太后

皇上聖鑒訓示謹

奏

籌還商款銀兩作為西征協餉片

再前准戶部咨陝甘督臣左宗棠奏明借用華洋商款銀三百五十萬兩每月一分二釐五毫給息由粵海關海浙海江海江漢五關出票分六年十二期還清內江漢關票借銀七十萬兩共應給息銀三十四萬一千四百十五兩另備關票分數填明隨本統期同付統在應解甘餉內劃抵行令遵照辦理等因查光緒五年三月二十日第一期應還本銀五萬八千三百兩隨給息銀五萬二千五百兩計共銀十一萬零八

百兩現已竭力騰挪如數湊足於三月初五日  
委員解交陝甘後路糧臺轉解恪靖行營上海  
採運局道員胡光墉兌收歸款此項代還商款  
銀兩應即在於應協西征餉內劃抵伏查鄂省  
原協左宗棠西征餉每月二萬兩自同治六年  
二月為始節經按月籌解八年二月間又奉添  
撥銀四萬兩截至光緒三年十二月止復經解  
過銀四百六十萬三千餘兩四年分代還第一  
期第二期洋款並先後籌解共銀四十三萬九  
千三百零六兩二錢五分又提前撥還五年正

月二十四日第三期洋款銀十六萬九千六百  
十二兩五錢均經隨時

奏報茲復代還第一期華洋商款銀十一萬零八  
百兩由湖北軍需局司道具詳前來除分咨外  
謹合詞附片具陳伏乞

聖鑒謹

奏



--	--	--	--	--	--	--	--	--	--

黃柏山大隄修築工竣片 五年八月二十四日

再前准工部咨光緒四年九月三十日奉

上諭據彭玉麟奏樊口隄閘於濱湖農田民命所關甚重必須將濱江黃柏山起至樊口四十里之大隄趕緊修補再於黃柏山以上添修里許樊口以內宜修一石閘即著照所請由李瀚章等督飭屬員趕緊辦理等因欽此 臣等遵即督飭司道轉行武昌等縣衛邀集紳耆分別辦理並將所議建閘章程開具清單恭摺奏明在案旋據該縣衛稟稱修築黃柏山大隄費



難驟集經該紳首稟借黃岡縣軍儲倉穀二千石暫濟工用秋後買補還倉並有在於該處駐紮彈壓之統領忠義軍提督劉維楨因目擊該隄工難速成自行捐製器具督率勇丁幫同紳民趕緊修補於伏汛未漲以前一律工竣當由該縣衛會詣勘驗該隄自樊口內起至黃柏山止計長四五十里根脚堅厚夯築如法現在江水盛漲相距隄頂尚餘一丈足資抵禦等情先後稟報前來除批飭仍將口內石閘遵照奏定章程迅速集紳籌費興築並將該隄歲修經費

按照受益田畝預議稟辦以垂久遠外所有武  
昌縣黃柏山大隄現已一律修築工竣緣由謹  
合詞附片具

奏伏乞

聖鑒謹

奏

--	--	--	--	--	--	--	--	--	--	--

密保將才摺五年十一月二十一日

奏為遵

旨酌保將才堪備任使各員恭摺密陳仰祈

聖鑒事竊臣接准戶部咨光緒五年八月初八日內

閣奉

上諭前因時事多艱需才孔亟疊經諭令各直省督撫隨時保薦人才以備錄用頻年講求吏治經武整軍各該省文武歷練既深必多堪備任使者著各直省大吏加意訪求秉公保奏候旨簡用等因欽此臣跪誦之下仰見

皇上慎重戎行虛己旁求之至意曷勝欽佩伏思軍興以來各省候補將弁不下數千人皆由轉戰立功得膺薦擢而隨營打仗與實任地方情事不同時勢亦異尤貴量材器使蓋提鎮大員身膺閫寄有整頓營伍督率將弁經營錢糧之責平時則嚴明紀律遇事則斟酌機宜非若軍營對敵以衝鋒敢戰為上况近日江防海防在在皆資任使尤非志慮純篤膽識兼優者難膺其選臣平日每於各營將弁留心訪察期為國家得人茲復奉

旨垂詢謹就臣見聞所及據實上陳查有統帶湖北  
武毅軍記名提督現署湖北提督吳鳳柱江蘇  
人嫻習戰事穩練勇敢言行悉就老成無劍拔  
弩張之氣統帶湖北水師左營提督銜記名總  
兵陸成祖湖南人勇樸精強治軍嚴整巡防緝  
捕井井有條頭品頂戴統帶湖南毅新營記名  
提督蘇元春廣西人英姿颯爽膽氣充足辦理  
緝匪事務精細詳明統帶湖南選鋒營水師提  
督銜遇缺題奏總兵陳海鵬湖南人巡緝操防  
實心實力為人亦沈細有謀老成穩練以上四

員於諸將中皆為出色足勝實缺提鎮之任臣  
既確有所見理合據實上聞仰備

聖明簡擢謹繕摺密陳伏乞

皇太后

皇上聖鑒謹

奏

密保賢能各員片

奏為遵

旨酌保賢能各員暨外省人才恭摺密陳仰祈

聖鑒事竊臣接准戶部咨開光緒五年八月初八日

內閣奉

上諭前因時事多艱需才孔亟疊經諭令各直省督撫隨時保薦人才以備錄用現在所舉各員量材授任者頗不乏人第恐聞見難周尚未盡登薦剡著各直省大吏加意訪求秉公保奏候旨簡用等因欽此仰見



皇上慎簡乃僚籲俊求賢之至意臣跪誦之下欽佩  
莫名伏思求治之道在於得人尤在於知人近  
來仕途混雜稍知自愛者皆循分供職求其材  
識卓犖頗不易覲臣叨荷

聖恩厯膺疆寄雖乏知人之明而竊慕以人事君之  
義十餘年來於所屬各員及外省僚友中凡賢  
能素著者業經隨時保

奏茲承

特旨垂詢敢不據見聞所及細加考核於臣心所器  
許者敬為

皇上臚列陳之查有現任湖北按察使姚覲元前在川東道任內治理秩然官紳愜服臣前涪川時心竊識之現官鄂省朝夕共事見其才識優長體用兼備又能宅心正大不競不絀堪充疆吏之選前任湖北學政翰林院編修王文在於學使任內精密周詳為人志趨純正器識閎遠同官三載心實重之若加以歷練吏事足膺大任江蘇簡用道洪汝奎學裕才優品端識邃隨前兩江督臣曾國藩辦理營務局事贊襄摩畫動合機宜至今始終如一操行純篤無急功近名

之心有飭躬敬事之實其才洵不可多得湖北  
候補道惲祖翼心敏才長有為有守任事不涉  
矜張自能洞中窾要湖南候補道陳寶箴學識  
閎通練達吏治歷任俱著循聲辦事亦有膽力  
鹽運使銜候選道湖北荊州府知府倪文蔚矣  
志忠純品學俱粹平情馭物不激不隨辦理地  
方各務整飭精詳絕無依阿之習以上六員均  
屬材能出衆器識過人足備

聖明採擇臣既素所深悉理合切實聲敘繕摺密陳  
伏乞

皇太后

皇上聖鑒謹

奏

--	--	--	--	--	--	--	--	--	--

浙江節婦黃朱氏請 旌片

再據湖北候補知府金星榆等稟稱節烈婦黃  
朱氏係浙江錢塘縣人湖北試用知縣朱世守  
之胞姊適於潛縣生員黃兆麟為妻夫故時氏  
年二十八歲生子正英甫數月該氏上侍孀姑  
下撫孤穉勤儉持家矢志守節該氏之姑黃蔡  
氏係浙江德清縣人前嚴州府學訓導蔡連之  
女適於潛縣拔貢生黃瑤墀為繼妻生子兆麟  
甫及週歲而夫亡該氏撫孤成立艱苦備嘗姑  
媳二人均於咸豐十一年粵匪竄入杭州省城

時避出城外因賊擄黃朱氏之子恐被污辱同  
時投江殉節原籍戶族蕭條久未舉報該候補  
知府金星榆等係屬同鄉見聞既確不忍聽其  
湮沒等情造具事實清冊由同鄉官天門縣知  
縣邵世恩出具印結稟懇

奏請

旌表前來臣查該節烈婦黃蔡氏黃朱氏兩世坤貞  
一門節孝善心為竊早著姑恩苦志承歡更兼  
子職遇賊氣於倉猝乃大義之深明指水盟心  
仍復相依形影磨筭此烈更兼氣秉忠貞洵為

彤管之流芳宜籲

恩綸之下逮除冊結咨送禮部科暨浙江巡撫臣查  
照外理合會同湖北學政臣臧濟臣附片具陳  
伏乞

聖鑒訓示再湖廣總督係臣本任毋庸列銜合併陳  
明謹

奏



--	--	--	--	--	--	--	--	--	--	--

籲懇

抑哀摺 七年四月初三日

奏為籲懇

抑哀仰祈

聖鑒事竊 臣 接准部咨跪讀三月十一日

皇上諭旨驚悉三月初十日戌時

大行慈安端裕康慶昭和莊敬皇太后慈馭升遐呼搶

哀號神魂飛越伏念

大行皇太后垂簾臨御佑啟

中興前後幾二十年廓清逋寇綏緝遐邦竭憂勤惕

厲之勞奠長治久安之業

神功

聖德邁古鑠今薄海喁喁淪浹感戴方冀

徽音廣被長享遐齡濟寰宇於昇平永

九重之孝養何圖一旦捐棄臣民凡居血氣之倫曷

罄攀號之慕我

皇上至德大孝秉自性生追溯

恩慈倍深悲痛伏求

俯念神器至重善保

聖躬順變節哀勉循

遺誥並籲請

慈禧端佑康頤昭豫莊誠皇太后勉抑哀思藉資靜攝  
速臻康復以慰率土臣民之仰望 臣不勝激切  
籲禱之至現經恭奉

諭旨外省疆吏不必入京叩謁

梓宮 臣楚疆奉職遠望

闕廷迫切銜哀毋能自釋惟有謹率僚屬慎固封  
圻冀以仰副

朝廷委任之至意所有繼臣哀籲下忱理合繕摺具陳  
伏乞

皇太后

皇上聖鑒謹

奏

遵議加增洋藥煙土稅捐摺 七年六月十九日  
奏為遵

旨悉心籌議據實覆陳恭摺仰祈

聖鑒事竊 臣等於光緒七年五月十九日承准軍機

大臣字寄五月初九日奉

上諭左宗棠奏禁食鴉片請先增洋藥土煙稅捐以  
收實效一摺各省原定洋藥釐捐本較洋稅為重  
乃總計所收釐金竟遠不及進口之稅是承辦各  
員任令奸商隱匿偷漏情弊顯然現照左宗棠所  
擬每洋藥百斤統稅釐合計共徵銀一百五十兩

內地土煙價值較低稅釐准照洋藥推算徵收亦尚平允著南北洋大臣各直省督撫將各關口及各地地方情形詳細體察將稽查徵收章程悉心妥議於一月內覆奏候旨定奪等因欽此遵即轉飭查明原定藥稅章程通盤籌畫妥議詳辦去後茲據湖北布政司江漢關宜昌關會同牙釐局司道詳稱鴉片流毒中國吸食者日多誠如諭旨所言沉溺既久非空文所能禁制左宗棠奏請加徵稅釐參用罰懲遺意冀挽頽風洵為救時急務自應體察遵行惟鄂省居長江上游凡洋

藥進口已在江海關完納正稅銀三十兩運至江漢宜昌兩關僅憑票查驗無稅可收今議加抽一百五十兩稅釐既未分清數目又相懸絕似非由初次進口之關與洋人議定遽難照辦溯查釐金定章洋藥一項必俟華商販運轉入行店出售始行分別抽收落地過境之釐所謂落地者係由行戶開報稽查雖嚴仍難得全銷之實數過境者與百貨錯雜携取甚便不能杜夾帶之藏其土藥一項來自川滇等省較洋藥價值本低釐章即因之有別販運者多由山僻



繞道而行最易偷漏咸豐九年奏明就入境釐  
卡抽收改釐為稅擇要於宜昌之平善壩荊州  
之沙市襄陽之老河口樊城設卡分辦仍照每  
藥百斤收稅銀三十兩按季造冊報部此外州  
縣集鎮零星販賣者即歸釐局抽收不名為稅  
同一土煙而稅釐析而為二連江漢關所征土  
藥出口正半稅銀則已隸三處抽收合之見多  
分之見少然京協各餉及本省防營善後諸費  
賴以奏撥解濟商民輸納歷久相安此稅釐照  
章循辦已有成效者也現在議加稅釐除洋藥

須俟進口之關定議始能籌辦外其土煙則鄰  
近各省多有出產若議加之數統就出產之地  
總收則鄂省幾無可收之釐然既曰土煙即應  
由我自主洋人不得過問凡有販運來鄂入境  
以後必須仍照舊章抽收方為平允鄂省原設  
平善壩沙市樊城老河口等卡地均扼要又有  
漢口總匯向收土藥釐稅均係填給聯票粘貼  
印花以憑查驗如經腹地局卡無票呈驗者即  
係偷漏照章倍收示罰立法尚屬周密將來如  
何議加或即就原有局卡或另行添設應俟洋

藥稅釐議定方可準則推算征收惟是稅釐愈重恐致偷漏愈多緣土之為物質小而價重易於夾帶藏匿而水陸路途歧出稽察尤屬難週今若以查洋藥之故多設局卡則經費繁鉅得不續失且行旅往來必滋擾累更慮不肖之輩得賄私縱是防民善俗之舉反為若輩牟利之端矣况販運藥土商人每多雇用獷悍之徒結夥成羣携帶器械恃其人衆不服盤查果欲認真堵截則巡役不足抵禦必將繼以兵勇辦理稍未妥洽難免激成事端各省軍務平定未久

十餘年來休養生息尚未能家給人足萬一因查土肇衅抗官滋鬧伏莽聞風附和則興師剿辦縱使立時撲滅而地方已受其害此又反覆籌商不能不鯁鯁過慮等情詳請核

奏前來臣等伏思鴉片有害於

國計民生人盡知之而迫於時勢挽救無術左宗棠奏請加征稅釐以重罰為嚴禁冀價貴而癮減其意未始不善按通商條約洋商販運洋藥祇准在通商口岸售賣不准入內地銷售立法本極嚴密惟此口運至彼口在所不禁湖北凡

有運到洋藥皆係已在江海關完稅之貨故江漢宜昌兩關向不徵收洋藥稅銀必俟華商赴洋行買進後始行抽收內地釐稅每百斤抽收錢二十餘串尚多隱匿偷漏如左宗棠原奏加征洋藥釐稅設立三聯單有合辦分辦二層合辦謂於總口征洋商之稅即併內地釐金而加征之此法誠為扼要可杜奸商滲漏然如何統收分解似須先為計及分辦謂於總口照稅加釐外於內地分銷各口加征華商之釐向來洋商由上海轉運洋藥赴各口銷售例不完釐今

欲加釐而聯票又須洋商遵領細繹此二層均與洋商互相交涉查煙台條款內議令英商於販運洋藥入口時封存棧房躉船迄今尚未開辦勢難由我自主今改定章程似須中外會議妥洽乃可推行盡利臣等愚見應請仍由總理衙門及南北洋大臣與各國公使商議將煙台條約所載洋藥入口由關派入稽查封存棧房躉船俟洋商照則完稅並令買客在新關輸納釐捐趕緊定章舉辦但洋商不准自運內地一節仍須堅守不可因加稅自亂其例俟議定後

通行各直省俾有遵循而江漢宜昌兩關亦均可仿照辦理矣至土煙應加稅釐一俟洋藥辦成照本推算增加事較易行惟慮釐稅愈重繞越偷漏愈多若處處添設巡卡則所費不貲稽查固鮮良策辦理恐難收實效所有遵議加增洋藥土煙稅捐實在情形謹合詞恭摺由驛覆陳伏乞

皇太后

皇上聖鑒訓示謹

奏

籌辦海防並陳管見摺

十六年五月十二日

奏為籌辦廣東海防分別築臺購礮設法措備經費並敬陳管見恭摺仰祈

聖鑒事竊維廣東負山帶海地險民強西北民獯雜處鎮懾已非易易至沿海各府州縣皆有港口堪以開埠屯船是海防尤為當務之急臣前在粵東畧知形勝此次仰荷

天恩重臨嶺表泣任以來即與將領僚屬朝夕討論咸謂粵東防務以海口為先而海防尤以臺礮兵輪為要綜論全局除省防外莫如瓊廉兩府



是以前督臣張之洞瀕交卸時有建築瓊廉海口礮臺礮隄訂購大礮車礮之

奏臣將所奏各節逐一訪察持論固合機宜而擇地建臺與配礮一切尚有未盡合宜之處當飭各該鎮道會同確勘適北洋海軍提督丁汝昌駕駛兵輪游歷過粵臣囑其親往查看詳加測繪旋據該鎮道等先後來省面稟與臣訪察情形大致相同丁汝昌亦繪具圖說據稱勘得各處應修礮臺以瓊州府海口為最要而崖州之榆林港儋州之洋浦次之又勘得廉州地方如

北海嶺地角嶺原有礮臺須加修整其餘龜尾  
冠頭嶺方門嶺等處斗入海中面瞰大洋安設  
礮臺亦可稍壯聲勢而三面濱海處處皆可登  
岸以繞礮臺後路守之維艱白龍尾其地重在  
陸防所有礮臺工程似屬可緩各等語正籌辦  
間承准海軍衙門咨開遵

旨覈議鈔錄議覆原奏咨行到粵臣查前督臣張之  
洞原奏謂瓊州海口城西五里之秀英山岡阜  
高廣擬築臺七座海口城西十里之西場築臺  
三座每臺均配二十四生三十五倍口徑大礮

一尊又海口城後之大英山築臺五座配十五  
生長礮五尊並於濱海一帶起自西場東至牛  
始舊礮臺二十餘里築一礮隄共配七生半車  
礮一百零二尊又稱廉州北海之冠頭嶺最為  
扼要遠瞰大洋擬於冠頭嶺天馬嶺石龜尾諸  
山築臺五座配二十四生礮五尊並練陸軍車  
礮五隊配八生七車礮三十尊用馬駕運又白  
龍尾地方應於近內較高之山建設礮臺五處  
將省防撤出鋼礮五尊撥用又稱擬於榆林港  
口門外東山樂道嶺西山獨田嶺分築礮臺各

三座配十五生礮六尊各等語臣查二十四生  
長礮出子太高不能平擊礮彈太大力亦不能  
過遠瓊州海口之秀英山既屬高阜若再配出  
子過高之礮焉能下擊敵船冠頭嶺等處既瞰  
大洋則敵船從遠處繞越雖有加長巨礮亦何  
所用臣故於春間飭令德商李德向克虜伯廠  
將前改訂二十四生長礮退去九尊仍訂十一  
尊俟測定礮臺式樣應配何礮再行接造庶鉅  
款不致虛糜至瓊廉兩處礮臺前督臣擬欲一  
時並舉查改訂長礮二十尊約需銀八十六萬

餘兩車礮一百三十二尊合銀三十七萬餘兩  
運費保險在外業已需銀一百二十萬兩而車  
礮所需馬隊及礮臺礮隄工程均未計及綜計  
應築礮臺即照北洋辦法以防勇代工合諸料  
物等件至省亦須百餘萬兼營併舉經費何出  
臣通盤籌畫須將各處臺工分別緩急次第舉  
辦查瓊州孤立海中較廉防更關緊要應先從  
瓊山海口建立臺座安配礮位遞及崖州之榆  
林港儋州之洋浦瓊州臺礮辦竣再及廉州各  
處惟據丁汝昌指陳建臺地名數與前督臣原

奏地方不符或係形勢之殊或係土名之異事  
關創建不厭精詳復經臣疊經電飭該鎮道等  
逐細覆勘將應辦事宜豫為籌畫至於踏看地  
勢定立方向必得精通洋弁代為勘訂庶可合  
用刻下雨水正盛各處均屬炎瘴未便興工擬  
俟秋涼咨商北洋將所雇洋師漢德根派令來  
粵確切勘估講求辦法再行開辦此臣籌辦臺  
工分別先後之情形也惟興工動役必須豫籌  
經費廣東各款歲有常支近來京協各餉提撥  
愈多欲興工役措署頗難前督臣源訂十五生

礮嗣改為長礮二十尊加價甚多合計所訂各礮並車礮先付半價司局雜款挪墊一空而潮肇兩關籌備購礮專款為期仍待十年緩不濟急墊款無從籌補臨交卸時又裁免巡緝經費每年數十萬金而用款一切照舊且有應付各礮後半價銀連廣西邊防添購礮價合計需銀七八十萬均屬新增現經臣減緩長礮九尊暫可省銀三十餘萬又停止不急之務多起無如入款過減雖極力節吝亦屬竭蹶上年前督臣奏白龍尾臺工委陶定昇前往勘估督同馮子

材所部將弁修造等語查此項工程該鎮等並未開辦亦因領款無得以致停擱今巡緝經費既經裁免而諸務又難中止臣與司道商計擬於鹽務埠商水客暨各項大宗生理勸其勉力報効海防經費但強弩之末難集鉅資容俟辦有成數酌量臺工隄工分撥應用並陸續添購十五生礮位再行隨時

奏明辦理此臣擬籌經費之情形也抑臣更有進者廣東沿海袤延千有餘里舟楫隨處可通即如附省港道向稱六門現惟中路之虎門黃埔



等處設有堅臺精礮其餘五門尚覺空虛此外  
潮州之汕頭高州之水東安埔惠州之稔山等  
處輪船皆可暢行其尚有未經測出如榆林港  
洋浦者不知凡幾安能遍置礮臺即使遍築而  
兵分力單亦難保固非有大號兵輪往來策應  
僅恃臺礮亦非萬全之策前督臣所造各船皆  
係淺水兵輪不能駛至大海其在閩廠協造各  
船已到者廣甲廣庚惟廣甲可行外洋今春臣  
派赴北洋聽候會操並令該船管駕隨同丁汝  
昌放洋操演已將未能合式之處就近在香港

船澳雇令洋匠修配齊全然船身不大未為盡善其廣乙廣丙船式與廣甲相埒須至今秋明冬乃成臣已屬丁汝昌轉致閩廠按照北洋船式添配修改此外廣丁一艘尚未動工辛壬癸三艘船身過小均難適用臣已咨商緩辦擬俟乙丙兩船造齊一併派赴北洋操練現粵東應付礮價及築臺要工款項尚須經畫如果物力稍紓擬仍添購中號鐵甲兵輪一二艘配成一隊聊備緩急此則臣區區之微意而未知能否辦到者也所有<sub>微臣</sub>籌備海防情形謹據實恭摺

具陳伏乞

皇上聖鑒訓示謹

奏

叩謝 天恩摺

奏為叩謝

天恩恭摺仰祈

聖鑒事竊於四月十一日禮闈揭曉臣子舉人經畬

中式光緒十六年庚寅

恩科第一百二十九名貢士經翰林院帶領引

見敬讀電鈔五月初十日奉

上諭李經畬著改為翰林院庶吉士欽此臣當即恭

設香案望

闕叩頭謝

恩訖伏念臣卅年疆寄有愧良弓七秩樗庸違言式  
穀有子束身於廉孝相期報

國以文章

臣子經畬

淝水凡材藝林薄植少叨門蔭

幸除劉湛之階甫歷郎曹濫副光庭之選當

慶榜宏開於

京洛迺微名上附於

瀛洲小草無知得覩

西清之秘笈析薪何幸竟分

東壁之餘光惟

大廷之藟菲無遺斯後進之茅茹共拔在

聖主廣作人之化普率土以  
敷恩而微臣念舐犢之私實戴

山而知重瞻

天拜命跼地增慙臣惟有勗以飭躬導之務本深愧  
臯陶之濟美勉如狐突之效忠庶一門之

雨露長承永此

無疆之覆幬即

億代之河山孔固猶將累世以銜環所有微臣感激下

忱謹繕摺叩謝

天恩伏乞

皇上聖鑒謹

奏

恭謝

天恩摺

十六年八月二十日

奏為恭謝

天恩仰祈

聖鑒事竊臣本年七月二十七日七十生辰仰蒙

皇上天恩特加

賞賚

御筆宣猷篤祐扁額一面

御筆福字一方

御筆壽字一方梵銅佛像一尊白玉三鑲如意一柄

小卷吉綢八件線縐八件由臣長子翰林院庶



吉士經畬恭齋到粵當即恭設香案叩頭祇領  
伏念臣早貢成均壯襄戎幕游躋開府忝領兼  
圻川黔之蕩節曾持蘇浙之銀符暫綰昔在楚  
江南北未報涓埃今來粵嶺東西仍承

眷注觀

天顏於

丹陛聆

聖訓於青蒲

禁城則

賜騎晨趨

御苑則

賞船曉度寵榮逾分悚懼已深加以臣弟鴻章備位  
綸扉紫韉

特錫臣子經畬厠名翰苑彩筆初簪

恩萃一門感縈五內每念

九重知遇竭驚悃以難酬方當七十年華愧駒光之  
虛度迺荷

聖慈渥沛

懋賞優加

寶墨熒煌擁祥雲於楣額

璇題璀璨溢瑞露於珠毫勗召崇郇黍以宣猷  
皇猷邁駿期越雉旅燹以篤祜

帝祜延鴻

福篆龍牋

福海則東瀛鏡淨

壽摹鳳誥

壽星則南極珠明莊嚴而金鑄長生願率萬家膜拜  
溫潤而玉嵌如意敢矜諸將指揮長欽

密勿之絲綸彌頌

昇平之黼黻在微臣廿載封疆壤流奚補而

聖主九天憐覆

雨露逾醲仰

賜目之駢蕃俯捫心而震悚

恩深報淺感極慚生臣惟有勉效靖共冀酬

高厚晚節之松筠益勵向陽之葵藿常傾幸依

舜日舒長叨

三錫而康侯協吉願祝

堯齡曼衍頌

九如而天保延釐所有

微臣感激榮幸下忱理合繕摺

叩謝

天恩伏乞

皇上聖鑒謹

奏

廣東小聞姓礙難弛禁辦理摺

光緒十七年四月二十七日

奏為廣東小聞姓有害民生無益餉項礙難弛禁  
辦理據實恭摺覆陳仰祈

聖鑒事竊臣承准軍機大臣字寄光緒十七年三月

初四日奉

上諭有人奏廣東聞姓之外尚有小聞姓並不關涉  
考試請仿照聞姓緝私助餉撥解海軍衙門等語  
著李瀚章斟酌情形查明覆奏原摺鈔給閱看等  
因欽此伏念海軍衙門經費支絀如果小聞姓緝  
私繳餉有益於

國無損於民自當擴此利源以資協濟惟臣斟酌  
事理諮訪官紳實有礙難舉辦者謹為我

皇上詳晰陳之查小關姓即白鴿票用千字文八十  
字刊票發賣每張售錢四五文不等任人買猜  
上彩者可得銀七八兩勝者絕少負者恆多近  
又有用姓氏刊票者因變其名曰小關姓雖無  
關於考試實有害於民生臣到任以後疊飭查  
拏又於光緒十六年七月十三日欽奉寄

諭確查嚴禁當將查禁情形覆奏在案旋禁旋開未  
符政體此礙難舉辦者一也粵人雖多嗜賭然

苟稍知自愛豈肯身入博場惟小闡姓沿門投  
賣無處不到晝買夜開毫無間斷愚夫愚婦以  
其所費無多所得較厚不知逐日累月得不償  
失迨至輸久計窮流弊不堪設想縱使弛禁既  
無殷商承充亦無正紳願保而零星收取徒滋  
紛擾難得實際此礙難舉辦者二也原奏內稱  
與其虛懸禁令何如取濟要需其言亦切中時  
弊不知粵東白鴿票流傳已久驟難盡絕根株  
但禁令所在人尚知做官吏察其丁役家長誠  
其子弟買者漸少賣者自稀一旦舊令胥蠲



國法弛於上家教弛於下婦孺傭販以為應然將  
至有限之錙銖悉入奸人之囊橐遷流所極貽  
害何窮治田者不以莠多而忘芸治盜者不以  
犯多而廢法此礙難舉辦者三也我

朝愛育黎元無微不至雖當軍書旁午時從未行  
一病民之政往歲海防缺餉闈姓復開臣未能  
別籌巨款不得不踵而行之若小闈姓之罔利  
害民與闈姓迥然不同即使繳餉有著猶難興  
辦况其瑣碎繁雜利少害多於餉項亦無把握  
乎臣忝任封圻仰蒙

垂詢敢不體察民情據實直陳以冀稍裨  
郵治嗣後仍當督飭文武各員認真查禁不敢稍任  
鬆懈謹繕摺具陳伏乞

皇上聖鑒訓示謹

奏



省河沙路鐵樁工程完竣摺日十七年十月初五  
奏為省河沙路地方樹立鐵樁工程完竣恭摺具

陳仰祈

聖鑒事竊查廣東省河自黃埔尾分南北两支南為  
沙路北為魚珠皆中外船隻出入之塗南支沙  
路水深尤為粵防大局所繫光緒十五年八月  
前督臣張之洞奏請於該處樹立鐵樁以資防  
守工費約需萬餘金一年內可以竣事臣到任  
後體察情形原約一年之期非洋匠所允未便  
將就草率而下樁工費約需銀三萬數千兩加

石護樁約需萬餘金均係必不可省復於光緒十六年四月附片奏明在案臣督飭記名提督蔡金章試用道閻希范認真經理先將船隻器具馬頭棚廠趕緊辦齊一面催解樁件於光緒十六年三月興工樹立至十七年五月底工竣查洋人鐵樁之制係用品字式三樁組合上加鐵蓋謂之一套沙路河面寬三百七十餘丈除沙坦淺水南岸至北岸計寬三百五丈設樁兩層每樁一套相距一丈九尺有奇外樁與內樁相距三丈有奇作之字形聯以鐵索互相維繫

椿之長短視水深淺自六丈數尺至三丈數尺不等南北各留閘口十五丈設遇有事之時均可即行堵塞南北閘口兩邊各樹單鐵椿二十支中填紅毛泥作圓弧形以順水勢各設紅綠望燈以便船行北閘口係輪船往來之路內外各加護口鐵椿二套以防撞碰椿根壓石計厚一丈三四尺至五六尺不等均視水之深淺分別填護完工後經臣選派文武大員逐細查驗一律堅固深穩堪資守禦數月以來疊經江漲察看尚無鬆動嗣後仍應每年加石益固根

本惟此事係雇用洋匠仿照西法施工開支各項無例可援均係核實動用樹樁一切工費共用銀三萬七千二百七十餘兩壓石工費共用銀一萬一千七百三十餘兩飭據善後局司道逐加覆核尚無浮冒與臣上年附奏之數亦屬相符應請連同購樁價銀歸於海防善後案內另冊造銷又查張之洞原奏內稱以後擬兩年加增一次現在粵省經費支絀兩年後能否續增應俟屆時酌量財力奏明辦理所有沙路河樁工竣緣由謹會同廣東巡撫臣劉瑞芬繕摺

具陳伏乞

皇上聖鑒訓示謹

奏





查閱虎門各礮臺及雷廠河椿片  
再虎門長洲前中路各礮臺捍蔽省城關繫甚  
重魚雷船艇尤為海防要需前年臣到任時曾  
經留心察看並於黃埔地方勘建雷廠船臺以  
免要件損失去冬復往察看一次今歲各處礮  
臺多易新勇又添配雷艇勇丁兩號與舊有二  
艇合成一營而所建雷廠船臺亦經工竣均須  
親往查閱臣於十二月初三乘廣甲兵輪駛出  
虎門縱覽形勢兼閱各營於初七日旋省竊查  
頭路大角沙角威遠三臺遙為犄角上下橫檔

各臺鼎峙中流鎖鑰海口洵為扼要之區惟地勢散漫有事之際必須輔以重兵其臺座營房均屬完固惜前尚書臣彭玉麟於沙角大角僅設暗臺口門又小礮子平出祇能橫擊船邊一發不中敵船即遠幸上下橫檔各礮迎頭轟擊尚可制勝中路長洲魚珠牛山沙路各臺層層環繞緊對四沙敵船來路為省外第二重門戶尚握形勢之要防守所不可忽各營弁勇步驟止齊手法靈捷大致均尚可觀臣獎其優者而訓飭其不及務使人皆知儆安不忘危黃埔雷

廠各工一律堅整工廠兵房雷庫藥庫度船有  
臺起重有架較前已臻完備雖用銀數萬而利  
益頗多雷艇鋼底甚薄在水易鏽以臺架之不  
致損壞一利也廠屋寬廣便於工作凡裝納雷  
藥較定雷性皆得逐件講求二利也學生半日  
在學堂半日在雷廠心明其理身習其事更易  
進功三利也雷礮價極昂貴工極精細臣於餉  
需支絀之餘勉力經營成此者蓋惜從前購辦  
之艱而冀他日得收實效也道經沙路徧視攔  
河鐵樁悉皆深穩防守堪資雖不能如前督臣

張之洞所奏每歲加增而椿腳壓石總須加填  
以防潮汐衝刷或有鬆動除仍督飭將弁認真  
操練防護外所有查閱礮臺雷廠等處情形理  
合附片具陳伏乞

聖鑒謹

奏

合肥李勤恪公政書卷十目錄

楚湘  
湖廣

男經畬經江澧編輯

滇  
淮  
濤  
淦

剿捕陽江山內拜會匪徒摺十八年四月十五日

水陸師學堂添設各項奏咨立案摺十五年十二月

查明湖廣督臣被參在粵各款摺十八年三月二十

廉欽被水發給銀米賑濟片十九年四月二十八日

水陸師學堂添設各項奏咨立案摺十九年五月二

瓊州秀英礮臺造竣奏咨立案摺八十九年十一月初  
黃埔船塢修理工竣片十九年十一月十一日  
裁撤船塢歸併雷局照料片

查明學臣徐琪被參各款摺十九年十二月

恭謝 天恩摺二十年正月二十五日

請開缺摺二十年二月初四日

欽越界務勘辦完竣摺二十年三月初八日

建造永濟藥庫奏請立案摺二十年五月初七日

覆奏鹽斤難以加價片

叩謝 天恩摺二十一年四月十四日

剿捕陽江山內拜會匪徒摺

日十八年四月十五

奏為大股匪徒潛匿陽江山內拜會滋事當經調派兵勇剿捕盡淨未至擾害地方擬懇

天恩將出力及陣亡員弁分別獎卹恭摺具陳仰祈聖鑒事竊查陽江廳所屬之大仁山白空石地方界連數縣萬山叢雜人蹟罕到最易藏匿奸宄前經訪聞有匪徒多人潛蹤山內拜會結盟情事當飭地方文武員弁嚴密搜拏旋據稟報拏獲匪黨奸細訊悉為首匪犯係譚運青黃繼義林得三梅菜四即杜興桂鄭亞林五人沿襲久經



禁絕之三合會舊名編造老母代被當地辦東  
補舊包衣各名目聚集一千餘人分為十旗旗  
上各書洪字衣襟繫紅布為號改白空石地名  
為紅英石築牆掘濠勢甚猖獗稟請派兵剿辦  
前來臣查該匪糾人既多潛伏未動暗遣奸細  
分往各處誘人入夥蓄謀殊為叵測必須及早  
殲除以免滋蔓惟大仁山白空石地方界連新  
甯恩平陽春三縣此拏彼竄勢所必然陽春迤  
西乃東安縣西山若竄越此山即可徑趨羅定  
州屬西甯縣屬境侵擾粵西邊界若竄至新甯

電白縣一帶又可擄船入海不但辦理費手更恐多擾地方剿辦之法當以併力進攻嚴堵旁竄為要即經會商水師提臣鄭紹忠遴派叅將顏全都司白琚府經縣丞幸光萃管帶安勇五百人馳往剿捕都司鍾杜養等管帶安勇在恩平新甯交界會合兜拏副將陳榮輝等分帶輪船拖船嚴巡海口其各屬交界之區責成廳縣營汛督率兵團相機堵截該匪聞有兵到恐被圍困即竄出山外叅將顏金等先毀匪巢以杜其回竄負嵎一面督隊分中左右三路疾馳前

進二月十三日追及匪衆於黑泥廠地方槍礮  
環擊斃賊數十名並斃騎馬賊目一名該匪知  
巢穴經官兵焚毀逃竄無路拚死抗拒把總劉  
有陞給獎外委黃得成曾滿中槍殞命勇丁受  
傷六人官軍見弁勇傷亡倍加奮怒進攻愈猛  
賊不能支向左路竄去都司白琚等迎頭邀擊  
又大敗之匪等且拒且走追逐二十餘里擊斃  
匪首梅某四及悍賊數十名生擒匪首黃繼義  
林得三及夥匪五十餘名奪獲洋槍旗幟刀械  
多件餘匪悉行逃散叅將顏金等收隊回營復

在白空石山內窮搜數日續獲藏匿賊匪數十  
名其被營勇追勦分竄潛逃者亦經各縣練勇  
擒拏無遺全股悉就盡平當匪衆初出巢時匪  
首譚運青之子譚紅義與匪首鄭亞林乘馬擁  
衆冒充官軍欲由陽春縣沙表山涌等處竄往  
西山該縣先已盤獲探路匪犯訊知其情督率  
兵練並約會陽江恩平各兵練合力堵截格殺  
譚紅義鄭亞林及匪黨多名生擒二十餘名練  
丁死者二人該匪不能竄越西山則陽春等處  
官紳兵練之力也惟匪首譚運青潛逃未獲陸

路料無所竄因飭哨弁魏陸羅揚貴專向沿海  
緝緝並飭各營縣一體查拏三月二十八日緝  
至新甯縣境譚運青因師船防守嚴密不得渡  
洋有漁人識之協同兵差登時拏解前來臣派  
委候補同知增亮候補知縣張璿馳往訊明匪  
供將為首及拒敵官軍各犯正法梟示其被脅  
入夥並未拒捕實非甘心從賊者分別收禁責  
釋遠近稱快地方一律平靜官軍未到以前鄉  
民有被脅取財物者固不得以通匪論即匪之  
親族既非知情同謀亦無應科之罪現經出示

曉諭嚴禁妄控以靖人心而杜訛詐傷三勇丁  
練丁分別賞給銀兩協獲首犯之漁人亦飭查  
明獎賞至大仁山白空石一帶山深路險林箐  
叢密夏秋山水阻路人不能入冬春即難免藏  
奸臣酌留隊伍周歷巡查熟其塗徑以備冬春  
二季不時會哨此又懲前毖後所不能忽者也  
伏查譚運青等聚眾拜會槍械甚多盤踞深山  
以為巢穴分遣心腹煽誘愚民將俟黨與益多  
氣勢益熾然後出犯各處立意極為兇狡迨官  
軍驚之出巢毀其濠牆斷其去路猶敢負恃其

衆捨命抗敵拒殺弁勇練丁實屬情同叛逆各將弁等奮勇攻剿死傷不顧各縣團練兵勇聯絡防剿同心一氣疊有斬獲不數日間遂將全股撲滅地方未經擾害首要各犯無一漏網其保衛民生殲除巨寇之功績實屬迥異尋常劉有陞等力戰捐軀尤為可憫相應籲懇

天恩分別給獎議卹以為勇往任事者勸升用副將儘先參將南韶連鎮右營都司顏金擬請以副將在任儘先補用候補都司惠州協左營守備白琚擬請以遊擊在任儘先補用五品頂戴新

拔佛岡營左哨千總羅揚貴儘先千總連陽營  
左哨頭司把總魏陸均擬請以守備在任儘先  
補用降補府經縣丞幸光萃擬請留於廣東補  
用陣亡把總劉有陞記獎外委黃得成曾滿均  
擬請

飭部照陣亡例從優議卹其餘出力員弁容臣確查  
擇尤奏保不敢稍涉冒濫臣為激勵將來起見  
可否照擬獎卹出自

鴻慈陽江廳營先經獲犯訊供請兵剿辦嗣又力堵  
竄匪新甯文武各派兵役協獲匪首譚運青其



失察職名均請邀免開報除飭取各員弁履歷  
送部外所有大股匪徒在陽江山內拜會滋事  
當即剿捕盡淨各緣由理合繕摺具陳伏乞

皇上聖鑒訓示再廣東巡撫係臣兼署毋庸會銜合  
併陳明謹

奏

水陸師學堂添設各項奏咨立案摺

二十八年十月十五

奏為謹將光緒十五年水陸師學堂添設各項照

章奏咨立案恭摺仰祈

聖鑒事竊據管理廣東海防善後局廣東布政使成

允等詳稱光緒十三年增設水陸師學堂招募

學生分別水師陸師兩途入堂肄業已將支銷

各款造報至光緒十四年年底在案嗣因水師

駕駛學生平時應習練輪機於光緒十五年添

設管輪學堂遴選洋教習一員月支薪水銀七

十五磅漢文教習三員各月支夫馬銀二十兩

添募學生七十名每名月支養贍銀四兩火食銀三兩八分雜差二十名每名月支工食銀三兩堂中燈油每月支銀十三兩五錢公費銀一百兩學堂添設稽查委員二員各月支薪水銀三十六兩醫官一員月支薪水銀三十兩水師學堂添設清書一名月支工食銀八兩以上各款或係酌照事務繁簡或係查照前支舊章分別覈實發給又於光緒十五年十一月添設廣業輪船一號以為諸生講授輪機之用共配管輪舵工火手水手人等十名共月支工食銀六

十兩公費銀二十兩此外如學堂輪船添置各物及購辦外洋書籍紙筆器具悉屬要需一併據實開報前經詳請咨部立案現奉戶部覈覆應將洋教習薪水按磅折成實銀作為定數其餘各款亦應將起止日期一律報部毋得遺漏又奉兵部覈覆廣業輪船係若干匹馬力未據聲明如係購買之船照章應將配設員名月支銀數奏明立案至漢教習應查明官階報部各等因遵查洋教習月支薪水銀七十五磅計銀三百五十三兩五錢八分九釐廣業輪船係十

二匹馬力漢文教習係屬兼差不領薪水祇支夫馬銀兩是以不論官階但計差使繁簡委係因時制宜並無定章可循造具清冊詳請

奏咨立案前來臣等覆覈無異除將清冊咨送戶兵工三部外謹會同廣東巡撫臣剛毅合詞繕摺具陳伏乞

皇上聖鑒飭部立案施行謹

奏

查明湖廣督臣被參在粵各款摺

二十九年三月二十八日

奏為查明湖廣督臣張之洞被參在粵各款均係傳聞失實恭摺覆陳仰祈

聖鑒事竊臣承准軍機大臣字寄光緒十九年正月二十四日奉

上諭有人奏疆臣辜恩負職據實糾參一摺據稱湖廣總督張之洞前在兩廣總督任內司道謁見往往候至終日而不得見候補州縣概不接見所喜者一人而兼十數差率皆浮薄夸詐之輩興居無節號令不時探訪本地富家借端苛罰數至鉅萬

恣意揮霍虧耗帑項甚鉅藩司王之春培克聚斂  
直隸州知州趙鳳昌聲名甚穢該督俱加信任等  
語著李瀚章按照原參各節確切查明據實具奏  
原摺著摘鈔給與閱看欽此遵

旨寄信前來承准此臣謹閱原奏所參懶見僚屬用  
人不公興居無節苛罰濫用各節臣昔未至粵  
亦有所聞迨到任後隨事考證始知非實大抵  
不得志於其時又未深悉其事者為此過甚之  
辭傳播遠近也謹為我

皇上詳晰陳之司道皆

欽簡大員與督撫切近共事若不隨時接見理固不可勢亦不行聞張之洞偶遇手治簿書時屬員進謁不無稍待未嘗候至終日尚不得見舊時司道等官亦無言及此者至於候補之員人數太多有事則常見無事則稀見此各省所同不獨張之洞為然也人之才具長短各殊或兼數事而有餘或任一事而不足張之洞任內間有一人兼充數項差使者皆係量材任使各有成效如果專尚浮夸阿其所好諸務何由而理又聞張之洞在翰林時講誦恆至夜分外任時判



牘亦然及其至粵正當多事之秋併力支持日  
不暇給譽之則曰夙夜在公劬勞罔懈毀之則  
曰興居無節號令不時惟既未誤公此等小節  
無足深論罰繳之銀不下七八十萬已造報未  
造報者皆有冊案可憑取之於關蠹吏饕博徒  
標匪以及貪劣各員董而非抑勒於富家用之  
以充餉濟賑利農恤士以及營造各要工而非  
消耗於無益取貪詐非分之財上資軍

國下濟士民揆之理法豈復為苛且皆獨斷施行  
屬員無從迎合王之春以江蘇候補道奉

旨補授廣東糧道張之洞因其才具尚好加之任使  
該員兩次署理藩司照章綜理並未創立名目  
多增進款謂為培克聚斂未免無因趙鳳昌派  
充巡捕僅供奔走備傳呼而已而官場陋習在  
大吏左右者輒目之為要人趨附謠詠皆由是  
起其實用舍予奪司道不得專督撫不得私巡  
捕微員何能干預臣見舊冊案中趙鳳昌曾將  
洋行例送茶金呈繳充公似張之洞約束尚嚴  
不致受其朦蔽張之洞到兩廣總督任時海防  
戒嚴邊事孔棘黎匪客匪乘機思逞雖有彭玉

麟力疾坐鎮而徵發兵餉整頓地方翦除伏莽  
維持洋務期彌後患則張之洞經畫為多用項  
雖多委非浪費軍務甫鬆即遣撤添調添募之  
兵以期搏節黃江稅廠潮橋鹽務皆掃除更張  
拔其病本取中飽糜費之款而歸之公出入之  
際籌畫若此豈肯恣意揮霍虛耗

帑金該前督臣任內用款業已分案造報均係實  
用實銷並無浮冒所建書院書局或自捐資或  
用罰款為數不少並未動用正項人所共知張  
之洞在粵時正值海疆有事政煩費鉅歷年辛

苦經營時勢亦與今不同儻非身至其境留心  
考覈固無以知其措施之蹟與傳聞之誣也欽  
奉

上諭飭臣確查斷不敢稍存瞻徇代為粉飾謹據實  
繕摺具陳伏乞

皇上聖鑒謹

奏



廉欽被水發給銀米賑濟片

十九年四月二十八日

再據廉州府知府劉齊淐電稟自三月二十七日起大雨三晝夜城外平地水深數尺及丈餘不等衝倒民房兼有淹斃人口當即多雇船隻分投拯救全活甚衆城内存糧本少在城文武捐廉購米發局平糶並設廠施粥靈山縣武利伯勞一帶同時被水已派員查勘撫恤等情又據欽州直隸州知州李受彤電稟三月二十八日風雨極大城外河漲丈餘居民猝被水患該員與參將黃培松及萃軍都司王殿光並各營

弁等捐資分雇船隻設法拯救安插高處棲止  
離城較遠各村墟派員運米散放防城縣之如  
昔茅嶺等處間亦被水尚未損傷人口現亦派  
員運米接濟等情臣等伏查廉欽二府州雨水  
過大山澗匯注小民蕩析離居實堪憫惻雖驟  
發之水不致久停成災惟值此青黃不接之時  
民食最關緊要兼之生者修建屋宇死者收斂  
掩埋均須量為資助廉州素少存糧而購買較  
便欽州稍有存米而採辦維艱當即發銀三千  
兩米五百石以濟廉州靈山賑需又發銀一千

五百兩米一千石以濟欽州防城賑需廉州賑  
銀電飭附近釐廠撥用欽州賑銀及兩處賑米  
均派員用輪船解往以期迅速而應急需謹合  
詞附片具陳伏乞

聖鑒謹

奏



A table with 10 empty columns and a thick border. The table is oriented vertically on the page. On the right side, there are two small, dark, trapezoidal shapes protruding from the edge of the table's border.

--	--	--	--	--	--	--	--	--	--

水陸師學堂添設各項奏咨立案摺

同日

奏為廣東省水陸師學堂添設律例植物等學洋  
教習及購辦管輪機器支用各款照章奏咨立  
案恭摺仰祈

聖鑒事竊查前督臣張之洞採取西學門類堪濟時  
用者五種曰鑛學化學電學植物學公法學以  
其皆足以資富強而裨交涉當經電致前出使  
英國大臣劉瑞芬代募前項五種洋教習各一  
員來粵教授並將召募緣由於光緒十五年十  
月十八日附片

奏明在案張之洞旋奉

恩命調任湖廣總督迨臣抵任正值餉項支絀經費  
難籌維時各教習均尚未到因電商前使臣劉  
瑞芬未訂者暫作罷論已訂者能否中止旋接  
電覆律例植物化學三教習業已訂定起程赴  
粵餘均停募隨准咨稱所訂之律例教習赫爾  
伯特一員係在英國倫敦律例學堂延雇該員  
堪充公法律例學教習之任訂立合同三年為  
期每月薪水英金七十磅到日起支代為預付  
一箇月薪水英金七十磅並給船價路費庫平

銀三百七十五兩又在英國干白雷池堪斯大  
書院延雇植物學教習葛路模一員訂明每月  
薪水英金四十一磅十三先令四本土到日起  
交代付整裝英金四十一磅十三先令四本土  
並給船價路費庫平銀三百七十五兩又續在  
英國阿克司福穆大林書院延雇化學教習駱  
丙生一員訂定每月薪水英金四十一磅十三  
先令四本土交代付整裝英金四十一磅十三先  
令四本土並船價路費庫平銀三百七十五兩  
等因內化學教習駱丙生一員旋准湖廣督臣

張之洞電商調鄂遣用並將由粵支過薪水船  
價路費等銀兩解還歸款當將該教習咨送鄂  
省粵省應即開除其植物洋教習葛路模及公  
法洋教習赫爾伯特二員係於光緒十五年十  
二月二十二十一等日先後抵粵應支薪水銀  
兩均於是日起支惟該教習等原訂合同薪水  
均係英磅查外洋磅價漲落不時均須各按付  
時磅價核給嗣因律例教習赫爾伯特不聽調  
度屢違約規旋於光緒十六年四月底辭退植  
物教習葛路模亦因種植未宜毫無成效復於

十八年三月底婉辭該二員各照合同津貼薪水四箇月并將應給回國船費等銀一併付訖又水師學堂管輪機器亦係電致前使臣購辦共付價值水脚等項銀二千三百十九磅十三先令八本士茲據廣東海防善後局廣東布政使成允等詳請奏咨立案前來臣等覆核無異除批飭該司局各按原日磅價逐一核明造冊報銷勿稍率誤並咨明戶兵工三部暨總理各國事務衙門查照外謹會同廣東巡撫臣剛毅合詞繕摺具陳伏乞

皇上聖鑒勅部立案施行謹

奏

瓊州秀英礮臺造竣奏咨立案摺

十九年十一月初八日

奏為瓊州海口建造礮臺工竣奏明立案恭摺具

陳仰祈

聖鑒事竊照瓊州府四面環海直接大洋乃中外之

關鍵前督臣張之洞擬建礮臺多處而經費無

出臣於光緒十六年五月十二日具

奏籌辦海防摺內聲明先於瓊山縣海口地方築

臺設礮在案查海口迤西五里之秀英山岡阜

高廣地勢扼要應行建臺防守前經咨會北洋

大臣李鴻章商調德國總兵福克爾來粵派記



名提督楊安典同赴該處相度方位酌擬築臺  
式樣繪具圖說經臣覈定飭委雷瓊道朱采督  
率興工至本年三月底工竣共計新築礮臺五  
座中間應設二十四生礮者三座擬名拱北鎮  
東定西兩旁應設十五生礮者二座擬名振威  
振武下以塞門德土攙和碎石填築堅厚上蓋  
礮棚有藏人洞以避敵礮子礮洞以置礮彈並  
有鐵路窰道以通往來大小水池以備應用其  
存儲子藥者臺畔有房外有總庫其駐紮兵勇  
者臺畔與臺下各有房屋他如操場官廳機器

教習等房無不悉備房屋均伏藏於土穴之中  
其上覆土厚六尺總子藥庫之上厚一丈二尺  
縱受敵礮不致傾塌臺前護牆厚九丈操場後  
面及左右牆均厚七丈有餘外土內石上下四  
圍加築三合土植樹木以環之護牆之外為大  
馬道另建小礮臺六座以防意外鈔襲大馬道  
之外馬道周圍亦植樹木以資蔭庇所需物料  
工匠夫役船隻起礮購地等項共銀八萬八千  
八百餘兩工竣後臣派委候補道周炳勳前往  
查驗各工一律堅實並據管理海防善後局司

道詳請

奏咨立案前來伏查瓊山海口為海南第一扼要之區雷瓊道朱采辦事認真思慮周密竭二年之力成此鉅工堅固異常經費亦極覈實方建築時每有過往洋弁周歷縱觀歎為他處所弗及現調瓊軍右營駐臺防守認真操練洵足以資控扼而衛郡城所有瓊州海口建造礮臺工竣緣由除咨部外謹會同廣東巡撫臣剛毅繕摺具陳伏乞

皇上聖鑒飭部立案謹

秦



黃埔船塢修理工竣片 十九年十一月十一日  
再廣甲廣乙廣丙三船隨同北洋海軍差操巡  
歷來往重洋船身喫重不可無輪流驗修之所  
查黃埔地方前有購得洋人舊船塢二處一名  
哥巴一名衆順大致尚屬可用惟閘門閘船吸  
水機器以及房屋碼頭起重架等項均須修造  
添設塢口積泥亦須清理 臣派員分別興辦均  
已工竣查驗完整如式嗣後各船乘暇輪修極  
為妥便此項工需係撥用官紳造船捐款邀免  
造報理合附片陳明伏乞

聖鑒謹

奏

裁撤船塢歸併雷局照料片

再水雷魚雷防守海口與礮臺相為輔依臣前將雷局事件飭派礮臺營務處記名提督楊安典兼管咨調北洋雷目二人來粵教習此次演試頗能得法仍飭加意講求冀收實效又查船局現無興造之事應行裁撤所有船塢器具等項就近併歸雷局派員照料造船經費原係官紳所捐裁併節省積少成多留為添造兵輪之用理合附片陳明伏乞

聖鑒謹



奏

查明學臣徐琪被參各款摺

十九年十二月十三日

奏為查明廣東學臣徐琪被參各款皆係傳聞未  
確據實恭摺會陳仰祈

聖鑒事竊臣等承准軍機大臣字寄光緒十九年九  
月二十五日奉

上諭有人奏廣東學政徐琪考試各屬生童所出題  
目率多割裂經文並關防不嚴操守不謹等語著  
李瀚章剛毅確切查明據實覆奏原片著鈔給閱  
看欽此遵

旨寄信前來承准此臣等即將該學臣考過各屬題

目逐場查覈一面按照所叅各款明查暗訪皆係傳聞未確謹為我

皇上詳晰陳之原片內稱考試題目割裂經文等語查廣東文風頗盛弊亦最多學臣徐琪初到任時見槍替雷同之卷太多仿照成案偶出飛鳥等數題欲使因難見巧冀以杜諸弊而拔真才旋因各卷多未合作法即不復出實無牛未馬皆等題目原片又稱歲考肇慶府時中途遊鼎湖山酣飲竟日放浪關說等語查由省至肇慶府水程三百里半係逆流該學臣於光緒十八

年二月二十二日申刻自省起程二十七日辰刻到肇慶府計行四日有餘無遊山宴會之暇水程所經之處向不應付旱夫雖欲登陸而有不能既未遊讌見人其並無關說之事可知原片又稱該學臣抵肇慶次日突然出城遊七星巖等語查該學臣於上年二月二十七日到肇慶府進署二十八日檢點公文牌示號戳二十九日祇謁

文廟率諸生恭聽宣讀

欽定卧碑

御製訓飭士子文回署放告三月初一日開考按日辦  
公並未他出學臣衙署有巡捕官專司啟閉果  
其違例出遊豈不報提調官稟臣等查覈原片  
又稱考試文章正場招覆多至二百餘人乃選  
富室年幼有貌衣服鮮艷及勢豪宦家子弟不  
問文理悉取入學有年僅八九歲並不能作小  
講者發落之日陰令執贄入署各餽三五百金  
等語查各屬童試多者或至數千人槍替冒頂  
之弊未能保其必無寬為錄取以防真才見遺  
嚴行覆試以冀弊端易絕招覆多寡因地制宜

並非每次皆二百餘名粵省幼童頗多聰穎該  
學臣奏報有案其所取進間有十餘歲及十歲  
九歲者皆係面試文理清通並無不能作小講  
亦非選取富豪宦家子弟廣東十四府州歲科  
兩考為期本促發落已畢即須起程焉有餘閒  
復令新生進見况交通賄賂必在得失未定之  
時既經入學孰肯自干法紀餽以多金此又情  
理之所必無者也伏思學政若營私受賄則畏  
人指摘場規不得不寬徐琪考校認真防弊極  
嚴苟非自反無愆奚能如此所叅關防不嚴操

守不謹各節臣等隨時訪察委係均無其事所  
有查明學臣被叅各款皆係傳聞未確緣由謹  
合詞繕摺具陳伏乞

皇上聖鑒謹

奏

恭謝

天恩摺

二十年正月二十五日

奏為恭謝

天恩仰祈

聖鑒事竊臣恭閱邸鈔內閣奉

上諭朕欽奉

慈禧端佑康頤昭豫莊誠壽恭欽獻崇熙皇太后懿

旨六旬慶辰各省文武大臣有久膺重寄卓著勤勞允

宜同膺懋賞兩廣總督李瀚章著賞加太子少保銜

等因欽此臣當即恭設香案望

闕叩頭謝



恩伏念臣淮淝下士受

三朝知遇之隆楚粵名區領卅載疆圻之重當海色澄

清於南極正

星輝炳耀於西池欽惟我

皇太后社介昌辰

祥開周甲鵷班鷺序共殫祝

嘏之誠壤叟衢童競上

與齡之頌幸際

慈闈之盛事敢期

異數之同承迺蒙

特沛綸音

俯垂天獎珠崖銅柱宮銜之

寵詔喧傳青綬銀章師保之崇階特晉念六傳實贊襄  
之選

釀施於歲首同霑况一門兼使相之榮

曠典惟臣家最渥感極而難酬

高厚省循而愈切兢慚臣惟有勉奮駑庸益思鼇戴愧  
乏匡詩之助遠師陶甓之勤傾葵藿而向陽願  
效華封之三祝策桑榆而勵節長賡

天保之九如所有微臣感激榮幸下忱謹繕摺叩謝

天恩伏乞

皇太后

皇上聖鑒謹

奏

請開缺摺 二十年二月初四日

奏為<sup>微臣</sup>年力已衰患病未愈籲懇

天恩俯准開缺以免誤公恭摺具陳仰祈

聖鑒事竊<sup>臣</sup>現年七十五歲雖盡心供職而筋力

日衰上年夏間疾病時作精神短乏時因將

軍<sup>臣</sup>撫<sup>臣</sup>進京海防有事未敢引年求罷冬

間查閱礮臺循行山徑步履維艱入春以來

益形頹憊痰嗽腹瀉不寐等證層見疊出治

之不愈據醫云氣血久虧一時斷難見效<sup>臣</sup>

受

恩深重當此多事之秋何敢遽萌退志惟念兩廣為  
山海巖疆關係甚重非衰病之軀所能卧治  
若託言致身隱圖戀棧臣罪愈重臣心何安  
現在海防布置猶定廣州將軍臣繼格回任  
撫臣馬丕瑤業已到任惟有滛情上陳合無  
仰懇

天恩俯准臣開缺回籍則此後有生之日無非戴  
德之年所有微臣年衰多病籲懇開缺緣由理合繕摺  
具陳伏乞

皇上聖鑒訓示謹

奏

27

--	--	--	--	--	--	--	--	--	--

欽越界務勘辦完竣摺 二十一年三月初八日

奏為欽州越南界務勘辦完竣謹將大概情形恭摺具陳仰祈

聖鑒事竊照光緒十五年八月二十日承准總理各國事務衙門電開法使照稱中越立界伊國已派文武官會同中國官辦理原定地圖直綫畫界之段有不合地勢者許照形勢之曲折彼此相讓期於兩國均無損礙等語查圖內所畫界綫不過得其大勢此次按約立界不必尅得寸得尺之言但求不離界綫而於地勢輻輳處所



彼此通融相讓方為妥善所派之員必須通達  
穩練能耐勞苦者乃克有濟意見不同處所先  
行記出勘完再定等因當以區劃前項界牌事  
關重要必須熟悉邊情及中外交涉事宜之員  
始克假以事權不致貽誤欽州直隸州知州李  
受彤幹練耐勞且係原派勘界之員一切情形  
均已深悉因派委該員主議專辦並委熟悉交  
涉之廣東候補知府陳武純試用同知孫鴻勳  
甘肅補用通判張懋德等幫同辦理暨咨會督  
辦欽廉防務雲南提督臣馮子材選派得力將

弁酌帶營勇隨同前往妥為彈壓防護節據該  
委員等將勘議細情電稟均經轉電總理各國  
事務衙門察照並隨同密授機宜飭令妥辦茲  
據該委員李受彤稟稱現與法員將界段陸續  
勘議立石完竣原勘圖約彼此畫押並照式鈔  
繪二分稟請分別咨呈總理衙門察照備案等  
情前來臣查欽越界務前往勘界大臣鄧承修  
與法員秋隆等會勘定議繪圖立約如果按照  
圖約界綫立石原可尅期辦竣祇以法國前派  
之巴拉第法蘭亭均以約內載明屬我之板輿

嶺懷等處係屬扼要之區妄冀劃歸彼轄藉端  
中綴上年法改派柯麻暨其總辦鵠釐咏接辦  
復飭該委員等按照圖約反覆議辯李受彤久  
在欽州熟悉邊界凡巴拉第法蘭亭所爭險要  
與越南皆隔深溝峻嶺而溝尤多因與約定按  
界綫有水處以水為界免如陸地之犬牙參差  
有山處以山為界免如平原之易於侵佔約計  
界長四百里陸界僅五十里皆係峻嶺餘悉溝  
界查照界綫區畫分明不獨原勘圖約所載分  
茅嶺板興板典嶺懷等處歸我即彼之縱橫崗

中十里亦全歸我惟披勞地方縱橫約三里各分一半因係以水為界不得不然以符總理衙門所言地勢輾轉彼此相讓之意柯麻不似前此法員之固執知板興等處必不可爭始得次第立竣亦無意見不同應行記出之處從茲各守各界庶無後慮除將原勘圖約咨呈總理衙門察照備案外所有勘定欽越界務大概情形謹會同廣東巡撫臣剛毅合詞恭摺具陳伏乞

皇上聖鑒謹

奏

--	--	--	--	--	--	--	--	--	--	--

建造永濟藥庫奏請立案摺 二十年五月初七  
奏為廣東省城郊外建造火藥庫工竣照章奏咨  
立案恭摺仰祈

聖鑒事竊照廣州府城外三元里地方舊設火藥庫  
於光緒十九年五月十一日被雷轟毀當經

奏明在案臣等即飭管理善後軍械各局司道擇  
地另建購得東門外距城八里之露澤園山地  
一區四山圍繞旁近無一民居實屬空廓僻靜  
堪以建造藥庫當經委員勘估核實興造建成  
東西藥庫兩座取名永濟中有山巒立亭瞭望

東庫二十四間西庫三十七間俱各繚以圍牆  
設門封鎖兩庫之外復用灰砂圈築外圍牆一  
周歸一總門出入以便稽查統共用過工料等  
項銀一萬八千九百八十兩一錢一分八釐委  
係工堅料實並無草率偷減據管理海防善後  
局廣東藩司覺羅成允等詳請

奏咨立案前來臣等覆核無異除咨移部科查照  
並飭造細冊另行報銷外謹合詞謹繕摺具陳  
伏祈

皇上聖鑒敕部立案施行謹

奏





覆奏鹽斤難以加價片

再准戶部咨具奏籌餉緊要先行酌擬數條一摺議令淮岸各商每引預繳鹽釐二兩廣東等處能否仿照預繳抑或另行設法籌款並令認真舉辦又議覆編修張百熙奏請籌餉各條一摺通行有鹽務各省每斤加制錢二文以佐軍需各等因均經恭錄

諭旨咨行欽遵前來臣當即督飭兩廣鹽運司英啟悉心商酌竊以粵商資本微薄迴遜淮商其鹽釐銀兩向係於銷鹽後始行完繳實難仿照預

提粵鹽以一百五十斤成包每斤加錢二文每包即加至三百文取諸食鹽之戶必將貧賤買私取諸運鹽之商又嫌成本太重官鹽所至常有貧民轉販覓利蠅頭若使無利可圖更恐別滋流弊光緒十年湖南省將樂桂埠湘引加價二文遂至私充銷滯可為前鑒光緒十六年御史恩燾因南省被災奏加鹽價經臣將窒礙情形具奏仰邀

恩免在案近年商力益疲多方調劑僅能勉副奏銷實未便再加鹽價致礙運銷惟部中需餉至迫

自應不拘何款竭力搜羅查有商輸潮橋水脚  
息銀二萬六千餘兩辦理疲瑋借給鹽本銀二  
千餘兩修造米艇經費本息銀七千餘兩潮橋  
帑本銀八萬餘兩均係應入季冊報撥之款可  
以催提限繳稍應急需所有粵鹽礙難提釐加  
價情形及報撥可提各款理合附片具陳伏乞

聖鑒訓示謹

奏



叩謝 天恩摺二十一年四月十四日

奏為叩謝

天恩仰祈

聖鑒事竊臣前因年老多病奏懇開缺奉

硃批著賞假一月毋庸開缺欽此嗣恭閱邸鈔三月

二十日奉

上諭李瀚章著加恩准其開缺回籍調理欽此跪誦  
之下感激涕零伏念臣衰病侵尋彌虞叢脞陳  
情乞罷冀免誤公原非敢於多事之秋藉圖安  
逸乃先蒙

賞假復蒙

恩准開缺回籍調理

聖慈曲逮蒲柳生春臣現仍力疾辦事俟新任督臣  
到粵交卸後即行回籍從此屏迹鄉閭與壤祝  
衢歌同遊

聖世則犬馬餘生皆出自

高厚生成之賜所有微臣感激下忱理合繕摺叩謝  
天恩伏乞

皇上聖鑒謹

奏